

УДК 80/81

ББК 81.2

С 94

Қазақстан Республикасы
Мәдениет және спорт министрлігі
Тілдерді дамыту және қоғамдық-саяси жұмыс комитетінің
тапсырысы бойынша
«Қазақстан Республикасында тілдерді дамыту мен қолданудың
2011-2020 жылдарға арналған мемлекеттік бағдарламасы»
аясында шығарылды

А.Байтұрсынұлы атындағы Тіл білімі институты

Жауапты шығарушы: филология ғылымдарының докторы О.Жұбайева

Сыздықова Рәбига

**С 94 Тілдік норма және оның қалыптануы (кодификациясы). Көп-
томдық шығармалар жинағы / Рәбига Сыздықова / – Алматы:
«Ел-шежіре», – 2014.**

ISBN 978-601-7317-88-1

Т. 8: – 292 бет.

ISBN 978-601-7317-96-6

Бүтінде әлеуметтік қызметті арта түсін, жазба да, ауызша да кеңінен колданыла бастаған қазақтың мемлекеттік ұлттық әдеби тілінің мәдениетін көтеру, зерттеу, науқараттау алға қойылып отыр. Тіл мәдениетінің өзекті мәселесінің бірі – норма. Бұл енбек осы тілдік нормаларды танытуға, олардың түрлерін, негізін, қазіргі күй-қалың көрсетуге арналған.

Кітап тіл мәдениетін көтеруге қызмет ететін қalam қайраткерлері мен бұқаралық акпарат құралдары қызметкерлеріне, баспагерлерге, мектеп мұғалімдері мен тіл-әдебиет ұстаздарына, студенттер мен оқышыларға, сондай-ақ ана тілінің сындарлығын қалайтын қалың оқырман жүртшылыққа ұсынылып отыр.

УДК 80/81

ББК 81.2

ISBN 978-601-7317-96-6 (Т.8)

ISBN 978-601-7317-88-1

© Сыздықова Р., 2014

© «Ел-шежіре» КК, 2014

**ТІЛДІК НОРМА ЖӘНЕ ОНЫҢ
ҚАЛЫПТАНУЫ (КОДИФИКАЦИЯСЫ)**



АЛҒЫ СӨЗ

Қазақтың бүгінгі ұлттық жазба әдеби тілінің әлеуметтік қызмет өрісі кеңеңе түсті, функционалдық стильдері сара-ланып, әрқайсысы өзінің белгілерімен айқындалды, қоғамға қызмет етуінің ауызша да, жазбаша да түрі жанданды. Қазақ тілінің мемлекеттік тіл статусына ие болуы ұлттық сананы тәрбиелеуде, ұлттық нақылдықтарда, ұлттық мәдениетті көтеруде үлкен мәні бар факторға айналды. Осылардың барша-сы тілдің өзіне әлеумет назарын аудартып, оның дұрыс, жемісті қызмет етуіне қойылатын талаптарды қүшейтті. Солардың бірі

– «тіл мәдениеті» деген білім-ғылым тармағы дүниеге келді. Енді казақ тілі әлеуметтік қызметті құр атқарып қана қоймай, дұрыс, сындарлы, мәдениетті түрде атқаруы күн тәртібіне қойылды. Бұл – кезең талабы, қоғамның мәдени-рухани сұра-ныстарының талабы.

Тіл мәдениетінің ең өзекті мәселесі – тілдік норма. Тілдік норма және оның кодификациясы жеке зерттеу нысаны болып тұнғыш рет әңгіме етіліп отыр. Мұнда тілдік нормага анықтама берілді, оның меже-белгілері, түрлері көрсетілді; қазақ әдеби тілінің нормативтік негіздері айқындалды, қалыпқа түсken нормалардың реттеліп, жинақталып хатқа түсіу (кодификаци-ясы), оның теориялық-практикалық негіздері әңгіме болды. Тілдік нормадан уәжді-уәжсіз ауытқулар да тіл мәдениетіндегі құрделі де маңызды мәселе деп каралып, оның түрлері мен себептері көрсетілді.

Жұмыс тек мамандарға арналған таза ғылыми монография емес, ана тілін пайдаланушы қалың жүргішшілікқа, оның ішінде оқу-ағарту саласындағы мұғалімдер мен өзге де ұстаз-дарға, бұқаралық ақпарат құралдары қызметкерлеріне, сөз өнері қайраткерлеріне арналған танымдық құрал ретінде ұсы-нылып отыр. Мұнда лексикалық, грамматикалық, орфограф-фиялдық, орфоэпиялық нормалар баптарға бөлініп, ереже түрін-

де көрсетілмейді (ондай құралдар емле ережелері, сөз сазы (сөзді дұрыс айту) тәртіппері және әр алуан сөздіктер болып жарық қөріп келеді), тілдің әр қабатындағы әдеби нормаларының түрлері, киын тұстары, назар аударатын сәттері сөз болады.

Тіл мәдениеті мәселелерімен 25-30 жылдан бері үзбей айна-лысып, емле мен тыныс белгілеріне, сөзді дұрыс айту (дыбыс-тау) занылыштарына арналған бірнеше анықтамалық құрал мен сөздіктер ұсынып, ондаған көлемді мақала жариялап келе жатқандықтан, біз бұл жұмыста бұдан бұрын жиналған ил-люстративтік материал-мысалдар мен айтылған кейбір пікір-лерімізді ішінара пайдаланып отырдық. Норма тақырыптарына қарай кейбір мысалдардың қайталанып кететін сәттерін де ес-кертеміз.

Бұл шағын жұмыста қазіргі қазақ әдеби тілінің барлық қаттауында нормалануының жай-күйі, ондағы проблемалар толық баяндады деп мәлімдеуден аулақпыз. Бұл саладағы ізденістер енді жандана бастады. Таза ғылыми ізденіс болғандықтан, мұнда тіл білімінің көшілік оқырманға бейтанистау терминдері мен шартты таңбалары кездесетіндігін ескерте міз. Бұл материалдың осы кітаптағы «Орфографиялық нормалар» деген тақырыпты терең түсінуге, емленің теориялық негіздерімен кеңірек танысуга жәрдемдесері даусыз.

KIPICSE

Ұлттық жазба әдеби тіл ретінде бірсыныра дамыған, функционалдық стильдерге тарамдалған, әр алуан нормала-ры тұрақтала түскен, әлеуметтік қызмет өрісі кеңейген, мемлекеттік тіл статусына ие болған бүгінгі қазақ тілінде «тіл мәдениеті» деген ғылым-таным саласы дүниеге келді. Қазіргі кездегі тілдің әлеуметтік базасының өзгеруі және соған орай тілге қатысты белгілі бір мақсат-мұдделі саясаттың жандануы да тілдің барлық қырына, оның ішінде дұрыс қолданылуына жүртшылық назарын арттырып отыр. Ал қоғам назарына іліккен құбылыс білім-ғылым нысанасы да болып шығады.

Тіл білімінің бір тармағы болып саналатын «тіл мәдениеті» көптеген ғылыми-практикалық проблемаларды қамтиды. Ол тек тілдің қолданысындағы ағаттықтары мен жазудағы қателерді тауып, көрсетіп отыруды ғана көзdemейді. Тіл қолданысындағы қателерді көрсету үшін олардың дұрыс болуга тиіс базасын тану қажет, демек, тілдік жүйені, ол жүйеге сай қалыптастан нормаларды айқындалап алуды шарт. Сондай-ақ тіл тіршілігінде тек сөздер ғана емес, дыбыстар, ол дыбыстардың айтылу сазы дегендердің мәні зор, бүгінгі тілдердің қызметі жазумен қоян-қолтық астарласып жатыр, бұл күнде тіл жазусыз қызмет ете алмайды, сондыктan емле мәселесі де «тілмәдениетін», яғни жазуда да дұрыстықты, жүйелілікти, қолайлышты талап етуі – заңды.

Тіл – тек қатынас құралы емес, ол эстетикалықта қурал. Тіл адамдарға бір-бірімен түсінісп қою үшін ғана емес, әсемдік дүниені сезіну үшін де қажет, демек, тіл арқылы бір-біріміз-ге жақсы әсер ету де көзделетіндіктен, экспрессиясы күшті сөздерді тандау, сөйлемдерді әсерлі етіп құрастыру, яғни тілдік көріктеу құралдарын танып дұрыс жүмсау да тіл мәдениетінің бір пүшпағын құрайды. Ал бұлардың барлығын әңгіме ету тілдің лексикология, грамматика, фонетика, фонология салала-рымен астарласып жатады, жазу таңбалары – графикаға, жазу тәртіпперіне (орфографияға) назар аудартады.

Тіл мәдениеті проблемалары отбасы тәрбиесімен, мектепте-гі оқу ісімен, жалпы әр алуан оқу-тәрбие орындарының нақты жұмыстарымен тығыз байланысты болып келеді. Бұдан да

бійктеу қарасақ, тіл мәдениеті ұлттық әдеби тілдің әлеуметтік базасының өзгеріске ұшырауына, өзге тілдермен аракатынасына да тікелей ұштасып жатады. Демек, тіл мәдениетін әңгіме-леуде (талдауда, зерттеуде) «мынау – дұрыс, мынау – бұрыс» деп қою мүлде жеткіліксіз, сол дұрыстық пен бұрыстықтың негізін табу керек, ол негіздердің бір-бірімен сабактастығын, алдыңғы кезендермен ілкестігін айқындау керек. Қысқасы, ғылым әлеміне кештетіп келген «тіл мәдениеті» дегеннің міндеті мен шаруасы көп, аумағы кең, шешімі қыын әрі құрделі екенін айтамыз.

Тіл мәдениетінің өзегі – норма туралы ұғым. Норма тілдің жүйесі мен құрылымына иек артады. Тілдік жүйе дегеніміз – тілде бар үлгілердің, қолданыс типтерінің (түрлерінің) бел-гілі бір тәртіппен келуі, ал тілдік құрылым дегеніміз – осы жүйенің іске асқан (көрінген) материалдың мүмкіндіктері. Бұл екеудің бөлек- бөлек айырып қарап сөз ететін де, айырмай, бірінің орнына екіншісін атайды беретін де зерттеушілер бар. Шындығында, тілдік құрылым – құлаққа естілетін, «отыз тіс-тен шығатын» деректі ұғым атауы, ал тілдік жүйе – сол «затты» жасап тұрған дерексіз ұғым атауы деуге болады. Демек, тілдік нормалардың «табан тірер» жері – тілдік құрылым екен де, тілдік құрылымның «арқасулері» – тілдік жүйе екен.

Тіл элементтері: дыбыс, сөз, сөйлем қолданыста тілдік құрылымға иек артады, ал тілдік құрылым тілдік жүйеге не-гізделеді. Орыс тіл білімпаздары бұл ретте үш сатыны атайды, біріншісі – тілдік мүмкіндіктер жүйесі, екінші сатыда – осы жүйенің материалдық көрінісі, тілдің құрылымы, үшінші сатыда – сол материалдың қолданысы. Осы жұмыстағы біздің әңгімеміздің мазмұны тілдік норма теориясының осы танымы-нан шығады.

Тілдік норманы сөз ету үшін бұл саланың терминдеріне назар аударсақ. Алдымен, *норма*, *нормалану* (нормализация) және *кодификация* терминдерін білдіретін ұғымдар жөнінде түсінік берелік. Норма – негізінен тілдің өзі ұсынған тәртіп, нормалану – сол тәртіpterді тілдің өзінің қалыптастыруы. Тілдің нормалануы мен ол нормалардың кодификациясы – бір әрекет емес, соңғысы тіл процестеріне адамдардың араласуы,

яғни тілдік нормаларды реттеу, сұрыптау, дұрысын беркіту, қалыптанғандарын хатқа тіркеу сияқты іс-әрекетті білдіреді. Кодификация – әдеби тілдің дамуына әлеумет тарарапынан ықпал жасау. «Кодификация» терминінің қазақша баламасын табу қынға соғып келеді, оны бірде «зандастыру», тағы бір-де «қалыптау» деп те жүрміз. Осы еңбектің өзінде тақырыпты баяндау барысында бірде *кодификация* бірде *қалыптаңдырылу*, *қалыптастырылу*, тағы бір тұста *зандастырылып*, *хатқа түсірілу* деп әрқылы атадық. Сірә, ғылым тілі үшін дұрысы – «кодификация» деген интернационалдық терминді қалдыру (жұмсау), ал қалың жүртшылықта түсініктірек болу үшін, ыңғайына қарай қазақшалап отырудың да жөні бар. Қайткенде де қазақша терминдік балама ұсыну қажет болса, «қалыптаңдыру» сөзі мағына жағынан дәлірек келер ме еді. Кодификация – тілдің өзінің «әрекеті» емес, оны қолданушы, қолданысын реттеуші – біздің (адамдардың) қарекетіміз, сондықтан «норма және оның қалыптануы» дегеннен гөрі «норма және оны қалыптаңдыру» деп атаған да дұрыс болатын сияқты. *Кодификация* терминінің мағынасы – дұрыс деп танылған тілдік нормаларды қалыпқа түсіріп, жинақтап көрсету, бұдан да гөрі дәлірек айтсақ, тілдік нормалардың қалыпқа түсіп, жаппай қолданыс тапқандарын орнықтыру, зандастыру, тіркеу.

Кодификацияланған нормалардың қолданысы міндетті, сондықтан «зандастырылыу» дегеніміз де – дәлелсіз емес. Нормаларды ұстанудың қалың көшілік үшін міндеттілігі кодификацияны еki жағынан көрсетеді. Бір қарағанда, кодификация тұрақтандырылған, қалыпқа келтірілген және міндеттел-ген шара болғандықтан, онда біршама консерватизм сипаты болады, ал консерватизм қандай да болмасын дамуға, өзге-рістерге тұсау болады, нормалардың кодификациясы «ке-шегі күнге» қаратылған болып келеді, яғни бүгінге дейін қалыптасқан, орнықкан, хатталған зандалықтарды (норма-ларды) ұстануды міндеттейді. Бұл – кодификацияның «кеже-гесі кейін тартып тұратын» жағы, ал жағымды, жақсы жағы – ол тілдің қолданысында жүйелі тәртіп орнатады, тілдік зандалықтарды тұрақтандырады, әдеби нормадан тыскары

элементтерді тоғытып жіберуден сақтайды. Кодификацияның осындаған екі жағының екеуін де есептей отырып, орыс тіл білім-паздары айтқандай: «алды-артын байқаған» либерализмнің ор-тасынан шықкан дұрыс.

Кодификацияның беріктігі де шартты: қалыптанған нормалардың императивтік (міндettі) түрлері мен диспозитивтік (таңдалған) түрлері болады. Қазақ әдеби тілінде, әсіресе лексикалық нормалардың диспозитивтік түрлері барышылық (олар жөнінде мысалдарымен көрсетіліп, кең турде келесі тарапуларда айтылады).

Тіл мәдениеті, норма дегендеге қатысы бар терминдердің және бірі – узус. Орыс тіл білімінде бұған көбінесе «узус – қолданылып кеткен тілдік бірліктер» деген түсініктеме бе-реді, узустың қарама-қарсысында окказионалдық бірліктер, яғни әдеттегі (нормадағы) мағынадан бөлек, тек сол контексте келтірілген мағынада жұмсалған сөздер тұрады. Узус пен окказионализмдер – оппозитивтік (қарама-қарсы тұрган) дүниелер. Сірә, дұрыс қолданыстағы бірлікті (сөзді, тіркес-ті, сөйлемді) «узус» дейтін болсақ, оның «нормативтік бір-лік» дегеннен қандай айырмасы болады? Сондықтан біз узус деп тілдік жүйеге кайши келгенмен, тілдік дағдыға айналған қолданысты атағанды дұрыс деп санаймыз. Бұған зерттеуші Н.Уәлиев жақсы мысалдар келтіреді. Мысалы, қазақ тілінің жүйесі бойынша *ер* (атқа салатын) деген зат есімнен етістік тудырғанда *ерле* болуға тиіс, бірақ қолданыста *ертте* тұлғасы жиірек кездеседі, сол сияқты қозы сөзінен етістік қозылады деп жасалуы керек, бірақ қазақ тілінде қоздады түрі қолданылады. Ал біздің байқауымызша, бұл күнде *туды-туылды* деген жа-рыспа катардың қолданыстары пікір таласын тудырып келеді. «Пәленше пәлен жылы *туды*» деп айтылып келген сөйлемді *туылды* деп жазу активтеніп барады. Егер тілдік жүйеге сәйкестікті қуаласақ, *туылды* тұлғасы дұрыс: *туатын* – ана, *туылатын* – бала. *Туылу* – ырықсыз етіс. Бірақ қолданыста *туды* тұлғасының орнығуы – узустық көрініс. Узустық тұлғаның тілден берік орын алғандығы сондай, ол – *туган-туысқан* (*туылған-туысқан* деудің орнына), *туган ағасы* (бірге *туылған ағасы* емес), *туган жері* (*туылған* жері деудің ор-

нына), *туып-өсу* (*туылтып-өсу* емес) сияқты қолданыстарды қалыптастырыған.

Узустық құбылыс мақал-мәтелдерде тіпті көбірек кездесді. Мысалы, *ішкен асын жерге қояды* деген мәтелде мағыналық алогизм сезіледі, бұл мәтел «есі-дерті сонда болды, сон-шама қызықты» деген мағынаны береді, ондайда *ішкен* (ішіп болған) асты емес, енді ішейін деп отырған асын жерге қоюы (ұмытуы, ескермеуі) керек қой, бірақ мәтел дәл осы түлғада (*ішкен асын*) қалыптасқан. Бұл да – узустық құбылыс.

Тегінде, норма мен узусты айырып таныған жөн. Норматив-тік бірліктер де – қолданылып кеткендер, олай болса узус де-геніміз – әдеттегі тілдік жүйеге негізделген норма емес, тілдік дағды, тіпті узустың бір айырым белгісі – оның тілдік жүйеге қайшы келетіндігі деп танимыз.

Узустық қолданыстың барлығы бірдей белгілі бір жүйе түзетін бірліктер болып шықпайды. Айтальық, әйел адамдарды *азаматша, мұғалима, комсомолка, төрайым* деп «женский родка» көшіріп бөлек атаушылық бар. Бұл – бір жағынан, орыс тілінің ықпалы болса, екіншіден, араб тілінен енген *мұғалима* сияқты кейбір сөздердің, әсіресе адам аттарының жынысқа қарай ажыратылатын үлгісі (*газиз – газиза, Латип – Латина, Фәрид – Фәрида*), үшіншіден, қазақ тілінің өзінде *ага-ана, әке-шеши, ана-жезде, ага-қарында* сияқты лексикалық коррелятивтер әсер еткен болар, бірақ соңғылар морфологиялық емес, лексикалық қатарлар. Дегенмен бұл – қазақ тілінің жүйесі мен құрылымына қайшы қолданыстар: қазақ тілінде «род» («жыныстық») категориясы жоқ: *ақын* десек ол ер адам да, әйел адам да болады, егер міндетті түрде әйел адам екенін атая ке-рек болса, *ақын* қызы, *ақын* әйел, *ақын* *ана* деп аналитикалық жолмен атайды.

Сірә, *азамат-азаматша, мұғалім-мұғалима* сияқты қолданыстар етек алмайтын құбылыс. Біз бұрын жазған бір мақаламызда *төрайым* сөзінің де нормаға қайшы неологизм екенін көрсеткенбіз. *Төрага* сөзінің «әйел жынысты» сынары төрайым-ның қалың көпшілікке ұнап, жаптай қолданыла бастауына сөздің сонылығы, тосындығы, «әйел-еркек» деп бөліп көрсету мүмкіндігі себеп болған. *Төрага* – орысша «предсе-

датель» дегенниң баламасы, бұл сөздегі *төр* компоненті де, *ага* сөзі де денотаттық (лексикалық, негізгі) мағыналарынан ажырап коннотаттық мағынада жұмсалып тұргандықтан, *ага* сөзі жыныстық мағынасынан көшіп, «басшы, басқарушы» деген ауыспалы мағынаны білдіретін компонент болып тұр, *ага* сөзінің бұл қызметі қолага, қолагалыщ (көне әскери терміндер), *отагасыі* сияқты сөздерде де көрінеді. Демек, *төраға* сөзі ер адамды да, әйелді де атауы керек. Дегенмен *төрайым* сөзінің узус ретінде *ага-қарындас*, *апа-жезде*, *ата-ана* сияқты лексикалық қосақтар қатарынан орын алып кетуі мүмкін. Ал морфологиялық көрсеткіштермен әйел жынысын атаудың (*аза-мат-азаматша*, *комсомол-комсомолкатәрізді*) тілдік жүйеге сәйкеспейтіндігі бұл тәрізді коррелятив жұптарды әдеби нормаға жібермейді деп санаймыз.

Біз әңгімелеп отырған проблемаға қатысты терминдердің тағы бір тобы – кірме сөз, бөгде сөз, шет сөз, жаңа сөз (неологиязм), көне сөз (архаизм), тарихтық сөз (историзм) деген атаулар. Олар да казақша эквиваленттері бір тұлғада тиянақталып, терминдік дефинициялары анықталып бола қоймағандар.

Бөгде сөз, шет сөз (немесе шет тілдік сөз), кірме сөз деген-дер мағына жағынан бір-біріне жақындау келгенімен, олардың әрқайсысының терминдік анықтамасы бөлек-бөлек болуға тиіс. Әйткені шет тілдік сөздердің бәрі «кірме сөз» статусына ие бола алмайды, ал «бөгде сөз» термині «кірме сөз» дегенниң оппозиттік сыңары болар: бір тілдегі кірме сөздер – сол тіл-ге сініскең, нормативтік құқық алған бірліктер болса, бөгде сөз – әлі сінісе алмаған, жаттығы, бөгделілігі сезіліп тұратын бірліктер. Сондықтан бұл үш түрлі термин-тіркестердің бірінің орнына екіншісін қолдана беруге болмайды. Бұларды бір-бірінен ажыратып жұмсау үшін, олардың дефинициялық мағыналарын былайша айқындасақ деген пікірлер де жоқ емес: шет тілден келген сөз қазақ тілінің дыбыстық зандаулықтарына бағындырылып, «қазақыланып» жұмсалса, кірме сөз деп аталысын, ал түптілдегі тұлғасында тұрса, ол бөгде сөз деп атап-сын деген пікірлер айтылды. Сонда *самаурын*, *божы*, *шыт*, *сәтендегендер* кірме сөздер болады да, *президент*, *парламент*, *сессия*, *бюджет*, *акциз*, *компьютер* дегендер бөгде сөздер то-

бын құрайтын болады. Бұл танымның арқауы бостау: егер *университет, институт* дегендерді *університет, інститут* деп жазсақ, олар «кірме» болып шыға келе ме?

Белгілі бір тілдің төл (өз) сөзі және оның қарсысында тұратын кірме сөз деген қатарлардың танымдық белгілерін тек олардың сыртқы тұлғалық суреті көрсетпейтін мәлім, кірме сөз төл сөздің оппозиті (қарама-қарсысы) болудан گері, «канди-даты», яғни тілдік лексика тобына қос[^]ілуға әрекеттенген кан-дидат бірліктер деуге болады. Кірме сөздер қолданылу әлеуеті (потенциалы), жиілігі (активтігі), өзге сөздермен синтаксистік, морфологиялық қатынастарға түсу мүмкіндігі, халық, қоғам тірлігіне енген ұғымдардың, заттардың, құбылыстардың ата-уын тек сол сөздің ғана білдіретін даралығы (вариантсыздығы) т.б. сияқты толып жатқан белгілерімен санақшанда, кірме сөз қай тұлғада қабылданса да, қабылдаушы тілдің лексикалық қазынасының мүлкі болып саналады. қазіргі қазақ тіліндегі дыбыстық тұлғасы жағынан «сындырылған ~ сындырылмаған» мындаған сөздер кірме бірліктер (единицалар) статусына ие болады.

Ал көрсетілген белгілердің көбі бойынан табылмайтын, көбінесе белгілі бір мақсатпен қолданылатын бөгде тілдік сөздер тобы және болады, олар макоронизмдер, бірқатар жар-гон сөздер, арготизмдер, окказионализмдер болып келуі мүмкін. Мысалы, Габит Мұсіреповтің «Оянған өлке» романындағы Байжанның аузынан жи естілетін *сыболыш* (сволочь) сөзі, жазушы қалихан Ысқақовтың «қара орман» романының Бес-кемпір атанған бір кейіпкерінің аузынан жи шығатын *вот так вот* деген орыс сөздері «кірме сөз» деп атала алмайды. Көркем шығармалардың кейіпкерлерінің аузына белгілі бір стильдік мақсатпен, әдейі салынатын шет тілдік сөздер де «бөгде тіл-дік» элемент болып қала береді, олар да «кірме сөз» статусына ие бола алмайды. Бұл орайда «бөгде сөз» бен «шет тілдік сөз» дегендер – синонимдер болып танылады, өзге тілдерден алып жұмсалған сөздерді бұлайша айырып танудың тілдік норма-ларды сөз етуде мәні айрықша.

Тіл мәдениетін, тілдік норманы сөз ету үстінде жиі қолданылатын терминдердің бірі – бірліктер, орысша единица-

лар. Бұл да бір сөзбен аталатын қазақша термині қалыптасты келе жатқан ұғым. Көпкө (тіпті қазірге) дейін тіл біліміне қатысты ғылыми әдебиетте, диссертациялық жұмыстарда, монографияларда, ғылыми тақырыптағы мақалаларда орысша термин *единица* деген сөзді қолданып келдік, қолданып келеміз. Соңғы кезеңде ғана орыс сөздерінен жасалған терминдердің әдетте қазақша баламасын іздең табатын дәстүрімізben *еди-ница* терминін де қазақша атауға кірестік. Мұны бір ғалымдар *тұлға-бірлік* деп, енді біреулері *тұлға* деп, алғашқы кезде тіпті *дүниелік* деп әркилы атай бастадық та енді көпшілігіміз *бірлік* деген калькаға тоқтадық. Калька деген – әдетте амалсыздың күні, алғашқыда ол құлаққа өте жат естіледі. *Единица* деген өз сөзіне орыс тіл мамандары да алғашқы кезде тосырқап қаралған болар, бірақ орыстың ғылыми әдебиетінде *единица* нағыз лингвистикалық термин болып қалыптастып кетті. Біз әзірге осы жүмыста көзіміз үйреніп, құлағымыз жаттықанша біресе *единица* (*бірлік*) деп, біресе *бірлік* (*единица*) деп жақша ішіне не орысша, не қазақша баламасын қоса көрсетіп, екі тілдегі атауды да жұмсадық.

Тіл білімінде орысша *мотив*, *мотивация* деп ұсынылатын ұғымның қолданылуы жиі кездеседі. Мұны да бұрын орысша түрінде жүмсалап келсек, енді *үәж*, *үәждеме* деген қазақша сәтті баламаларын ұсынып жатырмыз. Лексикалық нормаларды әңгіме еткенде әдеби нормага өтуге онтайлы, мүмкіндігі бар сөздерді бұрын *потенциалдық сөздер* деп келіп едік, енді оларды *әлеуетті бірліктер* деп қазақша жиі атайдыз. *әлеует* – «потенциал», *әлеуеттілік* – «потенциальность», *әлеуетті* – «потенциальный» дегендердің қазақша терминдік баламалары екенін анғартамыз.

Такырыпқа қатысты терминдердің баршасының қазақша баламасын іздең табу мүмкін де емес, шарт та емес, сондықтан *норма*, *стиль*, *лексикология*, *лексикография*, *диалектология*, *фонетика*, *морфология*, *морфема*, *лексема*, *сема*, *фонема*, *фонология*, *фонетика* сияқты халықаралық ғылыми терминдерді осылайша қабылданған түрінде пайдаланып отырмыз. Термин жасау теориясы бойынша абстракт ғылыми атауларды мүмкіндігінше бір тілден екінші тілге аударып алуға болады,

өйткені тілдердің қай-қайсысында да әр алуан ұғым аттары бо-латыны белгілі, тек қиындық семантикалық үйлесімі бар, яғни мағынасы жуық келетін қазақ сөзін табуда және оған жүйемен келетін жұрнақ түрін жалғауда болады.

Ғылымның қай саласы да бір елде, бір халықта жеке-дара, томага-тұйық дамымайды, тіл жағынан қарым-қатысы күшті көрші халықтардағы, тіпті дүние жүзіндегі ғылым жетістіктерімен, негіздерімен, жаңалықтарымен білсіп, бөлісіп отыру – бүгінгі заманның талабы. Басқа тілдердегі, әсіресе Еуропа елдері мен орыс қоғамындағы ғылыми әдебиетті оқымай, білмей, бір ғана тілдегі (айтальық, тек қазақ тіліндегі) әдебиетпен сусындал, ғылым салаларын дамыту мүмкін емес. Сондықтан кейбір терминдердің көптеген ұлт тілдеріне ортақ, таныс болып келуінен қашқақтауга болмайды. Қазақ білімі де осындаш шарттылықтан тыс тұра алмайды.

Лингвистикалық терминдер жайында бұлайша арнайы сөз қозғап отырғанымыздың уәжі бар. Алдымен, термин мәселесінің тілдің лексика саласындағы нормалану процесіне тікелей қатысы болғандықтан, олардың осы енбекте кездесетіндерінің бірқатарының білдіретін мағынасын, яғни ғылыми дефинициясын айқындал алады жөн көрдік, бұл әрекетіміз осы енбекті бірқыдыру түсініп оқуға жәрдемдесер дейміз. Бұл жұмыс тек тіл мамандары үшін емес, тілді дұрыс пайдалануға ниеттен-ген қалың қөвшілікке, әсіресе бұқаралық ақпарат құралдары қызыметкерлеріне, мектеп мұғалімдері мен студенттерге, баспа қызыметкерлері мен жазушы, журналист сияқты қалам иелеріне қарата жазылғандықтан, мұндағы ғылыми терминдердің мейлинше түсінікті болуын көзделдік, ал бұларды жиі қолданған себебіміз – бұл жұмыстың ғылыми – теориялықта, қолданбалы – тәжірибелікте сипаты болуы көзделді.

Екіншіден, қазақ тілінің нормалары жайында арнайы тұңғыш рет жазылып отырган бұл кітапта қазақша емес терминдердің біршама көбірек қолданылған себебімізді дәлелдеуді де жөн көрдік.

Бұл жұмыстың «Кіріспесінде» сөз етуге болатын әңгіме қырлары көп, дегенмен солардың тақырыпқа қатысты екіншінен ескертсек дейміз. «Тіл» дегеннің өзін ауызша сөз не-

месе айтылған сөз, жазба сөз немесе жазылған сөз деп екі түрге бөліп қарастырамыз. Бұл жердегі «сөз» термині тілдің қолданыстағы қалпы, орысша «речь» дегеннің баламасы ретінде алынып тұр. Тілдік норманы әңгіме етуге келген-де «тіл» деген жалпы ұғымды бұлайша нақтылап алу және оның қолданыстағы қалпын сөз ету – занды, өйткені «норма» дегеніміз – тілдің дұрыстық-бұрыстық сәттері туралы ұғым болса, тіл зандылықтарының дұрыстық-бұрыстығы қолданыс үстінде көрінетін белгілі.

Ауызша сөздің өзі ауызша әдеби тіл және ауызекі сөйлеу тілі деп екіге бөлінеді де олардағы сөзқолданыстарында айырмашылық болады.

Жазба сөз де біркелкі емес: бейтарап (нейтральный) тілдің, яғни ғылыми әдебиеттің, кенсе-іс қағаздары тілінің, бұқаралық ақпарат құралдары тілінің қолданыста өзіне тән нормалары бо-лады. Бұлар әдетте ресми тіл, қатаң тіл, тұйық стильтер деп та-нылса, бұл тілдерден көркем әдебиеттің тіл қолданысы мүлде бөлек тұрады, ол – ашық тіл, мұнда стильтік тұйықтық жоқ, ол жазба тілдің өзге стильтерінің элементтері түгіл, ауызекі сөйлеу тілінің бірліктерін де бойына сініре алады. Міне, тілдік нормаларды танып-танытуда осындай бөліністерді қатты еске-ру керек.

Тұғас алғанда, тілдік нормалар, әсіресе жазба сөз нормалары – мүлде өзгермейтін, «консервленген» құбылыс емес. Уақыт өткен сайын тілдің өзі сияқты, оның әр алуан тұстарындағы нормалары да өзгеріп отырады, бірақ бұл өзгерістер түбегейлі емес, яғни тілдің барлық нормасы түп-тамырымен өзгермейді, жеке сәттері өзгереді және олардың өзі – бір сәттік, кенет болатын өзгеріс емес, ұзақ уақытты алатын қозғалыс болады. Сондықтан тілдік норма мәселесін қарастырғанда, тіл дамуының белгілі бір кезеңін алып, синхрондық түрғысынан зерттеу (тану) керек. Эрине, ғылым үшін диахрондық аспектіде зерде-леуге болады, бірақ мұндай зерттеуде, біздің байқауымызша, тәжірибеде пайдалы нәтиже күтетін pragmatikaлық мақсат көзделмейді, мұнда тілдің тарихи дамуының объективтік зандылықтарын ашу үшін әрбір тілдік құбылыстың іліктестігі, жалғастылық сипаты, өзгерістерінің негізі (себебі) сияқты із-

деністер жүргізіледі. Диахрондық зерттеулердің тілдік нормаға келгенде ғылым үшін мәні зор болғанмен, қазіргі таңда біз-ге керек болып отырғаны – синхрондық сипаттағы, яғни дәл бүгінгі кезеңдегі қазақ әдеби тілі нормаларының күй-қалпын танып-білу және оны тек мамандарға таныту үшін емес, қазақ тілін пайдаланып отырған қалың жұртшылыққа таныту, сол арқылы тіл мәдениетін көтеру болып отыр.

Дегенмен бұл зерттеудегі *синхрондық үзік* (синхронный срез) дегеннің өзі тағы шартты деуге болады. әсіресе лексика саласында тіл тіршілігі бірнеше онжылдық түгіл, бірекі онжылдықтың барысында ешбір өзгеріссіз (синхрондық) қалыпта көрінбейді. Әсіресе біздің қоғамымызыда соңғы онжылдықта (1990 жылдардан бермен қарай) болып жатқан әлеуметтік, саяси, тіпті мәдени өзгерістер мен дүмпүлер тілді де, оның сөздік қазынасын да айтарлықтай қозғалыска түсіргенін көріп отырымыз. Демек, қазақ тілі дамуының синхрондық үзігі деп отырған кезеңнің өзінде диахрондық фактілер орын алғып жатыр. Бұған бірқатар орысша аталып келген терминдер мен жай сөздердің қазақша баламасын ұсыну, жаңа тұлғаларды жа-сауда сөз біріктіру сияқты кейбір амалдардың жандануы, жаңа сөз жасаушы жұрнактардың алмасуы тәрізді факторлар себеп болып отыр.

Әдетте тілдің өзінде қалыптасқан нормалар ережелер-мен ұсынылған, кодификацияланған нормаларға қарағанда, әлдеқайда тұракты, тиянақты болады. Ал ережемен реттелген, кейін ұсынылып хатқа түскендерін бұзу тәжірибеде аз кездеспейді. Бұл – норма ауысу құбылысын тудырады. Әрине, тілдік норманың түгелімен ауысуы дейтін болмайды, ол күнде тілдің өзі ауысып, басқа тіл болып кетуі керек қой, «норма ауы-суы» – шартты атаяу.

Қысқасы, ұсынылып отырған бұл жұмыста қазақ әдеби тілі нормаларының синхрондық үзіктері, атап айтқанда, соңғы онжылдықтардағы күй-қалпы, реттеліп, қалыпқа келуі, хатқа тіркелуі сөз болады. Тілдік-стильдік нормалардың тарихы, яғни қозғалысы, даму (жетілу, өзгеру) кезеңдері, оған әлеуметтің араласуы, ірі-ірі қайраткерлердің қызметі туралы зерттеулер – өз алдына жеке монографиялық ізденістер болмаққа керек. Бұл

– әрі қарайғы міндеттердің бірі. Тілдік нормалардың қалыптасу, даму, жетілу (қалыптасу) тарихы – әдеби тілдің өзінің жалпы тарихымен үштасып жатады. Тілдік нормалардың эволюциясында қоғамның әлеуметтік, саяси өмірінің қозғалысы үлкен рөл аткарады. Әсіресе тілдік нормалардың қалыптасуында тілдің табиғатынан тыс экстралингвистикалық факторлардың да үлесі болатындығын ескерсек, әлеуметтік, саяси, мәдени «қамшылар» мен «тоқпақтарды» ескеру қажеттігі даусыз. Қазақ тілінің бүгінгі тағдырында халықтың сауаттылық деңгейінің көтерілуі, бұқаралық ақпарат каналдарының өріс алуы, әлеуметтік қызмет өрісінің кеңеюі және «мемлекеттік тіл» ста-тусына ие болып, саяси құқығының көтерілуі үлкен мән алып, оның барлық жағынан дамуына, нормаларының қалыптаса түсіне зор ықпалын тигізіп отыр.

Әдеби тілдің нормативтік базаларын (негізін, көзін) анықтаудың да мәні зор. Өзге тілдер сияқты қазақ тілінің нормаларының негізі – жалпы халықтық сөйлеу тілі. Тілдік нормалар сол тілдің құрылымдық жүйесінен шығады, яғни тілдік жүйеге сай құрылымдық тәртібі – тілдің табиғи (өзіндік) нормаларын түзеді. Бұл нормаларды ұрпактан ұрпакқа ұластырып отыратын кумулятивтік қызметті ауызша сөйлеу тілі, ауыз әдебиеті, жазу пайда болған кезеңдерден бастап жазба үлгілер аткарады.

Тіл дамуының кейінгі кезеңдерінде тілді пайдаланушылардың, зерттеушілердің, негізінен ғалымдардың өздері реттеп, көрсеткен, хатқа тіркеп, тұрақтандырған (кодификациялаган) нормалары да болады (олар жөнінде мысалдарымен дәлелденіп, келесі тарауларда сөз етіледі). Сан жағынан, тұрақтылығы тұрғысынан, дұрыстығы жөнінен, әрине, табиғи нормалар базым болады, олар өзгеріске көп түспейді. Жаңадан ұсынылатын нормалардың дұрыс-бұрыстығын табиғи тіл нормаларының параметрімен өлшеп танимыз, яғни тілдік жүйеге (құрылымға) сәйкес келу-келмеуіне қарап, таңдаймыз.

Әдеби нормадан уәжді және уәжсіз ауытқу және олардың орын алу себептері де – тіл мәдениетінің өзекті проблемасы. Бұлар жөнінде де жұмыстың өн бойында, әсіресе лексикалық нормалар, норма және варианттар, көркем әдебиет стилінің тілдік-стильдік нормалары туралы тарауларда нақты баяндалады. Кіріспеде тек уәжсіз ауытқудың түрлерін атап кетелік. Олар:

1) әдеби баламасы бар жерде ешбір стильдік не өзге мақсат көзdemей диалектизмдерді, қарапайым сөздерді жұмсау, бұл – көбінесе тілге жауапсыздықтың немесе әдеби норма мен нор-мадан тыскары тұратын бірліктерді айыра білмеушілктердің салдарынан пайда болады;

2) қажетсіз тұста жана жасанды тұлға (сөз) ұсыну (мысалы, касса жұмыстыады) және оның мағына жағынан сәтсіз шығуы; 3) штампқа айналған ергашқы тіркестерге үйірсектік (май-

таман тракторышы, биік тұғырдан, көріну, ыргақты жұмыс т.т.);

4) сөз мағынасын, әсіресе көне, сирек сөздердің беретін ұғымын дұрыс білмей жұмсау, бұл ауытқу көбінесе теледидар мен радиода, газет-журнал беттері мен көркем әдебиетте кездеседі (мысалы, теледидардан: Чилидің бұрынғы билеушісі Пиночет туралы: 82 жасар Пиночет – жастағы болса керек, жасар – баланың жасына қатысты айтылады: *бір жасар, бес жасар*);

5) әдеби тіл нормасынан, тіпті жалпы сойлеу тәжірибесінен шығып қалған араб, парсы сөздері мен морфологиялық элементтерді тықпалау (*нәм, уа нәм, -и* журнағын жандандыру: *әйели, заңи*);

6) ғасырлар бойы қалыптасқан тұрақты тіркестерді, мақал-мәтелдерді стильдік мақсат көздел, өлең шарттарына жауап беру үшін емес, жай баяндауларда (көбінесе көркем әдебиет пен публицистикада) компоненттерін ауыстырып жіберу (мысалы, «ағайынға қадірім жоқ – бетімді көреді, қатыныма қадірім жоқ – етімді көреді» деген мәтелді жазушы Қ.Ісқаков «ағайынға қадірім жоқ – аруағымды біледі, қатыныма қадірім жоқ – тәнімді көреді» деп өзгертіп қолданған. Екінші мысал: «той тойға ұлассын» деген тілекті «той тойға жалғаса берсін» деп өзгертіп қолданғанда, эрине, ұласу мен жалғасу сөздері си-
нонимдер болғандықтан, мағынасына нұқсан келмейді, бірақ тілек-бата сөздерінің бір белгісі мейлінше ықшамдылығы, дыбыс гармониясы (**о ~ ұ:** *той тойға ұлассын*) бұзылып тұр. Мұндай ауытқулар жеке сөздер мен тіркестердің өз орнын-да дұрыс қолдану нормасын бұзады, екіншіден, стильдік-көркемдік нормадан шығып кетеді.

Мақал-мәтелдер – халықтың ғасырлар бойы түйген философиясы, даналығы ғана емес, тіл маржандары, әбден ықшамдалған, әрбір сөзінде бірнеше қосалқы мағына бар әрі құлаққа жағымды сазды ғаламат дүние екені мәлім. Олардың беретін мағынасын, кейде жүмбақ сиякты түйінін табу қындау болып келеді. Сондықтан болар, кейбіреулерін дұрыс өз мағынасында қолданбаймыз. Кезінде газет бетінде «құлағына алтын сырға» деген нақыл сөздің мағынасы «бұл сөзді естімеген болсын, құлағына бұл айтылған сөзді емес, алтын сырғаны таққан болайық» дегенге меңзейді, ал бұл күнде мұны «осы айтылған сөзге құлақ салсын» деген мағынада жиі қолданады, «бұл – дұрыс емес» деген пікірлер айтылған болатын.

Демек, тілдің ғасырлар бойы сомдалған асыл бұйымдары: тұрақты бейнелі тіркестер мен мақал-мәтелдерді, нақыл сөздерді, бата-тілектерді өз мағынасында және құрамына қиянат жасамай қолдану – тілдің бүгінгі мәдениетіне, сындарлығын сактауда койылатын талаптың бірі. Фалымдар мен әлеумет көнілін бұл сала да алаңдатады.

7) Казак тілінің орфоэпиялық (сөзді дұрыс айту, дұрыс дыбыстау) нормаларын сақтамай, одан ауытқытын тұстары бар. Бұл ауытқулар ауызша сөйлеушілердің, әсіресе шаршы топ алдына шыққандардың, теле-, радио дикторларының, комментаторларының, кейбір әншілер мен әртістердің тарапынан байқалады. Бұл – сөз сазы деп аталағын орфоэпиялық нормаларды жақсы білмеушіліктің, оған мектептер мен жоғары окуорындарында дұрыс үйретілмейтіндіктің және жалпы жүртшылықтың сөзді дұрыс айту дегенге өз дәрежесінде мән бермеушіліктің салдарынан туып жатқан ауытқулар.

Әдеби нормадан уәжді және уәжісіз ауытқулар мысал-фактилерімен кітаптың барлық тарауларында көрсетіліп отырды.

Сөйтіп, бүгінгі таңда қазақ тілін зерттеушілердің де, ана тілінің дұрыс дамуына мүдделі қалың жүртшылықтың да тілге, тіл мәдениетіне, нормаларына қатысты назарын аударып отырган мәселелер мынадай:

1) тілдің графикалық қуралы, яғни ең қолайлы, қазақ тілінің дыбыстық жүйесіне сай келетін әліпби (алфавит) таңдау, бұл проблема қазақ жүртшылығының жазу таңбасын өзгертіп, ки-

риллицадан латынға көшу саясаты көтерілген кезеңде туып отыр;

2) емле мәселелері, қазіргі қолданып отырған жазуымыз бойынша түзілген емлеміздің қырнайтын, толықтыратын, ықшамдайтын тұстары барына назар аудару және қазіргі емле қағидаларының негізінде латын жазуына сәйкестендіріп жасалтын емле ережелерін дұрыс түзу;

3) жазудың тілдік нормаларды қолдануға және оларды қалыптастыруға қатысты оң және қолайсыз сәттері, яғни орфографиялық нормалар мен орфоэпиялық заңдылықтардың бір-біріне қайшы тұстары, оларды реттеу жолдары;

4) ғылыми және басқа да терминология жайы; төл тілдік және кірме терминдердің арасалмағы; термин жасау принциптерін тұрақтандыру; кірме терминдердің тұлғалануы (жазылуы мен айтылуы);

5) лексикалық қазынаны байыта түсу мақсатын жалау етіп, қазіргі қазақ тілін әдеби нормадан тыскары тұратын элементтерді, оның ішінде әсіресе жергілікті сөздерді ешбір уәжіз қолданудан сактандыру, көне, сирек сөздердің де қолданысына қатаң қарау, олардың мағынасын дәл біліп, орнымен жүмсауды, көпшілікке түсініктілігін талап ету;

6) тіл мәдениетін, тілдік нормаларды насиҳаттайтын, түсіндіретін, үйрететін ғылыми-практикалық, анықтамалық құралдардың өте аздығы, барларының араларына 5-10 жыл салып келесі басылымдары әрен жарық көретіндігі;

7) мектептер мен жогары оқу орындарының оқу кестесінде тіл мәдениетіне арналған сағаттардың не жоқтығы, не жеткіліксіздігі.

Бұл – жалпы түрде аталған проблемалар, олардың сыртында жеке мәселелерге қатысты танымдық та, ғылыми да, практикалық та іс-карекеттер тұрғанын айтуға болады.

ТІЛ МӘДЕНИЕТІ ЖӘНЕ ОНЫҢ ПРОБЛЕМАЛАРЫ

Бұл күнде қазақ әдеби тілінің жазба да, ауызша да түрлерінің лексикалық, грамматикалық, орфографиялық, пунктуациялық, орфоэпиялық, стильдік нормалары біркүйдіру (едәүір десе де болады) орнығып қалғандығын айта аламыз. Соңдықтан да соңғы 30-40 жылдың барысында тіл мәдениеті проблема-сы көтеріліп, ол арнайы зерттеу саласына, яғни лингвистика ғылыминың бір тармағына айналды. Тіл мәдениетінің бас-тыбасты тарамдары (мәселелері) айқындалып, мазмұны мен объектісі, теориясы мен әдістері белгілене бастады. Дегенмен бұл салада әлі қолға мықтап алынбаған істер мен шешілмеген проблемалар аз емес: тіл (немесе сөз) мәдениетіне қатысты ғылыми терминдерден бастап, жалпы теориясын жасауға, әсіресе ұлттық тіл мәдениетінің ерекше сипаттарын ашуға дейінгі жұмыстар ізденушілері мен зерттеушілерін күтіп тұр.

Ең алдымен, тіл білімінің осы саласын қазақша қалай атаған дұрыс: «тіл мәдениеті» ме, «сөз мәдениеті» ме, «сөйлеу мәдениеті» ме? Орыс тілінде көбінесе «культура речи» деген термин қолданылып жүр. Сонымен қатар оның синонимі ретінде «культура языка» деген тіркесті де біраз уақытқа дейін (тіпті қазірдің өзінде де) қолданылғандығы байқалады. Орыс лингвистикасында «язык» және «речь» деген терминдер – дербес атаулар: «язык» – тілдің өзі («таңбалар жүйесі») болса, «речь» – сол тілдің қолданыстағы күйі (көрінісі).

Тіл мәдениеті, яғни тілдік элементтердің дұрыс қолданысы, сол тілді жұмсау барысында талап етіледі, демек, бұған «культура речи» деген термин дәлірек келеді. Ал қазақ тіл білімінде «язык» пен «речь»-ті айырып атайдын терминдер әлі қалыптаспай келеді. «Язык» дегенді «тіл» делік, ал «речь»-ті қалай атауымыз керек. Оны «тіл», «сөз», «сөйлеу», «тіл қолданысы», «қолданыс» деп әрқайсымыз әртүрлі беріп жүрміз. «Культура речи» деген сияқты білім-ғылымның жалпы бір саласын атау керек болғанда «сөз мәдениеті» деп алған дұрыс сияқты, ал баяндау барысында, контексте «қолданыс», «тіл қолданысы», «сөйлеу» деген сөздер де «речь» мағынасын бере алады (мен өз еңбектерімде тығырықтан осылайша шығып жүрмін). Сірә,

жалпы пәндік термин ретінде «сөз мәдениеті» дегенді таңдаған дұрыс болар. Өйткені бұл жерде әңгіме ойымызды ауызша да, жазбаша да дұрыс («мәдениетті») білдіру туралы болмақ. Ал «ой» дегеніміздің бір атауы – сөз.

Тегі, қазақ тілінде *сөз* өзінің семантикалық өрісікен: 1) сөз – лингвистикалық единицаны білдіретін термин («сейлем бес сөзден тұрады»; «сөйлемдегі әр сөздің қызыметі бар»; «бұл *сөз* ілік септікте тұр» деген сияқты қолданыстарда); 2) айтылған ой, пікірді де қазақ *сөз* деп атайды («сенің *сөзіңе* қосыламын»; «оның *сөзі* дұрыс»); 3) топ алдында сөйлеген сөз, жасалған баяндама, оқылған лекцияларды да жалпы «сөз» деп атай береміз («жиналыста пәленшениң *сөзі* дұрыс шықты»); 4) поэзияны да «сөз» деп атауды ұлы Абайдың өзінен табамыз («Сөз айт-тым Әзірет Әлі, айдаңарсыз», «Сөз түзелді, тындаушы, сен де түзел», «Кім біледі, жабырқаңқы жазған *сөзім*» т.т.), қысқасы, осы сияқты толып жатқан мағыналарды білдіреді. Соның ішін-де «айтылған ой, пікір» деген мағынасы жиі кездесетіндігі байқалады. Мұны *жылы сөз, тәтті сөз, бос сөз, жел сөз, сөз болу, сөз қайыру, сөз таппай* сияқты тіркестердегі «сөз»-дің коннотаттық (аудиоспалы, қосымша) мағыналарынан аңғарамыз. Біздіңше, тіпті қазақ тілінде «сөз» өзінің денотаттық (тура, негізгі) мағынасы – «ой, пікір» сияқты, ал лексикалық бірлік-ті (единицаны) «сөз» деп атау – Ахмет Байтұрсынов ұсынған лингвистикалық термин, демек, бұл – лексеманың коннотаттық мағынасы десек болар. Осы уәждерге сүйеніп, тілдің ойды білдірудегі көрінісі, қолданысы – «речь» дегенді «сөз» термині-мен атап, қалыптастырысақ, сонда «сөз мәдениеті» деген тіркес «культура речи» дегеннің дәл баламасы болып шығар еді.

Ал «тіл мәдениеті» дегенді бірден ығыстырып тастауға тағы да болмайды, өйткені, біріншіден, ол – бұл күнде қазақ тіл білімі зерттейтін қолданбалық мәні зор саланың атауы ретін-де біршама қалыптасқан термин болса, екіншіден, ой-пікірді тіл арқылы білдіруде сөздерді орнымен жұмсап, сөйлемдерді дұрыс құрастырудан өзге де сөттер бар екені, яғни түзулікті, дұрыстықты («мәдениетті»), жазудағы сауаттылықты, сөйлеу актісіндегі сөздерді дұрыс дыбыстай білу сияқты тұстарды қоса

есептесек, жалпы «тіл мәдениеті» деген термин де оңтайлы келеді. Әсіресе бұл атауға көнірек ұғымды сыйғызып, бүгінгі әдеби тілдің нормаларын сөз еткен тұста қолдансан, дұрысырақ болатын тәрізді.

Тіл мәдениеті – қазақ тіл білімінің зерттеу нысандарының (объектілерінің) ішінде кейінірек қолға алынған саласының бірі. Бұл саланың өзге нысандардан айырмасы – оның күнделікті өмірмен, тілді қолдану тәжірибесімен тікелей ұштасып жататындығында. Сондықтан тіл мәдениетін ғылыми-практикалық түрғыдан сөз етуде зерттеу жұмыстарына динамикалық-тарихи қырынан келуден гөрі, статикалық түрғыда қарастыру бірінші кезекте тұрады, яғни тіл мәдениетінің қалыптасу тарихы, әр кезеңдердегі сипаты дегеннен гөрі, дәл бүгінгі жай-күйі, проблемалары, даму бағыты, болашагы (перспективасы) деген мәселелерге алдымен көңіл аударылады. Мұны тіл қолданысының өзі сұрайды, бұл – бүгінгі әлеуметтік сұраныс.

Тіл мәдениетінің өзге салалардан кешірек, кейінірек қолға алынуының объективтік себептері бар. Тілдегі мәдениет деген-ди әңгіме ету тілдік нормаларының, яғни қолданыс зандалық-тарының қалыптасып, едәуір тұракталған әдеби тілдің бо-луына, оның жазбаша да, ауызша да түрін қалың жүртшылық тұтас пайдалана бастаған кезіне тікелей байланысты. Әсіресе көркем әдебиет пен баспасөздің, радио мен телевидениенің (теледидардың), ұлт театры мен киносының дамыған кезін-де тіл мәдениетіне, яғни тілді дұрыс, әдемі қолдануға, жазу сауаттылығына ерекше назар аударылады. Сондықтан мәдениетін талап ететін күбылыстың өзі әбден күшіне енген-ше, тіл туралы ғылым-танымның бұл тармағының кешендең қолға алынуы – занды да түсінікті.

Тіл мәдениетін зерттеушілер, әсіресе орыс тіл мамандары, бұл проблема жазба әдеби тіл кезеңінің сұранысы деген-ди айтады. Мұның да қысыны бар. Тіл мәдениетінің өзегі тіл-дік нормалардың қалыптасуында, біршама тұрақталуында, зандастырылып хатқа түсуінде (кодификациясында) жатса, бұлар бүгінгі ұлттық жазба тілдердің қам-карекеттері.

Бізде тіл мәдениеті дегенге соңғы 30-35 жылдың барысында ғана айтарлықтай көңіл аударылып, ол тіл білімінің бір сала-сына айналды, ғылыми ізденістер мен практикалық жұмыстар дүниеге келді, атап айтқанда, Қазақстан Ғылым академиясының А.Байтұрсынұлы атындағы Тіл білімі институтында арнайы бөлім ашылып жұмыс істеді, сауатты жазу, сөздерді дұрыс дыбыстау, дұрыс қолдану сияқты салаларға арналған анықтағыш құралдар, сөздіктер, мақалалар мен жинақтар жарық көрді, диссертациялар қорғала бастады. Тіл мәдениетіне, оның ішін-де әсіресе терминология, емле мәселелеріне қатысты пікірлер мен ұсыныстар айтылды¹. Тіл мәселелері жайында әлеуметтік пікірдің пайда болуына қунделікті баспасөз берні радио, теледидар, қысқасы, бұқаралық ақпарат құралдарының баршасы мейлінше ат салысын келеді.

Тіл мәдениеті проблемасының теориялық негіздерін анықтау, талдау тәсілдерін іріктеу сияқты жұмыстардан бастап, таза ғылыми монографиялар жазу, құнделікті қолданысқа қажет құралдар: анықтағыштар, сөздіктер, тіпті окулықтар беру тәрізді қыруар практикалық жұмыстар алдымында тұр. Өйткені күні бүгінге дейін бұл салада біраз ғылыми еңбектер жазылып, практикалық шаруалар жасалғанымен, олардың әлі де толықтыратын, нақтылайтын тұстары баршылық. Әсіресе

¹ Балақаев М. Қазақ тіл мәдениетінің мәселелері. - 1-басылым. - Алматы, 1965
- 2-басылым. - Алматы, 1971; Балақаев М. Тіл мәдениеті және қазақ тілін оқыту. - Алматы, 1989; Сыздықова Р. Қазақ тілі жайында анықтағыш. 1-басылым. - Алматы, 1960. - 2-басылым. - Алматы, 1974. - 3-басылым. - Алматы, 1996; Жинақтар: Сөз мәдениеті және баспасөз. - Алматы, 1972; Орелі өнер (тіл мәдениеті туралы). - Алма-ты, 1976; Сез онері (тіл мәдениеті туралы). - Алматы, 1978; Уалиев Н. Сөз мәдениеті. - Алматы, 1984; Уалиев Н. Фразеология және тілдік норма. - Алматы, 1998; Үйнекбаев И. Қазіргі қазақ тіліндегі вариантар проблемасы. - Алматы, 1976; Уалиев Н., Алда-шева А. Қазақ орфографиясындағы қыындықтар. - Алматы, 1988; Бизақов С. Тілдік норма және вариантылық. - Алматы, 1997 сияқты еңбектерді және Қазақ тілінің үлкен орфографиялық сөздік. - 1-басылым. - Алматы, 1963. - 2-басылым. - Алматы, 1978. - 3-басылым. - Алматы, 1988; Мектепке арналған орфографиялық сөздік. - Алма-ты, 1972, сондай-ақ М.Әуезов, Ф.Мұсірепов, М.Әлімбәев, Т.Әлімкүлов, М.Карақұлов, Ә.Жарылғапов сияқты журналистердің және концептеген тіл мамандарының артурлі жинақтар мен мерзімді баспасөз беттерінде сөз қолдану мәдениетіне, к азак жа-зуы емлесіне, терминология мәселелеріне арналған мақалаларын қаранды (оларды Ш.Сарыбаев құрастырып жарыққа шығарып келе жатқан «Қазақ тіл білімі әдебиетінің библиографиялық көрсеткіш» атты кітаптардан табасызы. Олардың 1-томы 1965, 2-томы 1971, 3-томы 1982, 4-томы 1987, 5-томы 1987, 6-томы 1994 жылдары «Ғылым» баспасынан жарық көрді).

тіл мәдениетіне қарата айтылған кейбір ұсыныстар жеке адамдардың «меніңше, былайшасы – дұрыс, былайшасы – бұрыс» деген сияқты ғылыми дәлелсіз, тек жеке бастарының танымына (дәлірек айтсақ, талғамына) қарай айтылған пікірлер түрінде көрініп келеді, яғни бұл жерде дилетанттық сипатта жоқ емес. Дилетанттық тұжырымдар әсіресе тіл маманы емес, жазушы, журналистердің аузынан (қаламынан) жиірек шығады. Дилетант деп өзінің мамандығынан, білім-танымынан аулақ тұрған саланың мәселелерімен әуестенушіні атаймыз. Дилетант мәселеге арнайы дайындықсыз келіп, үстіргін пікір айтады. «өлеңге әркімнің де бар таласы» дегендей, тілге келгенде де, әркімнің өз танымы, өз байламы, өз бағасы болады. Мәселенің ғылыми негізін қаузап, арнайы зерттелмегендіктен, дилетанттардың пікірлері субъективтік болып шығады. Тіл мәселесіне, оның мәдениетіне, жұмсалу нормаларының тұзу-терістігіне қатысты дилетантизм мен субъектизмнің пай-дасы мен зиянын айыру қынырақ соғады, кейде пайдасынан зияны қөбірек болуы да мүмкін.

Сөйтіп, «тіл мәдениеті» деп нені танимыз? *Мәдениет* деген сөздің семантикасында «дұрыстық», «тұзулік», «тәртіптілік», «жүйелілік», «реттілік», «қисындылық», «сәйкестік» деген сияқты мағыналық ренктер (семалар) жататыны белгілі. Бірақ әңгіме ненің дұрыстығы, немен сәйкестігі, қандай реттілік, қандай тәртіптілік, ненің қисыны деген сияқты сұрақтарға жауап іздеңде, «тіл мәдениеті» деген күбыльстың заттық, ұғымдық мәні күрделі екендігі байқалады.

Тіл мәдениеті, ен алдымен, әдеби норма дегенге тіке-лей қатысты. Жалпы тіл білімінде (шетелдік те, орыстық та, қазақтық та) біршама қалыптасқан тұжырымдарға иек артсак, тіл мәдениеті дегеніміз – тілдік нормаларды, оның ішінде әдеби тіл нормаларын дұрыс сақтау әрекеті болып табылады. Кейбір зерттеушілер бұл салаға кеңірек міндет артып, тілдің көріктеу құралдарын, яғни стилистикалық зандылықтарды дұрыс пай-далануды да сөз мәдениетінің объектісі деп таниды². Бұл пікір-ді біз де әбден қостаймыз.

² Крысин Л.П., Скворцов Л.И., Шварцкопф Б.С. Проблемы культуры русской речи (обзор) //Известия АН СССР. - ОЛЯ. - 1961. - Т. 20. - Вып.5. - С. 428-429.

Сөйтіп, тіл мәдениеті дегеніміз – сөздерді дұрыс, орнымен қолдану (лексикалық), дұрыс құрастыру (синтаксистік), дұрыс қилюастыру (морфологиялық), дұрыс дыбыстау (орфоэпиялық), сауатты жазу (орфографиялық), тілді әсерлі етіп жүмсау (лингвостилистикалық) нормаларын ұстану, орнықтыру, жетілдіру. Осылардың бәрін қосып, «тіл мәдениеті» деген ғылым-таным саласын «ортология» деп атаушылық бар, яғни ортоло-гия – сөздің (тілдің) дұрыстығы туралы ілім. Бұл атауды біз де қисынды санаймыз.

Тіл мәдениеті атқаратын міндеттерінің бірі – қай қолданыс бұл күнде норма болып табылады, қайсысы – жоқ деген мәселелерді түбекейлі зерттеу. Әйткені тілдің мәдениетін таныттын шарт – тек жогарыда салалап көрсетілген нормаларды ұстанып қана қою емес, ол нормалардың өздерінің дұрыстығын, сындарлығын тап басып тану және дұрыс деп қабылдау.

Тілдік норманың өзі «дұрыс» деп бағалануы үшін ол тілдің құрылымдық заңдылықтарына сай келуі керек. Мысалы, бұл күндерде қазақ тілі сөздігі *тәлімгер*, *айтыскер*, *жүлдегер*, *иегер*, *саясаткер* сияқты ондаған жаңа тұлғалармен толыгуда және олар нормативтік элементтер ретінде әдеби тілден берік орын тебуде. Бұл неологизмдер сөзжасам жүйесінде бар нормаға сай келіп тұр: **-гер** – адамның қасібін, мамандығын, бір нәрсеге қабілеттілігін білдіретін жүрнақ: *саудагер*, *жұмыскер*, *қызметкер* т.т.

Тіл мәдениетін статикалық тұрғыдан, яғни қазіргі күй-қалпын әңгіме еткенде, тілдік норма дегеніміздің бір кезеңде ғана қалыптасып, әрі қарай өзгермей қатып қалатын құбылыс емес екендігін де қатты ескеру керек. Норма – тарихи-өзгермелі құбылыс болғандықтан, тіл дамуының бір кезеңінде норма ретінде қабылданған (қолданылған) тілдік элемент екінші кезеңінде нормадан ығыстырылуы мүмкін және керісінше, әйткені тілдік норманы анықтауда әлеуметтік талғам негізгі рөл атқарды, ал әлеуметтік талғамды құнделікті өмір кажет-тігі, тілді пайдалану практикасы белгілейді. Осы себептен кейде тілдің құрылымдық заңдылығына сай келмейтін қолданыстардың да норма деп танылып, әдеби тілден орын алуы мүмкін. Мысалы, **-ыр/ір**, **-ар/-ер** тұлғалы есімшеге **-ман /-мен**

жүрнағы жалғанғанда, ол тұлға қазақ тілінің жалпы құрылымдық нормасы (зандылығы) бойынша алдымен, затты, құбылысты емес, қымылды білдіреді, яғни етістік болып қалуы ке-рек және ол әлі орындалмаған, бірақ жүзеге асуға таяп тұрған, енді-енді орындалатын іс-әрекетті білдіруі тиіс. Мысалы, ол жыларман болды дегенде, «ол адам әлі жыламаған, бірақ жылауға тақау» деген үғымды береді. «Көшерменде жүрт жаман, тастарманда қатын жаман» деген мәтелде көшермен тұлғасы ауылдың әлі орнынан қозғалмаған, бірақ көшпелі шаруашылық қамымен тозған орынды ауыстырып, отты-сұлы жана өнірge көшу қажеттігі таянған қам-қарекетті білдіреді, ауыл әлі көшкен жоқ, бірақ енді-енді көтерілетін кезі туғанда, тозған жүрт «жаман» деген баға алады, тұздары жараспаған жұбайлар да – сондай, қазактың бұрынғы (мәтел дүниеге келген кездегі) саясатында мұндай жұбайлар қазіргідей тепе-тен тұрып соттасып айырылыспайды, ері әйелін «тастайды»: төркініне қайтарады, үстіне әйел алады немесе басына отау тігіп, алдына мал салып, бөлек шығарады. Қазактың әдет-ғұрып заңы («Обычное право казахов» деген заң) бойынша да, мұсылман дінінің шаригаты бойынша да бір күнде әйелін «тастай салу», ажырап кету онай болмаған, тастай алмай, бірақ қарым-қатыстары соған әбден жақындаған сәтті қазақ «тастарманда» деп бір тұлғамен білдірген. Қысқасы, **-ар+ман** жүрнактарымен жасалған тұлға қымыл, іс-әрекет семантикасын сактаған. Ал бұдан 30-40 жылдай бұрын, яғни 60-жылдардың ішінде әдеби тілімізде **оқырман**, **көрермен**, **тыңдарман** деген, біздің күндерімізде, 90-жылдардың соң кезінде **оралман** деген атаулар пайда болды. Бұлар енді етістік емес, есім (зат есім) сөздер, әлі орындалмаған, бірақ орындалуға таяу тұрған іс-әрекетті емес, сөз түбірі білдіретін қымылдың, іс-әрекеттің (*оқу, көру, тыңдау, оралу* сияқты) иесін, орындаушысын атайтын атау сөз, тіпті термин сөз болып тұр. Соңғы **оралман** тұлғасы морфологиялық норманың шырқын мүлдем бұзып тұр, өйткені адамдардың қимылына, іс-әрекетіне, кәсібіне т.т. қарап **келмен**, **кулмен**, **жүрмен**, **ойнаман**, **жазман**, **сызман** деп атамай-мыз ғой. Бұл – нормада жоқ, қазақ тілінің құрылымдық заңдылықтары мұндай норманы білмейді, оған жібермейді. Соған

қарамастан, шет жүрттардан өз отанына қайтып келіп жатқандарды «коралман» деп атап, оны ресми терминге айналдырып та алдық. Бұл сөздер тілдік нормага сай емес, қайшы келетін-дігіне қарамастан, қазіргі әдеби тілімізге енді, оларды әсіресе публицистикалық стиль, яғни бұқаралық ақпарат құралдары: газет, журнал, радио, теледидар, сондай-ақ ресми құжаттар (кенсе-іс қағаздар стилі) жиңі колданып, тез тұрақтандырып келеді.

Тілдік табиғи нормага керегар мұндай қолданыстардың пайда болу себептері неде? Тұлға тілдің құрылымдық ішкі нор-масына қайшы келетіндіктен, оның пайда болу уәжі лингвистикалық сұраныстан шықпаған, ол – жүйелі құбылыс емес. Де-мек, бұл жерде уәжді, яғни себебін, мотивін тілдің өз зандары-нан тыс «экстралингвистикалық» деп аталатын сұраныстардан іздеу керек.

Бұл күнде *оқырман* деп атап отырған іс-қарекет иесін көпке дейін *оқушы* деп келдік. Соңғы *оқушы* деген тұлға мектепте оқытындарды атайтын терминді де білдіреді, ал ертеректе: өткен XIX ғасырда, тіпті XX ғасырдың басында мектеп окушыларын бірде *шәкірт*, бірде *оқушы*, бірде тіпті *бала* (Кел, балалар, оқылық – Ыбырай Алтынсарин) деп атағанымыз белгілі. Кейін келе қазақ қауымында оку-ағарту жүйесі жанданып, жолға қойылып, ондағы әрбір зат, іс-әрекет, дерексіз ұғым атаулары нақты болуы, бір- бірімен араласып кетпеуі талап етіле баста-ды. Мысалы, *оқушы* сөзі «мектепте оқытын жас (адам)» дегенді білдіреді десек, енді ол сөзben жалпы бір нәрсені оқытын адамды да атайтын болсақ, бір-бірінен мүлде бөлек әрекет иелерін ажыратса алмай, шатастыратын боламыз. Бұл ұғымдарды орыс тіліндегі атауларымен көрсеткенде, «ученик» пен «читатель» сөздерін табамыз.

Оқушы ~ оқырман қатарының пайда болуына орыс тілі-нің әсері, яғни аударма ісі, аударма әдебиет себепкер бол-ды деген пікірлер де айтылып жүрді. Сырт қарағанда, солай көрінгенмен, тілдегі мұндай жаңалықтардың, оның ішінде тосын қолданыстар мен тұлғалардың сыры тереңде жатқандығын, яғни қоғамның әлеуметтік тіршілігінде, заман ағымында, сол ағыммен ілесіп отыратын рухани-мәдени-заттық сұраныстарда жатқандығын айту керек.

ХХ ғасырдың II жартысында қоптеген халықтардың, оның ішінде империялық құрсауда болып келген бұрынғы КСРО құрамындағы үлкенді-кішілі ұлттар мен ұлыстардың және солардың бірі – қазақ халқының әлеуметтік, экономикалық, саяси, мәдени, тіпті рухани өмірінде дүниежүзілік адамзат тіршілігінің жалпы даму тенденциясына біршама үндесетін өзгерістер, жаңалықтар пайда болды, ол әлі де жалғасуда. Бұл жаңалықтардың атаулары тілден орын алғанда, олардың көбі қазақ тілінің құрылымдық зандылықтарына сәйкес келіп, норма ретінде орнығып жатқанын айтуга болады. Сонымен қатар жаңа қолданыстардың да лексикалық нормаға айналуы, бір жағынан, қоғам өмірінің сыртқы сұраныстарына қатысты болса, екінші жағынан, сол сұраныстармен санақтан қалың жүртшылықтың «көрегі – осы сөз, осы тұлға аталақ ұғымды дұрыс береді» деген сияқты талабы мен талғамы себепкер болып тұр.

Сондай «заман талабының» бірі – әрбір заттың, ол заттағы әрбір бөлшектің (мысалы, техника детальдарының), әрбір ұғымның өз алдына дербес, айқын түрде аталауы, өзге ұқсас дүниелермен шатастырылмауы болса, мұны жүзеге асыратын – тіл, оның лексика саласы. Айталық, ХХ ғасырда қазақ даласында аграрлық саясат, соған қатысты саланың бірі – егін шаруашылығы өріс алды, бұл – оны өндіруден бастап, барлық іс-шаралардың, өнімдердің атаулары нақтылана түсіүн талап етті. Бір-екі мысал: *егістік жер* деген – жалпы атау, оны пайда-лану процесіндегі, мерзіміндегі түрлері егіншіліктің күрделене түсуіне орай жеке-жеке атауларды қажет еткендіктен, ертеректегі қазақ шаруашылығында болмаған, айталық, *пар* деген түрінің атауы пайда болды, ол – «белгілі бір мерзімде дақылдар егілмейтін, арамшөптерден тазартылып тұратын танап» (*Танап* – «егістік жер, егіс даласы, алан»). Енді осы *пар* деп аталағын егістіктің өзіне қатысты *пар танабы*, *пар болігі* (паровое звено), *парлы сына танап*, *алғы парлар* деген сияқты «детальдап» көрсететін сөздер егіс даласының бұл түрін тек *пар* деп атау қою аздық ететінін байқатады (фактілер «Егіншілік жөніндегі орысша-қазақша түсіндірме сөздіктен».

- Алматы: Қайнар, 1984 алынды). Демек, бұл жерде тіл өмірдің сұранысын өтеп тұр, яғни заман ағысына ілесіп тұр.

Тағы бір мысал: сан ғасыр мал шаруашылығын жақсы игерген қазактардың тілі мал мен адамның анатомиясы мен физиологиясына қатысты атауларға бай екенін білеміз. Бірақ бұл атаулардың ішінде ғылыми танымдарға қатыстылары жоқ болып шығуы ғажап емес. Айтальық, ішкі секреция бездерінен шығып, тікелей қанға және лимфага қосылатын зат «гормондар» дегенді бұрын қазақ атаған емес, ол – медицина ғылымы үшін қажет термин, енді осы гормонның өзінің (өсу *гормондары, жүрек гормоны* т.б.) жеке-жеке атауға (терминге) ие болғанын көреміз. Бұл екі мысалдың екеуінде де қазақ тілі оңай «олжалы» болған: төл қазынадан сөз іздемей-ақ не жаңа тұлға жасамай-ақ, *пар, гормон* деп орысша атауларды алдық, ол да – дәлелсіз емес: Қазақстанда егіншіліктे орыстар («орыс тілділер») қазақтан көп болмаса, аз қатысқан жоқ, сол парларды жасайтын тың игеру сияқты науқандарда негізінен орыс адамдары мен орыстілді өзгелер қызмет етті, сондықтан *пар* сияқты сөздер орыс-қазақ баршасына түсінікті болды да қазақ тіліне де «зып етіп» ене қойды. Ал *гормон* – ғылым үшін қажет атау, бізде ғылыми терминдердің басымы аударылмай, көбі халықаралық (интернационалдық) қордан алынып отырғанын мойындаймыз.

Енді осы қатардағы бірер қазақ тілінен келтірілген фактілерге назар аударсақ. Мысалы, өткен XIX ғасыр мен XX ғасырдың алғашқы онжылдықтарында пайда болып, бірте-бірте етек жая бастаған қазақ газеттерінің тілінде *мынақып* деп арабша аталған, ал XX ғасырдың 40-80 жылдарында *некролог* деп орысша аталған ұғымды соңғы онжылдықтарда *азанама* деп жана жасанды сөзben беріп жүрміз. XIX ғасырдан бұрын ондай «дүниеден қайтқан адамның өмірі мен қызметі туралы жазылған алғашқы естірту мақала» дегенді қазақ білмеген, оны білдіретін баспасөзі болмаган, демек, атауы да жоқ болған. Бұл әрекетті *естірту* немесе *аза тұту* деп атай салуга болмайды: олардың этнографизмдер ретінде тілде өз орындары бар, ал *не-кролог* – жай естірту емес, әлеуметтік сипаты бар ері жиі болып тұратын әрекет («өмір бар жерде өлім бар»), сондықтан енді бұл қарекетті жеке-дара атау керек болды, сөйтіп, *азанама* *не-ологизмі* дүниеге келді.

Бұл айтқанымыздың барлығы – бүгінгі тіл қолдану тәжірибемізде жаңа атаулардың ондап-жүздел пайда болып жатуының себептерін көрсету. Баса айтуға болатын жайт – жаңа лексикалық бірліктердің дені (өзге тілдерден аудармай қабылданатындарын, яғни кірме сөздерді қоспағанда) қазақ тілінің құрылымдық нормаларына сай жасалатындығы. Ал жоғарыда көрсетілген, *окырман*, *көрермен*, *оралман* сияқты сөздер тіл-дің құрылымдық заңдылығына қайшы жасалғанмен, бүгінгі лексикалық қазынадан нық орын алып отыр. Мұндай қайшылықтар өте сирек кездеседі, көбінесе лексикалық нормативтер тіл заңдылықтарымен үндесіп жатады. Соңдықтан көптеген зерттеушілер әдеби нормага белгілі кезенде әлеумет: баспасөз, көркем әдебиет, радио мен теледидар, шаршы топ алдындағы ауызша сөйлеу үрдісі – қолданыска қолайлы, көпшілікке ортақ деп қабылдаған сөздер мен грамматикалық тұлға-тәсілдер жатады деген пікірге ден қояды.

Тілдік норманың динамикалық теориясы бойынша, тіл дамуының бір кезеңінде норма емес элементтер келесі кезеңінде нормага айналуы мүмкін. Мысалы, белгілі бір іс-әрекет атауынан абстракт есім тудыруда бір кезде **-у**, **-ушылық**, **-ғандық** сияқты жүрнақтар актив норма болса, бұл күнде оның эквиваленті ретіндегі **-ым/ -ім**, **-ыс/ -іс** қосымшалы сөздердің әдеби тілдегі қолданысы нормага айналуда, мысалы, *спектакль* қойылымы, *суранным*, *окылым* (сессияда пәлен қаулы бірінші *окылымда* қабылданды). Алдыңғы жүрнақтардың нормалық «белсенділігі» әлсірегені байқалады.

Тіл бірліктерін әдеби деп танытатын белгінің басты-сы – нормалылық («әдеби тілдік идеал») болса, оның негізгі қасиеті – консерватизм (қасандық, тұрақтылық) деп танытын көзқарастар да бар (мысалы, А.М.Пешковскийдің пікірлері). «Әдеби-тілдік идеалға» деп қою, яғни тұрақтылық, консерва-тизм теориясын жақтаушылар қазақ тілі тәжірибесінде де жоқ емес. «Ата, аға буын аузында болған» немесе «ежелден келе жатқан», «бабаларымыз солай қолданған» сөздер мен тұлға-тәсілдерді бүгінгі ұлттық әдеби тіліміздің нормасы деп тануды ұсынатындар аз емес. Мысалы, бабаларымыз қазақ сөздерінде айтылмайтын **ф**, **х**, **в**, **ч**, **ц** сияқты дыбыстарды білмеген,

сондықтан бүгінгі қолданысымыздығы кірме сөздерді айтуда және жазуда осы дыбыстарды қатыстырмай, «бабаларымыздың тіліне салып, *пійзіке*, *пійнаныс*, *қылор*, *қиймыйа*, *бәгөн*, *белесептем*, *шек* (чек), *шемпійон*, *семент*, *сеқ* (цех), *сипыр* (цифр) деп айту керек және кириллицаны қолданып отырғанның өзінде осылай жазу керек» деген пікірлер айтылып келеді.

Норманың консерватизмін қолданушылардың тістері көп бата алмайтын тұстар да бар, олар – лексикалық неологизмдер. Мысалы, «Қазақ лексикасындағы жаңа қолданыстар» де-ген атпен тіркеліп, жарияланып жатқан жүздеген сөзді неме-се активтенген жүрнақтарды «бұрынғы қазақ тілінде бұндай сөздер немесе жүрнақтардың активтігі болмаған, сондықтан қабылдамау керек» деген пікірлер мүлде айтылмайды, өйткені консерваторлар тілдің бір қаттауында (фонетикада, орфоэпи-яда) консерватизмді жақтаса, екінші қаттауларында, айталық, лексика мен грамматикада шарасызың көрсетеді, себебі тіл – тарихи құбылыс екенин мойындаиды, тарихи құбылыстың өзгеріп, жаңарып отыруы, сандық қана емес, сапалық та жаңа сипаттарға ие болуы сияқты заңдылықты жокқа шыгара алмайды. Ал тілдік нормалар – тілдің «перзенті», олар да жаңа сапалық өзгерістерге ұшырап отыратындығын және нормалардың бір тарамы, айталық, фонетикалық-орфоэпиялық тәртіппері «қатып қалуга» – консерватизмге бейім болып, өзге тарамдары, әсіресе лексикалық қазынасы үнемі өзгеріп, байып отыратындығын мойындау – кереғарлық әрекет болып шығар еді.

Кейбір тіл мамандарының *келгесін*, *барғасын*, *боп*, *кеп* деген тұлғаларды бейнормалық деп тануы – бір жағынан, субъективтік талғамның көрсеткіші болса, екінші жағынан, тілдік нормалардың эволюциясын мойындауышылық, сайып келгенде, бір кездерде *келгеннен соң*, *барғаннан соң* деп, одан келе ықшамдалып *барған соң*, *келген соң*, одан *барғансын*, *келгенсін* (қараңыз, Махамбетте: «Бақыттым ауып басымнан Жапанда жалғыз қалғансын, өкінгеннен не пайда Құдайым басқа салғансын?» деп қолданғанын оқимыз), ал бұл күндерде әрі қарай келтеленіп, *барғасын*, *келгесін* болып жиірек қолданылуы – норманың қозғалысы, терминмен айтсақ, дамуы. Тіл дамуын-

да тұлғаның ықшамдалу процесі орын алатындығын өзге мысалдармен де көрсетуге болады. Тілдік нормалардың уақыт өткен сайын тілдің өзінің ішкі даму бағытына орай да, сыртқы экстрагностикалық факторлардың ықпалымен де, алмасып, өзгеріп отыратындығын, сондықтан консерватизм принципінің күші мықты еместігін дәлелдейтін фактілер аз кездеспейді.

Ол өзгерістер – тек жалғау-жұрнақтардың қызметінде, сөз тұлғаларының ауысып отыруындаған емес, тілдің құрылымдық қаттауларының барлығында да орын алады. Мысалы, өткен ғасырларда бойға жеткен, ерге жеткен, менің туралы, менің үшін, біздіңмен сияқты қолданыстар бұл күнде бойға жеткен, ерге жеткен, мен туралы, мен үшін, бізбен тұлғасында келетіндігі – норма. Шылау мен көмектес септік жалғауы деп саналатын менен ~ мен, есімшениң баратын ~ баратұғын, шылаудың дағы ~ да сияқты жарыспа қатарлары да – ықшамдалу құбылысының нәтижесі, бұл – қазақ тілінің соңғы бір-екі ғасырлық даму барысында құрылымдық норма-сына айналып отыр. Бірақ ықшамдалу процесіне ұшыраған элементтердің кай стиль үшін әдеби қолданыстық норма, қайсылары үшін вариантың сынары екенін айыру керек. *Менен ~ мен, дағы ~ да, тұғын ~ тын* қатарлары – көркем әдебиет үшін нормалық вариантар, ал публицистика, ғылыми стиль, кеңсе-іс қағаздары үшін ол қатардың ықшам сынары – норма.

Менің туралы, менің үшін, бойға жеткен сияқты «толыққанды» тұлғалар – жалпы қазақ поэзиясы тіліне, тіпті бүгінгі ақындар тіліне де жат емес, нормадағы қолданыстар. Осы қатардан өткен кезеңдердегі қазақ поэзиясы тілінен табылатын *атаңың тегі* («Атаңың тегін сұрасан, Арқар ұранды жат едің» – Бұхар) – бұл күндең *ататегі* > *ататек* болып ықшалған тұлғаның; сол сияқты *өкпеменен қабыну ~ өкпесі қабыну, өтіменен жарылу ~ өті жарылу* («өкпенменен қабынба, өтіменен жарылма» – Бұхар), «*калай*» деген мағынадағы *нешік* («әр *нешік* күнің сол болар» – Бұхар жы-рау, XVIII ғ., Шамырқансам – тағы кетермін, Кетпей де *нешік* етермін – Махамбет, XIX ғ.) сияқты қолданыстардың бұл күнде ықшам түрлері немесе басқа варианты жұмысалатындығын білеміз. Демек, тұлғалардың ықшамдалу бағыты (тенденция-

сы) қазақ тілінің дамуында орын алғып отырған құбылыс екен-дігін мойындасақ, тілдік норманың динамикалық сипатын да тануга болады.

Тек ықшамдалуда ғана емес, өзге сәттерде де тілдік нормалардың алмасып отыратындығын көрсететін фактілер бар. Айтальық, күні кешеге дейін тіпті Абай тілінің өзінде бұл құнғі **-уга (-уге)** жүрнақты тұлғаның орнына **-ар+та (-ерге)** тұлғасының жұмсалғанын татар тілінің ықпалы деп жаңсақ танушылық та болып келді, ал, шындығында, бұл – күні ке-шеге дейін қазақ әдеби тіліндегі, әсіресе поэзиясындағы морфологиялық нормалардың бірі болған. Мысалы, XV-XVII ғасырларда жырлап өткен ақын-жырауларды былай қойғанда, «күні кешегі» Бұхар жыраудың (XVIII ғ.): «Қайырсыз итке мал бітсе, Аңқаң құрып келгенде, Саумал бермес *iшерге...*», «Қатты тамақ *шайнарга* Мен пакырда тіс бар ма?» деген жолдары, Махамбеттің (XIX ғ.): «Өлең айтып толғадым Көкірегімді *басарға...*», «Қарадай отын жармадым, Тас қазанды *асарға*» деген тармақтарын оқымыз. Демек, *өкпеңменен, баратұғын, менің туралы, баланың тұрасында, катты ас шайнарга* (мен пақырда тіс бар ма) сияқты тұлғалар кездесетін дүниелерді әдеби тіл үлгісі емес деп санауға бола ма (ондай пікірлер жазылған ғылыми еңбектерді де білеміз)? Әрине, жок!

Менен ~ мен, баратұғын ~ баратын, мен туралы ~ менің туралы, шайнауга ~ шайнарга сияқты қатарлардың екеуі де – әдеби норма, айырмасы – алдыңғылары дәл бүгінгі қунде қазақ тілі стильдерінің барлығында актив жұмсалмайды. Бұдан әдеби-тілдік элементтердің (бірліктердің) кез келгені барлық жерде (барлық стильдерде) бірдей қолданысқа қолайлы бола бермеуі мүмкін, тілдің әр функционалдық стилінің өзіне тән немесе өзінде актив (жii) қолданылатын тұлғалары оның нор-масы болып келеді деген қорытынды шығады.

Сөйтіп, «тіл мәдениеті» атты білім-ғылым саласының діт-тейтін міндеттерінің бірі – жалпы тілдік, құрылымдық нормаларды айқындау, әдеби тілдік бүгінгі нормаларды бөлек көрсету (екеуі әрдайым бірдей түсіп отырмайтынын таныту), олардың сақталу және бұзылу сәттерін қадағалау, қысқасы, бұл саладағы жұмыстарды ғылыми негізде жүргізу. Субъ-

ективтік пікірлердің кейбіреулерін, сөз жоқ, ескеріп отыру қажет, бірақ тіл тәжірибесіндегі реттеуші әрекеттерді (регламентацияны) жеке ғалымдардың немесе өзге де белгілі жазушы, журналистердің беделіне (айтқан пікіріне) қарай жүргізбей, ғылыми теориялардың негізінде, яғни ол нормалар қазак тілінің құрылымдық заңдылықтарына сай келетін-келмейтіндігіне, жүйелік қатарын түзетін-түзбейтіндігіне қарай дәлелдеп барып реттеп отыру қажет. Демек, алдымызды қазақ тіл мәдениетінің ғылыми базасын жасау міндеті тұр. Ол үшін, біздіңше, бірінші кезектегі ізденістеріміз бер ұсыныстарымыз минаядай мәселелерді нысанана алууды қажет етеді:

Бірінші. Лексикалық нормаларды таныту, яғни сөзқолданыс регламентациясында әр алуан вариантылық проблемасын шешу. Варианттылық, яғни жарыспа қатарлар – сөз мәдениетінің басты мәселесі. Тіл дамуының әр кезеңінде әртүрлі салада, әртүрлі дәрежеде және әрқылды сипатта жарыспалылықтың орын алуы – табиғи құбылыс. Онсыз бірде-бір тіл өмір сүрмейді. Егер жарыспалылық құбылыс болмаса, тілдің нор-малану процесі де жүрмес еді, тіл мәдениеті үшін күрес те күн тәртібінде тұрмас еді. Варианттылық тек лексикалық қана емес, қазақ тілінің қазіргі даму сатысында әр алуан лексика-семантикалық, ішінара грамматикалық, әсіресе синтаксистік, орфографиялық, орфоэпиялық, стильдік вариант қатарлары бар. Жарыспалық құбылысын танытуда әдеби бірліктер (сөздер, морфологиялық тұлғалар, фонетикалық вариантар т.т.) мен жергілікті сөздерді, диалектілік элементтерді айырып тану, сол сияқты әдеби сөздер мен қарапайым сөздерді, арготизмдер мен жаргонизмдерді ажыратып алу қажет. Осы ізденістің барысын-да қазақ жазба әдеби тіліндегі диалектизмдердің лексикалық, стильдік статусы айқындалады.

Лексика саласының нормалану процесін реттеуде бүгінгі күні пікірталас және ғылыми-практикалық ізденістер туғызып отырган проблема – қазіргі сөздік қазынамызды толықтыру көздерін (каналдарын) іздестіру және айқындау, ол каналдардың қайсысын немесе қайсыларын басты амал ретінде ұстану. Айталақ, біреулеріміз диалектілік (жергілікти) сөздерді молынан еркін пайдалануды ұстансак, енді біре-

улеріміз жаңадан жасанды тұлғалармен тоқытыруды дұрыс деп табамыз, ізденушілердің бір тобы өзге тілдерден термин қабылдауды және қабылданған терминдерді (бірен-саран жай сөздерді де) жатсынбау, қолданыстан аластапауды жөн са-найды. Осылардың нәтижесінде бұл күнде диалектизмдерді, ауызекі сөйлеу тілі элементтерін: қарапайым сөздер мен фонетикалық өзгеше тұлғаларды әдеби айналымға түсіру, яғни оларды көркем әдебиетте ғана емес (бұлар көркем шығармаларда кейіпкер тілінде қолданыла беретін сөздер ғой), өзге функционалдық стиль үлгілерінде, әсіресе публицистика-да орын алу тенденциясы бары байқалады. Жергілікті тұлғалар мен қарапайым сөздерді активтендіру әуелі көркем әдебиетте, оның ішінде проза жанрында көзге түсіп отыр. Жазушылардың біреуінде сәтті қолданылған-ау деген сөзді екіншілері «қағып алып» кететіндіктері сезіледі. Мысалы, *пошым, бозымбай, бағамдау, сүркілу, кермалдасу, можантопай, усиқы, оңаза, мондыбас, құйыннерен* сияқты сөздердің біраз жазушылардың тілінде, тіпті газет-журнал беттерінде жиірек көріне бастауы осыны дәлелдейді.

Норма регламентациясына келгенде жасанды тұлғалардың да, оның ішінде тек аффиксация (журнақ жалғау) амалымен ғана емес, сөздерді біріктіру тәсілімен де жасау әлдеқайда жан-дана түскеніне назар аудару және оларды реттеу (мағыналық жағынан дұрыс-бұрысын, жүйелілігін салмақтау) – «тіл мәдениеті» бойынша журғізілетін шаралардың бірі және жау-аптысы.

Екінші. Тіл мәдениеті міндеттерінің ішінде кезек күттірмес маңызды шаруа о р ф о э п и я ғ а, яғни сөйлеу актісінде сөздерді дұрыс дыбыстыай (айта) білуге қатысты. Бұл салада жүзеге асырылған шаралар аз емес.

К.Неталиеваның «Қазақ тілінің орфоэпиялық сөздігі» (1977 жыл), М.Дүйсебаеваның «Қазақ тілінің қысқаша орфоэпиялық сөздігі (мектеп оқушыларына арналған, 1981 жыл)» сияқты сөздіктер ұсынылды, баспасөз беттерінде, радио мен теледидарда сөздерді дұрыс айту жайында макалалар жарияланып, әңгімелер еткізіліп келеді. Сөзді дұрыс айту нормаларын ба-яндал, ережелерін ұсынған біздің «Сөз сазы» (1-басылымы –

1983, 2-басылымы – 1995) атты құралымыз жарық көрді. Бірақ бұл іс-әрекеттер тенізге құйылған тамшыдай ғана. Бұл орай-да балабақшалардан, мектептерден бастап, мұғалімдер мен журналистерді, сондай-ак өнер адамдарын: театр актерлерін, әншілерді даярлайтын оку орындарында сабак беріп, үйрететін практикалық жұмыстармен қоса, орфоэпия проблемасының ғылыми-теориялық танымын арттыра түсетін зерттеулерді жүргізе түсуге мейлінше дең қою қажет.

Бұл орайда орфоэпия нормаларына жазудың тигізетін ықпалын айрықша ескеруге тұра келеді. Бұл күнде орфоэпия нормаларының жазудың құлдығына ұшырау қаупі бар. Дәлірек айтсақ, бір жағынан, орфоэпия ережелерінің нормала-ну процесінің әлсіздігінен, екінші жағынан, жазу дәстүріміздің күшті дамуы салдарынан сөздер қалай жазылса, солай оку (айту, дыбыстау) салты етек алып бара жатқаны да, сөз басындағы **о**, **е** дыбыстарын айтуда орыс тілінің әсері байқалатындығы да тіл мәдениетіне назар аударушыларды алаңдатады.

Үшінші. Радио, теледидар және баспасөз сияқты бұқаралық ақпарат құралдарының тіліне арнайы көніл аудару да тіл мәдениеті шаруаларының бірінен саналады. Бұқаралық ақпарат құралдарының тілі дегенде, олардың сөз таңдау жұмсау әрекеттерінен бастап, орфографиялық, орфоэпиялық нормаларды дұрыс қолдануларына назар аударылады. Бұлар өзгелерден екі есе көп жүк арқалайды: бірі – күнделікті газет-журналдар, сахна өнерпаздары, радио мен теледидар қызметкерлері тіл мәдениеті проблемаларын көтеру, тілдік нормаларды берік сақтау сияқты мәселелерді өздерінің тікелей насиҳаттауы, түсіндіруі, пікірталастар үйымдастыруы болса, екіншісі – сах-на мен радио, теледидар қызметкерлері орфоэпиялық норма-ларды қалың көшпілікке үйретуші ұстаз болуға міндетті, ал баспасөз қалың оқырман қауымының тілін ұстартып, жазу сауаттылығын көтеруге мейлінше зор қызмет етуге міндетті.

Төртінші. Шаршы топ алдында сөйлеу мәдениеті деген проблема да – жалпы тіл мәдениетінің бір пұшпағы, өйткені соңғы 5-10 жылға дейін (тіпті 4-5 жылға десек те болар) шаршы топ алдында қазақ тілінде сөйлеудің аясы тар болып келді. Съездерден бастап, мәслихат, мәжілістерде, жиын-жиналыстарда,

тіпті торқалы тойлардың салтанаты мен топырақты өлімнің азаларында айтылатын сөздеріміз, көбінесе, орыс тілінде болып келгені аян. Демек, соңғы 50-60 жыл барысында (ең кейін-гі 4-5 жылды қоспағанда) қазақ әдеби тілінде ауызша дұрыс, әсерлі, әдемі сөйлеу дәстүрін дамытатын «шаршы топ базасы» шағын болды, барларының өрісі тарыла берді.

Шаршы топ дегеніміз – көпке қаратса сөз айтылатын жер және ол сөз әлеуметтік мәні бар, қоғам мұддесіне арналған әңгіме (тақырып) болуы керек. Бұл сөзді шешенниң сөзі немесе «шешендік сөз» деп те атап жүр, бірақ бұлайша атағаннан гөрі оны «шаршы топ алдындағы сөз» (орысша «публич-ная речь») немесе «көпшілікке арналып айтылар сөз» деген дұрысырақ болар, өйткені қазақ ұғымында «шешендік сөздер» деп бұрынғы дәүірлерде өткен билер мен ел, ру басыларының, қыскасы, от ауызды, орақ тілділердің сөйлеу үрдісі танылады. Бүгінгі жиналыстарда (онда қатысатындар – «шаршы топ») шығып сөйлейтін қатардағы ұжым мүшесі мен, мейлі тіпті бастықтар мен кешегі билердің сөздері, әрине, бірдей емес. Бұл жерде әңгіме сөйлеуші қозғаган тақырыпта да емес, шаршы топтың үлкен-кішілігінде де емес, тыңдаушы топтың кімдер екендігі мен сөйлеуші шешенниң өз сөзін ұсыну (жеткізу) мәнерінде, дағдысында, қабілетінде, сонымен қатар екі дәуір шешендері сөздерінің мақсаты мен әлеуметтік жүргінің әртүрлі екендігінде.

Қыскасы, бұл жердегі айырмашылық бұрынғы бабаларымыздың шешендік өресі биік болып, қазіргі замандастарымыздың ауызша сөйлеу қабілеті төмен екендігінде деп кесіп айтпасақ та, бұл күнде топ алдында дұрыс, түсінікті, тіпті шешен сөйлеуге әлі дағыданып болғанымыз жоқ, замандастарымыздың ішінде бірен-саранымыз болмаса, көпшілігіміз топ алдында жазылып сөйлей алмаймыз. Бұл жерде айтпақ ойымызды дәл жеткіzetін сөздерді тауып алудан бастап, ойды жинақы, әсерлі етіп ұсыну, орфоэпиялық нормаларды сақтап, сөздерді бір-бірімен үндестіріп айту, ойымыздың логикалық желісін үзіп алмай, дұрыс құру сияқты толып жатқан шарттарды орындау-ға әлі машиқтанбай жатырмыз. Міне, бұл орайда да тіл мәде-ниеті діттейтін ғылыми да, практикалық та іс-қарекеттер баршылық.

Тек өзіміздің ғана емес, жалпы тіл білімінде, оның ішінде Еуропа, орыс тілдерін зерттеушілердің танымы мен пікірлері бойынша да, жоғарыда айтылғандарды былайша түюге болады:

«Тіл мәдениеті» – екі салада қолданылатын термин: бірі – осы тіркес білдіріп тұрган жалпы мағынада, атап айтсақ, әдеби тілді жазбаша және ауызша қолданғанда оның лексикалық, грамматикалық, орфоэпиялық, стильдік нормаларын сақтау; екіншісі – бұл терминмен тіл білімінің бір тармағы аталады, ол – тілді қатынас құралы мен ұлттық мәдениеттің қаруы ретінде дамыта тұсу үшін, оның нормалануын ғылыми негізде зерттейтін саласы. Тіл мәдениетін жалпы мағынада әңгімелегендегі, алдымен, оның қолданыстағы нормаларын (орысша «рече-вые нормы») сөз дұрыстығы, яғни тіл бірліктерін (сөздерді, тұлғаларды) дұрыс жұмсау және әсерлі, әсем етіп жұмсау деп бөліп қарастырылады. Тілдік нормаларды тек дұрыс қолданып қана қоймай, тіл құралдарын эстетикалық түрғыдан да әсерлі етіп жұмсай білу адамның жалпы кісілік мәдениетін, ой-парасатының дәрежесін, тілге деген ықылас-құрметті таныта-ды.

«Тіл мәдениеті» дегенді ғылым тармағы ретінде сөз еткенде, әңгіме тіл мәдениеті проблемаларын теориялық негіздерге сүйеніп зерттеу болып табылады. Демек, тіл мәдениеті – ғылыми және практикалық іс-қарекеттерді қажет ететін сала, яғни ғылымның тәжірибелен тығыз ұштасып жататын тармағы. Тілдің қолданылу барысындағы көріністер мен құбылыс-тар оларды ғылыми түрғыдан талдап-танытууды талап етсе, ғылыми түйіндер мен тұжырымдар қолданыс заңдылықтарын дәлелдеуге, дұрыс-бұрыстығын негіздеуге мүмкіндік береді. Тегі, тіл мәдениеті саласындағы практикалық іс-әрекеттер ғылыми негізdemelerden біраз бұрын жүріп жатады да жеке бір құбылыс ретінде әлеумет назарына ілінуі оны ғылыми не-тізде зерттей бастаған кезбен тұстас келеді.

Ғылым объектісі болғаннан кейін «Тіл мәдениетінің» теориялары, теориялық арқаулары болады. Тіл мәдениеті теориясының ең бастысы – тілдік норманы тану, талдау, зерттеуге қатысты. Тіл білімінің тіл мәдениеті тармағы нормативтік

грамматикамен, нормативтік фонетикамен және нормативтік стилистикамен ұштасып жатады, яғни қазіргі күнде норма деп танылған грамматикалық, фонетикалық заңдылықтар мен олардың қолданыстағы көрінісінің ұштастығы және сәйкестігі тілдік норма болып табылады.

Тіл мәдениеті теорияларының ішіне ұлттық әдеби тілге, көркем әдебиет тіліне қатысты ізденістер мен тұжырымдар да кіреді. Тіл мәдениетінің үлкен мәнге ие болып, қоғамның мәдени өмірінен орын алуы тіл дамуының барлық кезеңінде бірдей, біркелкі болмайды. Зерттеушілер дұрыс танығандай, тіл мәдениеті ұлттық жазба тілдің едәуір қалыптаса бастаған кезінде күн тәртібіне қойылады. Ұлттық тіл біршама дамыған кезеңдерінде де тіл мәдениеті проблемалары көтеріліп, көпшілік назарын өзіне аударатын тұстары да болады, ол – қоғамның әлеуметтік, саяси, мәдени тіршілігінде ірі өзгерістер, толқулар пайда болған тұсқа тұра келеді. Мұндай өзгерістерді әртүрлі революциялық дүmpулер, демократилық қозғалыстың бел алуы, соғыстар, техниканың күрт дамуы сияқтылар туғызады.

Қазактың ұлттық жазба әдеби тілінің қалыптаса бастауы XIX ғасырдың соңғы ширегіне тұстас келгенмен, бұл кезеңде тіл мәдениетін сөз ететін қазақ қоғамының әлеуметтік, ағартушылық, ғылыми базасы болмады. XX ғасырдың алғашқы онжылдықтарында оку-ағарту едәуір жанданып, баспа ісі жолға түскенімен, күнделікті баспасөздің ауқымы арта түскенімен, білім-ғылым салалары өмірге келгенімен, 60-70-жылдарға дейін «тіл мәдениеті» проблемасы таным-ғылым объектісі бола алмай келді.

Қазактың жазба әдеби тілі біршама бекіген, қоғамның ұлттық мұддесіне қызмет ету аясы едәуір кеңіген, функционалдық стиль тармақтары саралана түсken, білім-ғылымы едәуір дамыған кезі XX ғасырдың 50-60-жылдары болды, осы кез-де «тіл мәдениеті» мәселелері көтеріліп, жұртшылық наза-рына ұсынылды: Академияның Тіл білімі институтында ар-найы бөлім ашылды, мұнда ғылыми зерттеулер басталды, пединституттар мен университеттердің филология факуль-теттерінде тіл мәдениеті пәні оқытыла бастады, сөздің дұрыс қолданылуы диссертациялық жұмыс тақырыбына айналды,

орфографиялық, орфоэпиялық сөздіктер жарық көрді, әртүрлі анықтағыш күралдар ұсыныла бастады, тіл, сөз мәдениетіне арналған ғылыми-практикалық конференциялар өткізілді.

Ал 90-жылдардан бастап тіл мәдениеті проблемасына жүртшылық назары жаңа қарқынмен аударылғанын айта ала-мыз. Мұның объективті себебі – қазақ тілінің мемлекеттік тіл статусын алып, әлеуметтік қызмет өрісін кеңейту үшін қурестің басталғаны болды. Соңғы жарты ғасыр ішінде қазақ тілінің сөздік қазынасында орыс тілінің өз сөздері мен орыс тілі арқылы еніп жатқан өзге тілдік сөздердің, оның ішінде интернационалдық терминдердің шамадан тыс көп орын алып кеткені де жүртшылықты қатты алаңдата бастады. Бұл ретте шет тілдік сөздердің өздері ғана емес, қазақ лексикасының толығу көздері мен бағытының ұлттық тіліміздің даму тенденциясына көрі әсер ете бастаганы жүртшылық назарын аударды. Осы факторлар «тіл мәдениеті» проблемасының күрт көтерілуіне әкелді.

Жоғарыда айтылғандай, тіл мәдениетінің басты практикалық та, ғылыми да объектісі норма мәселесі болғандықтан, сол нормалардың мейлінше тұрақтылығын – консерватизмді жақтаушылар мен оған қарсылар болатыны белгілі. Осы орай-да пуритан күбылышының бар-жоқтығы көзге түседі. Пуритан дегеніміз – әдеби тілді, әсіресе оның сөздік қазынасын шет тілдік кірме сөздерден, тіпті жаңа жасанды тұлғалардан, ауы-зекі сөйлеу элементтері болып саналатын жергілікті сөз-диалектілерден, қарапайым сөздерден тазарту дегенді қостайтын ағым, күрес түрі. Қазақ әдеби тілінің алдыңғы кезеңдерінде, тіпті XX ғасырдың 20-30- жылдарының өзінде пуритан ағымы болған жоқ дегенді айтады зерттеушілер. Шындығында да, тіпті ертеден қазақ тіліне әр алтуан каналдармен: діни оку, мұсылман дінін ұстану, ортаазиялық түркі әдеби тілінің үлгісімен енген араб-парсы сөздерін, кейбір морфологиялық тұлғаларын (мы-салы, -кор, -паз, -гер, -и қосымшаларын) қолданыстан алас-тату әрекеттері болған жоқ, керісінше, арабизм, парсизмдерді жазба әдеби тілде, сондай-ақ ауызекі сөйлеу тілінде де кеңінен қолдану, тіпті жазба үлгілерде төл тұлғасын сақтап жазу тәжіриbesі XX ғасырдың орта тұсына, 40-жылдарға дейін орын алып келді.

Орыс тілінің және орыс тілі арқылы Еуропа тілдері сөздерінің қазақ тіліне молынан еніп, кеңінен қолданылуы ұлы Отан соғысы жылдарында (1941-1945) басталып, соғыстан кейінгі «коммунизмге тұра тартқан» жылдарда мұлде кең етек жай-ды. Таза туристік ағым болмағанмен, жаңа ұғымдар мен жаңа зат-бүйімдарды атауда ана тіліміздің өз қазынасын барынша пайдаланудың нақты әрекеттері (мысалы, I.Жарылғаповтың қазақша ұсынған *аялдама, балмұздақ, көкайдын* сияқты сөздері) 1960 жылдардан басталды. 1990 жылдардан бастап қазақ тілін «орысшылдықтан құтқару » ағымы тікелей саяси бағыт болмағанмен, күрес мазмұнына айналды, әлеуметтік пікір туа бастады. Мұны да, сірә, туризм ағымы деуге болмас, өйткені қазақ тілін өзге тілдік элементтерден (сөздерден, тұлғалардан, тіпті грамматикалық бірен-саран тәсілдерден) тазарту науқаны жүрген болса, лексикалық қазынамызыдағы жүздеген араб, пар-сы сөздерін, мындаған орыс және шет тілдік сөздерді бүгіндегі қолданып отырмас едік.

Сірә, бұл күндерде туризмнің бел ала алмай отырғаны – тілдің тарихи-өзгермелі құбылыс екенін мойындастындағы білім дәрежеміздің өскендігі болар, тілдің де заман ағымына, оның өзінде дүниежүзінде ғылыми-техникалық жаңалықтар қауырт пайда болып, дамып отырған осы күндердің ахуалы-на ілесуі қажет екенін және бүгінгі сауатты, білімді адамдарға қызмет етіп отырған қазақ тілінің бұл ұлы майданнан шеттеп қалмауы керек екендігін сезіп, түсініп отырғанымыз болар. Тіпті бүгінгі біздер түгіл, кешегі, 20-жылдарда қазақ тілі-не қызмет етіп өткен Халел Досмұхамедов сияқты ғалым-практиктер жат сөзсіз болмайтын заман тугандығын айтЫП: «Мәдениет қуған жұрттың алдымен тілі өзгермекші, білімге кірген жаңа сөздердің көбі шеттен кірген біліммен, әдетпен, заңмен жаңалықтарға ұғым беретін жаңа сөздер кірмекші, [олар] үлгіе алынған мәдениетті жұрттың сөздері болмақшы» – деп жазып, дүрыс көрсеткен болатын.

Туризм – табиғатында жаман ағым емес, миллиондардың «мұлкі» – тілдің сындарлығын, тазалығын сақтау ниетін көздейтін күрес амалы. Бұл күрес әсіресе қатар қолданысқа түсken тілдердің тенсіздігі байқалғанда, бірінің бел алып бара

жатқан тұстарында женіліп келе жатқан тіл үшін пайдалы қарекет екенін білеміз. Толыққанды үлкен пуризм болмағанмен, оның бірқатар белгілерінің бұл күнде орын алуын да жөнсіз деуге болмайды, тек ана тіліміздің тазалығын, сындарлығын, тұтастығын, көркемдігін қай сәтте, қай тұсында қалайша сақтау керектігін айырып тануымыз керек. Пуризм әрекеті ұран, құрғак сөз түрінде емес, нақты жұмыстар түрінде жүргізуін қалаймыз. Әрі қарай жеке тақырыптарды сөз ету үстінде пу-ристік пікірлердің түрлері мен оның жүзеге асырылу- асырыл-мау мүмкіндіктері сөз болып отырады.

Тіл мәдениеті проблемаларына оның алдында тұрған бүгінгі таңдағы міндеттері немесе жүргізілуге тиіс іс-шаралар да жатады. Ең басты міндет – қазақ тілі мәдениетін көтеру, жетілді-ру, насиҳаттау. Ол үшін ана тіліміздің сөздік қазынасын жақсы, дұрыс пайдалану қажет. Бұл жерде әңгіме еki-үш тұрғыдан айтылуға тиіс: бірі – ғасырлар бойы жасалып, сақталып кел-ген лексикалық көрді жұтатпай сақтау, толықтыру, ол үшін көне, сирек, жергілікті сөздерді жинап, бүгінгі қолданысқа жа-рамды деп табылғандарын әдеби нормага қосу. Әсіресе қазақ халқының ұлттық салт-дәстүріне, шаруашылық түрлеріне, табигаттануына, дүниетанымына, психологиясы мен халықтық философиясына қатысты сөздер мен тіркестерді, фразеоло-гизмдер мен мақал-мәтедерді жинап, ұмыт болғандарын хатқа түсіріп, мағыналарын түсіндіріп отыру.

Бұл ретте жүзеге асырылып келген жұмыстар жоқ емес. «Ана тілі», «Қазақ әдебиеті» газеттері 90-жылдардың ішінде «Төрт құбыламызды түгендейік», «Көзінің қараышығында» де-ген сияқты айдарлармен жоғарыда аталған салаларға жататын сөздерді, сөз тіркестерін тіркеп, олардың мағынасын түсіндіріп, қолданылатын тұстарын көрсетіп беру үрдісін қолға алды. Бұл ретте Ә.Нұрмамбетов, Ж.Бабалықұлы, Жәрдем Кейкін, Дәркембай Шоқпаров сияқты тілсүйер азаматтардың еңбегін атай отырып, осы үрдісті әрі қарай жалғастыра түссек. Бұл іске әсіресе Монголиядан, Қытайдан көшіп келген қаламгерлер: ақын, жазушы, мұғалім, журналист және тағы басқалары ат салысса, құба-құп болар еді, өйткені әр алуан себептермен біз-де, Қазақстанда, ұмыт болған немесе мүлде болмаған сөздер

мен фразеологизмдер бұлардың қолданысында кездесетіндігін байқаймыз, бірақ кейде олардың мағынасын тап басып айта алмаймыз. Қазақ халқы – дүниежүзінің көптеген елдерінде шашылып жүрсе де, тілі, діні, ұлттық рухы бір халық, сондықтан тіл қазынасын жинауда, толықтыруда әр киырдағы қазактардың сөз мәдениеті, тіл тәжірибесі орасан зор табыс болмақ.

Сөз мәдениетін реттеуге қатысты міндеттеріміздің бірі – соңғы онжылдықтарда қазақ тілінде орасан мол түрде жұмсалып келген орыс тілінен енген сөздерді сұрыптау. Әңгіме бұл жерде орыс тілінің өз сөздері және интернационалдық деп аталатын ғылыми және саяси-мәдени терминдер болып келетін сөздер деп бөліп қарастырып, көбінесе құнделікті тұрмыска қатысты орысша жай атаулардың қазақша баламасын табу туралы болуға тиіс. Ал ғылыми, саяси-әлеуметтік, мәдени-ағартушылық терминдерге келгенде, оларды жаппай қазақшалаудың мүмкіндігі жоқ екені сөз мәдениеті проблемасының бір ұшы болып саналады.

Бүгінгі қазақ тілі мәдениетінің өзекті де әлеуметтік-ғылыми мәні зор мәселесі – терминология жайы. Бұл тұста әңгіме – кір-ме терминдер, жасанды терминдер, сүйегі шет тілдік, бірақ «қазақыландырылған» терминдер туралы болмақ. Бұлардың да шешімі, сайып келгенде, норма проблемасына келіп тіреледі. 90-жылдардан бермен қарай терминология мәселелері баспасөз беттерінде жиі сөз болып, арнайы шакырылған конференция-мәслихаттардың күн тәртібіне қойылып, кеңінен талқыланған бастауы сөз нормасының бұл тармағына әлеумет назарына мықтап іліккенін білдіреді, бұл жөнінде әлеуметтік пікірлердің пайда болғаны – құптарлық құбылыс, әрі қарай осы пікірсай-ыстарды сұрыптап, дүрыстарын пайдаланып, терминдерге қатысты сөз нормаларын реттеу – тіл мәдениеті шаруасының бір тарамы.

Тіл мәдениеті тек сөз таңдау, сөз жасау, сөйлем құрастырудаған емес, сөйлеу актісінде сөздерді дұрыс айту нормала-рын сақтауға келгенде де айрықша мәнге ие болады, яғни орофоэпиялық заңдылықтарды көрсету, олардың сақталу және бұзылу сәттерінің себептерін анықтау, ережелерін ұсыну сияқты ғылыми-практикалық іс-әрекеттер де – тіл мәдениеті

міндеттерінің бірі және өзге салаларға қарағанда, істелер жұмысы көбірек, оларды жузеге асыру – қынырақ жүк. Бұл орайда іс тек орфоэпиялық заңдылықтарды ғылыми тұрғыдан зерделеп, ережелерін түзіп берумен шектелмейді, ол ережелер көрсеткен нормаларды қалың көпшілікке үйрету, насиҳаттау жұмыстары да алдымызға тартылады.

Емле, яғни сауатты жазу мәселесі – қай кезеңде де тіл-ді жазба түрде пайдалану барысында дұниеге келетін талап, орфографиялық нормалар да – бүгінгі таңда қайта қарастырап сәттері бар және ол сәттер лексикалық, грамматикалық нормалармен ұштасып жататын іс-қарекеттер. Латын жазуына көшу проблемасымен де астарласа қаралатын емле проблемасы – бүгінгі таңдағы ғылыми, әсіресе практикалық жұмыстарымыздың маңыздыларының бірі.

Тіл мәдениетінің және бір проблемасы – шаршы топ алдында ауызша еркін, дұрыс, шешен сөйлеудің шарттарын, тәсілдерін айқындау, үлгілерін көрсету, белгілерін танытатын ереже іспеттес құралдар ұсыну.

Міне, «тіл мәдениеті» деп аталатын ғылыми-практикалық үлкен жұмыстың проблемалары және сол проблемалар туғызатын міндеттері – қысқаша осындай. Әрі қарай бұл мәселелер жеке-жеке тақырып етіп, кенірек баяндалады.

Міне, тіл мәдениеті туралы жалпы түсінік, оның нысандары (объектілері) мен проблемалары, тәжірибе мен ғылымдағы анықтамасы (мазмұны), ғылыми-теориялық негіздері туралы қысқаша мәлімет – осындай.

Әрі қарай тіл мәдениетінің қолданбалық та, ғылыми да обьектісі – норма болғандықтан, сол нормаларды «лексикалық», «грамматикалық», «орфографиялық», «орфоэпиялық» деп тарамдап, әрқайсысының мән-мағынасын, қазіргі жай-күйін, алдағы бағыт-бағдарын сипаттаймыз. Норма және оны кодификациялау ісінде өзекті мәселе – вариантылық құбылысы болғандықтан, бұл тақырып та өз алдына бөлек әңгімеленеді, лексикалық нормалануда бүгінгі терминология жайы айрықша орын алатындықтан, ол да арнайы сез болады.

ТІЛДІК НОРМА ТУРАЛЫ ҰФЫМ

Әдетте «норма» сөзін терминдік мағынада емес, қалыпты бейтарап сөз мәнінде жұмсасақ, белгілі бір «тәртіп, жүйелілік, дұрыстық» деп ұғынамыз. Ал тілге келгендегі бұл сөздің ұғымы «жалпы тәртіптілік» дегенмен қоса, терминдік мәнге ие болатындығы мәлім.

Норма – тілдің «туа біткен» қасиеттерінің бірі іспетті. Ол белгілі бір реттілік, жүйелілік құбылыс ретінде ауызекі сөйлеу тіліне де («халықтық тілге» де), әдеби тілдің ауызша қолданысына да, жазба тілге де тән.

Тілдік норманың табиғаты екі түрлі: бірі – тілдің өзінде қалыптастан нормалар және ереже бойынша ұсынылған нормалар. Соңғыларды «ереже бойынша» деп атауымыз шартты. Бұл жердегі «ереже» дегеніміз – грамматика оқулықтары мен әр алуан сөздіктер, анықтағыштар т.т. Мысалы, қазақ тіліндегі септеу, жіктеу парадигмалары, сын есім шырайлары, етістіктің етіс тұлғалары, шақтық мағыналары, жұрнақтар арқылы жаңа сөздің жасалуы сияқтылар «туа біткен» – яғни өте ертеден тілдің өзінде қалыптастан, әбден орнықкан, тілдің өз табиғатына тән жүйеге айналған заңдылықтар. Ал мен (*pen, ben*) шылауын қосымша ретінде танытып, 7-көмектес септіктің көрсеткіші деп ұсыну, оны септік парадигмасының өзге жалғаулары сияқты сөзге қосып жазу нормасы – «қолдан жасалған», яғни ережемен реттелген норма. Сол сияқты екі түбірдің ұзақ уақыт бойы бірігіп айтыла-айтыла, дыбыста-луы жағынан кірігіп (өзгеріп, қысқарып), бір мағынаны біл-діретін бір лексикалық тұтастық (бірлік) ретінде қалыптасуы

– тіл табиғатының өзінде пайда болған норма; мысалы, *бұғін* (бұғ+күн), *быыл* (бұғ+ыыл), *әкел* (алып+кел), *tурегел* (тұра+кел), *қайтін* (қалай+етіп), *сөйтін* (солай+етіп), *белбеу* (бел+бау) де-ген сөздердің о баста екі түбірден бірігіп пайда болған сөздер екенін бірден сезе бермейміз, өйткені бұлар – тілдің «о бастан келе жатқан» нормативті дүниелері, ал *өнеркәсіп*, *кәсіподақ*, *ойталқы*, *жолсапар*, *гулдесте*, *гулшианақ* сияқты тіркестерді біртұтастық деп тану – ереже арқылы ұсынылған нормалар, яғни бұларды біріккен сөз деп біріктіріп жазу бүгінгі лексика-семантикалық, орфографиялық нормалар болып шығады.

Әрине, «реттілік, жүйелілік» дегеннің өзі тіл қолданысының көрсетілген түрлерінде болсын, тілдің әлеуметтік-тариhi қызмет барысында (тарихында) болсын, біркелкі, бір сипатта болмайды, оның үстіне нормалылықтың белгісі тілдің лекси-ка, грамматика, тіпті фонетика сияқты қаттауларының бірін-де «көрінеу», «қатаң» болып тұрса, екіншілерінде «солқыл-дақтау», «босандау» болып келуі және заңды. Мысалы, ауызекі сөйлеу тілінде жалғаулық шылаулардың қолданылуы си-ректеу ұшырасады, олардың орнын интонация немесе син-таксистік құрылым сияқтылар басуы мүмкін: *дәрі iшин алдым*

— *басым ауырып тұр*, бұл — ауызекі сөйлеу актісінде, ал жалпы кодификацияланған ереже бойынша: *дәрі iшин алдым, өйткени басым ауырып тұр* немесе *дәрі iшин алдым, себебі басым ауырып тұрганы* деп құрылуы тиіс.

Сол сияқты сөз вариантының еркіндеу қолданылуы ауызекі сөйлеу тілінде де, шаршы топ алдындағы сөзде де жазба әдебиет тіліне қарағанда жиірек орын алады. Бұл жерде лексикалық норманың «босандығының» ғана емес, стильдік талаптың да рөлі болады. Айталық, ауызекі сөйлеу тілінде дөрекі, қарапайым, жергілікті сөздер және бөгде тілдік сөз қатары әлдекайда еркін жұмсалса, жазба тілдің шаршы топ алдындағы қолданысында немесе публицистикалық үлгілерде (газет-журнал беттерінде) бұлардың орын алуы мейлінше шек-теулі, жоққа тән болуы керек, бірақ мұның барлығы да өз орын-дарында, өз салаларында норма болып табылады.

Жалпы әдеби тіл мен сол тілдің көркем әдебиетінің нормалары да бір емес, соңғыда әдеби нормадан «ауытқу» сияқты болып көрінетін сәттер аз кездеспейді, бірақ бұл «ауытқулар» көркем әдебиет тілі үшін норма болып саналады. Мысалы, шылау-жалғау болып қызмет ететін *мен (мен, бер)* тұлғасының *менен (менен, берен)* варианты, есімшенің **-тын (-тін)** де-ген көрсеткішінің **-тұғын** болып қолданылуы, *едім, келіп, айтқанмын* сияқты етістіктердің *ем, кеп, айтқам* болып кездесуі — публицистикалық, ғылыми және кеңсе-іс қағаздары стильдері үшін норма емес болса (оны М.Балақаевтың жал-пы әдеби тіл үшін бейнормалық санауы — жансақтық), көркем әдебиет, әсіреле поэзия тілі үшін — норма. Егер бұлар — әдеби

тіл үшін бейнормалылық, ауытқушылық болса, ұлы Абайдың өлөндөрі мен қара сөздері әдеби тіл үлгісіне жатпаған болар еді, өйткені көрсетілген тұлғалардың барлығы ақынның поэзиясы мен прозасының тілінде «тұнып тұр», оларды Мұхтар Әуезовтің «Абай» эпопеясы сияқты көркем туындылары мен көркем публицистикасы тілінен де молынан кездестіреміз. Демек, әдеби тілдік нормаларды тілдің функционалдық стильдеріне қарай ажырату қажет: бірінде қатаң болып келетін норма екіншілерінде босандайды (ауытқу сияқты болып көрінеді). Бірақ қай-қайсысы да – өз саласында норма, яғни уәжді, орын-ды қолданыстар болып танылады.

Сөйтіп, жүйелілік, реттілік болып танылатын норма – тілдің барлық көрінісінде, яғни қолданысының барлық түрінде орын алатын тілдік, әлеуметтік категория.

Тілдік норма дегеніміз – көпшіліктің қатынас құралы ретін-дегі тілдің қолданысында оның әлдеқайда орныққан, дәстүрлі құралдары, амал-тәсілдері, тәртіпптері; норма – тілдің қай-қайсысының да даму (қызмет ету) кезеңдерінің баршасына тән құбылыс.

Норма деп тану үшін «әлеуметтік бағалау», яғни сол тіл-де сойлейтін қалың жүртшылықтың «дұрыс не дұрыс емес, жағымды, әсем не жағымсыз, орынды не орынсыз» деген танымы, бағасы болуы керек. Нормалылық танымына тұрақтылық (стабильность), дәстүрлілік, көпшілікке біршама ортақтық бел-гілер де кіреді. Бұлар – тілдегі нормалылықтың әлеуметтік ка-тегория ретіндеңі белгісі.

Тілдік норма құбылысын зерттеушілердің айтуына қаранда, норма мәселесіне тек сөздердің, грамматикалық амал-тәсілдердің, тілдік құрылымдардың жүйелі түрде, біршама орныққан, көпшілік дұрыс, әсем деп тапқан қолданыстары ғана емес, осындағы қолданыстардың таңдалып алынуы мен қолданыс барысының тенденциясы, яғни бағыт - бағдары, өмір шенідігі, уәжділігі, әлеуеті (потенциалдығы) деген мәселелер де кіреді. Сондықтан «қазақ тілі мәдениеті», оның «тілдік нормалары» деген проблемаларын сөз еткенде, бұл салаға қатысты зерттеулер жүргізіп, мақалалар мен диссертациялар жазғанда, кітаптар мен құралдар ұсынғанда, бұларға байла-

нысты мәселелердің тек бүгінгі күй-жайы, бары-жогы туралығана емес, әрі қарайғы барысы мен бағыты да сөз болуы ке-рек. Тілдік нормалардың өзін ғана көрсетіп қою, яғни бүгінгі лексикалық, грамматикалық, стильдік нормаларды атап, әр алудан ережелер жинағы мен сөздіктер түзу – жеткіліксіз. Бұлардың әрі қарайғы қолданылу, қырналу, өзгеріс-жаналықтарға ие болу бағыты (тенденциясы) қандай деген пікірлер мен ұсыныстар болуы қажет. Әсіреле жазудың жаңа түріне – латын графикасына көшуге дайындық барысында да, көшу процесінде де, ол жазуды өмірде, тәжірибеде орнықтыру жұмыстарында да тілдік норма мәселелері айрықша мәнге ие болары сөзсіз, бұл орайда орфографиялық және орфоэпиялық нормаларды бірден дұрыс көрсетудің, оны қолданыста берік орнықтырудың тек тілдік емес, әлеуметтік маңызы өте зор болмақ.

Қазақ емлесі мен сөзді дұрыс дыбыстауга қатысты күні бүгінге дейін орын алғып келген қындықтардың түптөркіні 1929 жылы араб жазуынан латынға, 1940 жылы латыннан кириллицаға көшкен кезде әрі қауырттықтан (екі сәттің де саясат тоқпағынан «от ала келгендей» тездікпен орындалғанын білеміз), әрі сол кезде тіл, жазу, сөзді дұрыс айту мәдениеті дегендердің ғылыми танымдары қалыптаса қоймағандығынан туған жайттарда жатқанын айту керек. Тіпті бұл күндердің өзінде тіл мәдениетінің, оның өзекті проблемасы – норма дегеннің теориялық негіздері түгел қаланып, практикалық шешімдері түгел жүзеге асып болған дей алмаймыз.

Норманы сөз еткенде, әрдайым оның жалпы ұғымын, мән-мағынасын әңгімелеп қана қоймай, оны ажыратып (дифференциялад) қарастыру керек: әуелі ауызша тіл мен жазба тілдің нормалары, сондай-ақ функционалдық стильдердің әрқайсысының нормалары дегендерді бөліп-бөліп алу қажет. Әрине, бұл нормаларды бір-бірімен астаспайтын, бірімен-бірі байланыспайтын оқшау-оқшау автономиялар деуден ғөрі, түптамыры ортақ «үлкен үйден» өрген отаулар деп таныған жөн, өйткені әдеби норманың өзегі (ядро) – стильдік жағынан бейтарап, «көпшілік қолды» тіл элементтері болады. Барлығы жиылып келіп бүгінгі ұлттық әдеби тілдің, оның ауызша және жазбаша түрлерінің қолданылу жүйесін, тәртібін білдіреді.

Сондыктан, зерттеушілердің танымына қарағанда, тілдегі нормалылық үш тағанға орналасады: бірі – қандай да бір нор-ма, негізінен, сол тілдің табиғатына, құрылымына сәйкес бо-луы, екінші – қатынас құралы ретінде көшілікке ортақтығы, қайталаңып келіп отыратындығы, үшінші таған – белгілі бір кезеңдегі әлеуметтік талғамның сол қолданысты дұрыс деп тануы. Соңғы таған ол нормаларды макұл деп тануға, кодификациялауға алып келеді. Тілдің өзінде болатын табиғи норма мен кодификация – тепе-тең құбылыстар емес, кодификация дегеніміз – сөздерді орнымен қолдануды, сөзжасам тәртіптерін, сөз өзгерту жүйесін, сөздері тіркестіру мен сейлем құрастырудың ережелерін заңдастырып, қалыптастырып хатқа түсіру, басқаша айтқанда, қабылданған тілдік нормалардың окулықтарда, сөздіктерде, анықтағыштарда әр алуан ереже-лер түрінде ұсынылуы. Бірақ кодификация дегеннің өзі де – қатып қалған зат емес: азды-көпті орын алып жататын өзгеріс-жаңалықтарға байланысты және экстралингвистикалық факторларға орай уақыт озған сайын кодификацияның да ішінара қырналышып, өндөліп, толықтырылып отырылуы – заңды.

Тілдік нормалардың анықтала, тұрақтана түсіу және олардың әлеумет тарапынан макұлдануы, осылардың нәтижесінде қалыптастырылып хатқа түсінің – кодификациялануының бүгінгі қазақ тілі үшін мәні өте-мөте зор. Мемлекеттік мәрте-беле ие болып, әлеуметтік қызмет өрісі кенеңе түскен бүгінгі тіліміздің лексика-фразеологиялық қазынасы молығуда; сөз жасаудың грамматикалық, семантикалық мүмкіндіктері қүшешінде; функционалдық стильдердің белгілері анықтала түсіде; тілдің ауызша жұмсалу процесінде орфоэпиялық заңдылықтары айқындалуда; жазу мәдениетіне, яғни ғылыми негізде түзілген орфографиялық нормаларды жүйелі сактау талабы алға тартылуда – міне, осылардың баршасы тіліміздің лексикалық, грамматикалық, стильдік, орфографиялық, орфоэпиялық нормаларының макұлданған, заңдастырылып хатқа түскен кодификациясын жақсы көрсетіп, дұрыс танытуды қажет етеді.

Жалпы тілдің өзінде қалыптасқан нормалар мен кодификацияланған, оның ішінде ереже бойынша ұсынылған нормалардың арасында айырма болады. Тілдің өз нормасы – әлдеқайда тұрақты, көбіне-көп ұзақ сакталатын құбылыс, ал

кодификацияланған норманы бұзып қолдану тәжірибеде аз кездеспейді.

Тілдік нормаларды тіркең, реттеп жүйеге келтіріп отыру және оларды кодификациялау – жазба әдеби тілдің шаруасы (бұл қағиданы орыс тіл білімпаздары баса айтады³). Бұған қазақ тілінің 1940 жылы кириллицаға көшкен кезінен бермен қарай алғашкы орфографиялық нормаларының екі рет: 1957 және 1983 жылдары елеулі түзетулермен жаңғырғаны дәлел бола алады, соған сәйкес түзіліп, жарық көрген емле сөздіктерінің (оларды «Орфографиялық сөздік» деп ғылыми түрде атап көлеміз): 1941, 1948, 1963, 1968, 1972, 1978, 1988 жылдары жарық көрген басылымдарын жай көзben салыстырып қарағаның өзінде, оның ішінде толық түрде ресми басылым ретінде алғашқысы 1963, екіншісі 1978, ең соңғысы 1988 жылдар үш рет түзетіліп, толықтырылып басылған емле сөздіктеріндегі сөзтізбеле (реестрде) берілген сөздердің түрлері, ұяда берілген тіркестер, кейбір сөздерге қосымша жалғану үлгілері арасында айтарлықтай өзгерістер бар екені де жоғарғы пікірдің айғағы болады.

Кодификацияланған нормалардың азды-көпті өзгеріске ұшырап отыруы – тәжірибе талабынан туған занды құбылыс болса, тілдің табиғи өзінен туындастын құрылымдық модельдерден ауытқушылық та орын алып жататындығын айтуға болады. Мысалы, жіңішке сөзге немесе соңғы буыны жіңішке дауыстыға аяқталатын сөздерге казақ тілі қосымшаларының да жіңішке түрде жалғануы – табиғи норма, құрылымдық модель. Айталық, *куна* – *куналі*, *кунасіз*, *куә* – *куәлік*, *Кұлаш* – *Кұлашиңіц*. Ал кейбір қосымшалар, мысалы, барыс жал-ғауы немесе етістік тудыратын **-ла/-ле, -да/-де, -та/-те** жүрнағы жуан түрде жалғануға бейім: *куналау*, *Кұлашиқа*, *куәландыру*. Мұндай ауытқуларға емле ережелерінің де тигі-зетін ықпалы бар, яғни *кунаға*, *куәландыру* деп жазу нормасы солай дыбыстауға дағдыландырады және оны орфоэпиялық норма ретіндегі тұралғанда түседі. Қазақ тілінің үндестік зандылығын бұзып ұсынылған нормалар әсіресе кірме сөздерге, кірме элементтерге (жүрнақтарға) қатысты болып

³ Костомаров В.Г. Культура языка и речи в свете языковой политики //Язык и стиль. - М., 1965; Пешковский А.М. Объективная и нормативная точки зрения на язык // Избранные труды. - М., 1959.

келеді. Мысалы, кірме **-паз**, **-қор**, **-қой** жүрнақтары жіңішке сөздерге де осы жуан түрінде жалғанады немесе **-гер** деген жүрнақ жуан сөздерге де жіңішке жалғанады: *әнерпаз*, *сәнқой*, *шайқор*, *саудагер*. Сірә, бұл тәрізді сәйкессіздіктер, яғни қазақ тілінің ұндастік зандарына бағынбай қолданылуың уәжінде (мотивациясында) тілдің өзіне тән кейбір модельдер жататын болуы керек. Айталық, **-мен** (**-бен**, **-пен**) көмектес жалғауының (оның түп-төркіні шылау екені мәлім), **-нікі** (**-дікі**, **-тікі**) қосымшасының жуан вариантының, **-қой** (*сәнқой*) сияқты бірен-саран жүрнақтардың жіңішке вариантының жоқтығы бұлардың да қазақ тілінің фонетикалық нормасына сай келмей-тінін көрсетеді. Ал бұларды сөзден ажыратылмайтын қосымша деп танып, біріктіріп жазу – кодификацияның жемісі.

Тілдің өзіне тән табиғи нормасы мен ереже арқылы ұсынылып кодификацияланған нормалардың айырмасы жазба тілдің қолданыс тәжірибесінде едәуір байқалады. Мысалы, сөз соңындағы **қ**, **қ**, **п** сияқты қатаң дыбыстардың дауысты дыбыстан тұратын немесе дауыстыдан басталатын қосымшалар жалғанғанда ұяндауы – қазақ тілінің табиғи нормасы, ал қазіргі жазба әдеби тілімізде: *цех* – *цехы*, *шах* – *шахы*, *принцип* – *принципi*, *сан* – *санында*, *тарих* – *тарихы*, *тип* – *типi*, *грипп* – *гриpi* (жұқты) болып айтылуы және солай жазылуы осы нормалардың түр. Сірә, бұл ауытқулыққа бірнеше фактор себеп болса керек: біріншіден, **х** дыбысының қазақ сөзінің соңында қолданылмайтындығы оны **қ**-ның қатарына жібермей, қатаң түрінде сактауға итермелейтін сияқты, екіншіден, *таригы*, *шагы*, *цегы*, *сабы*, *тиби*, *грибi* деп дыбыстау бұл сөздердің (көбін кірме элементтердің) тұлғалық төркінің өзгерітіп, мағынасын түсінуге киындық келтіретін қаупі де туатын болу керек, үшіншіден, соңғы қатаң дауыстыларды ұяндатпай жазу емлесі де қатаң түрде дыбыстауға, демек, осылайша нормаландыруға алып келген сияқты. Араб жазуын, тіпті 1929-1940 жылдар ішінде латын жазуын пайдаланған кезде бұл сөздердің соңғы дыбысы ұяндалап айтылуы мен жазылуы орын алған болар.

Демек, уақыт озған сайын, әсіресе жазба тіл тәжірибесінде «норма ауысуы», «нормалар варианты» (немесе «вариантты нормалар») деген құбылыстар пайда болатынын байқаймыз. Норма ауысу актісі, әрине, түбөгейлі емес, жеке нормалардың

өзгеруі түрінде болады және бір сәттік акт емес, ол ұзағырақ уақытты алады. Мысалы, үстіміздегі ғасырдың бас кезінде-гі жазба әдеби тіліміздің өзінде *дереже*, *және*, *қазір*, *магына* сияқты сөздер қазіргіден басқаша түрде айтылып, жазылып келді: *даражса*, *жаңа*, *кәзір*, *магана*. Бұлардың айтылу, жазылу нормасы едәуір ұзак уақытқа созылды. Мұның ізін кейбір фонетикалық дублеттердің, лексикалық, орфографиялық вариантардың осы күнге дейін орын алғып келе жатқанынан көріп байқаймыз. Мысалы, *адал* – *алал*, *зарар* – *залал*, *ақиқат* – *хақиқат*, *өмір* – *ғұмыр*, *бейіл* – *нейіл*, *гаділет* – *әділет*, *газиз* – *әзіз*, *диірмен* – *тиірмен*, *нәсін* – *несібе*.

Әдетте жаңа норма есіресе лексика саласында әдеби жазба тілдің өзінде емес, ауызша қолданыста пайда болады. Мысалы, бұл күнде қазақ жазушылары тілінде – көркем әдебиетте, тіпті ішінара публицистикалық ұлгілерде қолданыла бастаған *пышым*, *толайым*, *дей тұрганмен* сияқты сөздер немесе *барады* емес *пе* (бармай ма деудің орнына) сияқты, сондай-ақ *барғысы* жоқ, *айтқысы* жоқ тәрізді грамматикалық құрылымдар о бас-та ауызша сөйлеу тәжірибесінде орын алғып, бірте-бірте жазба ұлгілерге ауысқан. Бұл фактілер жарыспа нормаларды таныта-ды.

Нормалардың ауысуы мен жарыспа түрлерінің пайда болуында тілдің өзі туғызған мотивтермен қатар, экстралингвистикалық факторлар себеп болады. Мысалы, араб, парсы тілдерінен енген кейбір сөздердің вариантылығы тілдің өз зандалықтарына сәйкес пайда болғандары мен жазба дәстүрді сақтау сияқты түпнұсқалық вариантын қолдану қатар жүріп келді: *есен* – *қисап*, *хұкімет* – *укімет*, *амал* – *ғамал*, *өмір* – *ғұмыр*, *гашиқ* – *асық*, *әрекет* – *харекет*. Бұл қатарға күні бүгінге дейін орын алғып келе жатқан фонетикалық дублеттердің қосуға болады: *бәле* – *пәле*, *бәлі* – *пәлі*, *нейіл* – *бейіл*, *бенде* – *пенде*, *гаунар* – *жасаңар*, *гашиқ* – *асық*, *дағуа* – *дауа*.

Лексикалық та, фонетикалық та жарыспа тұлғалардың дені – кірме элементтер, оның ішінде де араб, парсы сөздері болып келеді. Дегенмен төл сөздердің арасынан да вариантылық құбылысын кездестіре аламыз: *дәнеңе* – *дәнeme*, *бірдеңе* – *бірдеме*, *бұндаі* – *мұндаі*, *бұниша* – *мұниша*, *едірею* – *еҗірею*, *жәбір* – *зәбір*, *жұбану* – *уану* т.т.

Бұл қатарлардың XIX ғасырдың II жартысы мен XX ғасырдың алғашқы онжылдықтарында кезектесе, бір мәтіннің ішінде екеуі де қолданылғанын көрсек, бұл қүндегі қолданыста қатар сыңарларының жеке-жеке лексикалық-семантикалық бірлікке (сөзге) айналуы, дәлірек айтсақ, айналдырылуы орын алып келе жатқанын айта аламыз. Бұлар жөнінде толығырақ «Варианттылық және норма» деген тарауда сөз болады. Норма проблемасындағы варианттылық мәселесі осы жерден келіп шығады. Варианттылық – тіл мәдениетінің, яғни нормалану процесінің ең өзекті бөлігі.

Зерттеушілердің байқауынша, норманың күші, яғни қатаң сакталуға тиіс тұстары тілдің барлық қаттауында бірдей емес. Айталық, қазақ тілінде орфографиялық, грамматикалық, пунктуациялық нормалар (ережелер) қатаң сакталады, ал сөздерді таңдауда, жұмысдауда норма зандылықтарына біршама еркіндеу қарашылық байқалады. Лексика саласында, біздің-ше, қатаң ұстануды керек ететін тұс – сөздердің тіркесу тәртібі. Айталық, кейбір есім сөздер, етістіктер, көмекші есімдер тек қана немесе көбінесе жағымсыз мағына беретін сәттерде, енді біреулері жағымды мағына беруде тіркеседі: мысалы, *арқасында* деген көмекші есім тек *жағымды мағынада айтылатын тұста* келеді: *табыстың арқасында, денсаулықтың арқасында, байлықтың арқасында*, ал *кемішліктің, шығын-ның, сәтсіздіктіңарқасында, науқастың арқасында, қайырылықтың, кедейліктің, бейшаралықтың арқасында* деп айтылмайды. Тағы бір мысал: қазақ тілінде көптеген тіркестердің етістік компоненті тек қана болымсыз түрде келеді: *көз алмау, көз айырмау, үйқы көрмеу, күн көрсетпеу, шаңын көрсетпеу*. Бұлардың *көз алу, көз айыру, үйқы көру, күн көрсету, шаңын көрсету* деген қарама-қарсы оппозициялық қатарлары жоқ. *Tac қараңғы* деген консервленген тіркес бар, оның *mac жарық* оппозитиві жоқ.

Орыс тілінде ең қатаң және бұзылғаны көзге ұрып тұратыны – сөздегі екпін нормасы болса, қазақ тілінде – сөздің ұнdestік зандарын сақтап айтылуы. Бұл тұста әсіресе қатаң /ұян, еріндік /езулік дыбыс зандарын бұзып айту – орфоэпиялық нормалардан ауытқу ретінде көзге тұседі, құлаққа естіледі. Қалыптасқан тұрақты тіркестердің, мақал-мәтелдердің компо-

ненттерін уәжсіз (себепсіз) ауыстырмай қолдану да – қазіргі қатаң сақталуға тиіс лексика-фразеологиялық нормалардың бірі. Айталақ, «жел *tұrmаса*, шөп басы қымылдамайды» деген мәтелдің жел *соқпаса*... деп өзгертіп жұмсағанда, мәтелдің мағынасында аз да болса логикалық сәйкесіздік байқалады: желдің тұруы мен соғуы дегенде жел екпіні екі түрлі беріледі: желдің тұруы – жалпы онын пайда болуы, соғуы – біршама қарқынмен келуі. Мәтел үшін желдің қарқынды соғуын емес, әйтеүір пайда болуын, сәл байқалуын айту керек, өйткені бұл мәтел «бір нәрсениң пайда болуында сәл болса да себебі, белгісі, негізі сезілуі керек» дегенді анфартады.

Ал стилистикалық нормаларға келсек, бұл жерде оларды сақтауда қатаңдықтан гөрі, стильдік мақсат көздейтін уәж-ділік басым түсіп жатады. Мысалы, жазушы Сейдахмет Бердіқұловтың спортшылар туралы жазған көркем шығармасының бірінде «велосипедшілер құйысқан тістесіп бара жатты», тағы бір тұсینда «екі велосипедші үзенгі қағыстырыды» деген сейлемдерді оқимыз. Егер фразеологияларды орнымен қолдану нормасына келсек, үзенгі қағыстыру да, құйысқан *тістесу* тіркесі де салт атты адамдардың шабысына қатыстығана айтылуы керек, ал велосипедтерде құйысқан да, үзенгі де болмайды, соған қарамастан, бұл жерде норманы берік ұстану емес, стильдік мақсат алға шығып тұр: жазушы бұл «қазақы» фразеологизмдерді қазіргі техника көлігіне жаңастыра қолдануы арқылы оқырман сезіміне он әсер ететін образдар жасап тұр. Велосипедші қазақ жігіті – Тұйғынның жарыстағы күресі, күйі, психологиясы дегендеге «қазақы» үн берген, бұл жердегі ұлттық бояу осы шығарманың тұтас өн бойындағы көркемдік стиліне сай келеді, яғни дәл осы қолданыс осы шығармада ұтымды, қолайлы деп танылған. Бұл жерде сти-листика тұрғысынан сөзқолданыстың нормаға сай дұрыстығы емес, қолайлылығы, ұтымдылығы көзделген.

Норма туралы тұсініктің ішінде, яғни оны бағалауда «дұрысы/дұрыс емесі», «сәттісі/сәтсізі», «дәл/дәл емес» деген танымдар жол алады.

Әдеби тілдік норма тілдің даму барысының әр кезеңіне қарай айқындалуы керек. Тілдің құрылымдық табиғи нормалары негізінен қай кезеңде де турақты болып келеді. Бірақ

ішінара тілдің құрылымдық зандары да өзгеріске ұшырауы мүмкін. Мысалы, қазақ тілінде *туралы, үшін* шылаулары біздің кезеңімізге дейін, яғни XX ғасырдың 20-30-жылдарына дейін ілік септікегі сөзбен менгеріліп тұрды: *менің үшін, оның туралы, баланың үшін, баланың тұрасында*> *баланың туралы*. Қазіргі норма бойынша *мен үшін, мен туралы, бала үшін, бала туралы* деп атау тұлғасындағы сөзбен қабысады. Демек, тілдік норманың қалыптасу, даму, өзгеру тарихын зерттеу барысында болмаса, жалпы сөз еткенде, нақты бір кезеңді алғып қарастыру керек болады. Мысалы, біз осы жұмыста қазақ әдеби тілінің қазіргі, яғни соңғы 70-80 жылдың барысындағы жай-күйін әңгімелеп отырмыз.

Сөйтіп, қорыта айтқанда, әдеби тілдің нормасы дегеніміз – қоғамның белгілі бір кезеңдегі әдеби тілді жазба және аудызша түрде қолдану тәжірибесінде қалыптасқан, көпшілік қауым дұрыс деп таныған, жалпыға ортақ сөз қолдану, сөйлем құрастыру, сөз жасау, сөзді дұрыс дыбыстау, сауатты жазу занылықтары, яғни тілдік амалдарды дұрыс жұмысаудың көрінісі. Тілдік норманың құрылымдық табиғи түрлері және ереже бойынша ұсынылған түрлері болады. Олардың қай-қайсысы да, әсіресе соңғы түрлері – тандаудың, сұрыптаудың және өңдеудің жемісі. Тілдік нормалар, тілдің өзі сияқты – тари-хи-өзгермелі құбылыс. Тілдің қолданылу тәжірибесінде әбден қалыптасып, біршама (яғни сол кезең үшін) тұрақтандырылған ереже-қағидаларды норманың эстетикалық және pragmatika-лық теориялары негізінде жүйелеп зандастырылуы олардың кодификациясы деп аталады. Тілдік нормалардың кодифи-кациясы мектеп окулықтарында, әр алуан орфографиялық, терминологиялық, түсіндірме, екі тілдік, үш тілдік сөздіктерде, анықтағыш құралдарда баяндалып, хатқа түседі. Аталған сөздіктердің басым көпшілігі нормативтік сипатта түзіледі. Олардың сөзтізбесінде орын алатын нормативтік емес элементтерге «диалектизм», «жаргон», «қарапайым сөз», «арго», «көне» деген сияқты белгілер қойылады.

Осы ұсынылып отырған кітап тіл мәдениетінің өзекті мәселесі – қазақ тілінің әдеби нормаларын айқындаپ, оның ко-дификациясын көрсетуге арналады.

НОРМАНЫҢ ӨЛШЕМ-ШАРТТАРЫ (КРИТЕРИЙЛЕРІ)

Тілдік норма деп тану үшін оған қойылатын шарттар (меже) болуы керек. Бұл шарттарды «норма» дегенді көтеріп тұратын тағандар десек те болар.

Шарттардың бірі – норма сол тілдің табиғи, құрылымдық өзіндік (ішкі) зандалықтарына сәйкес болуы керек, яғни тіл-дің грамматикалық құрылышының, сөзқолданысының, сөзжасмының, мағына құбылтуының, сөз сазының табиғи зандарына қайшы келмейтін тұлға-тәсілдер норма болып санала-ды. Мысалы, бұл күнде жанданған (активтенген) бірқатар жұрнақтар арқылы жасалған сөздердің норма болып танылуы – осы модельдің тілдік жүйеде бүрыннан бар екендігіне қатысты. Айталақ, адамның қызмет түрін, кәсібін, мамандығын біл-діруде -шы жұрнағы тек қазақ, араб, парсы сөздерінен емес, орыс тілінен енген сөздерден де жаңа тұлғалар жасайды: *тракториши, комбайнши, футболиши* дегендерді былай қойғанда, бұл күнде *гипнозиши, памфлетиши, парашютиши, саботажиши, парламентиши, газетиши* сияқты ондаған туынды сөздің еркін жасалуына жалпы тілдік модель (улғі) негіз болған, яғни бұл сөздерді қазақ тілі табиғатын бұзбайтын нормадағы тұлғалар деп табу керек.

Әрине, тек жаңа тұлғалардың жасалуында емес, тілдің өзінде қалыптасқан табиғи нормалар да, кодификацияланған (ережелермен реттелген) жазба тіл нормалары да – барша-сы да – сол тілдің ішкі құрылымдық зандарына сәйкес ке-луі нормалыштың бірінші шарты немесе айырым белгісі болғандықтан, көп ретте параллель модельдер болмайды. Мысалы, қазақ тілінде септіктер парадигмасының екінші варианты жоқ. Дегенмен тіл-тілдің қай-қайсысында да оның табиғатына қайшы келетін жеке бір қолданыстардың норма ретінде қалыптасып кетуі немесе дұрыс деп табылып кодификацияла-ну фактілері кездесіп отырады. Айталақ, **-лар** қосымшасы өзі жалғанған сөзге көптік ұғым беретіндігі – табиғи құрылымдық норма, ал **әкемдер келді** дегендे, әкениң көптігін емес (адамның әкесі біреу-ақ болады ғой), әкениң қасында өзгелердің

болғандығын, яғни бір әкесі емес, оған қоса бірнеше (көп) адамның келгенін түсінеміз, демек, бұл жердегі **-лар** – тілдік модельге сәйкеспейтін қолданыс: «нормага қайшы келетін норма», соған қарамастан хатқа тіркелген – кодификацияланған қолданыс. Екінші мысал: сан есіммен келетін тіркестерде келесі компоненттің көптік жалғауын қабылдамауы – тілдің ежелден қалыптасқан жүйелік нормасы: қорада *он бес сиыр бар* (*он бес сиырлар* емес). Осыған қарамастан қазіргі баспасөз беттерінде, тіпті көркем шығармаларда, әсіресе радио мен теледидарда *екі жұз оқушылар, он бес жоғары оқу орындары сияқты қолданыстарды* кездестіреміз.

Тілдік нормага сай келмейтін грамматикалық, орфоэпия-лық, сөзжасамдық құбылыстардың орын алу себептері де әр-түрлі болып келеді. Олардың басым көвшілігі өзге тілдің әсері-нен пайда болатынын байқаймыз. Айталық, көптік жалғауының жалғанбайтын жерде келтірілуі – орыс тілінің, әсіресе орыс тілінен аударылған үлгілердің әсері деуге болады. Ал *окырман, көрермен, сатарман, аларман, оралман* деген жаңа сөздердің жасалуына «қамшы болған» қазак тіліне күні кеше ғана – XIX ғасырдың II жартысында жүйені бұзып пайда болған *атарман, шабарман* сияқты бірді-екілі қолданыс сияқты. Дегенмен бұл екі сөздің жағымсыз мәндік семасы (реңкі) кейінгі *окырман, көрермендерде* сакталмайды. Демек, бұзылған жүйе әрі қарай бұзыла түсken. Мұндай негізі осал, яғни тілдік құрылымына сәйкеспейтін нормалар кодификацияланбай, бірақ жарыса қолданылып жүре берулері әбден ықтимал. Тілдің табиғатынан шығып кететін нормалар тілдік бүкіл жүйені қамтymайды, жеке тұстарының ғана «шырқын бұздады». Сондықтан норманың басты белгісі – тілдің құрылымың табиги занылықтарына сәйкес келіп отыруы деген қағида әрдайым құшін сақтайды.

Норманың екінші шарты (межесі) – тілдің қатынас құралы ретінде қалың жұртшылықтың әрдайым қолданысында болатындығы, яғни әлеумет дұрыс деп тауып, көвшілік болып әрдайым қолданып отыратын сөздер, грамматикалық тұлғатәсілдер, сауатты жазу, сөзді дұрыс дыбыстау үлгілері норма болып табылады. Бұл жерде нормалылық құбылысы тілдің өмір сүру кезеңіне байланысты каралады. Мысалы, қазіргі

әдеби тіліміздің нормалары – осы кезеңде (айталық, соңғы 60-70 жыл ішінде) қолданылатындары. Айталық, бұл күнде көпшілік жалпы «әйел», одан соң «біреудің жұбайы, жары» де-ген мағынаны білдіру үшін адамды жынысқа бөлгендегі атауы («ұрғашы») ретінде әйел сөзін қолданады, бұл – осы күнгі әдеби норма, оның «қатын» деген синонимі – белгілі бір стильтік ренкпен (түрпайылық, қарапайымдылық т.б.) ғана жүмсалатын «әдеби емес» сөз. Ал қатын сөзі күні кешеге дейін, Абайдың өзінде әдеби норма болған, яғни бұдан 60-70 жыл бұрын қазақ жүртшылығы қатын сөзінен түрпайылық көрмеген. Бұл сөздің тіпті ертеректе «ханның, императордың, ұлы әміршілердің некелі жары» деген титулдық мағынасы болғанын білеміз. Шыңғыс ханың төрт әйелі ғана «хатун» лауазымына ие болған, қалғандары *кіши*, құма сияқты атаулармен аталған, *кіши* сөзі бабаларымыздың тілінде көне замандардан сакталған, ол «біреудің жұбайы, қосағы, жары» (орысша «жена») дегенді білдірген. «Абай» эпопеясында Бердіқожа (М.Әуезовтің ұлы ата-сы) Құнанбайға қызын «кішілікке бермеймін» дейді ғой, мұны бүгінгі оқырман «кіші» сөзінің мағынасынан шығарып, кіші әйелі ретінде, яғни тоқалдыққа бермеймін дегені деп ұғады, ал, дұрысында, *кішілікке* сөзін «әйелдікке» дегеннің баламасы деп түсіну керек, тіпті бәйбішенні де бабаларымыз *кіши* деп атаған. Ол дәүірлердегі тілімізде *кіши*, қатын сөздері норма болған болса, бұл күнде бірі көнеріп, мағынасы күңгірттеніп қолданыстан кеткен, екіншісі түрпайы стиль элементіне ауысқан. Қазіргі қазақ әдеби тілінде «біреудің әйелі, қосағы, жұбайы» мағынасы үшін де, жалпы «ұрғашы әйел заты» ұғымы үшін де жаппай, кең қолданыстағы сөз – «әйел», демек, бұл – әдеби норма.

«Жаппай қолданыс» (употребляемость) дегенді жиі, актив қолданыс дегенмен шатастырмаған жөн. Сирек қолданылатын сөздер де әдеби нормадағы элементтер болуы мүмкін. Айталық, көнерген сөздер, кейбір экспрессивті поэтизмдер, тар аумақтық кәсіби сөздер сияқтылар сирек жүмсалады, олардың өзге эквиваленттері болмайды, сондықтан реті келіп жүмсалса қалса, барлық жүрттың аузына түсsetін, яғни жаппай қолданатын тіл-дік элементтер болып саналады. Мысалы, көптеген көне сөздер мақал- мәтелдердің, фразеологизмдердің құрамында сакталған,

оларды бүгінгі қалың көпшілік түгел түсіне де бермеуі мүмкін, бірақ сол сақталған күйінде барлық жерде қолдана береді. Айталақ, «әр ханның тұсында бір сұрқылтай», *ереуіл* атқа ер салмай, *өндірдей* жас жігіт, *қатуланып*, *қаттанып* дегендердегі көрсетілген сөздерді мағыналарын анық білсін-білмесін, барша жүрт айта береді, бірақ оларды өте сирек (мысалы, Тезек төре Сүйінбайға «болсайшы сен де менің сұрқылтайым» дейді) жүмсайды, олардың тіркесімдік қабілеті де шектеулі бо-лады, осыларға қарамастан, олар да – әдеби нормадағы сөздер болып саналады.

Нормалылықтың «көпшілік қолданатын» деген өлшемі «әдеби» және «әдеби емес» деген қатарларды анықтауда басты шарт болады. «Әдеби емес» параллельдердің түрлері әр алуан. Айталақ, күні бүгінге дейін бірқатар сөздердің жуан не жіңішке айтылатын қатарларының қайсысы әдеби норма екендігін белгілеу кындық туғызып келеді: *кәзір* – *қазыр*, *әулі* – *аула*, *заңгар* – *зенгір*, *пара* – *пәре*, *кәйтіп* – *қайтіп*. Мұндайда кодификация арқылы, яғни мына варианты әдеби деп танылсын дегенді сөздіктерде, әсіресе орфографиялық сөздікте, окулықтарда әдейі көрсетіп, қолдан нормалауға тұра келеді, бұған әдемі бір мысал келтіруге болады: бұл күнде *және* сөзінің осы тұлғада қалыптасып кеткендігі даусыз, тіпті соңғы ұрпақтар мұның өзге варианты болғанын білмейді де, ал үстіміздегі ғасырдың 40-жылдарына дейін арабша, латынша хат танып, жазып-сызып келгендер бұл шылаудың алғашқыда *жана* тұлғасын, бертін келе, 20-30-жылдардың ішінде, оған қосамжарлатып *және* вариантын қолданғанын білеміз, оған сол кезеңдердің уәкілі – өзіміз күеміз. Осы қатардан *даражса* – *дәреже*, *уағда* – *уәде*, *қазыр* – *кәзір*, *ары* (тұр) – *әрі* тұр, *әріп* – *қарып*, *ауырым* – *әүпірім*, бары – *бәрі*, ғазиз – *әзіз*, ғылым – *ілім*, доңғалак – дөңгелек, ажыраю – ежірею, қисап – есеп, жадау – жүдеу, жай – жәй, жаудырау – жәудіреу, жаутаңдау – жәутендеу, зағым – зәлім, занғар *зенгір*, қаны – *кәні* (*қане* – *кәне*), қария – *кәрия*, қоңырсу – *көңірсу*, шайы (*көйлек*) – *шайі* (*орамал*), *азар* дегенде – *әзер* дегенде, *ауаны* – *әуені* сияқты параллельдерді көре ала-мыз. Бұлардың бір парасы ережемен реттеліп, бір ғана тұлғада кодификацияланды: *және*, *дәреже*, *әріп*, *әзер* (дегенде), *аула*.

дегендердің жана, даража, қарып, азар, әулі вариантыры әдеби қолданыстан ығыстырылды, бірқатарының, әсіресе араб, парсы кірме сөздерінің екі (кейде тіпті үш) түрлі фонетикалық тұлғада қолданылғандарының екі вариантты да «қәдеге асырыл-ды»: әрқайсынына жеке мағына телініп, яғни әрбірі қосымша семаларға (қосымша, үстеме мағыналық реңктерге) ие болып, әдеби норма ретінде тіл «айналымына» түсті. Мысалы, *ғылым* – орысша «наука», *ілім* – «учение», *доңғалақ* – көбінесе арбаның, мәшинениң донғалағы (бірақ бұл мағынада *дөңгелек* вариантты да қолданылуы мүмкін), ал *дөңгелек* – пішін атауы: *дөңгелек сыйық, дөңгелек таңба*; бірқатары қосарынан жұмсалып, қос сез статусын алды (*есен* – қисап, жүден – жадау), ал көпшілігі әлі күнгө дейін жарыса қолданылып, екеуі де әдеби тілде вариантытар (*балуан* – *палуан*, *пәле* – *బәле*, *шайтан* – *сайтан*) қатарын түзіп келеді, бұлар да, сөз жоқ, түптің түбінде не бөлек-бөлек мағыналық реңктер алып, екі сөз болып қалыптасады, не тіркесімдік қабілеттін (ретін, үйлесімін) түрлендіреді: айтальық, «Түсіндірме сөздікте» *жасудырау* варианттының «көзі мөлдіреу, бейкүнә көзбен қарау» деген мағынасымен қатар «жарқырау» (*жасудырап* ағып жатқан бұлақ су), «жалтақтау, қия алмау» (ыстық мекені *жасудырапартта* қалды) мағыналары болса, *жасудіреу* параллелі көбінесе *жасудіреген* көз, *жасудіреп* қарау деген тіркестерде қолданылады (бірақ «Түсіндірме сөздік» бұл қатардың жіңішке варианттын әдеби норма емес, сейлеу тілінің элементі деп көрсеткен, біздіңше, екеуі де – әдеби нормадағы сөз, тек қолданылу орындары, тіркесімдік сипаттары бөлек болып келетін сияқты). Фонетикалық дублеттер (әлде вариант-тар) қатарын тек жуан-жіңішке параллельдер ғана емес, өзге де, ұян-қатаң немесе **с/ш**, **ө/ү**, **ұ/ы** дыбыстары алmasып келетін сөздер құрайды. Мысалы, *диірмен* – *тиірмен*, *айғай* – *айқай*, *шама* – *сама* (ішілген шайдың қалдығы), *сопы* – *сұпы*, *тұну* – *тыну*, *тұннық* – *тынық*, *тозақ* – *дозақ*, *таба нан* – *тата нан*, *тажал* – *даҗал*, *саф* (алтын) – *сан* (алтын), *құбыла* – *қыбыла*, *жұзік* – *тұзік*, *еzi* – *ізгі*, *былай* – *бұлай*, *мұнда* – *бұнда* сияқты қатарлар мен *й/г*, *й/ғ* дыбыстар сәйкестігі сияқты тілдік өз дамуында пайда болған құбылыстың көне-жаңа вариантыры да (*киз* – *кигіз*, *жейде* – *жегде*, *иеци* – *егеси*) түпкі әдеби норманы

анықтауда кейде оңай, кейде қыын шешімдер туғызып келеді. Бұлардың басым көпшілігі И.Ұйықбаев⁴, С.Бизаков⁵ сияқты ғалымдардың арнайы жүргізген зерттеулерінің нәтижесінде біршама жіктеліп (классификацияланып), нормативтік әлеуеттері (потенциалдары) айқындалып қалды. Ал енді бірқатарының әр алуан сөздіктерде, оқулыктарда көрсетіліп, баспасөз беттерінде жиі қолданысы ескеріліп, әдеби норма деп танылуы – кодификациялануы арқылы әдеби варианттары едәуір тұрақтана бастады дей аламыз. Мысалы, *сопы*, *құбыла*, *жұзік*, *саф* (алтын), *тұннық* (су), *таба* (ыдыс) тәрізді сөздердің екінші қатарлары қолданыстан шығып барады дей аламыз. Ал енді *айғай* – *айқай*, *диірмен* – *тиірмен*, *мұнда* – *бұнда* (*мұны* – *бұны*, *мұндаі* – *бұндаі* т.т.), *ізgi* (ниет) – *еzgi* сияқты қатарлардың екеуі де норма ретінде сөздіктерден орын алып келеді. Эрине, күндердің күнінде бұлардың да біреуі тұрақтанып, екіншісі ығыстырылуы сөзсіз. Сірә, мұндаіда қайсысы жирик қолданылатыны сияқты статистиканың да рөлі болатын болар немесе сөздіктерде біре-үі ғана көрсетіліп, «күшпен» тұрақтандырылатын болар, тіп-ті мұндаі кейбір қатарлардың әрқайсысына қосымша мағына телініп, олар жеке-жеке сөз болып, «іске асып кетуі» және мұмкін.

Көпшілік қолданысына ие болу – нормалылықтың бір бел-гісі деп танылғанда, мұны тек жоғарыдағыдан лексика сала-сынан ғана көріп қоймаймыз, семантикалық қолданыстардан да, грамматикалық амал-тәсілдерден де, стильдік қызмет түрлерінен де, орфоэпиялық тәжірибеден де табамыз. Мысалы, бір алуан сөздердің тек жағымсыз не жағымды мағынада ғана (ректе) қолданылатындығы, сондықтан өзіне қатысты сөздерді таңдап жұмсалатындығы – әдеби норма. Айтальық, *арқасында* сөзі жағымды мағынадағы тіркес құрайды: *денсаулықтың арқасында*, *байлықтың арқасында*, *таланттың арқасында*, ал аурушаңдықтың *арқасында*, *жоқтықтың арқасында*, *дарынсыздықтың арқасында* деп айтылмайды, ол әдеби норма түгіл, жалпы тілдік нормаға сыймайды. Жоғарыда да айттық, белшесінен батты, етек алды, тап болды деген фра-

⁴ Ұйықбаев И. Қазақ тіліндегі варианттылық проблемасы. - Алматы: Фылым, 1976 .

⁵ Бизаков С. Тілдік норма және варианттылық. - Алматы: Фылым, 1997.

зеологизмдер тек жағымсыз мағынаны білдіреді, сондықтан олар жағымды мағыналы сөздермен тіркеспейді. Мысалы, қамқорлық етек алды, қуанышқа тап болды, байлықта белшесінен батты сияқты қолданыстар мұлде дұрыс емес (соңғы мысалдар тіл қамқоршысы – Қабышевтың мақаласынан алынды). Сол сияқты көптеген етістіктер тек қана болымсыз тұлғада жүмсалады, оларды болымды тұлғасы жоқ деуге болады. Мысалы, *бет қалмады* («ұятты болды»), *бет бақтырымады* («сөйлемпепді, жауап бергізбеді»), *бет бұрдырымады* («мүмкіндік бермеді»), *бетіне жсан келтірмеді* деген тіркестердің бет қалды, бет бақтырыды, бет бұрдырыды, бетіне жсан келтірді деген жағымды сынarlары жоқ.

Грамматика саласына келсек, бағындыруши мүше мен бағынушы мүшениң орын тәртібі ежелден тілдің өзінде қалып-тасқан: бастауыш баяндауыштан, анықтауыш толықтауыш, пысықтауыш өздеріне қатысты сөйлем мүшесінен, көбінесе баяндауыштан (не етістік түбірінен жасалған өзге мүшелер-ден), менгерілетін сөз менгерушіден (*ақшага бай, ақылга кенде* деген сияқты) бұрын тұратындығы – норма. Бұл нор-ма ауызекі сөйлеу тілінде немесе белгілі бір стильдік мақсат көздеген тұстарда жазба тілде бұзылуы әбден мүмкін. Ал бүгінгі грамматикалық әдеби нормамыздың дені қазақ тілі-нің құрылымдық ішкі зандылықтарына сай орнығып, кодифи-кацияланғанын баса айтуда болады.

Лексика, орфоэпия, орфография салаларына қарағанда, грамматикада дұрыс деп (норма деп) танылған тұлға-тәсілдердің көпшіліктің жаппай қолданысында болуы, яғни нормалылықтың екінші шарты әлдекайда басым. Солқылдақтау салалар – орфография мен орфоэпия. Әсіресе сөз сазы, яғни сөйлеу актісінде сөздерді дұрыс дыбыстау (айту) нормалылықтың екінші белгісіне келгенде әлсіздік танытады. Мұнда жергілікті ерекшеліктерге қатысты алалық та (бір жерде, айталық, солтүстікте сөздерді жуан айтуда дағдысы болса, екінші өнірлерде, мысалы, онтүстікте оны жінішке айтушылық) орын алады (*пара – пәре*) немесе **ш/ч** (*шатақ – чатақ*), **к/ш** (*әпке – әпше*), **б/п** (*бле – пле*, *балуан – палуан*, *бұт – пұт*) дыбыс алмасулары жергілік-ті ерекшеліктерде орын алғыны белгілі. Тілдің өзге тарамда-

рымен салыстырғанда, сөз сазындағы нормалылық әлдекайда ауыр, кеш қалыптасып орныгады. Бұл заңдылық тіл-тілдің қай-қайсысина да тән.

Бұл күнде орфоэпиялық нормалары кодификацияланып, ережелері айқын түзіліп, көптеген құралдары (орфоэпиялық сөздіктер, анықтағыштар, оқулықтар, нұсқаулар, әдістемелік құралдың т.т.) жарық көріп жатқан орыс қоғамының өзінде орфоэпия мәселесі тым кешеуілдеп қолға алынғанын ғалымдары айтады. Атақшы сөздікші Д.Н.Ушаков 1928 жылы: «Мектептерімізде сөзді дұрыс айту (орфоэпия) теориясы деген әлі жоқ, мұғалімдердің көбі орфоэпия терминін білмейді», – деп қынжылған болатын. Жалпы орфоэпиялық нормалар ұлттық әдеби тіл едәуір дамыған кезеңде мықтап қолға алынады.

Әсіреле әдеби тілдің әлеуметтік қызмет өрісінің бірі – шаршы топ алдында сөйлеу бел алған кезде, оның ішінде теледидар мен радио, театр мен жалпы сахна өнерінің түрлері қарқынды жұмыс істей бастаған тұстарда сөйлеу актісінде сөздерді қилюластырып, үндестіріп, сазды етіп айтылуына үлкен мән беріледі. Орфоэпиялық нормалардың да деңі тілдің дыбыстық зандарына негізделеді, содан көп шықпауға ұмтылады. Бұл жерде нормалылықтың бір шарты – «көпшіліктің солай қолдануы» дегенниң рөлі айрықша. Дегенмен өзге салаларға қарағанда, жалпы тілдік нормалардан ауытқушылық орфоэпияда көбірек кездеседі және оның объективтік те, субъективтік те себеп-тері бар. Ол ауытқушылықтар туралы және оларды туғызып отырган факторлар жөнінде сөз сазына арналған тарауда нақты фактілермен кеңірек айтылады.

Норма деп танудың үшінші шарты – оның әлеуметтік қолдау табуы, яғни қалың жүртшылықтың белгілі бір сөздің, тіркестің, грамматикалық тұлғаның, жаңадан жасалған не өзге тілдер-ден енген сөздердің осы мағынада қолданысы, осы тұлғада айтылуы дұрыс сөздердің сейлеу үстінде осылайша дыбыс-талуы жөн деп мақұлдауы. Эрине, бұл – тілдік норманың «көпшілік дауыспен» шешілуі емес. Сол тілде сөйлейтін қалың жүртшылықтың «дұрыс» деген бағасы дүниеге референдум-мен келмейді, бұл бағаны бергізетін – белгілі бір норманың тіл табигатына сәйкес келетіндігі, әрдайым қолданыста

болатындығы, яғни нормалылықтың алдыңғы екі шартты соңғы үшінші шартқа алып келеді, өйткені адамдарда тілдегі түзулікті, дұрыстықты сезетін қасиет болады, ол дұрыстықты теория жүзінде талдап-тансымай-ақ, «Неліктен осы қолданыс дұрыс?» дегеннің дәлелін іздең жатпай-ақ, адамның интуициясы – «пат-ша қөнілі» сезіп отырады. Дегенмен бірсыныра зандылықтарды, әсіресе лексикалық, оның ішінде терминологиялық, сондай-ақ орфографиялық, орфоэпиялық нормаларды кодификация арқылы тұрақтандырып, көпшіліктің қолдауын қамтамасыз етуге тұра келеді.

«Көпшіліктің қолдауы» дегеннің өзі біршама шартты: норма ауысу кезеңінде жаңа тұлға-тәсілдерді, сөздерді, тіркестерді көпшілік бірден қабылдай қоймайтыны жиі кездеседі. Көпшіліктің ішінде жеке қаламгерлер, ғалымдар, оку-ағарту ісіндегілердің бірқатар топтары жаңа нормаларды (дәлірек айтсақ, жаңа сөздер мен тәсілдерді) қабылдамайды, жатырқай қарайды, тіпті сынап жатады. Мысалы, парсының **-и** жүрнағы арқылы сын есім жасау нормасы тілімізде XX ғасырдың 50-60-жылдарынан бастап жанданды деуге болады. Әуелде бұл араб, парсы тілдерінен енген сөздерге жалғанса (*тарихи, саяси, адами, дүнияуи, мәдени*), кейін келе *сыни, қогами* дегендей қазакы сөздерге де жалғана бастады. Мұхтар Әуезов, Ғабит Мұсірепов сияқты ірі жазушылар көпкे дейін бұл норманы қабылдамай өтті. Публицистикалық стильде қолданылуға бейім бұл тәсіл-норманы екі жазушының екеуі де өздерінің очерк, мақалаларында макұл көрмей, *тарихтық, саясаттық, адамгершілік, адамдық* деген варианттарын қолданды. 50-60-жылдарда пайда болған *окырман, көрермен* сөздеріне де біраз қаламгерлер көпке дейін тосырқай қарады. Әрине, бұл – жүрнақ арқылы жаңа сөз жасау тәсілін жатсыну емес (ол – тілдің о бастан «бойына біткен», қалың жүртшылық ешбір ойланбастан қабылдайтын табиғи нормасы), не жүрнақтың өзін (шет тілдік **-и** аффиксін) қабылдамау емес, я болмаса **-р+ман** қосынды жүрнақтың беретін мағынасына шек келті-ру емес, осы тәсілдермен жаңадан жасалған сөздердің тілдің өз зандылығына дәл келмеуін сезінү. Жоғарды айттық: келер шақ есімшеге **-ман** жүрнағын жалғағанда, әлі орындалмаған,

орындалуға тақап қалған іс-әрекет, қымылды білдіретін етістік-ті жасайды, сондықтан *оқырман*, *көрермен* деген сөздерді әлі оқымаған, көрмеген, оқуға, көрге тақап қалған іс-қымыл етістік деп қабылдаудан шыға алмағандары байқалады. Белгілі бір тілдік жаңа норманың көпшілік дұрыс деп танып, жаппай қолданып кетулеріне ол норманың (сөздің, тәсілдің, айтылу сазының, жазылуының) ережемен беркітіліп, хатқа тіркелуі бірден-бір рөл атқарады, әсіресе баспасөз беттерінде, радио мен теледидарда жиі жүмсалуы тіпті тіл табиғатына қайшы ке-летін қолданыстарды да көпшілік қауымның қабылданған кетуіне үлкен әсерін тигізеді. Жоғарыда аталған *оқырман*, *көрермен*, *тыңғарман* немесе *оқулық*, *әдістемелік*, *анықтамалық* деген жаңа тұлғаларды қазіргі жас буын тіпті жасанды сөздер деп, бертінде дүниеге келген туындылар деп сезінбейді.

Көпшіліктің жиі қолданысы арқылы (демек, қабылдауымен) кейбір бейнорма құбылыстардың дағдыға айналып кететін фактілері бар. Мысалы, сөздер аралығында, көбінесе тіпті біріктіріліп жазылған сөздерде **к**, **қ** дыбыстарының ұяндайтын тұстарын ескермей, қатаң түрде айту дағдыға айналып бара-ды: *шегара*, *көгөнүс*, *қыргүйек*, *қолғойұлды*, *кунүгеше*, *балагез-де* деп айтылуға тиіс сөздерді жазылуынша *шекара*, *көкөніс*, *қыркүйек*, *кунікеши*, *балакезде* деп дыбыстағандарды жиі ес-тиміз.

Міне, тілдік норма деп тануға қойылатын шарттар (критерийлер), яғни норманың белгілері, межелері туралы бүгінгі ғылым анықтаған тұжырым-түйіндер және ол шарттардың тәжірибедегі көрінісі туралы ізденістер – осындай.

ТІЛДІК НОРМА ЖӘНЕ ФУНКЦИОНАЛДЫҚ СТИЛЬДЕР

Тілдік норманы сөз етуде орыс тіл білімінде «тілдік жүйенің қаттаулары» («разные ярусы системы») дегенді жиі атап келді. Осы орайда «сөз айтылған жағдай» («ситуация речи»), «стиль жағынан орынды» болуы («стилистическая уместность слова») дегендерді де кездестіреміз.

Біз жоғарыда тілдік норма туралы ұғымды түсіндіргеніміз-де, норманы тануға қойылатын шарттарды, яғни норманың межелерін (критерийлерін) баяндағанда және вариантылық құбылысын нормамен байланыстыра сөз еткенімізде – барлығында да оларды «жалпы әдеби тілдің нормасы» деген планда алып қарадық. Оның өзінде де әдеби тілдің жазба түрде колданысы нысанана алынды. Әйтпесе тілдік норма дегеніміз – тек жазба әдеби тілдің «мұлқі» емес, диалектілік сөздер де, қарапайым сөзқолданыстарының да нормасы болады, яғни ауызекі сөйлеуде де белгілі бір «белгілердің» нормалардың болатыны аян. Бірақ тілдік норманың жазба және ауызекі колданыстағы бөліністері, чех ғалымы Б.Гавранектің дұрыс танығанында, түп-тамырымен өзгеше болып келетіндігінде емес, белгілі бір нормаларды қолдану міндетті түрде болатын-болмайтындығында, оның үстінен жазба әдеби тілдің нормала-ры кодификацияланады (хатталады, тұрактандырылады), ал ауызекі сөйлеу нормалары кодификацияланбайды, «еркіндік» мол болады. А.М.Пешковский жазғандай, әдеби тілде сөйлеуші (жазушы) адам ойын әйтеүір айтып (жазып) беруді ғана емес, қалай айтып (жазып) беруді көздейді, тілдегі дұрыстықты (идеалды) ұстауға тырысады, демек, әдеби тілдік нормада екі мақсат қатар көзделуі керек: ойды білдіру және оны мәдениетті түрде, яғни белгілі дұрыстық, көркемдік нормаларын сактап білдіру. Әдеби тілдік нормалары «жалпақ жүртқа» (халықка), барлық аймаққа тегіс міндетті, ортақ болатын болса, ауызекі сөйлеуде жергілікті ерекшеліктерді қолдану дәстүрі адамдардың «мәдени» (сауаттылық, тілге деген ұқыптылық т.т.) дәрежесі сияқты факторларды, міндеттілікті қажет етпейді.

Оның үстінен қазіргі қазақ әдеби тілінің нормаларына келгенде, олардың жалпыға ортақтығын, міндеттілігін айтумен қатар, функционалдық стильдерге бөліп қарау керектігі де

назар аударады. «Қазіргі қазақ әдеби тілі» деп, кезеңге қарай әдейі атаганымыздың себебі – тілдік норма дегеніміз тілдің өзі сияқты – динамикалық «тірі» құбылыс. Тілдің әр кезеңдегі ішкі («құрылымдық») және сыртқы (экстраграмматикалық) дамуына қарай, нормалары да әлеуметтік өзіндік сипат ала қалыптасады. Бұл жердегі әңгімеліңіз синхрондық және функционалдық нормалар жайында болмақ.

Тілдік норманы міндетті түрде қолдану бар да, ыңғайына қарай қолдану бар. Айталық, орыс тіл мамандарының (Б.Н.Головник т.б.) тануынша, грамматикалық, орфоэпиялық, орфографиялық, пунктуациялық нормаларды қатаң, міндетті түрде сактау керек, ал стилистикаға келгенде ыңғайына қарай босаң нормаларға да иек артуға болады дейді. Тілдің функционалдық стильдерге қарай ажыратылатын нормалары стилистикалық нормалар дегенмен бір емес. Соңғысы тіл-ді дұрыс қолданудың үстіне әсем (искусная речь) қолдануды көздесе, функционалдық стильдердің әрқайсысына тән (өзгелерінен ажыратылатын) азды-көпті нормалары дегеніміз – жалпы тілдік нормалар аясына кіреді.

Грамматика саласында: өткен шақ есімшениң журнағы - **тын** (-тін) және **-тұғын** болып екі вариантта кездеседі. Мұның алдыңғысы – қатаң норма, ол – қазіргі нейтральдық норма, яғни функционалдық стильдердің баршасында қолданылады, ал **-тұғын** варианты – негізінен көркем әдебиет, оның ішінде поэзия үшін норма, сол сияқты **мен ~ менен** деген шылау мен септік жалғауы **-дай ~ -дайын** тәрізді тенеу журнағын, **да ~ дағы** шылауының алдыңғы сыңарын әдеби норма деп, екінші қатардағы вариантарын бейнормалық деп танушылар бар. Бұл – әдеби норма деп тек публицикалық, ғылыми, реесми стильдерді ғана көздел айтылған таным. Ал көркем әдебиет тілі де – әдеби тілдің функционалдық стильдерінің бірі екен-дігін ескерсек, бұлайша пайымдау дұрыс еместігі байқалады. Ол күнде XV ғасырлардан басталған ақын-жыраулар тілі, ке-шегі Махамбеттің, Бұхардың, Жамбылдың, тіпті ұлы Абайдың тілі де әдеби тіл үлгісі деп танылmas еді. Абайдың өзі өлеңнің өлшем, үйқас сияқты шарттарына қарай, тіпті прозасының өзінде **мен ~ менен, -тын~ -тұғын, да~дағы** вариантарын ер-кін қолданғанын білеміз: «Осы өлең *октитұғын* дұғам менің...», «Арзан жалған күлмейтін шын күлерлік...», «Ақыл менен

білімнен әбден үміт үзіппін...», «Саған құрбан мал мен бас...», «Сүйтсе дагы елімді ұстай алмадым мығымдап...». Мұндай мысалдарды қазіргі қазак поэзисы тілінен де молынан көлтіру-ге болады. Ал тілдің даму барысына үнілсек, **-тұғын**, **менен**, **дагы** вариантының тек сөйлеу тілі емес, күні кешеге дейінгі по-эзия, тіпті прозалық үлгілерінде әлдекайда жиірек қолданылған нормалық тұлғалар екенін дәлелдеуге болады. Мұны біз Абай тілін зерттеген, қазак әдеби тілінің XV-XIX ғасырлардағы тарихын баяндаған еңбектерімізде айқын көрсеткен болатынбыз⁶.

Синтаксис саласында да бағыныңқы сөйлемнің, әсіресе баяндауышы *dep-ke* аяқталатын түрлерінің басынқыдан кейін келетін үлгілері де көркем прозада да, тіпті публицистикалық үлгілерде де норма болғандығын дәлелдей көлеміз.

Лексика саласында: араб кірме сөздерінің екі, кейде үш фонетикалық варианты болып келетіндерінің бірқатары көркем әдебиет стилінде катар қолданыла береді. Мысалы, ұлы Абай өлеңдерінде *гашиқ ~ асық* қатары өлең өлшеміне қарай бірін-бірі алмастыра алады. *Сорлы асық сағынса да, сарғайса да* – мұнда өлең жолы 11 буынды болу үшін қатар келген екі сөздің аралығындағы екі дауыстының біреуі «жұтылып», үш буынды болып айтылуы қажет: *сорласық*. Ақын бұл жерде *гашиқ* вариантын қолдана алмаған, өйткені *сорлы гашиқ* тіркесі 4 буын-ды болып кетеді. Ал *гашиқақпын, еш күмәнсіз* дегенінде ақын кезеңінің өзінде-ақ жалпы тілдік *гашиқ* вариантын алған, бұл жерде *гашиқ ~ асық* жарыспалы қатардың буын саны үшін айырмасы жоқ.

Тағы бір мысал: *шайтан ~ сайтан* вариантының алдыңғысының өзінің номинативтік мағынасында қолданылуы – жалпы (барлық стильде) норма, ал *сайтан* варианты әрі фонетикалық вариантика айналып, әрі коннотаттық мағынага («сиқырлы») ие болып, тек көркем әдебиетте, көбінесе поэзияда орын алады. Бұл жерде әр функционалдық стильге тән белгілерді анықтауда оларға қатысты тілдік нормалар дегенмен, бір жағынан, байланыстыра, екінші жағынан, ажыратса қарау керек сияқты. Мысалы, *біріншіден, екіншіден, әрине, қысқасы, сонымен, меніңше, біздіңше, пәленишениң айтуынша (тікірінше)*, ал деген сияқты қыстырма сөздер басқа стильдерге қарағанда, ғылыми стильтен.

⁶ Сыздықова Р. Абай шығармаларының тілі. - Алматы, 1968. - 172-177-б.;
Сыздықова Р. Қазак әдеби тілінің тарихы. - Алматы, 1984.

де, публицистикада жиі қолданылатыны – осы стильдерге тән белгілер. Бірақ бұларды өзге стильдерде қолданылмайды деуге болмайды, өзге, әсіресе көркем әдебиетте, оның поэзия жан-рында көрсетілген қыстырыма сөздердің орын алуы сирек кез-деседі, ол – бұған белгі емес.

Немесе заң-сот материалдарында, ресми құжаттар тілінде сөздер негізінен номинатив (тура) мағынасында жұмысалады, бұл үлгілерде сөздердің сипаттаушы, суреттеуші, көріктеуші қатарлары қолданылмаға тиіс. Мысалы, ресми хабарларда, құжаттарда Президент деген сөз Елбасы деген суретте-ме сыңарымен ауыстырылмайды. Соңғы вариант көтерінкі (пафостық) тонмен жазылған газет-журналдар тілінде, яғни публицистикада, көркем әдебиетте, оның ішінде поэзияда қолданыла береді.

Ғылыми стилде ғылыми терминдердің мол қолданыла-тындығы, сойлемдердің анық, түсінікті болуы – ғылыми жаз-балардың стильдік белгілері болса, мұнда да жалпы тілдік ортақ нормалармен қатар, осы функционалдық стильдің әрі белгісі, әрі нормалары болып келетін тілдік элементтер аз емес.

Әрине, тілдік нормалардың функционалдық стильдерге қарай азды-көпті айырмашылықтарын атағанда, көркем әдебиет стилін өзгелерінен бөлек алуға тұра келеді. Жалпы тілдік бей-таратап (нейтрал) нормаларға жатпайтын бірқатар лексикалық және грамматикалық тұлға-бірліктер көркем әдебиетте жұмысала беретін, яғни нормативтік элементтер бола алады. Айтальық, қарапайым сөздер, диалектизмдер, дөрекі сөздер, жаргондар жалпы әдеби тілдің лексикалық нормасынан тыс тұрады, олар ресми публицистика, ғылым, кенсе-іс қағаздары үлгілерінде қолданыла қалса, бұл – нормадан уәжісіз (жөнсіз) ауытқу болмак. Ал көркем проза мен драмалық шығармаларда бұлар көбінесе кейіпкерлер тілінде, тіпті шығарманың жанрлық си-патына қарай автордың өз баяндаудында да қолданылуы норма болып табылады.

Кейіпкердің қай өлке тұрғыны екенін көрсету үшін неме-се оның мәдениеттілік, сауаттылық дәрежесін, мінез-құлқын (дөрекі, тәрбиесіз, жөнсіз қасиеттерін) аузынан шыққан сезі арқылы бейнесін күштейте тұсу үшін жазушы жалпы лексикалық әдеби норма шенберінен шығып кетеді, бірақ олардың

қолданысы көркем әдебиет стилі үшін уәжді (дәлелді, орынды) болып тұрады. Бұған көптеген мысал келтіруге болады, мұны тіпті кез келген сауатты оқырман көркем шығарманы оқып отырғанда өздері де көре алады. Мысалы, Қалихан Ісқақовтың «Ақсу – жер жаннаты» деген романының тіліне зер салсақ, үлкен бір юмормен жазылған дүние сияқты. Мұнда «маусымдық кәсіп қуған калымщиктерден басқа барлық жібі тұзу де, жібі қисық та, қыскасы, «тайганың ақ жапалағындаш шакырайып тас керең отырған кесір шалына» дейін кейіпкерлерінің тілі қышанқы болып келеді. Автор олардың аузына *әкри*, *ләухи*, *шорту* сияқты одағай іспеттес ауызекі элементтерден бастап,

бет-мордасы (*бет-әлпеті* дегеннің орнына), *түйекөтен* (помидор), *қотқа жүрмейді* («қағазсыз қара басыныз бұл күнде қотқа жүрмейді»), *ассалау* («ұрының кәсібі тілге зар емес, ассалауы не, атанның басы не») деген тәрізді әдеби нормадан тыс тұрған элементтерді салады. Қарапайым сөз, тұрпалы сөз, макаронизмдер деп аталып тұлғасын мейлінше өзгертип, кекесінмен, мысқылмен қолданылған өзге тілдік сөздер мен сөз орамдары кейіпкерлерінің диалогтерінде де, автордың өз баяндаудында да орын алған: «Бекет осымен біржола *иоңқыған...* Бекет начальникті таяқ туқылымен *куситін* бір жібергісі кеп тұрды...», «*қотанаяқ* тракторист», *бупит* (буфет), *әрісдомкрат* (аристократ), *төріс* (турист). Бұлар – әрине, стильдік мақсатпен қолданылған бейәдеби бірліктер.

Сейтіп, көркем әдебиет үлгілері өзге стильдердің элементтерін де, диалектизмдер, архаизмдер, кәсіби сөздер, қарапайым сөздер, дөрекі сөздер, жаргондар, ауызекі сөйлеу тілінің белгілері сияқты бейәдеби тұлға-бірліктерді де, архаизмдер, кәсіби сөздер сияқты сирек қолданыстағы элементтерді де ер-кін жұмсай алады, өйткені көркем әдебиет тек коммуникатив-тік емес, эстетикалық функцияны да коса арқалайтындықтан, өзге стиль үлгілерінен оқшау тұрады. Осы ерекшеліктерінен болар, кейбір зерттеушілер көркем әдебиетті функционалдық стильдер қатарына қоспағынды. Көркем әдебиет туын-дыларында өз нормаларын қатаң сақтайтын тұйықтық жоқ, ол көп қырлы стиль болып келеді. Қайталап айтсақ, көркем әдебиеттің барлық жанрлары, әсіресе поэзия тілі поэтикалық (эстетикалық-көркемдік) сөз өрнегіне жиірек барады, ал

поэтикалық амалдар тіл құралдарын барлық кеңістіктен, яғни барлық функционалдық стильдерден іздетеді. Өзге стильдердің элементтері де, әдеби нормадан тыс тұрган тілдік тұлғалар да көркем әдебиетте белгілі бір стильдік жүк арқалап тұрады, яғни олардың көркем шығармаларда орын алуының уәжі (мотиві, себебі, дәлелі) болады. Сондықтан бұларда ауызекі сөйлеу тілінің де, кітаби жазба тілдің де белгілері тоғысады. Көркем туындылар тілінің бұл қасиеті, кейбір қазақ зерттеушілері атағандай, «кемістігі» емес («көркем әдебиетте әдеби норма-дан тыс жөнді-жөнсіз ауытқулар көп ұшырайды, сондықтан басқа стильдер тіліне өнеге-ұлгі бола бермейді» – М.Балақаев), ерекшелігі болып келеді.

Әр функционалдық стиль нормаларының әдеби тіл нормаларына қатысы, алатын орны, даму әлеуеті деген мәселелерге келгенде, бұл проблеманы өз алдына бөлек, кеңінен сөз ету (зерттеу) қажеттігі байқалады.

Көркем әдебиет стилінің нормаларын тануда алдымен бұл стиль үлгілерінің өзін көркем проза, поэзия, драматургия, көркем публицистика, шаршы топ алдындағы ауызша көркем сөз (мұны ауызекі сөйлеумен шатастырмау керек) деп бөліп-бөліп қарап, әрқайсысына ең бір тән нормаларын сөз ету керек болады. Ал көркем прозаның өзін:

тұрмыстық оқигаларды баяндайтын әңгіме,
новеллалар; тарихи шығармалар; кең планды эпопея,
романдар;
фантастикалық шығармалар;
көркем публицистика;
сатирик туындылар;
философиялық эсселер.

деген сияқты тақырыптық, жанрлық түрлерге бөліп қарап, әрқайсысына тән тілдік-көркемдік нормаларды айқындау қажеттігін де баса айтамыз. Бұлардың стильдік белгілері мен тілдік-көркемдік нормалары көбінесе тоғысып жатады және ол нормалар бейнелік, әсерлілік сипат бере жазылған өзге стильдер үлгілерінде, мысалы, көпшілікке арналған жартылай ғылыми-публицистикалық кітапшаларда, очерк-терде, мақалаларда, баспасөз беттеріндегі пафостық үні бар информациалық материалдарда ішінара қолданылуы мүмкін.

Бірақ бұл қолданыстар – көркем әдебиеттен басқа стиль үлгілерінің нормасы емес, яғни негізгі стильдік белгілері емес, стильаралық «ауыс-түйістер», «қолғабыстар» санатында таныллады.

Көркем шығармалардың әр түріне тән белгілер де барлығына ортақ норма болып есептелмейді. Мысалы, тарихи ро-мандарда жиі қолданылатын көнерген сөздер, этнографиз-мдер, морфологиялық көне тұлғалар, синтаксистік көне түзілімдер көркем шығармалардың өзге түрлерінің бәріне тән емес. Мысалы, Мұхтар Мағауиннің «Аласапыран» деген тарихи романының екі кітабында қолданған шортабегі, есікагасы, гаскербасы, сипағасалар, аталаңқ, қарашибек, құма, емелдес, тұтқауыл, ертауыл, маңдайсұбе сияқты көнерген сөздер, сондай-ақ Әбіш Кекілбаевтың «Үркөр», «Елең-алан» атты дилогиясында кездесетін құлдірмамай, жекеауыз, бірауыз, қандыауыз, жездауыз, шиті, берен сияқты көне мылтық, қару-жарақ атаулары, жалаңқат, зере, кіреуке, дұлыға, жасы сияқты әскери сауыт-сайман аттары, даңғырашы, сайыскер, қылышиктер, садақшы, айдауыл, торуыл, тосқауыл, қарауыл тәрізді әскери топ аттары қазіргі заманды суреттейтін романдар мен әңгіме-повестерде мүлде кездеспеуі – занды, яғни көне тұлға-тәсілдердің жиі қолданылуы – жалпы көркем әдебиетте норма емес болса, тарихи шығармаларда бұлар – нормадағы қолданыстар.

Сол сияқты жергілікті ерекшелік деп аталатын диалектикалықтердің көбінесе кейіпкерлер аузына салғанда жазушы стильтің мақсатты діттейді: кейіпкердің белгілі бір өнірдің тұрғыны екенін көрсеткісі келеді (мысалы, М.Әуезовтің «Білекке білек» әңгімесінің кейіпкери Мақпалдың Оңтүстік Қазақстанның тұрғыны екенін білдіреді), сол сияқты әдеби нормадан тыс тұратын қарапайым сөздер, кейде тіпті дөрекі сөздер, макаронизмдер деп аталатын бөгде тілдік элементтер – кейіпкер бейнесін айқындай түсестін тілдік құралдар болады (мысалы, Қалихан Ысқақовтың «Қара орман» романындағы «калымышіктердің» диалогтеріне назар аударыңыз).

Демек, жанр, тақырып түрлеріне қарай көп қырлы болып келетін көркем прозаның нормалары бір алуан болса, поэзияның тілі, оның зандалықтары (нормалары) – өз алдына бөлек сөз ететін сала. Поэзия тілінің нормалары өлеңнің ырғак, өлшем,

дыбыс гармониясы – эвфония, поэтикалық синтаксис шарттарына сай сөз таңдауда, сөйлем кұрастыруда жалпы әдеби тілдің лексикалық, грамматикалық нормалары шенберінен шығып кететін қолданыстар болады. Мұнда да поэтикалық ойды (образды) күшетту үшін бірқатар ақындар тосын сөздерді іздейді, олар қарапайым сөз, жергілікті сөз, архаизм, сирек қолданылатын бөгде тілдік сөздер катарларынан табылады. Мысалы, ақын Қуандық Шаңғытбаев «Қасым өлімін есіткен-де» деген өлеңінің:

Катардың мен де сондай *dүрi* болсам,

Құлшынған *илхам* ұлы, ірі болсам, –

деген екі тармағында *dүр*, *илхам* сияқты сирек қолданылатын сөздерді поэтикалық қуаты, яғни оқырманға беретін әсері күшті құралдар ретінде таңдайды. Бұларды поэтикалық стильдің нор-масы, белгісі дегеннен ғорі, «стильдік бояу» деп тапқан дұрыс, дегенмен бұл сияқты тосын, кәнігі емес қолданыстардың (сөздердің, тұлғалардың) көркем әдебиетте, оның ішінде өлең тілінде еркін, жиі кездесуі – функционалдық стильдердің нормаларын және стильдік белгілерін де бір-бірінен айырып тұратын өлшем.

Қазак тілінің функционалдық стильдерінің бір-бірінен айырым белгілері көрсетіліп келеді. Ол белгілерді қазақ тілін зерттеушілер орыс тіл білімінің танымынан шығарып, яғни соған орайластырып айтатынын мойындаймыз. Бұған, біріншіден, тіл-тілдегі функционалдық стильдер табиғатының, қызметінің универсалий (ұқсас, ортақ, бірдей) құбылыс екендігі не-гіз болса, екіншіден, ресми-іс қағаздарының, ресми ақпарат материалдарының, тіпті ресми публицистиканың, ғылыми әдебиеттің, казақ тілі мен әдебиеттің басқа пәндер бойынша жазылған мектеп оқулыктарының күні кешеге дейін көбінесе орыс тілінен аударылып ұсынылып келгені себепкер болды. Сондықтан публицистикалық стиль жалпы әдеби тіл нормасын қатаң сактайды, әдеби нормадан тыс лексикалық тұлға-бірліктерді – диалектілік, қарапайым, жаргон сөздерді пайдаланбай-ды, морфологилық тұлғалардың да бәсек нормага жататын варианттарын (мысалы, **-тұғын**, **менен**, **дағы**) қолданбайды, жалпы синтаксистік нормаларды да қатаң сактайды, яғни сөйлем мүшелерінің, құрмалас сөйлем компоненттерінің орын алма-

сып келуі кездеспейді деген белгілер аталады. Бұл белгілер – осы стильдің тілдік нормасы болып та есептеледі.

Ғылыми стильде де нормадан тыс тұратын сөздер қолданылмайды, морфологиялық тұлғалардың да жалпы тілдік бейтарап (нейтрал) вариантының да жалпы тілдік сөздердің дәл (денотаттық) мағыналарын жүмсау үстем болады, баяндау барысында синтаксистік нормалардың да жалпы тілдік вариантына жол беріледі. Бұл стильде ғылыми терминдердің, оның ішінде жалпы әдеби тілдік нормаға енбейтін, тар ауқымды мамандық терминдері деп аталындарының да еркін әрі жиі орын алуын ғылыми әдебиеттің стильдік белгісі де, нормасы да деуге бо-лады.

Кеңсе-іс қағаздарының стильдік нормалары (әрі белгі-лері) өзгелерден мүлде ажыратылып көрінеді, мұнда шаблон күрылымдар: сөйлем түрлері, сөз тіркесімдері, мәтіннің күрылымы орын алады, лексикалық норма қатаң сакталады, сөздердің метафора, теңеу, эпитет сияқты көріктеуіш кызметте жүмсалуына, сөздің коннотаттық мағынада келуіне жол берілмейді. Әсіреле заң-закон, қаулы, ереже сияқты реєми құжаттардың тілдік нормасы берік әрі тұракты болуы шарт.

Ал бұлардың барлығынан оқшау тұратын – көркем әдебиет стилінің нормалары. Әрине, бұл айтылғандардың барлығы – функционалдық стильдердің әрқайсысының тілдік сырттай белгілері және соларға орай нормалары туралы. Ал әрбір стильдің өз ішінен мазмұндық-жанрлық бөліністеріне қарай және функционалдығына (мақсатына) орай бөлшектеп, әрбіреуіне тән шағын белгілерін (детальдарын) көрсетер болсақ, сөз жоқ, функционалдық стильдер нормаларын жеке-жеke өз алдына ғылыми ізденис объектісі етуге тұра келеді.

Тақырып желісіне орай, алдымен, ұлттық көркем - әдеби нормалар туралы сөз етіп алу керек. Ұлттық әдеби тіл нормасы мен ұлттық көркем әдебиет нормалары дегендер – бір категория емес. Әдеби нормалар – жалпы тілдік нормалар, ал көркем әдеби нормалар – функционалдық көркем әдебиет стилінің нормалары. Стильдердің қай-қайсысының да тірегі, негізі, қазығы, қоймасы – ұлттық әдеби тіл, соның нормалары. Демек, көркем тіл нормалары – тұтастың бөлшегі, жалпының тармағы ретінде танылуға тиіс. Қазақ тілінің тілдік нормасы дегеніміз

- алдымен, осы тілдің жүйесіне, яғни табиғи, тұрақталған, орнықкан фонетикалық, лексикалық, грамматикалық заңдылықтарына сәйкес келуі керек, екіншіден, дәстүрлі болуы шарт, үшіншіден, солай қолданылып кетуге, яғни тілдік узус дегенге қатысты болуы керек. Демек, жалпы тілдік әдеби норма дегеніміз – белгілі бір кезең ішінде, мысалы, қазіргі кезеңде, көпшілік қабылдаған, тұрақталған қолданыстар, атап айтқанда: сөздердің денотаттық та, коннотаттық та мағынасы, олардың бір қалыптағы көбінесе вариантызың фонетикалық-графикалық көрінісі (тұлғасы), сөз жасау және сөз өзгерту мөдөльдері, синтаксистік амал-құрылымдары. Бұл жерде «белгілі бір кезең ішінде» деген түсінік әдейі айтылады, өйткені тілдік нормалар – бір уақытта пайда болып, ешбір өзгермей, қатып қалатын категория емес. Тілдің өзі сияқты оның нормалары да
- «тірі», «жанды» құбылыс. Айталық, норма ретінде танылған белгілі бір қолданыс (сөз, емле тәртібі, грамматикалық амал т.т.), айталық, дәл сол кезеңде дұрыс деп көпшілік қабылдаған норма болғанмен, тіл тәжірибесінде өзгеріп, «үлгілік» сипатты-нан айрыла бастауы мүмкін немесе «норма» деп көрсетілгеніне қарамастан, кейбір қолданыстар оған бағынбай, күнделікті баспасөзде, радио мен теледидарда, шаршы топ алдындағы шешендік сөздерде, тіпті ғылыми әдебиетте, әсіресе мектеп оқулықтарында қолдау тауып, кеңінен жүмсалған бастайды да бірте-бірте нормаға айналады. Мысалы, жалпы грамматикалық норма бойынша етістіктің өткен шақ есімшелі сұраулы мәнді құрылымы барған жоқ па, келген жоқ па деген модельде келуі тиіс. Бұл – жалпы тілдік норма. Соңғы жылдарда, әсіресе публицистикалық стильде осы модельдің орнына барды емес *ne, келді емес ne* деген құрылым жиі көріне бастады. Эрине, көп уақытқа дейін мұның екі варианты да жарыса қолданыла береді, бірақ соңғысын нормадан тыс қолданыс деп сыйып тастан алмаймыз, өйткені оның грамматикалық мағынасы, қызметі, түсініктілігі алдыңғы варианtpен бірдей, жасалуында да тілдік жүйеден ауытқу жок.

Жалпы әдеби тілдік кейбір норманың өзгеріп, дәлірек айтсақ, бірте-бірте ығысып, жаңаларының элеумет тарапынан қолдау табуы әсіресе сөзжасам саласында көзге түседі. Жана сөз тудыру, яғни сөзжасам құбылысының активтенуі – бұғынгі тіліміздің талабы, ал тіл ол талапты қазіргі өмірдің, қоғамның,

мәдениет, ғылым, техниканың даму тоқпағы туғызып отыр. Бұған норма болып келген кейбір сөз тудырушы жүрнақтардың (-**у**, -**ушы**, -**ыс** т.т.) пассивтенуі, оның орнына бұрын сирек қолданылатын өзгелерінің (**-ым**, **-л+ым** т.б.) активтену неме-се екі тұлғаны біріктіріп, жаңа семантикалық бірлік туғызу сияқты құбылыстар мысал бола алады. Бұлардың барлығы – тілдің құрылымдық нормаларына қатысты әңгіме. Ал нормага келгенде, жоғарыда айттық, құрылымдық жалпы тілдік әдеби нормамен бірге, көркем әдеби нормалар жеке сөз болуға тиіс.

Алдымен, «қазақ әдеби тілінің ұлттық белгілері қандай?» дегенге назар аударсақ. Өзге халықтардың мейлінше дамыған ұлттық тілдері сияқты, қазақ тілінің де әдеби тіл ретінде қалыптасып, әрі қарай дамыған және жетіле түсken тілінің ұлттық сипат алғаны – занды құбылыс. Эр халықтың ұлттық тілі дегеннен кейін, олардың бір- бірінен азды-көпті айы-рым белгілері, яғни өзіне тән зандылықтары болмағы бел-гілі. Қазіргі қазақ тілінің ұлттық белгілері туралы бұрынды-сонды ешбір зерттеуші арнайы қарастырып әңгіме еткен емес. 1990 жылдарда біз әдеби тіліміздің тарихына және көркем әдебиетіміздің тілін тануға арналған еңбектерімізде азын-аулақ сөз ете бастаған болатынбыз⁷. Мұнда шамамен мынадай бел-гілерді атады:

1) қазақ әдеби тілі басын аса бай ауыз әдебиет тілі мен ауыз-ша туып, ауызша тараған ақын-жыраулар поэзиясы және ше-шендік қара сөз ұлгілері тілінен алған ұзак дәстүрлі, бірнеше ғасырлық тіл екендігі;

2) аса бейнелі (образды) көркем тіл екендігі, яғни бей-нелі фразеологизмдердің, синонимдік қатарлардың молдығы, тілдік бірліктердің көріктеу құралдары болу әлеуетінің (потенциалының) құштілігі;

3) лексикалық қазынасы өтө бай тіл екендігі;

Сөз байлығы тек оның санымен өлшенбейтіндігі, лексикалық мүмкіндіктерінің молдығынан көрінетіндігі белгілі; қазақ лексикасының тарихи бейтарап (нейтралдық) қабатының өзі ақпараттың қай түрін беруде де мұқтаждықты өтей алатын дәрежеде екендігі, бұған лексикалық топтардың стильдік қызметпен, ассоциациямен келетін қолданыстарына жиі иек артуы сияқты амал-тәсілдер қосылғанда, ана тіліміздің атауыштық

⁷ Сыздық Р. Сөз құдіреті. - Алматы: Санат, 1997. - 191-192-б.

қазынасының орасан зор байлығын, ол байлықтың көркем әдеби нормалардың ұлттық көрінісі болып танылатындығын айтуға болады. Халықтық терминология деп аталатын атаулар топтары сол халықтың дүниетанымымен, табиғатпен қарым-қатынасымен, әр нәрсені, әр құбылысты бағалауыштық сезімталдығымен тығыз байланысты болып келеді. Қазактар – табиғатты жақсы білген, табиғатпен етene өмір кешіп келген халық, ал табиғат адамды дәлдікке, қарама-қарсы полюстерді дөп басуға, әр заттың, әр құбылыстың нәзік қырларын ажыратып отыруға мәжбүр етеді, осының нәтижесінде қазақ тілінде жеке атаулар молайған, синонимдер қатары көбейген, әсіресе сындық таным аттары: сын есімдер мен үстеулердің жарыспа қатарлары – синонимдер, қайшы қатарлары – омонимдер мен болымды-болымсыз тұлғалар қазақ тілінің лексикалық қазынасының аса бай екендігін көрсетсе, ол байлық ұлттық белгісінің бірі болып танылады.

4) Сөздік құрамды толықтыруда лексикалық-грамматикалық мүкіндіктері күшті дамыған тіл екендігі, яғни сөз жасау тәсілдерінің икемділігі, өзге тілдерден сөз кабылдау қабілетінің күштілігі, семантикалық құрылымдарға бейімділігі – қазақ әдеби тілінің ұлттық белгісінің бірінен саналады.

5) Қазақ халқы мекендереген ұлан-ғайыр территорияның барлық аймағына ортақтық сипатының күштілігі, яғни диалек-тілік ерекшеліктердің әлсіз, аз болып келгендей.

Қазақ көркем әдеби тілінің ұлттық сипаты негізінен осы көрсетілген белгілерден шығады, оның нормалары осын-дай ұлттық сипатына үндесе қалыптасқан. Әрине, мұндай белгілердің бірқатары өзге тілдердің де ұлттық сипатын танытады, айталық, сөздік қазынаның байлығы, сөз құбылту икемділігі, бейнелі бірліктердің молдығы, әдеби дәстүрдің ұзақтығы сияқты белгілер көптеген тілдердің ұлттық нышандары болып келеді. Қазақ көркем тіліне келсек, оның бастау көздері диалектілік ерекшеліктерге бөлінуден жоғары тұруы, ауызша дамыған авторлы әдебиеттің, оның тек поэзия жанрығана емес, ауызша әнгімелеу, баяндау сияқты проза жанрының да белгілі рөл атқарып келгендей, көркем сөздің «шешен-дік сөз» деп аталатын авторсыз (фольклорлық) және авторлы түрінің де орасан зор ықпал етіп келгендей – осылар, қазақ

тілінің өзге тілдерден бөлекше келетін ұлттық белгілері. Аталған белгілердің толық еместігін және бұл – арнайы зерттеген ізденістің тұжырымы еместігін ескертеміз. Ұсынылған пікірдің жалпылық сипатын да мойындаймыз.

Тіліміздің жалпы құрылымдық нормаларымен қатар, көркемдік-эстетикалық заңдылықтарын (нормаларын) қалыптастыратын, беркітетін, әрі қарай ұластыратын, қалың жүртшылықта ана тілінің байлығы мен әсемдігін танытатын, сол байлық пен әсемдікті дұрыс пайдалана білуге тәрбиелейтін құралдың бірі – көркем әдебиет. Демек, қазақ тілі мәдениетін көтеруде қазіргі кезеңдегі көркем әдебиет стилінің орны, рөлі, қызметі ерекше.

Көркем әдебиет – өнер туындысының бірі сөз өнерінің құралы, шеберлік дүкені («дүкен» дегенді ұстахана, шеберхана, мастерская мағынасында жұмсал отырмыз). Көркем шығарма – өнер ескерткіші болғандықтан, бір жағынан, сол өнерді сомдайтын ұстаның: жазушының, ақынның, публицистің, драматургтің шеберлігін сөз ету керек болса, екінші жағынан, көркемсөз иелері әдеби тіл нормаларын белгілеуші, жетілдіруші, сақтаушы болғандықтан, олардың бұл нормаларды ұстануы немесе олардан ауытқуы тұрғысынан да әңгіме болуы тиіс. Лингвостилистика және тіл мәдениеті деп танылатын бұл екі саланың екеуінің де зерттеу нәтижелері белгілі кезеңдегі, айталық қазіргі, қазақ көркем әдебиет тілінің жалпы әдеби тілдің даму бағытымен, даму принциптерімен өлшенетіндігін көрсетеді. Сондықтан бұл орайда қай тұрғыдан болса да, сөз болатын тіл мәселесі, сайып келгенде, тілдік нормага барып тіреледі.

Қазақтың көркем әдебиеті стилінің жалпы нормаларын сөз етумен қатар, бұл әдебиеттің өз ішінен проза, поэзия, драматургия деп бөлінетінің де ескеріп, әрқайсысының стильдік белгілеріне орай тілдік нормаларын талдап-тану қажет. Айталық, көркем әдебиеттің проза жанры – өзгелеріне қарағанда, әлдеқайда кең ауқымды, яғни тілдің барлық функционалдық стильдерінің элементтерін пайдалана алады, онда «стильдік тұйықтылық» деген болмайды, ол – «көп қырлы» стиль. Поэзия тілі – көркемдіктің қоймасы болғандықтан, онда өзіне тән, тілдік құралдарды таңдап жұмсау принциптері бар, өлең тілі

– поэтикалық сөз өрнегіне, сол өрнекті жасайтын тәсілдерге жиірек барады. Сөздің, грамматикалық тұлғаның, синтаксистік құрылымның экспрессиясы күштілерін таңдайды. Бұл таңдаулар тосын, жалпы тілдік нормаға сыя бермейтін элементтерді қажет етеді. Поэтикалық норма өз алдына басқаша дүниелерден тұрады. Драматургия дегеніміз – көбінесе адамдардың өзара сөйлесуінен жасалатындықтан, ауызекі сөйлеу тілінің нормаларын ұстануға бейім келеді, демек, мұндағы көркем тілдік нормалар проза мен поэзия жанрынан өзгеше болып келеді. Сонымен катар бұл үш жанрдың нормалары бір-біріне ауысип, ұласып та келетін тұстарын жоққа шығаруға болмайды. Мысалы, қазақ драматургиясында ак өлеңмен немесе тіп-ті кәдімгі өлең үлгісімен жазылған шығармалар баршылық. Мысалы, Габит Мұсіреповтің «Ақан сері-Ақтоқты», «Қозы Қөрпеш-Баянсұлу» пьесалары, Мұхтар Әуезовтің «Карагөзі», «Қарақыпшақ Қобыландысы», Тахауи Ахтановтың «Ант», Қалихан Бекхожиннің «Ұлан асу», Әбіш Кекілбаевтың «Абы-лай хан», Софы Сыматаевтың драмаларының кейіпкерлерінің тілі – күнделікті ауызекі сөйлеу тілінің әдеби үлгісі емес, нағыз поэтикалық толғаныстар мен ерекше ұсынылған репликалар болып келетіндігін білеміз. Демек, бұл драмалық шығармалардың тілдік нормалары поэзияның нормаларымен үндесіп жатады. Сол сияқты көркем прозадағы кейіпкерлердің тілінен ауызекі сөйлеу тілінің нормаларын танимыз. Осылардың баршасы

– көркем әдебиет стилінің тілдік-стильдік нормалары деген тұтас тақырыпты атауга мүмкіндік береді.

Тілдік нормаларды функционалдық стильдерге қарай ажыратып тануда олардың бір стиль шеңберінде тұйықталатын сипаты жоғын білу керек. Жоғарыда көрсетілгендей, нормалардың бір функционалдық стиліндің өз ішінде ғана емес, азды-көпті стильаралық «ауыс-түйістер» де жүріп жатады. Мысалы, ғылыми стиліге жататын кейбір әдебиетте публицистикаға тән белгілер (нормалар) кездесуі мүмкін және көрісінше. РЕ-СМИ іс қағаздары мен құжаттар тілінде ғылыми стиліге тән реттілік (санамалылық), нақпа-нақтықты көрсететін лексика-грамматикалық бірліктер норма үндесінен шығып тұруы әбден ықтимал. Бұл фактілерді әрбір функционалдық стиль үлгілерін талдаған ғылыми-танымдық ізденістерден көруге болады.

НОРМА ЖӘНЕ ВАРИАНТТЫЛЫҚ

Тіл біліміндегі *вариант*, *варианттылық* терминдерінің беретін мағынасы «ұқсас тілдік бірліктердің (единицалардың) жа-рыспа қатарлары» деген жалпы ұғыммен ұштасып жатқанымен, өзіндік ерекшеліктері бар. Әсіресе «тіл мәдениеті», «әдеби норма» дегендеге қабыстыра қолданғанда, *вариант* сөзін «жарыспа элемент (сөз, тұлға, олардың жазылуы, айтылуы)» деген жалпы мағынада да қолдануға болатындығын, сонымен қатар шектеулі (қатаң) терминдік мән беріп жүмсау керектігін де айтамыз.

Тілдік құбылыстарды зерттеуші маман-теоретиктердің пайымдауынша, варианттылық жалпы тілге, тілдік жүйеге тән қасиет (сипат), екінші сөзben айтқанда, тілдік бірлік-тұлғалардың баршасы вариантты болып келеді. Мұны түсіну үшін, алдымен, *вариант* пен *инвариант* деген терминдердің мағыналарын біліп алған жөн. *Вариант* деректі ұғымды атай-ды, ал *инвариант* сол ұғымды білдіретін дерексіз «дүние», бір-келкі, ұқсас объектілердің ұғымдық «тұпатасы». Айталық, т фонемасының қолданыста бірнеше варианты бар: қатаң айтылатын (*at* дегендегі), жіңішке айтылатын (*et* дегендегі). Бұл жерде т фонемасы – *инвариант*, ал оның қолданыста жуан, жіңішке, келте, созылыңғы деген сияқты көріністері (айтылуы, естілуі) – *варианттар*. Вариант/инвариант деген танымдар о баста фонология атты тіл білімі саласында дүниеге келген-ди. Мұнда фонеманың (дыбыстың) өзін **инвариант** (ортак түбі, тұпатасы) деп, ал оның қолданыстағы түрлерін сол **фонеманың варианттары** деп тану орнықты. Бұл таным бірте-бірте тілдің грамматика, лексика сияқты өзге қаттауларына көшті. Фонологияда: инвариант – «фонема», вариант – «аллофон, фон»; лексика саласында: инвариант – «лексема», варианттар – «лекса, аллолекса»; морфологияда: инвариант – «морфема», вариант – «алломорф, морф» деген ғылыми терминдермен атала бастады. Демек, жалпы тілге қатысты қарағанда, варианттылық де-геніміз – тілдік жүйеге тән табиғи құбылыс болып танылады.

Варианттылық фонетика саласында фонемалардың жуан, жіңішке, қысан, созылыңғы немесе өзге фонемаларға жуық құбылып айтылуы (естілуі) сияқты жарыспалы қатарларды

түзсе, грамматикада морфологиялық, синтаксистік амалдардың қызметтеріне орай бірінің орнына екіншісінің алмасып қолданылуды, дәлірек айтсақ, бір қызметтің әртүрлі грамматикалық амалдар арқылы берілуі варианттар қатарын құрайды, лексика саласындағы варианттар қатары тіпті көп екендігі мәлім. Ол қатарларды:

әдеби сөз бен диалектизмдер;
сөздердің фонетикалық варианттары;
төл сөз бен кірме сөздердің жарыспалы қатарлары; қазіргі қолданыстағы сөздер мен олардың көне варианттары; жаңа атаулардың бірнеше вариантта кездесуі;
кірме сөздердің тұлғалық варианттары; туынды сөздердің тұлғалық қосарлары – қысқасы, осындағы жарыспалы топтар лексикалық варианттар әлемін көрсетеді.
Демек, варианттылық тілдің барлық қаттауында орын алады екен, соңдықтан оны:
1) лексикалық немесе сөз варианттары;
2) грамматикалық варианттар;
3) лексика-фонетикалық варианттар деп бөліп-бөліп қарастырған жөн.

Сонымен қатар варианттылық құбылысын сөз еткенде зерттеушілер (негізінен орыс тіл білімінде): варианттылықты тудыратын факторлар, оның ішінде тілден тыс тұратындары, варианттылықтың әлеуметтік лингвистика тұрғысынан қарағанда туындайтын проблемалары деген жайттарға көніл аударуды ұсынады. Бұлардан басқа: ситуативтік варианттар, әдеби тіл мен диалектілер тұрғысынан алғандағы варианттылық мәселелері дегендер де зерттеуші назарынан тыс қалмауы керек. Ең соңғысы – тілдік бірлік-тұлғалардың варианттылығын және норма мәселелерін зерттеу ұсынылады. Біздің бұл жұмыстағы негізгі нысанымыз да осы – соңғы көрсетілген проблема.

Демек, вариант құбылысын әдеби норма қырынан қарастырап болсақ, алдымен тағы да кейбір терминдерді айқын-далу қажет. Ол: *вариант* және *дублет* терминдері. Зерттеушілердің басым көшілігі, оның ішінде орыс тіл білімінде де бұл екі сөздің терміндік мәндері бірдей деп қарайды, яғни бірінің орнына екіншісін жұмсау жиі кездеседі. Тепе-тен

мағыналас қатарлар болмаганмен, әбден ажыратылып, еке-үі екі бөлек тұрақты термин болғанға дейін, осылайша алма-кезектеп жұмсай беруге де болар. Тіл мәдениетіне қатысты бұрынырақ жазған бір мақаламызда біз де *дублет* terminin «жазба әдебиетімізде екі, кейде тіпті одан да көп вариантта қолданылып жүрген жеке сөздер, тұлғалар» деген мағынада жұмсаған болатынбыз⁸. Қазақ тіліндегі вариантылық проблемасын арнайы зерттеп, монографиялар жазған И.Ұйықбаев, С.Бизақов сияқты ғалымдар да бұл екі атаудың бір-біріне сино-ним болып келетінін айтады. Дегенмен оларды айырып жұмсау қажеттігін де ескерtedі. И.Ұйықбаев: «*Variant* сөзінің ауқымы кең жатады, өйткені ол барлық жарыспалы сөздерді қамтиды, ал *дублет* көбінесе лексикалық-семантикалық дәлме-дәлдікті (аллолекса) білдіру үшін қолданылады» деген пікірді айтады⁹. Зерттеуші С.Бизаков А.А.Реформатский, Н.М.Шанский, Ро-гожникова, И.А.Короленко сияқты зерттеушілердің *вариант* пен *дублет* терминдерін орыс тіл білімінде ажыратып қолдану туралы пікірлерін келтіріп, бұл терминдер жайында бірсызыра тоғызырақ мағлұмат береді де қазақ тіліндегі еңбектерде бұл екі терминнің ара-жігі ашылмай, қабат алынып келе жатқанын білдіреді¹⁰. Бұл зерттеуші де «вариант» пен «дублет» құбылыстарын бір-бірінен ажыратып танытатын белгілерді атап, фонетикалық дублеттер мен сөздің дыбыстық вариантта-рына жеке-жеке сипаттама береді.

Ұсынылып отырған жұмыста біз вариантылық құбылысының зерттелу тарихын, таным деңгейін тәптіштеп толық баяндауды мақсат етпей, қазақ тілінің бүгінгі әдеби нормасы түрғысынан келгенде, вариантар, дублеттер, қосар сөздер (И.Ұйықбаев ұсынған атаулардың бірі), жарыспа сөздер (тұлғалар) деп атап жүрген тілдік элементтерді қалайша танып, жіктегеніміз жөн деген таным-талдауларымызды ұсынамыз (бұрынырақ жариялаған кейір материалдарымыз берін пікір-лерімізді де пайдаланғанмызды ескертеміз).

Әдеби норма дегенді сөз етуде де зерттеушілердің алдында

⁸ Сыздықова Р. Қазіргі казақ әдеби тіліндегі дублеттер жөнінде //Тіл мәдениеті және баспасөз. - Алматы, 1968. - 28-б.

⁹ Ұйықбаев И. Қазіргі қазақ тіліндегі вариантылық проблемасы. - Алматы, 1976. - 14-б.

¹⁰ Бизақов С. Тілдік норма және вариантылық. - Алматы: Фылым, 1997. -16-19-б.

«қай қолданыс қазірде «әдеби» болып танылады, қайсысы та-
нылмайды?» деген мәселе тұрса, мұның бір ұшы вариант, дуб-
леттерді тануға, іріктеуге барып тіреледі.

Кейбір зерттеушілер тіпті вариантылық құбылысы болма-
са, нормалану процесін сөз етуге тұра келмес еді деген сияқты
пікірлерді де айтады. Мұның жөні де бар, өйткені норма де-
гениміз – таңдау, ал таңдау үшін ең кемінде екі варианттан
тұратын дүние (сөз, тұлға, дыбыс, тіркес, сөйлем түрі т.т.)
булу керек. Таңдау тілдің қолданыс үстінде болады. Сондықтан
қай жерде, функционалдық стиль үлгілерінің
қайсысында, қай кезеңде, айтальық, дәл бүгінгі тілімізде
болатын таңдаудың ере-кше мәні бар. Өйткені тіл дамуының
бір кезеңінде норма емес элемент келесі кезеңінде норма
ретінде танылуы мүмкін және керісінше.

Әдеби норманы анықтауда әлеуметтік талғам, яғни қоғамы-
ның сол қолданысты дұрыс деп санауы негізгі рөл атқара-
тындығы жоғарыда айтылды. Мысалы, *сұраным*, *қойылым*,
оқылым, *салым*, *салымши* сияқты сөздер бұрын тым жасан-ды
тұлғалар ретінде әдеби тілде қолданылмаған болса, бұл күндеге
олар – тіпті терминдік мағынаға ие болған сөздер. Сол сияқты
функционалдық стильдердің бірінде нормадан тыс деп
танылатын элементтер екіншісінде нормага сай түсетін
бірліктер (сөздер, құрылымдар, эстетикалық құралдар) болып
саналуы әбден ықтимал (бұлар жөнінде кейінгі тарауларда
толығырақ айтылады).

Жоғарыда айтылғандай, тіл мәдениетіне қатысты мәселелер-
ді сөз еткенде, зерттеушілердің де, қалың жүртшылықтың да
көбірек назар аударатыны – жарыспа бірліктер (сөздер, тұлғалар,
орфограммалар т.т.). Фонетикалық-орфографиялық нормалары,
сондай-ақ жеке сөздер мен грамматикалық амалдарды жұмсауы
көп сәттерде бір ізге түсіп, тұрақталу процесін басы-нан өткізіп
жатқан казіргі жазба әдеби тіліміздің мәдениетіне нұқсан
келтіріп отырған құбылыстың ең үлкені – кейбір сөздер мен
тұлғалардың әртүрлі вариантта жарыса қолданылып келе
жатқандығы. Бұл жерде вариант атаулының бәрі әдеби нормага
нұқсан келтіреді деген тұжырымнан мұлде аулак болу керек.
Олардың дені тіл қолданысының белгілі сәттерінде өз орны бар,
жұмсалу әлеуеті құшті элементтер болып келеді. Енді
варианттардың түрлерін жеке-жеке көрсетелік.

Лексикалық варианttтар

Лексикалық, яғни жеке сөздердің варианttтарын құрайтын топтар мүнадай:

1) қазақтың төл сөздерінің ішінде бірі – жұрнақсыз түбір сөз, екіншісі – жұрнақты туынды сөз болып қолданылып жүрген варианttтар қатары бар: *нақты* – *нақтылы*, *ерек* – *ерекше*, *шабар* – *шабарман*, *ұры* – *ұрлықши*, *диқан* – *диқанши*, *аспаз* – *аспазши*, *кіл* – *кілең*, *тоз* – *тозаң*, *мүкі* – *мүкіс*, *лайық* – *лайқат*.

Бұндай қатарлардың дублетті сипаты, яғни біреуі артық екен-дігі жақсы сезілгенімен, көпшілігінің екі варианты да қолданылып жүр. Тек бірен- саранының, мысалы, *диқан* сөзінің *диқан-ши*, *аспаз* сөзінің *аспазши* варианttтарын қате деп тауып (яғни *диқан*, *аспаз* деген тұлғалардың өздері қасіп немесе мамандық иесі екендігін білдіреді), жұрнақты сынарларына сөздіктерден орын бермей жүрміз. Ал *диқанши* тұлғасын қазақ сөзінің қасақшылары – Ахмет Байтұрсынов, Міржақып Дулатовтар қолданғанын білеміз. Соған қарағанда, халықтық қолданыста сөз түбірінің, әсіресе кірме сөздер мен жұрнақтардың мағы-насына жеке-жеке үнілуден гөрі, мамандықты, қасіпті таны-татын сөздердің біркелкі тұлғалануына, яғни қебінің **-ши/-шы** жүрнағымен жасалатындығына назар аударылған сәттері болатындығын байқаймыз.

2) Қазіргі тіл жүмсау тәжірибеліде бірқатар сөздерге III жақтық тәуелдік көрсеткішін екі рет қабаттастыра жалғап қолдану орын алып келеді: *қебі* – *қебісі* (*көп+i+ci*), *бірі* – *бірісі* (*бір+i+ci*), *ақыры-ақырысы* (*ақыр+ы+сы*) (бұлар жөнінде толығырақ «Морфологиялық варианttтар» деген тараушада ай-тылады).

3) Қазақтың төл сөздерінің ішінде бір түбірден екі түрлі жұрнақ арқылы жасалып, бірдей мағынаны беретін сөздер де варианttтар қатарын құрайды: *намысшыл* – *намысқор* – *намысқой*, *кемдік* – *кемшілік*, *жаягерлік* – *жаянгершілік*, *бейәдел* – *әденсіз*, *бейхабар* – *хабарсыз*, *аласы* – *алажақ*, *бересі* – *бережек* – *берешек*, *себепкер* – *себепші*, *арызқой* – *арызқор* – *арызышыл*, *аспаз* – *аспазши* – *асиы*, *шоқынды* – *шоқыншиық*, *малсақ* – *малжансды*, *ұтымды* – *ұтықты*, *оқтын-оқтын* – *оқсын-оқсын* т.т. Мұндай қатарлар сан жағынан едәуір. Нор-ма түрғысынан қарағанда, бұлардың да көпшілігі – жарыса

қолданыла беретін сөздер, тек бірен-саранының екінші варианттары жергілікті қолданыс (*оқсын-оқсын, бережек*) немесе ауызекі сөйлеу тіліне тән (*шоқынышық*) деп саналады. Эрине, бұлардың алма-кезек қолданыла беретін себептерін дәлелдеу киын, дегенмен әр жұрнақтың сөз мағынасына қосатын өз реңктері (семалық ерекшеліктері) бар екенін байқап, олардың әрқайсысының қолданылатын орындарын біліп жүмсау кепек. Айтальық, шоқынған адамды *шоқынды* десе, ол – нейтралды жалпы атау, ал оны *шоқынышық* дегенде, жақтырмай, мұқатып атау реңкі сезіледі; сол сияқты *білімді* – бояусыз номинатив, *білімдар* – көтеріңкі тон қосылған, эмоциялы атау; *арызышыл* – арыз жазғыш адамның нейтралды нақты атауы, ал оны *арызқой* десек, «арыз жазуға әбден бейімделіп алған» деген сияқты қосымша мағыналық сема (реңк) үстелген деуге болады. *Бейберекет* пен *береқетсіз*, *бейхабар* мен *хабарсыз* тәрізді жарыспалы қатарлардың екі сыңары да өзге сөздермен тіркесу қабілеттеріне қарай немесе белгілі бір функционалдық стильге жататын үлгілерде қолданылу мүмкіндіктеріне қарай өз орындарында жүмсалған алады: *хабарсыз кету* дегенді *бейха-бар кету* деп алмастыруға болмайды, сондай-ақ *мазан тиесілі ақша* дегенді *мазан тиісті ақша* деп ауыстыру жатық болмас еді; *жолдасым мазан бүгін келуге тиісті* дегенді *тиесілі* деп, *береқетсіз адам* дегенді *бейберекет адам* деп айту мүлде келмес еді. Сіра, бұл іспеттес қатарларды таза (тепе-тен) вариантар деп атауға болмайтын тәрізді. Тіпті *жұмақ ~ ұшпақ*, *ұқсан ~ құсан* сияқты бірен-сарандарын әдеби варианттары алғашқысы деп нормаға айналдырған күннің өзінде екінші сыңарлары әр алуан қажеттілікке қарай әдеби тілде қолданыстан шығып қалмайды: *ұшпақ* сөзінің мақал-мәтелдер кұрамында сакталуы, *ұқсан* вариантының үйқас, ыргақ сияқты өлең шарттарына қарай поэзияда еркін қолданыла беретіндігі осыны дәлелдейді.

Демек, әдеби тіл нормасы талабынан келгенде, лексикалық варианttтар қатарына мейлінше сақтықпен (дұрыс таныммен) қарау керек болады. Олардың ішінде бір сыңарын сөздіктер арқылы реттеп, қолданыстан ығыстыру әрекетін іске асыра беруге болмайды.

4) Лексикалық варианttардың бір тобын белгілі бір атаудың көпшілікке танымал, яғни біршама норма ретінде қалыптастып қалған сөздің газет-журнал беттерінде жарыса жүмсалып

жүрген қатарлары құрайды. Мысалы, *қызылишаны* Жетісу өнірі қазақтары қылаша түрінде, *сіріңкені* батыс өлкедегілер шырты деп, енді бір аймакта *оттық*, *күкірт*, *кеуірт* деп қолданылатындығын білеміз. Бұлар әдеби сөз бен жергілікті сөздердің қатарлары болғандықтан, сонғылары әдеби нормаға енбейді.

Норманы сөз еткен тұста әңгіме жазба тілде орын алғып жүрген «әдеби сөз – диалектизм» қатарлары туралы ғана болмақ, әйтпесе ауызекі сөйлеу тілінде кездесетін әдеби тілдік

– диалектілік қатар құрайтын сөздер едәуір көп екендігі мәлім. Әрине, ауызекі сөйлеуде де басы артық сөздердің қосамжарлап қолданбай, нормаға сай варианттарын жүмсасақ, нұр үстіне нұр болар еді ғой.

Әдеби - диалектілік деген қатарға әсіресе әр жерде әртүрлі аталатын бір ғана өсімдіктің, аңың, құстың, құрт-құмырсықаның екі-үш вариантта келген түрлері де жатады. Мысалы, *бәрпі* деп аталатын өсімдік өзге өңірлерде үқорғасын, *аюоты* деп, *бетегебоз* деген өсімдік енді бір жерлерде *тырса* деп аталады еken. Ал бозбетеге дегеннің торт түрлі варианты бар: *селеу*, *садақбоз*, *көде*; құс атауларынан *сұықторғай* ~ *бозшымышық*, андардан *сарыңақ* ~ *зорман*, *көдек* ~ *қодыға* ~ *қодық*, *қаракөз* ~ *торта* (балық), *миғұрт* ~ *бәдік*, *айналма* ~ *тентек* (орынша «вертячка» деп аталатын бір ғана мал ауруының әр жерде әртүрлі аталуы), *таңқурай* ~ *биешек* («малина» деген жидектін аты), *жасауынқұрт* ~ *шылауашын*. Бұлардың мына варианты әдеби, қалғандары жергілікті деп танудың өзі қын. Әзірge ботаника, зоология окулықтарында жиірек қолданылғандарын немесе түсіндірме сөздіктерде анықтама берілген вариантын норма (әдеби) деп, қалғандарының түсіндірмесін соған сілтеме жасау арқылы тұрақтандыру әрекеті байқалады, яғни мұндайда норма еместері бірте-бірте қолданыстан ығыстырылуы керек, ейткени бір зат (аң, құс, өсімдік) екі-үш түрлі аталмауға тиіс, ал мақал-мәттерде, фразеологизм құрамында сакталатындары нормадан тыс болса да, өз орындарында айтыла беретіні түсінікті.

5) Лексикалық варианттар қатарын жаңа тұлғалар: бұрын казақ ұғымында жоқ заттарды, ұғымдарды казақша атау процесінде жарыса қолданылатын сөздер құрайды. Бұлардың өзге топтардан өзгешелігі – біреуінің норма деп танылуы тезірек болады да, екінші, үшінші варианттары қолданыстан ығыс-

тырылады немесе басқа мағынаға ие болып, жеке лексикалық бірлік ретінде әдеби тілдіе өмір сүреді. Мысалы, ондаған, жүздеген адам түсетін, түнейтін, бірнеше сағаттан бірнеше күнге, айға дейін тұратын арнайы жай (орысша – «гостини-ца», Еуропа тілдерінде – «отель») бұрын қазақтарда болмаған, бірақ мұны қазақша атауга әбден болады, өйткені ол – ғылыми-техникалық термин емес немесе бұрын қазақ білмеген абстракт ұғым атауы емес, оның үстіне қазақ қауымы жолаушылап шығатын адамдарды далага түнетпей, үйге түсіріп «конак», «мейман» деп атауды жақсы білген. Сондықтан «отель» қазақша мейманхана, қонақ үйі, қонақүй деп күні бүгінге дейін жарыса аталып, арнайы ғимараттың төбесіне, майдайшасына жазы-лып келеді. Мұның мейманхана вариантының жарыса жүруіне кейін пайда болған әр алуан әлеуметтік қызмет жайларының хана сөз-форманттымен жасалу жүйесі де (*kітапхана, асхана, аурухана, төлхана*) себепкөр болғанға ұқсайды. Мұндай жаңа атаулардың алғашқы кезде варианиттары көбірек болатын. Мысалы, 1920-1960 жылдары тыңайтқыш ~ құнарландырғыш, қосымша құн ~ түсер құн, басылу ~ басылым, оқушы ~ оқырман, азамат созысы ~ азаматтық согыс, жұмыскер ~ жұмысының деген варианиттар қатары болды. 1990 жылдың жарық көрген «Қазақ лексикасындағы жаңа қолданыстар» атты сөздікте *шірінді* ~ қараши^rік (гумус), *айнамұз* ~ мұзайдын ~ мұзойнақ («каток»), *аяқжол* ~ жаяу соқпақ (тrottuar), *балқайнатпа* ~ қайнатпа ~ *tosan* (варенье), *жолақы* билет ~ *сапарлық* билет («проезд-ной билет»), *жолқаптық* ~ жолдорба («рюкзак»), *көктат* ~ *көкөніс* (овош), *қигаштама* ~ бұрыштама («виза»), қол күйме ~ бесік арба («коляска»), *қорап* ~ қаяу («кузов»), құлаққап ~ құлаққалқан құлақтама, құлақілдік ~ құлақілдірік («наушник»), қызан ~ қызанақ (помидор), анықтамалық ~ *мағлұматнама* («справочник»), *өлікхана* ~ мәйітхана («морг»), *тежесеме* ~ тежегіш («тормоз»), *жеңілгек* ~ *тиектүйме* («запонки»), *шыңылтыр* ~ әйнекей («глазурь») деген ондаған жаңа сөз қатары тіркелген. Бұлар – қазақ өмірінде, оның мәдениетінде бұрын болмаған жаңа заттардың атаулары, көбінесе олар – тұрмыстық лексика деп аталатын сөздер, сондықтан оларды орысша атамай, қазақша баламасын жасау барысында екі-үш, кейде тіпті 3-4 (наушник дегеннің атауын қараңыз) жарыспа жаңа тұлғалар пайда болғанын көреміз. Әрине, бір ғана нақты

заттың аты болғандықтан, оны әркім әртүрлі атамай, бір ғана сөзбен беру – норма талабы, бірақ бұл талап көп ретте бірден орындаға қоймайтындығы, ауызекі сөйлеу тілі былай тұрсын, жазба дүниеде, әсіресе баспасөз беттері мен радио, теледи-дар сияқты ақпарат каналдары тілінде бірсыныра уақыт бойы вариантар болып түрліше аталаған келетіндігін мойындау қажет. Тіл мәдениеті саласында істелуге тиіс шаралардың бірі – осындай жарыспа атаулардың бірін норма ретінде қалыптасытуру. Бұған вариантардың бірінің жиірек қолданылуы, окулықтар мен анықтамалық құралдарға біреуін енгізу, әр алу-ан нормативтік сөздіктерге нормага сай деп танылған біреуін беру сияқты іс-әрекеттер дәнекер болады. Айтальық, жоғарғы көрсетілген вариантардың ішінде *тыңайтқыш, қосымша құн, оқырман, мұзайдын, анықтамалық, бұрыштама, басылым, мәйітхана, көгөніс* деген сыңарлары біршама орныға түскен сияқты. Ал енді бірқатарының дәл мына варианты норма болсын деп айта қою қыын. Мысалы, *томидор*-дың қызынақ немесе қызын деген аударма вариантарынан ғөрі қолданыста «*томидор*» сөзі жиірек кездесетіндігін көреміз.

6) Орыс сөздері мен олардың қазақшаланған вариантарының қатар қолданылуы алдыңғы көрсетілген топттан бөлек талданып, танытылады. Мысалы: *скелет ~ қаңқа, артрит ~ шорбуын, атрофия ~ сему, реликт ~ қалдық, туберкулез ~ құрт ауру* сияқты қатарлардағы әсіресе медицина терминдері жазба тілімізде жарыса қолданылып жүр және сөздіктерде екі вариантын да норма деп беріп келеміз. Бұлардың санатында *паспорт ~ төлкүжат, космос ~ гарыш, класс ~ сынып, телеграмма ~ жеделхат* сияқты көптеген тілдерге ортақ интернационалдық корға жататын сөздерді екінші бір шет тілдің, көбінесе араб тілінің сөзімен алмастырудың уәжі қаншалықты құшті екенін айту қыын, сірә, бұл жерде әйтеуір «орысшылдықтан» қашу ниеті рөл ойнаған болар, әйтпесе 70-80 жыл бойы қолданылып келген *класс* сөзін (мектеп кластары), мамандық дәрежесін білдіретін *класс* арабша *сынып* (лұрысы *синиф* болуы ке-рек) баламасымен алмастырганда, оның қазаққа түсініктілігі, дағдылығы жағынан ұтып тұрмаганы белгілі, *космос* терминін *гарыш* деп алмастырганда, бұл арабизм «*космос*» дегеннің ғылыми мағынасын бере ме: түпнұсқа тілдегі негізгі мағынасы («так») мүлде жуыспайды, ал оның араб тіліндегі «*көк аспан*»

деген коннотативтік мағынасы *космос* дегенді білдірмейді, *космос* – жерден қарағандағы жай аспан немесе көк аспан емес. Оның үстінен *космос* түбірінен туындағының *космогония*, *космонавтика*, *космизация*, *космография* деген сияқты терминдерді *гарышгония*, *гарышнавтика*, *гарышграфия*, *гарсизация* деп атайды алмаймыз, демек, *космос* сияқты сөздердің ғылыми термин етіп қалдыру керек, яғни мұндай сөздердің көбінесе ғылыми әдебиетте жүмсалатын, барлық тілдеде жазатын ғалымдарға таныс халықаралық варианктарын норма деп қалдырасқ, казак тілінің байлығы ортаймайды. Бұл да қазіргі кезде лексикалық норма проблемасының бір қырына барып тіреледі, яғни әңгіме бұл жерде *космос*, *класс* сияқты жеке сөздердің қолданысқа ену-енбейі туралы емес, терминология принциптерін жүйелеу жайында болмақ.

Ал *гарыш*, *Елбасы* (Республика Президенті), *халық қызметшісі* (депутат), *құрылтай* (конференция, съезд, симпозиум, сессия, жиын, жиналыс) сияқты сөздер сипаттаушы, суреттеуеші баламалар болып қолданыла алады.

Міне, қазіргі таңда әдеби норма статусында бір варианты үзілді-кесілді тұракталмаган сөз топтарының сипаттары – осындей. Бұл топтарды осылайша бөліп-бөліп таныстырып өтуіміз қажет болды. Өйткені бірқатар тіл мамандары мен жазушы-журналистер жарыспалы варианттар мен синонимдер қатарын шатастырып жүрген ынғайлары бар. Ал, дұрысында, фонетикалық, тұлғалық, мағыналық жақындығы жағынан жарыспа сөздер мен синонимдерді таза вариантың қатарлар деп қарауға болмайды. Бір заттың номинативтік атауы екеу (не үшеу) болса, олар – дублеттік варианттар болмақ, мыса-лы, *иінагаш ~ қүйенде* дегендегер – лексикалық варианттар, ал заттың сынын, қасиетін, қымылын, қымылдың амалын мағына жағынан жақын, бірақ түрлі сөздермен атаса, олар синонимдер болады. Мысалы, *есерсоқ*, *кенкелес*, *әумесер* сияқты сын есімдер адамның бір қасиетін түрлі сөзбен білдіреді, олардың мағыналары жуық, бірақ сол мағына қосымша семантикалық реңктері (семалары) арқылы әр сөзді өз орында қолданатын синонимдер етіп танытады. Демек, мағыналас бірліктердің (сөздердің) бәрі лексикалық варианттар болып шықпайды. Варианттар – фонетикалық, морфологиялық, генетикалық жағынан түрленетін жарыспа сөздер, ал синонимдердің ста-

тусы бұдан мұлде бөлек. Нормадан ауытқушылық көбінесе синонимдерді таңдауда байқалады. Мысалы, *қайтыс болды*, *қаза тапты*, *өлді* деген синонимдердің әркайсысының қолданылатын орындары бар (бұлардың *келмеске кетті*, *о дүниелік болды*, *көз жұмды* деген сияқты ондаған бейнелі тіркес қатарларын былай қойғанда, олар да орын тандап, контекст таңдап жұмысалатыны белгілі). Теледидардан Шешенстанда болып жатқан қақтығыстар жайында хабар жүргізуши журналист: «пәлен жерде, пәлен күні болған айқаста федералды үкімет әскерлері жағынан пәлен адам қайтыс болды» деп *хабарлаганын естідік*. *Ұрыста адам қайтыс болмайды*, *қаза табады*, *шейіт болады*, *аварияда опат болады*, *аурудан, жаражаттан қайтыс болады*.

Сол сияқты жылдың төрт мезгілінің келгенін білдіретін синоним сөздердің әркайсысына дәл түсेतін өз жыл мезгілдері бар: *қыс туследі*, *жаз шыгады*, *көктем туады*, *күз келеді*. *Жаз тусти*, *күз шықты*, *қыс туды* деп қолданса, ол – лексикалық нормадан ауытқу болар еді. Баспасөз беттері мен көркем әдебиетте әдеби нормадан ауытқудың сөз тандауға қатысты түрі – ең жиі кездесетіні. Бұл ретте тек синонимдер қатарын таңдауда емес, жалпы жоғарыда көрсетілген вариантар қатарын тандап қолдануда үлкен ағаттықтар, білместіктер, салақтықтар кездесіп келеді.

Фонетикалық-орфограммалық және лексика-фонетикалық вариантар

Әдеби норма тұрғысынан келгенде, біреуі нормативтік (нормаға сай), екіншісі (не екіншілері) нормаға үйлеспейтін қатарлар деп бөліп қарастыратын топтар бар. Бұндай жарыспа элементтерді біз *дублет* деп атағанды жөн көреміз. Дублеттердің ең үлкен бірінші тобы – **фонетикалық-орфограммалық** (бұны **лексикалық-фонетикалық** деп те атап жүрміз) болып келетін тұлғалар, яғни дыбысталуы бір-бірінен өзгеше түсेतін, бір инварианттан өрбіген вариант сөздер: *зарар ~ залал*, *пен-de ~ бенде*, *кәрі ~ қары*, *тиірмен ~ диірмен*, *мұнда ~ бұнда* т.т. Бұлардың өзін іштей топтастыру керек болады:

а) араб, парсы тілдерінен енген кірме сөздердің фонетикалық орфограммалық жарыспа қатарлары;

ә) қазактың төл сөздерінің жарыспа тұлғалары; б) орыс тілінен және орыс тілі арқылы енген кірме сөздер болып келетін жарыспалар; в) ауызша сөйлеу тілі мен жазба әдебиетте түрліше фонетикалық вариантта кездесетін қатарлар.

Дыбыстық тұлғасы (айтылуы мен жазылуында) жағынан дублет болып келетін бірліктердің басым көшілігін араб, парсы тілдерінен енген кірме сөздер құрайды: *рұқсат* ~ *ұлықсат*, *уәде* ~ *уагда*, *зерек* ~ *зирек*, *зарар* ~ *залал*, *мехнат* ~ *михнат*.

Қазақ тіліне шығыс тілдерінен сөздердің енуі ертеректен басталғаны мәлім. Олар негізінен оку-ағарту, әдебиет, дін сияқты мәдениет каналымен келді. Басым көшілігі халықтың сөйлеу тілінен орын алып кетті, олар тұрпаты жағынан қазақ тілінің фонетикалық заңдарына бағынып, қазақша қалыптасты. Мысалы, араб тіліндегі *гайн* деген дыбыстан басталатын сөздер қазақ тілі үшін алдыңғы жат дыбысты түсіріп, сөзді дауыстыдан бастап айтуды қалыптастырды. Мысалы, *ақыл*, *әділ*, *әдем*, *аза*, *азан*, *айт*, *айып*, *амал*, *ар*, *арыз*, *асы*, *аян*, *аяр*, *әзіз*, *әйел*, әлем тұлғасында қолданылатын сөздердің баскы дыбысы – **гайн** (*гақыл*, *әәділ*, *әәдем* ...) болатын. Сол сияқты сөз басындағы **и**, жіңішке **х** дыбыстары да қазақтың сөйлеу тілі үшін кәнігі болмағандықтан, *һәйбәт*, *хәйлә*, *хейван*, *хәқ*, *хәқиқат*, *халуа*, *хәдір*, *наким*, *хәл* сөздері *айла*, *қайла*, *айуан*, *ақ* («*аққа* Құдай жақ»), *ақиқат*, *алуа*, *әзір*, *әкім*, әл болып халық тіліне «қазақы» тұлғада енді. Бірақ осы сөздердің бірқатары көп уақытқа дейін екі, кейде үш фонетикалық вариантта қолданылды. Мысалы: *әдем* ~ *гадем*, *әділ* ~ *ғәділ*, *асы* ~ *ғасы*, *әзіз* ~ *ғазиз*, *әлем* ~ *ғалам*, *айла* ~ *қайла*, *айуан* ~ *хайуан*, *ақ* ~ *хақ*, *әкім* ~ *хәкім*, *ақиқат* ~ *хақиқат*, *әл* ~ *хәл* сияқты қатарлар күні бүтінге дейін қосамжарланып келеді.

Тіл дамуы үшін сәтті орын алған бір құбылыс – бұлардың бірсыптырасының екі сыңары екі түрлі мағыналық дербестік алып, екі лексикалық бірлік (сөз) болып қалыптасуы, олар – *өкімет* ~ *үкімет*, *мәлімет* ~ *маглұмат*, *хақ* ~ *ақ*, *ақиқат* ~ *хақиқат*, *әкім* ~ *хәкім*, *әл* ~ *хәл* сияқты тұлғалар. Демек, бұлардың енді фонетикалық дублеттер емес, жеке-жеке сөздер болып танылуы бел алып келеді. Араб, парсы кірме

сөздерінің фонетикалық дублеттер құрайтын тобы, әрине, тек сөз басындағы **тайн**, **аш**, **ха** дыбыстарымен келетіндер ғана емес, өзге де көптеген тұлғалардан табылады. Мысалы, *пәле ~ бәле, тәспиқ ~ тәспі ~ тәспих ~ тәсбік, тағылым ~ тәлім, қазір ~ әзір, разы ~ риза ~ ырза, рүқсат ~ ұлықсат ~ ұрықсат ~ лұқсат, ризық ~ ырзық, сағадат ~ сәт, секілді ~ сықылды, шайтан ~ сайтан, ауа ~ әуе, үәде ~ үағда, зерек ~ зирек* деген қатарлардың қазақша тұлғалануындағы фонетикалық заңдылықтарды фонетист-мамандар дәлелдей танытар. Біздің бұл жердегі мақсатымыз – жарыса қолданылып келген, қолданылып жүрген вариант тұлғаларды көрсетіп, олардың әдеби нормага қатысын айқындау.

Әдетте әдеби норма тұрғысынан келгенде, дублеттердің біреуі – нормативтік (нормалық), қалғандары – дәл сол қолданыста нормадан тыс тұратын бейнормалық болып танылуы қажет. Бұл талап әсіресе емлеке (жазылуына) келгендеге, қатаң сақталуға тиіс. Жоғарыда да айтылды, тілдің ішкі даму заңдылықтарының бірі – әр ұғымды жеке-жеке атау (номинация) заны бұл варианттардың біразын дублеттер дүниесінен ығыстырып жіберді, яғни дублеттік қатар түзіп тұрған тұлғалардың әркайсысына өзгеше семантикалық дебестік беріп, жеке сөз статусына көтерді немесе стильдік мақсатта қоланылатын стилемага айналдырыды. Мысалы, *әкім* – мемлекеттік құрылым жүйесінің лауазымдық термині (Алматы қаласының әкімі), *хакім* – «дана, философ, ойшыл» (хакім Абай); *өмір* – ұғымның жалпы атауы, *ғұмыр* – жеке адамның өмірі (бұл даралану әлі тұрақталған жоқ деуге болады, бірақ жалпы мағыналық жағынан осылайша ажырату бағыты бар), *шайтан* – «жын-шайтан», *сайтан* – «көремет сиқырлы» («Мен қазақын, кара көз сайтан қызыбын» – Ж.Молдағалиев), *гашиқ* – асық вариантының поэзияда өлен техникасы шартта-рын (тармақ өлшемін) дүрыс сақтауда орын алады (мысалы, Абай поэзиясында). Осы қатардан *абырой ~ абиыр, ауа ~ әуе, тағылым ~ тәлім* деген варианттарды көруге болады.

Демек, кірме сөздер болып келетін жарыспалы қатарлардың фонетикалық вариантының лексикалық корды толықтыруда

белгілі қызмет атқаруы – тіл-тілдің қай-қайсысында орын алатын универсалий құбылыс болғанымен, қазақ тілінде оның едәүір өнімді түрде жүріп жатқаны байқалады. Бұған және бір дәлел – тек кірме сөздер емес, қазақтың төл сөздерінің де фонетикалық дублет қатарларының семалық үстемені (мағыналық қосымша ренкті) пайдаланып, екі лексикалық единица ретінде қолданылып келе жатқандары аз емес. Мысалы, *адыраю* ~ *одыраю*, *дөңгелек* ~ *доңгалақ*, *жиналыс* ~ *жисиылыс*, *жұбаныш* ~ *уаныш*, *жұбату* ~ *уату*, *суару* ~ *сугару*, *улгеру* ~ *улгіру*, *бақ* ~ *бай* т.б.

Кірме сөздердің енді бірқатары көбінесе діни әдебиетте, шығыс философиясы, мәдениеті, әдебиеті т.б. жайында жазылған үлгілерде ғана қолданылатындар болып келеді, олар араб пен парсы тілдеріндегі түпнұска тұлғаларын біршама сақтап пайдаланылады. Айтальық, *ихсан* «1) жарылқаушылық, жақсылық, қайырымдылық; 2) қайыр, садақа» («Өнер өзі де – мал, өнерді үйренбек – өзі де *ихсан*» – Абай¹¹); *инсан* «адам», *әнелислам* «мұсылмандар, ислам дініндегілер», *таби* «1) бір-еуге ерушілер, біреудің жолын қуушы, шәкірт, жәрдемші; 2) қоласты, қарасты, бағынушы» («Олай болмаса, сипаттар өз орталарында бірі – *табиғ*, бірі – *мәтбүғ* болады ғой» – Абай); *садиқ* «1) дұрыс, шын, 2) нағыз, ақиқат, 3) күшті, мықты», *мұхтаралам* «қадірлі»; *мазынаб* «1) тәсіл, жол, 2) діни ілім (мектебі, ағымы), 3) қауым, секта, жік, тарам».

Бұл фактілерге, яғни қазірдің өзінде түпнұсқаға мейлінше жуық айтылып, жазылып жүрген араб сөздерінің фонетикалық дублеттері жоққа жуық екендігіне көніл аударған бізден бұрынғы зерттеушілер де, біз де варианты қатарлардың пай-да болуының не болмауының бір себебі – олардың халықтың сөйлеу тіліне ену-енбеуіне де қатысты болып келетіндігінде дейміз.

Дублеттік қатар құрайтын сөздер біраз уақытқа дейін қолданыста жүре береді: *әмір* ~ *әұмыр*, *мағына* ~ *магана*, *дара-жса* ~ *дәреже*, *уагда* ~ *уәде*, *галым* ~ *әлім*, *молда* ~ *молла*, *Алда* ~ *Алла* т.т. Ал тек жазба әдебиетте, оның ішінде де көпшілікке

¹¹ Фактілер, мысалдар Н.ОНДАСЫНОВ құрастырган «Арабша-казақша түсіндірme сөздіктен» (1- том. - Алматы, 1984; 2-том. - Алматы, 1989) алынды.

бейтаныс күнделікті өмірде көп қолданылмайтын араб, парсы сөздері мүмкіндігінше түпнұсқа қалпында жазылып, айтылып келе жатқандығы байқалады, сондықтан бұл шағын топта жарыспалы қатарлар жоққа тән.

Сейтіп, қазіргі қазақ әдеби тіл нормасы тұрғысынан қарағанда, фонетикалық жарыспа қатар – дублеттердіңүлкен тобын араб, парсы сөздері құрайды. Олардың бір тобы күні бүгінге дейін емле нормасының бұзылуына себепкер болып келеді. Мысалы, қазақ тіліндегі кірме арабизмдердің түсіндірме сөздігін құрастыրған Н.ОНдасыновтың көрсетуіне және келтірген фактілеріне қарағанда, арабша *иждиғат* болып тұлғаланатын бір сөз *иждағат*, *иждағат*, *иждиғат*, *ыждағат*, *ыждағат*, *иждағат*, *иждиғат* болып, жеті түрлі жазылып келіпті (сөздік авторы мысал-фактілерді жазба дүниелерден алған). Сол сияқты арабтың *хаққ* сөзінен тараган *ақы*, *хақ*, *хақы*, *қақ*, *қақы*, *һақ* түрінде 5-6 тұлғада беріліп жүргендігін де осы сөздіктен таба аламыз. «Қазақ әдебиеті» сияқты беделді, көшілікқолды газетіміз 60-80-жылдары хикая («әңгіме, повесть, тарих») сөзін бірде *һикая*, бірде *хекая* деп жазып жүрді.

Осы көрсетілген қатарлардың емле сөздіктері мен мектеп окулықтарында біреуін тандап, сол вариантының жазылуын көрсету арқылы бұл күнде дублеттер қатары азайып келеді.

Мысалы, көп уақытқа дейін *қауып*, *қаюіп*, *хайып*, *хауып*-фдеп жазылып келген сөздің қазіргі әдеби нормадағы тұлғасы – *қауіп* деп көрсетіліп, осы тұлға орныға бастады. Сол сияқты үстіміздегі ғасырдың алғашқы онжылдықтарында қалық ~ халық, баҳт ~ бақыт, даража ~ дәреже, мисал ~ мысал, қан ~ хан, патса ~ патша, хұқимет ~ үкімет, раҳмет *рахымет* ~ *рақмет* ~ *рақымет* ~ *рахмат* деген дублеттері орын алғып кел-ген сөздердің басым көшілігі бұл күнде бір орфограммалық тұлғада тұракталып қалды: *халық*, *бақыт*, *дәреже*, *мысал*, *хан*, *патша*, *рақымет* т.т. Енді бірқатарының бір сөз ретінде екі түрлі жазылуын норма деп қалдыру фактілері де жоқ емес, бұл топта **б** - **п** дыбыс алмасуымен келген бес-он сөз: *нейіл* ~ *бейіл*, *нәле* ~ *бәле*, *палуан* ~ *балуан*, *пейіш* ~ *бейіш*, *пұл* ~ *бұл* («баға»), *парапар* ~ *барабар*, *рұқсат* ~ *лұқсат*, *бәлекет* ~ *пәлекет*, *пәлі* ~ *бәлі*, *пенде* ~ *бенде*, *бесене* ~ *пешене*, *пітір* ~ *бітір* (беру),

тажал ~ дажал, сама ~ шама (шайдың *самасы*), хас ~ қас сияқты қатарларды емле сөздігінің норма деп алдыңғы сынарларын көрсеткеніне қарамастан, қолданыста екі вариантта жазылып келе жатқаны байқалады. Сірә, бұны жаңсақтық, салақтық деп табудан гөрі, себебін тілде орын алған аналогиялардан іздеуге тұра келеді. Айталық, қазақтың өз сөздерінің ішінде айғай ~ айқай, даярлау ~ таярлау, тызылдау ~ дызылдау, пырт-пырт ~ бырт-бырт, ғүрілдеу ~ күрілдеу, дырыл ~ тырыл, шылдыр ~ сылдыр, шытырлау ~ сатырлау, түлей ~ дүлей, жұз дұз, *таяз ~ саяз*, қаржілік ~ кәржілік, башай ~ бақай, өзге ~ өңге сияқты қатарлардың орын алуы – кірме сөздердің де дыбыс алмасу арқылы дублеттерінің пайда болуына құқық («право») беретін сияқты.

Әрине, екеуі – екі мағынаға, не мағыналық реңкке ие дербес сөздер деп танылмаса, келе-келе олардың да біреуі ғана нормага айналдырылады, ал қазіргі таңда бұл типтегі жарыспа қатарлардың қолданыста орын алу фактісіне көніп отырған жайымыз бар. Бір жақсысы – бұндай фактілер аса көп емес, ондаған сөз шамасында болып келеді.

Лексика-семантикалық вариантар

Алдымен, фонетикалық бітімі жағынан бір-біріне өте ұқсас, сырт қарағанда, бір сөз сияқты болып көрінетін қатарлардың өзін семантикалық, семалық табиғатына қарай ажыратып алу қажет. Норма тұрғысына келгенде, төл сөздердің ішінде фоне-тикалық тұлғасы жағынан бір сөз сияқты болып көрінетін *сартылдау ~ сыртылдау, дызылдау ~ тызылдау, сарт-сарт ~ сарт-сүрт, алақ-жалақ ~ алақ-жұлақ* тәрізді қатарлардың әрқайсысының семантикалық дербестігі бар вариантар екендігін айту керек. Мысалы, *сартылдау* ауқымы үлкен заттардың өзге заттарға соғылғанда (үйкелгенде) шығаратын дыбысы: пойыздың донғалақтары *сартылдайды*, шоқпар *сарт-тылдан соғылады* т.т., ал *сыртылдау* ұсақтау, кішілеу денелердің (заттардың) өзге заттарға соғылғанда шығаратын үздіксіз дыбысы, мысалы, малдың түқтарты *сыртылдайды*, саусактар *сыртылдайды*. «Түсіндірме сөздік», өкінішке орай, мұндай

семантикалық ренктерді көрсетпейді. Мұндағы түсіндірмелер: *сартылдау* – «сарт-сарт еткен дыбыс шығару, сатыrlау», *сыртылдау* – «сырт-сырт ету, тырыслдау», ал қайткенде сарт-сарт еткен дыбыс, қайткенде сырт-сырт еткен дыбыс шығатыны айтылмайды. Демек, дауысты дыбыстарының ашық (**a**), қысан (ы, і немесе **o-ұ, ү**) болып құбыльып келетін еліктеуіш сөздер (*тарс ету ~ тырс ету, сарт ету ~ сырт ету, сырылдау ~ сарылдау*) мен етістіктер (*дордию ~ дүрдию, дөңқиу ~ дүңқиу, батпию ~ бытпию, балишию ~ билишию, қоңырсу ~ көңірсу*) сырт қарағанда, бір лексеманың инварианттары болып көрінгені-мен, шын мәнінде, семалық өзгешеліктері бар жеке-жеке сөз-бірліктер болып танылады, бұлар – дублеттер емес, сондықтан мұнданың қатарлардың бірін әдеби нормадан ығыстыруға мүлде болмайды.

Төл сөздердің ішінде лексика-фонетикалық вариантардың үлкен бір тобын жуан – жіңішке болып дыбысталатын қатарлар құрайды. Олар: *ажым ~ әжім, ажуда ~ әжүә, абдыра ~ әбдіре, ары (тыр) ~ әрі (тыр), аула ~ әулі, қария ~ қәрия, қары ~ қәрі, пісті ~ пысты, пара ~ пәре, жай ~ жәй, жайт ~ жәйт, шай ~ шәй, жаңағы ~ жәңегі, және ~ жана, қайтін ~ кәйтін* т.б.

Бұл топтағы қатарлардың бірқатары жергілікті сөз машиғына (говорлық, диалекттілік қолданыска) қатысты болып келеді. Диалектолог мамандардың зерттеулеріне қарағанда, Орта Азия республикалары мен соларға іргелес жатқан қоныстардың қазақтары тілінде, Қазақстанның Орта Азиядан шалғай жатқан тұрғындарында **а** дауыстысымен айтылатын сөздер ә дыбысымен айтылады: *мәңләй ~ маңдай, шәм ~ шам, пәте ~ бата, мәс ~ мас, бәриә ~ барша*. Диалектолог С.Омарбеков өзбек арасындағы және солармен іргелес қоныстардың қазағының тілінде көптеген араб, парсы кірме сөздері де жіңішке айтылатындығын көрсетеді: *әтіреп* (атырап), *шәрт* (шарт), *сәәт* (сағат), *қасиет* (қасиет), *місәл* (мысал) т.т. Сол сияқты Қазақстанның қыыр шығысында, Алтай-Тарбағатай өнірлерінде, Монголияның Баянөлгей аймағында тұратын қазақтардың тілінде де әдеби нормага сай келмейтін **а-ә** дыбыс алмасулары байқалады: *және, жәңәлік, тәутеке, шәрии, жәзуінгер, жәртілей*.

Қазақ сөздеріндегі **а**-ә алмасулары кірме сөздерге де әсер етіп, бұлардың арасынан да жуанды-жішікелі дублеттер бар екендігін көрсетеді: *әбзәл – аbzal, бәсі – бағасы, әтірәп – атырап, әбзел – abzal, мәусім – маусым, нәзер – назар.*

Әрине, бұл паралельдер – әдеби норма мен жергілікті ерекшеліктерден тұратын дублеттер. Ал көрсетілген құбылыстың жалпыхалықтық тілде де бары байқалады. Оған *қәрі – қары, жай – жәй, саудегер – саудагер, алдеқашан – алдақашан, бәлгер – балгер* сияқты дублеттерді көрсетуге болады, бұлардың дені айтылуда сақталып келе жатқанымен, емле сөздіктері арқылы реттелуде, яғни *алдеқашан, жай, саудагер, балгер (бақсы-балгер)* деп жазу керектігін көрсету арқылы осы тұлғалар нормаға енүде.

Әдеби норманың бүгінгі талабы – көрсетілген типтегі дыбыстық-орфограммалық дублеттердің біреуін норма ретінде қалыптастыру болса, бұл бірте-бірте жүзеге асырылып келе жатқанын айтуға болады. Емле сөздіктерінде көрсетілген дублет қатарларының біреуі беріліп келеді және бұлардың сөздікте көрсетілген варианттарының орфограммасы (жазы-луы) біршама нормаға түсті деуге болады. Төл сөздердің ішінде жуан-жішік болып қатар түзетін бір топ тұлғалардың екеуі де – нормативтік деп танылатындары бар. Мысалы, *заңгар ~ зеңгір, сықылды ~ секілді, орасан ~ ересен, қолбырау ~ колбіреу, қоңырсу ~ көңірсу* деген қатарлардың түбірі бір болғанмен, тіркесу орындары (қандай сөздермен тіркесетіндігі) біршама ажыратылған, яғни семалық ерекшеліктері еске алынатын жеке-жеке сөздер деп танылады да жоғарыда көрсетілген мысалдардай бір сынары нормадан (емле сөздіктерінен) ығыстырылмайды. Осы қатардан, сірә, *пышылдау ~ пышылдау, бырсу ~ быришу, бақыраю ~ бажыраю, батпио ~ бытпио, бедірею ~ безірею, едірею ~ ежірею, бүкшеңдеу ~ бүкшиңдеу, тымық ~ тынық* сияқты қосарлар да табылады деп санаймыз. Бұлардағы әр сынардың мағыналық реңктері (семалық ерекшеліктері), тіркесімдік тандауы, стильдік қызметтері бар бірліктер, сондықтан әдеби нормадағы сөздер болмак.

Төл сөздердің ішінде лексика-фонетикалық дублеттердің келесі тобын **б ~ п, б ~ м, қ ~ ф, т ~ с, т ~ д, ш ~ с, е ~ і, а ~ ы, ұ ~ ы** дыбыс алмасуымен келген қатарлар құрайды. Олар

бірақ онша көп емес, бұл жерде *сайқымазақ* ~ *шайқымазақ*, *тілмар* ~ *ділмар*, *дөңбекиу* ~ *төңбекиу*, *бәйге* ~ *бәйгі*, *булдірге* ~ *булдірғе* (камшының бүлдіргесі), *сүйінши* ~ *шүйінши*, *емешесі* *құру* ~ *емесесі* *құру*, *таяз* ~ *саяз*, *барқын* ~ *барқан*, *қортта* ~ *құртта*, *сопы* ~ *сұпы*, *алашақ* ~ *алајсақ*, *құдаги* ~ *құдагай*, *бұлау* ~ *былау*, *таба* (нан) ~ *тата* (нан), *тоқаш* ~ *тогаш*, *мақ-сат* ~ *мақсұт*, *өйткені* ~ *үйткені*, *бекіре* ~ *мекіре*, *мұқыл* ~ *тұқыл*, *аңқаю* ~ *аңқио*, *міне* ~ *міні*, *әне* ~ *әні*, *айқара* (*құшактау*)

~ *айқыра* сияқты қатарларды көрсетуге болады. Бұлар да емле сөздіктері арқылы реттеліп келеді, яғни сөздіктерде көрсетіл-ген дублеттердің көбінесе біреуі ғана беріледі, демек, алдыңғы сынарлары норма ретінде тұрақтандырылды, тек *айқай* және *айғай*, *ділмар* және *тілмар*, *саяз* және *таяз* сияқты бірен-сараны ғана екі вариантта қолданыла беретіндігі «және» деген белгімен қалдырылып отыр.

«Және» белгісімен бұл есімдігінің септік тұлғаларда *бұның* ~ *мұның*, *бұнда* ~ *мұнда*, *бұдан* ~ *мұнан*, *бұнымен* ~ *мұнымен*, *бұны* ~ *мұны* болып келетін қатарлары да беріліп жүр.

Ал лексика-фонетикалық дублеттер болып көрінетін *өзге* ~ *өңге*, *нәрсе* ~ *нәсте*, *жұбату* ~ *уату*, *ыстық* ~ *ыссы*, *шырық* (*бұзу*) ~ *шырыши* (*бұзу*), *береке* ~ *берекет*, *дейін* ~ *шейін* ~ *шекейін*, *әуелде* ~ *әзелде* сияқты қатарлар сынарларының әрқайсысы – тілде қолданылуға, оның ішінде әдеби нормаға енуге «құқықты» дүниeler, өйткені бұлардың пайда болу себептері таза фонетикалық қатарлардан өзгеше: кейірі түркі тілдерінің әртүрлі тобына жататын тұлғалардың көрінісі болса (*өзге* ~ *өңге*, *жұбату* ~ *уату*, *нәрсе* ~ *нәсте*), енді бір-сыпырасы түркі тілдеріндегі **к** ~ **ш**, **қ** ~ **ш** дыбыс алмасу құбылысын көрсететін (*шырық* ~ *шырыши*, *әпке* ~ *әпше*), үшінші тобы – кірме сөздердің әртүрлі тұлғада қабылдануына (*риза* ~ *разы* – *ырза*, *береке* ~ *берекет*) қатысты пайда болған қатарлар. Бұлар да бүгінде нормативті деп танылады, яғни ретіне қарай екеуі де қолданылуға бейім сөздер болмақ. «Реті» деп отырғанымыз – бұлардың функционалдық стильтерде қолданылуы, әсіресе көркем әдебиет үлгілерінен орын алуы (айталық, стильтік мақсатпен авторлық баяндауда немесе кейіпкерлер тілінде) әбден мүмкін.

Көркем әдебиетте, әсіресе поэзия тілінде заман ~ замана, алқа-салқа ~ алқам-салқам, әрегідік ~ әредік, әлгінде ~ әлгіде,

бәлкім ~ бәлки, бұғана – бұғанак, бұзық ~ бұзақы, біруақ ~ бірауық, біржолата ~ біротала, ғажайып ~ ғажап, досым ~ до-стым, едәүір ~ недәүір, ерегес *егес*, *есіл-дерті* ~ *есі-дерті*, жазғытұры ~ жазғытұрым, жиіркену ~ жириену, ишара ~ ишарат, кәр ~ қаңар, қекейкесті ~ қекейтесті, қапыда ~ қапия-да, өңкей ~ өңшең, рең ~ реңк тәрізді қатарлардың да табиғаты фонетикалық таза дублеттерден өзгеше. Бұлардың ішінде за-ман ~ замана, қапы ~ қапия, Құдай ~ Құдайа дегендер – «поэ-тикалық сұраныстың» дүниелері. Сөз соңындағы **а** форманттын шақыру септігінің көрсеткіші (звательный падеж) немесе во-катив деп танушылар бар, демек, бұлардың екі варианты да тілде қолданыла алады, бұлар стильдік немесе контекстік ду-блеттер болмақ. Ал *әрегідік* ~ *әредік*, *қомекей* ~ *қомей*, *уагда* ~ *уәде*, *тагылым* ~ *тәлім*, *жиіркену* ~ *жириену* деген қатардың алғашқы сыңарларындағы **ғ**, **г**, **қ** (**ғы**, **ті**) дыбыстары су-сып, түсіп қалғаннан екінші қатары пайда болғанын көреміз. Бұл фонетикалық заңдылық қазақ тіліне тән екендігі мәлім (*құлғақ* ~ *құлақ*, *кигіз* ~ *кіз*). Сол сияқты **ж** дыбысының **й** ды-бысына айналуы орын алған сөздер қатары да бар. Мысалы: *біржолата* > *бірйолата* > *біролата* > *біротала*. Сөз соңына не ортасына сынамаланып **м**, **н**, **л** сонорларының орын алуы *алқа-* *салқа* ~ *алқам-салқам*, *бәлкім* ~ *бәлкім*, *есіл-дерті*, *есіл-дерті*, жазғытұры ~ жазғытұрым, *әлгіде* ~ *әлгінде*, *мынадай* ~ *мы-нандай*, *әлгідей* ~ *әлгіндей* деген қатарларда көрінеді. Бұл жерде түркі тілдерінде **м**, **н**, **л** дыбыстарының «журдек» («сусылдақ») (біресе қосылып, біресе жойылып кетіп отыратын) қасиетіне қатысты, яғни түркі тілдерінің даму барысында орын алған фонетикалық құбылыстардың қазақ тілінде «бой көрсеткен» тұстары деп танып, оларды да нормадан ығыстыруға болмай-ды деп есептейміз. Емле сөздіктерінде кейбіреулерінің **и** сусы-малы дыбысының варианты берілген: *мынадай* (*мынандай* варианты жоқ) немесе көрсетілген қатарлардың біреуі ғана ұсынылған: *есіл-дерті*, *бәлкім* (*есі-дерті*, *бәлки* вариантыта-ры тіркелмеген), ал енді бірсыптырасының екі варианты да сөзтізбеден (реестрден) орын алған: *алқам-салқам* ~ *алқа-* *салқа*, жазғытұры ~ жазғытұрым, *әлгіде* ~ *әлгінде*. Демек, бұларға келгенде қатаң нормативтік принцип ұстанылмаған.

М, л, н сонорларының сөз соңында не ортасында орын алудың және олардың келген вариантар қатарының біреуін әдеби нор-мада қалдырып, екіншісін ығыстыру процесінің әлі бір жүйеге түсіпейін оларды ығыстыру уәжі дәлелденбеген құбылыс болғандықтан деп санаймыз да, бұлардың екеуін де нормативті тұлғалар санатына қосамыз.

Кірме сөздердің ішіндегі артық дыбысты қосар тұлғаларға да (*дос ~ дост, рең ~ реңк, шара ~ шарат*) қолданылу реттері (тұстары, орындары) бар бірліктер (сөздер) деп қараша жөн, мысалы, өлең текстерінде.

Қазақ тілінде **м ~ н ~ ң** сонор дыбыстарының, **б ~ м** дыбыстарының алмасуы да орын алған бірді-екілі фактіні таба ала-мыз: *бірдең ~ бірдеме ~ бірдеңке, ештеме ~ ештең ~ ештеңке, дәнeme ~ дәнең, батыру ~ матыру, бас ~ мас*. Бүгінгі қолданыста бұл қатарлар да жеке-жеке таза фонетикалық дублет (яғни біреуі ығыстырылатын) ретінде емес, сөзтізбеде орны бар жеке-жеке тұлғалар деп танылып, нормативті бірліктер қатарына қойылады (*бірдеңке, ештеңке* сияқты бірен-саран диалекттілік тұлғалардан басқалары).

Лексикалық дублеттердің келесі тобын орыс тілінен ен-ген сөздер қурайды. Олар: 1) дыбысталуы (фонетикалық тұлғалануы) мен жазылуы (орфограммасы) жағынан дуб-лет болып келетіндері; 2) орысша-казақша баламалары қатар қолданылып келген немесе келе жатқан дублеттер; 3) қазақ тілінің әртүрлі қосымшаларымен келген кірме сөздердің жарайспалы қатарлары.

Орыс тілінен орыстың өз сөздері мен өзге шет тілдер сөздерінің қазақ тіліне енуі XX ғасырдан бұрынырақ басталғаны мәлім. Ену каналдары әртүрлі болды: күнделікті түрмисқа, сауда-саттыққа, шаруашылық түрлеріне қатысты сөздер көбінесе ауызша сөйлеу тілі арқылы келіп, орын тепті. *Самаурын, шәйнек, патынос, шәй, шекер* (секер), *шыт, сәтен, бөз* (вязь), *барқыт, шәлі, бақалышы* (бакалейщик), *пәкөс* (покосы), *іспірт, мұржаса* (труба), *тұрба, болжы* (вожжи), *жәмшиік, пеш, бөрене* (бревно), *бөшке* сияқты сөздер ауызекі сөйлеу тілі арқылы қалыптасқандықтан, олардың қазақтың фонетикалық жүйесіне бағындырылып, «қазақыланып» алынғанын көреміз.

Бұлар да о бастаң бірден бір вариантта қалыптаспагандықтан, әр өлке қазақтар өздерінше «сындыргандықтан», *тұрба* ~ *мұржа*, *самауыр* ~ *самаурын*, *кереует* ~ *кірәуат*, *кір* ~ *гір* (гиря), *білте* ~ *пілте* (фитиль), *купәйке* ~ *пүпәйке*, *ләмпәси* ~ *мәмпәси* сияқты қатарлар ауызекі сөйлеу тілінде күні бүгінге дейін жарыса қолданылып келеді. Бұлардың бір вариантын нормативтік деп таныту әрекеті соңғы 50-60-жылдарда бастал-ды, яғни емле сөздіктері мен мектеп окулықтарында мұндай қосарлардың біреуі көрсетілуде.

XIX ғасырда Ресей империясының қазақ даласындағы мемлекеттік-әкімшілік жүйесіне, сот істеріне, жаңа саудасаттыққа, орысша оқу-ағарту саласына қатысты сөздер де енгені мәлім, олар да негізінен сөйлеу тілінде қалыптасты: *бексел*, *задетке*, *сома* (сумма), *мұнанай* (меновой двор), *жәрменәке*, *кеңсе* (канцелярия), *шкөл*, *кінеге*, *содия*, *сот*, *болыс* (волостной управлятель), *ауылнай*, *газет*, *минөт*, *пошты*, *шот* (счет), *доқтыр*, *штат*, *үйез* (уезд), *губірнә*, *земтемір* (землемер), *мулиеншік* (миллионер) т.б. Бұлардың бірқатары (*мұнанай*, *ояз*, *үйез*, *болыс*, *ауылнай*) бұл күнде тарихтық сөздер (историзмдер) қатарына кетіп, енді бірсыптырасы (*задетке*, *кінеге*, *земтемір*, *мулиеншік*) қазақша баламасымен алмастырылып, әдеби нормадан шығып қалды. Ал *кеңсе*, *жәрменәке*, *сот*, *газет*, *минут*, *почта*, *шот* сияқтылары қазірде осылайша айтылып-жазылатын нормадағы бірліктер болып саналады, енді бір тобының (*доктор*, *вексель*, *миллионер*) жазылуы (демек, айтылуы да) өзгерді. Орыс тілінен ауызша тіл нормасы бойынша енген сөздердің де норматив вариантын тұрақтандыру әрекеті жүргізіліп келеді. Мысалы, сөздіктерде ауызша қалыптасқан *самауыр*, *кереует*, *келі* (кило) сөздерінің осылайша жазылуы норма деп ұсынылады (*самаурын*, *кірауат*, *кілә* варианты емес).

Орыс тіліне қатысты лексикалық вариантар қатарларының бір тобын бұрынырақ қазақша әртүрлі сөздермен беріліп келгендері құрайды. Мысалы, XIX ғасырда жарық көрген екі тілдік сөздіктерде *көтерме сауда* ~ *көтерме сауда* (аукцион), *процент* ~ *өсім* (процент), *банкир* ~ *өсімші* ~ *сұмхор*, *төлеңгіт* ~ *қызметші* ~ *қызметкер* (слуга) деп тіркелген вариант қатарлары бар. Уақыт өте келе бұлардың да бір вариантын

нормага айналдыру процесі орын алды. XX ғасырдың 20-жылдарынан бастап жарық көрген екі тілдік сөздіктерде көбінесе біреуі беріледі. Мысалы, 1931 жылғы «Атаулар сөздігінде»:

процент ~ процент, өсім, аукцион ~ аукцион, жарыс сауда, делегат ~ өкіл, делегат. Олар да кейін қайта қаралып, әрі екі тілді сөздердің мағына жағынан дәл түсестін эквиваленттерімен алмастырылған, әрі варианкттар қатарын азайтқан.

Орыс тілінен енген сөздердің дублеттік қатарларына қазақ тілі жүрнақтарын жалғауда түбірлерінің түрліше болып келетіндері немесе қызметтес жүрнақтардың жарыса жалғандары да жатады. Мысалы, *прогрестік ~ прогрессивтік, абсолют ~ абсолюттік, демократтық ~ демократиялық, педагогтік ~ педагогикалық, нормалық ~ нормативтік* сияқты қатарлар ешбір уәжісіз бірінің орнына екіншісі жұмсалған беретінін байқаймыз. әрине, бұларды реттеу – лексиколог мамандардың шаруасы, яғни әуелі орыс тіліндегі *норма, норматив, прогресс, прогрессив* деген тұлғалардың мағынасын айырып көрсету керек, содан соң осы түбірден жасалатын казақша туынды тұлғалардың: *нормалық* немесе *нормативтік, прогрестік* немесе *прогрессивтік* дегендердің қайсысы дұрыс екенін дәлелдей, жарыспа сөздердің біреуін нормативтік деп қалдырып, екіншісін ығыстырған жөн.

Сөздік деңгейіндегі дублеттік қатарлардың келесі тобын – жазба тіл мен ауызекі тілдегі дыбыстық өзгешеліктері бар косарлар құрайды, яғни бір сөздің жазба түрпаты мен ауызша айтылуында (дыбысталуында) сәл өзгешеліктері бар қатарлар болып шығады. Бұл – тіл-тілдің қай-қайсысына да (немесе басым көшпілігіне) тән табиғи заңдылық. Әңгіме бұл жерде – сөздердің жазылуы мен қолданыстағы айтылуын қайткенде де бірдейлестіру туралы емес, ол мүмкін де емес, қажет те емес. Бұл күбылысты нормага орайластыра сөз еткенде, керісінше, жазу мен дыбыстаяу немесе орфография мен орфоэпия нормаларын ажыратып тану және ұстану мәселесі тұрады. Сондықтан осы жұмыстың келесі тараулары орфографиялық нормалар мен орфоэпиялық нормаларға арналады. Ал бұл жерде көніл аударатын жайт – сонғы жылдары қазақ тілі мемлекеттік статус алып, өзіне орыс тілінің тигізіп келген ықпалын біркыдыру те-

жеу бағыты бел ала бастаған тұста «төл сөздерді де, кірмелерін де естілуінше (айтылуынша) жазу керек» деген пікірлердің айтылуы. Төл сөздерге келгенде, ерін үндестігін сақтап жазу (*орұн, күмүс, құлдұруп сөйлөдү*), ілгерінді-кейінді, тоғыспалы үндестік заңдарын сақтап жазу (*орынбасар* дегенді *орұмбасар*, *көнбеді* дегенді *көмбеді* деп жазу дегендей), жуан **ый**, **ұу** дыбыстарын осылайша қос әріппен танбалашу, жінішке **ій**, **ұу** дыбыстарын да көрсетілген түрде жазу керек деген ұсыныстар жайында пікірсайыстар болды, алі де бола бермек (ол жайында орфография нормаларын сөз еткен тұста тағы айтылады).

Сөздің жазылуы мен айтылуы – кірме сөздерге, оның ішінен орыс тілінен (орыс тілі арқылы) енген сөздерге қатысты, дәлірек айтсақ, бұлардың емлесі мен дыбысталуын «қазақыландыру» керек деген ұсыныс-пікірлер бүгінгі норма мәселесінің даулы тұсының бірі.

Бұл жөнінде де келесі тарауларда сөз болатындықтан, әзірге мына жайттарды ғана анықтаумен шектелеміз.

Орыс тілінен және орыс тілі арқылы интернационалдық қордан XX ғасырдың өн бойында, әсіресе кириллицаға көшкеннен кейінгі сонғы 60 жыл барысында қазақ тіліне жүздеген сөздер, сөз-терминдер енді. 1929-1940 жылдардағы латын жазуы кезінде бұл сөздердің емлесі қызын соқты: әуелі (1929 жылғы қабылданған ережелер бойынша) орыс тілінен ен-ген сөздердің көбін, әрине, интернационалдық ғылыми-техникалық терминдерді айтылуынша (естілуінше) жазу ережесі қабылданды, нәтижесінде бір сөз бірнеше вариант-та жазылды. Проф. Құдайберген Жұбановтың ашына айтқан сөзіне қарағанда, бір ғана *коммунист* сөзі 16 түрлі жазылыпты. Сол кезеңдегі ең «киелі» сөздің бірегейі *коммунист* 16 түрлі жазылса, өзге сөздерге не жорық! Демек, тығырықтан шығудың жолы ізделуге тиісті болды.

Латын жазуын пайдаланған 10 жылдың ішінде оның графикалық жүйесі мен емле ережелері екі-үш рет қырналды. Мұның ішінде, әрине, орыс тілінен енген сөздерді игеру – айтылуы мен жазылуын реттеу бірінші кезекте тұрды. 1940 жылы қазақ қауымы «кириллица» деп аталағын «орыс» жазуын (әліпбій, графикасын) қабылдағанда, орыс тілінен

енген кірме сөздерді дұрыс жазудың жолы оп-оңай табыл-ды, яғни олардың бұрынырақ еніп, сөйлеу тілінде қазақша қалыптасқандарынан басқаларын, әсіресе ғылыми, әлеуметтік, саяси терминдер мен техника саласының атауларын орыс тіліндегі түрінде жазу ұсынылды. Бұл орайда қазақ емлесі «екі жеп биге шықты» немесе бір оқпен екі қоянды атып алды: біріншіден, мындаған «орыс» кірме сөздерін таңбалалауда ду-блет қатарлардан құтылды, екіншіден, «коммунизмге тезірек апаратын жол» – орыс тілін игеру, орыс мәдениетіне бауыр басу саясатына – Ресейдің империялық мұддесіне «мәдениетті түрде» қызмет етті. Ұлттық тілдің, ұлттық мәдениеттің, ұлттық рухани дүниесінің даму барысын, бағытын саясатқа, идеоло-гия талабына мықтап бағындырудың басы осы жерден бастал-ды деуге болады, яғни орыстар қолданып отырған кириллицаға көшу, орыс тілі арқылы еніп жатқан және әрі қарай да жуздел-мындал ене беретін сөздерді орысша жазып, орысша игеру Ресейдің империялық мұддесін көзdedі, коммунистік идеологияның талабын өтеді. Бұл процесс ондаған жылдарға со-зылды. Тіл дамуының бір заңы – дәстүрге айналу факторы жүзеге аса бастады. Дәстүрлік факторын кері қайтару, яғни тілдегі дағдыға айналған құбылысты сол тілді қолданатын миллиондаған адамдардан «қайтарып алу», керінше, басқаша дағдыландыру – онай еместігін бүгінгі қазақ тілі мәдениеті саласында жүргізіп жатқан іс-қарекетіміз, күресіміз, талас-тар-тысымыз көрсетіп отыр.

Сөйтіп, сөз варианттары және лексикалық норма мәселе-сіне келгенде, әдеби нормаларды ұстану және одан уәжді-уәжсіз ауытқу туралы әңгіме болуы – занды. Алдымен, варианттардың түрлерін айырып тану арқылы әдеби – әдеби емес қатарлардың соңғы сыңарларын әдеби тілде жазғанда не сөйлегенде қатыстырмау қажет. Ол сыңарлар: диалектизмдер, фонетикалық-орфограммалық дублеттер, қарапайым, дөрекі сөздер, варваризмдер. Мысалы, қолдан өсіріліп, адам, мал азығы ететін дақылдың әдеби атауы – *жүгері* сөзі тұрғанда, оның *борми*, *көмбеконақ* варианттары уәжсіз қолданылмауга тиіс. Егер кейіпкері Шығыс Қазақстан тұрғыны болып, оны жергілікті тілде сөйлеткісі келсе ғана жазушы *борми* вариан-

тын жұмсай алады, бұл – уәжді қолданыс болмақ. Варианттарды тандауда көркем әдебиет стилінің басқа функционалдық стильдерден ерекше тұратындығы қатты ескеріледі. Ал ресми-іс қағаздары, ғылыми, публицистикалық стильдер варианттар қатарын пайдалануда жоғарыда берілген талдауларға құлақ асуы – тіл мәдениетінің басты талабы.

Варианттардың нормалануы жөнінде және олардың әдеби нормадан ауытқу көріністері кейінгі «Лексикалық нормалану», «Грамматикалық нормалану», «Орфографиялық нормалану», «Орфоэпиялық нормалану» деген тарауларда, сондай-ақ «Тілдік норма және функционалдық стильдер» деген тарауда нақты сөз болады.

Грамматикалық варианttар

Қазақ тілінде грамматикалық тұлғалар мен амал-тәсілдер саласында варианттар қатарын түзетіндері аса көп емес. Әдетте кейбір зерттеушілер шылау, үстен сияқты сөз таптарына жататын жеке сөздердің лексика-фонетикалық варианттарын морфологиялық тұлғалардың вариантыны деп қарайды, оларға *шейін* ~ *дейін*, *бірдеме* ~ *бірдеңе*, *мұндай* ~ *бұндай*, *меніше* ~ *менімше*, *баратық* ~ *баралық*, *жасамыс* ~ *жасамыш*, *істер* ~ *ісмер*, *жұқалтаң* ~ *жұқалаң*, *ұлы* ~ *ұлық*, *кіши* ~ *кішік* сияқты қатарларды жатқызады¹². Біздің байқауымызша, бұлар да – лексика-фонетикалық варианты, тек мұнда варианттың тұлғалардың пайда болу көздері әртүрлі. Мысалы, *ұлы* ~ *ұлық*, *кіши* ~ *кішік* дегендердің соңғы сынарлары көне түркілік қалдықтар болса, *мұниша* ~ *бұниша-лардың* жарыспалылығы – **м** ~ **б** дыбыс алмасуларының нәтижесі, қысқасы, бұлар – морфологиялық амалдың вариантыны емес, фонетикалық варианты.

Морфологиялық, синтаксистік варианттар деп грамматикалық амалдардың жарыспа қатарларын айту керек болады. қазақ әдеби тілінің қазіргі қолданысында кейбір морфологиялық категориялардың тілдік көрінісінде варианттар қатары бары байқалады. Оларды **семантикалық-морфологиялық** деп атаған жөн, яғни мұнда вариант құрайтын негізгі объект

¹²Бизақов С. Тілдік норма және варианттылық. - Алматы: Ғылым, 1997.
- 73-75-б.

морфологиялық категория ұғымының әртүрлі тұлғамен (жүрнақпен) берілетіндігі көзделеді. Мысалы, бұйрық рай семантикасы екі-үш түрлі амалмен жүзеге асырылады: 1) етістіктің II жақтық жекеше-көпше, аныы-сыпайы тұлғалары арқылы: *кел*, *келіңдер*, *келіңіз*, *келіңіздер*; 2) шартты райдың II жақтық тұлғасы арқылы: *барсаң*, *барсаңыз*, *барсаңдар*. Әрине, бұл варианttар қатары тепе-тең емес, қолданылар кеңістіктері де бөлек, мағыналарында да бір-бірінен ажыратылатын бұйрық мәндері (семалары) бар: *бар*, *барыңыз* – «таза» бұйрық болса, *барсаң*, *барсаңыз* – тілек мәнді, өтініш мәнді бұйрық.

Супин (мақсат) мәнді етістік тұлғаларының да вариант қатары бар: *бару керек* ~ *бармақ керек*. Күні кешеге дейін мұның **-ар+ға** жүрнақты варианты жарыса қолданылып келген: «Қарағайға қарсы бұтақ бітсейші Найзаға сап қыларға» (Махамбет), «Мұңдасарға кісі жоқ сөзді ұғарлық» (Абай).

Түйік етістіктің де екі түрлі тұлғалық варианты бар: **-у** жүрнақты, **-мақ** жүрнақты: *бару*, *бармақ*. Бұл вариант қатарларының бұл күнде **-у** варианты активтеніп, **-мақ** тұлғалысы орын таңдалап, көбінесе поэзия тілінде қолданылуға ығысып бара жатқан сияқты. Ал **-мақ** жүрнақты қатар XX ғасырдың басына дейін әлдеқайда актив тұлға болғанын Абай, Шәкәрім және бұлардан көп бұрын өткен акын-жыраулар поэзиясы тілі көрсетеді.

Көптік категорияны, көптік мағынаны білдірудің де бірнеше морфологиялық амалдары (тұлғалары) бар; аффиксация ама-лы: **-лар** (**-лер**, **-дар**, **-дер**, **-тар**, **-тер**) жалғауымен келетін тұлғасы (*балалар*, *кітаптар*), **көп**, **біраз**, **бірсыныра**, **едәуір** сияқты сөздермен тіркесіп келетін аналитикалық амалмен берілетін тұлғасы: **көп бала**, **көп кітап**, **бірсыныра бала**, **біраз кітап** (алдым).

Етістіктің жақтық парадигмасында көптік мағынаның III жағының морфологиялық норматив көрсеткіші жоқ: олар *келді* (өзге бірқатар түркі тілдерінде бұл көрсеткіш барын білеміз: олар *келділер*), ал көптік семантиканы көбінесе көркем әдебиетте, оның өзінде де белгілі бір жазушылар қаламында, мысалы, Мұхтар Әуезовте, ортақ етіс тұлғасымен беру орын алады: «Қонақтар үйге *кірісті*»... Бұларды семантикалық-морфологиялық-стилистикалық варианttар деу керек болар.

Белгілі бір морфологиялық категория білдіретін ұғымның әр түрлі тұлғалармен (бірақ бір тәсілмен, айталық, аффикса-ция тәсілі – жалғау, жүрнақтармен), кейде әр түрлі амалмен (айталық, біреуі – аффикс жалғау, екіншісі аналитикалық – сөз тіркестету) келетін вариантыры аса көп болмағанмен, біразы бар екендігін көрсетуге болады. Жоғарыдағы мысалдарға (фактілерге) қоса, мынадай семантикалық-морфологиялық, морфологиялық-стилистикалық вариантыры бары байқалады:

1) қалау райлық мағына беретін *барғым келеді* ~ *барғым бар*, *барғым келмейді* ~ *барғым жоқ* қатарлары. Мұнда көмекші сөздер екі вариантта (*келеді* ~ *бар*, *келмейді* ~ *жоқ*) көрініп тұр; екеуі де әдеби нормага сыйымды, бірақ алдыңғысы – барлық аймаққа ортақ, көпшілік дұрыс деп қабылдаған, функционалдық стильдердің барлығында да қолданыла беретін, әсіресе ресми стильдер қатаң ұстанатын вариант, соңғысының жұмысалуында көбінесе стильдік қосымша реңк бар және ол – негізінен ауыз-ша сөйлеу актісіне тән вариант;

2) сұраулық мәнде қолданылатын етістік тіркестерінің шақтық көрсеткіштері мен көмекші сөздері екі түрлі берілген вариантытар: *айтқан жоқпын ба?* ~ *айттым емес не?* Бұлардың алғашқысы әдеби норма ретінде орныққан, бірақ екінші сынары да қолданыла береді, ол көбінесе ауызекі сөйлеу барысында және көркем әдебиет тілінде жиірек жұмысалады;

3) демеулік шылаудар тілдік құрылымдық норма бойын-ша өздері тіркесетін сөзден кейін келеді де, негізгі сөзге жалғанатын қосымшалар шылаудан бұрын тұрады: *қашықпын-ақ*, бірақ бұл құрылымның екінші варианты бар, мұнда шылау негізгі сөзге тікелей жалғанып, жіктік жалғауы содан кейін ке-луі мүмкін: *гашиқақпын* («гашиқақпын еш күмәнсіз» – Абай); «Күн туса – ондай сөзді *айтарақпын*» («Қозы Көрпеш-Баян сұлу» жырынан). Бұл вариантытардың екеуі де – әдеби норма, дегенмен соңғысы көбінесе көркем әдебиетке, поэзия тіліне, ауызекі сөйлеу тіліне тән болып келеді.

Бұл қатарда *баратын шығармын* деп құрылатын етістіктің *барам (ын)* *шығар* деген варианты тұрады. Мұнда да алғашқы сынаarda жіктік жалғау көмекші сөзге жалғанған болса, екіншісінде негізгі сөзге (*барамын*) жалғанған. Бұл қатардың

алыңғысы – әдеби норма, екіншісі – Қазақстанның батыс аймақтарына тән диалектлік вариант.

4) III жақты тәуелдік көрсеткішінің екі рет жалғануын да морфологиялық варианttар қатарына жатқызуға болар. Мысалы: *көбі* ~ *көбісі* (*көп+i+ci*), *бәрі* (*бар>бәр+i+ci*) ~ *бәрісі*, *ертеңіне* (*ертең+i+ci*) ~ *ертеңісі* (*не*), *уақытына* (*уақыт +ы+сы*) ~ *уақытысына* т.б. Бұл құбылысты диалек-толог зерттеушілер Қазақстанның оңтүстік аймақтарының тіліне тән деп табады. Шу бойы қазақтары *акыр+ы+сы*, *үй мұлк+i+ci* деп өйлейтіндіктерін көрсетеді¹³. Сірә, бұл құбылыс тек оңтүстік говорларында ғана емес, қазақ жерінің өзге өңірлерінде де кездесетіндігін де өзге зерттеушілер айта-ды. Мысалы, Ұлытау, Жезқазған аудандарының тұргындары да *көбісі*, *бәрісі*, *уақытысы*, *қамын*, *ойлау* деудің орнына жүрудің *қамысын*, *ойлау* деп айтады екен¹⁴. Бұл фактілерге қарағанда, тәуелдік жалғауды қосарлап (қабаттап) қолдану – қазақ тілінде бір кезде жаппай болмағанмен, бірқатар тұстарда кеңірек орын алған құбылыс болар, кейінгі дәуірлерде жергілікті ерекшелік болып сақталып қалғанға ұқсайды деген ойға келеміз. Күні бүгінгі әдеби нормамыздың өзінде *көбі* ~ *көбісі*, *бірі* ~ *бірісі* деп баспасөз беттері мен көркем шығармаларда (авторлық баяндауда) қатар қолданылып келе жатқандығының бір себебі осыдан болар. Бұл қатардың екеуі де әдеби деп танылғанымен, тілдің құрылымдық жүйесіне сай келетіні – тәуелдік көрсеткішінің бірақ рет берілген варианты: *көбі*, *акыры*, *уақыты* т.т. Бейнормалық сипатына қарамастан, қосарланған қосымшалы варианttардың әдеби үлгілерде жиі кездесетіндігі халықтың дағды – узустың көрінісі деуге болады.

5) Қатыстық сынды білдіру тұлғаларында да варианttар қатары бар: бірі – жұрнақ жалғау тәсілімен келсе (*азаматтық согыс*), екіншісі – тәуелдік жалғаулы тіркес-изафетпен келген варианты (*азамат согысы*). Бұл варианttардың аффиксация жолымен жасалатындары жазба тілде бел ала бастаған тәрізді. Бір кездерде, ХХ ғасырдың алғашқы жартысында *азамат согысы*, *коммунист партиясы*, *қала өндірісі*, *ауыл мектебі* деп

¹³ Накысбеков О. Қазақ тілінің оңтүстік говорлар тобы. - Алматы: Ғылым, 1982. - 55-б.

¹⁴ Досқараев Ж. Қазақ тілінің жергілікті ерекшеліктері. - II бөлім. - Алматы: Ғылым, 1955 .

қолданылып келген тіркестер бұл күнде көбінесе азаматтық соғыс, коммунистік партия, қалалық өндіріс, ауылдық мектеп деген варианттар әдеби норма ретінде жирик қолданылып кетті. Дегенмен бұл қатардың әр сынарының семантикалық реңктері бар екенін білу керек: жұрнақты түрінде қатыстық мән, изафеттік түрінде тәуелдік, меншіктік мағына басым болып келеді. Мысалы, мектеп оқушылары дегенді мектептік оқушылар деп атау кисынсыз көрінеді, өйткені мектеп – оқушы бала дегеннің қатыстық сыны емес, керісінше, «иесі», яғни бала (оқушы) – өзге орынның емес, мектептің «иелігінде», «құзырында», «шаңырағының астында». Бұл морфологиялық-семантикалық вариант қатарының ішінде қалыптасып, узусқа айналып кеткен тіркестер аз емес. Мысалы, кітап сауда-сы, ауыл шаруашылығы, оқу орны сияқты варианттары жиі қолданылады.

Қазақ тіліндегі грамматикалық вариантарды норма түрғысынан алып зерттеген арнайы енбектер жоқ, әсіресе синтаксистік параллельдерді анық танытқан, олардың тілдік құрылым-дық жүйесіне сай келетін немесе оған сәйкеспейтін варианттар қатарын көрсеткен монографияларды кездестірмедік.

Сондықтан морфологиялық варианттар қатарын да біз осы жұмыста түгел көрсете алмаған болармыз.

Синтаксистік вариантарды әңгімелуіміз бұдан да кел-терек болады. Өйткені синтаксисте вариант түзетін бірліктер таза құрылымдық-тілдік вариантар емес, стилистикалық - авторлық ерекшеліктер ретінде танылуға бейім тұратын сияқты. Мысалы, құрмалас сөйлем компоненттерін жалғаулықтармен немесе жалғаулықтарсыз құру, сырт қарағанда, сөйлем түрінің варианттары болып көрінгенмен, мұның стильдік, шеберлік, әсерлілік мақсатын көздел жасалғандығы сезіледі. Мысалы:

Елге мойнымды созам, – көрінбейді. Маңайга мойнымды со-зам, – дәнене жоқ (С.Мұқанов) деген сөйлемдердің екеуі де бірақ деген жалғаусыз құрылған. Бұларды жалғаулықты варианты: «Елге мойнымды созам, бірақ маңайда дәнене жоқ» түрінде құрылса, екеуінің қолданысында стильдік реңк айырмашылықтары бар: жалғаулықсыз вариантта амалсыздық, үмітсіздік реңкі бар, жалғаулықты варианты жай хабарлау болып танылады.

Бірынғай мүшелердің әрқайсысы қайталама жалғаулықтармен құрылған сөйлем мен бірынғай мүшелерді жалғаулықсыз келтіру де – сол сөйлемнің синтаксистік бір варианты болса, мұнда да стильтік мақсат көзделеді, демек, екеуі де – әдеби норма.

Бағыныңқы мүшелердің өзіне қатысты сөйлем мүшесінен бұрын орналасуы, құрмалас сөйлемнің бағыныңқы компоненті басыңқыдан бұрын туратындығы – тілдік құрылымдық нор-ма. Осы нормаға қарама-қарсы түзілген сөйлемдер не норма-дан ауытқу болады, не диалогтерде берілетін аузызекі сөйлесу тәртібі болып танылады, не белгілі стильтік мақсат көзделеп келген құрылым болады. Мысалы, жазушы Сәбит Мұқанов кейде шартты бағыныңқы сөйлемді басыңқыдан бұрын келтіруді өзіне тән қолтаңбасы ретінде қолданады. Мысалы:

Ол шалқалап құлан түсемін еді, артынан біреу келіп қапсыра құшақтамаса деген сияқты сөйлемдер.

Сайып келгенде, бұл да – синтаксистік варианттың стилдік мақсатпен келген нормативтік түрі.

Сөйтіп, лексикалық және грамматикалық варианттылық құбылысын қазақшалап «жарыспалылық» деп те атайдырып, вариант бірліктерді (тілдік единица: дыбыс, сөз, сөз тіркесі, сөйлем, көріктеуіш құралдарды) «жарыспалар» (әлде «жа-рыспалылар» ма?) деп «жарыстыра» қолданып, бұл құбылыс пен оның объектілері туралы жоғарыда айтқандарымызды түйіктасақ:

1) варианттар – «ұқсас дүниелер», дүниеде, оның ішінде тілде де «ұқсас» (мағыналас, қызметтес, үндес) бірліктер – единицалар барышылық, бірақ баршасы тұра мәніндегі варианттар болып танылмайды. Мысалы, синонимдер де – бір-біріне ұқсас, яғни мағыналас сөздер. Оларды *варианттар* деп атап мүлде шартты, бұл жердегі «вариант» сөзі «қатар» сөзінің эквиваленті болмақ. Демек, біз жоғарыда норма тұрғысынан талдаған варианттар мен синонимдерді шатастырмая керек. Әрине, белгілі бір жарыспа тұлғаларды вариант (дублет) деп тану немесе синонимдер деп карау кейде қындау согады.

Мысалы, орыс тіл білімінде *неграмотный ~ безграмотный* деген қатарларды синонимдер деп қарайды, бұлайша танысақ,

бейкүнә ~ күнәсіз, әденсіз ~ бейәдепдеген жарыспа тұлғалардың біз де вариантар дегеннен гөрі, жасалуы жағынан бір-біріне синоним болып келетін сездер деуімізге болады. Сірә, бұлайша танымауға олардың тіркесімдік қабілеттерінің түрліші екендігі де себеп болатын сияқты: *күнәсіз жазғыру, бейкүнә жан* дегеннен гөрі *күнәсіз жсан, бейкүнә жазғыру* деп айту – жатық, дұрыс, яғни норма.

2) Варианттарды «тегіне» қарай: әдеби тілдік және әдеби-диалектлік қатарлар, әдеби және ауызекі тілдік дублеттер, ауызша және жазбаша (орфоэпиялық-орфографиялық) варианты, орфограммалық (графикалық) дублеттер деп бөліп-бөліп қарастырган жөн.

Тілдік-құрылымдық сипатына қарай вариантының фонетикалық – орфографиялық – морфологиялық – лексикалық болып белгінеді. Казіргі қазақ тілінде ең көп кездесетіні – лексикалық және фонетикалық жарыспа қатарлар. Аталған жарыспа бірліктердің қай-қайсысы да нормага қатысты қарастырганда едәуір пікірлер қайшылығы мен әр алудан қындықтар келтіріп жатқаны мәлім. Тілдегі вариантының қатары неғұрлым көп болса, олардың әдеби нормалануы толық жүріп болмағанын көрсө-теді. Варианттарды әдеби – әдеби емес, әдеби-стилистикалық (әдеби-функционалдық) деп ажыратуда, әсіресе фонетикалық қатарлардың емледе біреуін тандауда бірнеше факторларға иек арту керек болады. Мысалы, фонетикалық дублеттердің бір сынарының күнделікті баспасөзде қайсысы жиірек қолданылып келе жатса, соны норма деп ұсынушылық орын алды. Мысалы, соңғы 50-60 жыл барысында баспасөзде *патша* (*патса* емес), *дұстан* (*дұспан* емес), *мысалы* (*мисалы* емес), *бәйге* (*бәйгі* емес) тұлғалары жиірек қолданылғандықтан, тек газет-журналдарда емес, оқулықтар мен ғылыми әдебиетте, функционалдық стильдердің өзге салаларында олар әдеби нор-ма ретінде ұсынылып отыр.

3) Әдеби және жергілікті деген оппозициялық қатарлардың әдеби сыңарын тандау біз үшін аса қынға соқпады, өйткені қазақ тілінің тірек диалектісі айқын көрініп түрмәғанымен, қазақтың кен даласының көптеген аймақтарында қолданылатын вариантының әдеби норма деп тануға мүмкіндік берді. Мысалы, Қазақстанның батыс өлкесінде *құдагай*, *сұпы*, *жарын*, *ақа*, *жар* (газеті) деген сынарлары жиірек қолданылғанымен,

қалған солтүстік, орталық, онтүстік, шығыс өлкелерінде құдаги, сопы, келер жылы, аға, қабырға (газеті) деп қолданылатындықтан, осы көрсетілген тұлғалары сөздіктерде норма деп ұсынылып жүр және солай қалыптасып қалды деуге болады. Бұл іспеттес жарыспа қатарларының бір сынарын тандауда «қүштеу» де жоқ емес, яғни бір тұлғасын норма ретінде баспасөз жіңінен қолданса, емле сөздіктерінде «осылай жазылады» деп ап-анық көрсетіп қойсақ, сөз жоқ, 10-15 жылдан кейін қатардың сол варианты дағдыға айналады да дублеттіліктен арылады.

Әдеби-ауызекі тілдік қатарлардың, әрине, «әдеби» деп танылатын сынарын тұрақтандыру керек, дегенмен бүгінгі танда, яғни соңғы 5-10 жылда ауызекі сөйлеу тілі элементтерін әдеби айналымға (қолданысқа) әдейі қатыстыру әрекеті байқалады. Мысалы, *қадағасы*, *қадағасын* (кәдімгі-нің ауызекі сөйлеудегі сынарлары), *пошым*, *дей тұрганмен* сияқты бес-он сөз баспасөз беттерінде көркем әдебиеттегі авторлық баяндауды былай қойғанда, радио мен теледидарда жиірек қолданыла бастады. Бұл құбылыс белгілі бағытка (тенденцияға) айналса, дублет қатарын қөбейтуі – даусыз, ал «басы артық» дублет сынарларын әдеби нормадан ығыстыру әрекеті – бүгінгі тіл мәдениетінің басты шарттарының біріне кері ықпалын тигізір де анық.

4) Варианттардың бір тобы өзіміз дублет деп бөліп қараған жарыспаларға жатады, дублеттер тілдік норма тұрғысынан келгенде, бір сынары «кәдеге асып», екінші сынары бірте-бірте мұлде ығыстырылатын (мысалы, *даражасы*, *дүспан*, *магана*, *магна*, *алдақашан*, *үйткені*, *кәйтіп* сияқты орфограммалық сынарлар) немесе өз алдына «отау тігіп» кететін, яғни дербес мағынаға ие болатын (*үкімет* ~ *өкімет*, *ая* ~ *әуе*, *заңгар* ~ *зенгер* сияқты қатарлардың әрқайсысы бір-бір лексика-семантикалық единица болғаны сияқты) я болмаса қолданыста стильдік жүк арқалап, өмір сүре беретін (*шайтан* ~ *сайтан* сияқты) сөздер болады. Ал синонимдер – керісінше, қатары толыға түсетін, ешбірі қолданыстан ығыстырылмайтын сез қатарлары. Синонимдер – тілдің икемділігінің, семантикалық бояуларға байлығының, бейнелігінің көрінісі. Синонимдерге бай тіл – мықты тіл, қазыналы тіл.

5) Варианттар қатарын түзетін бірліктердің, әсіресе лексикалық жарыспалардың барлығы жоғарыда көрсетілген дублеттер тобын құрамайды. Басқаша сөзбен айтқанда, норма тұрғысынан келгенде варианттылықтың шегі деген ұғым (қафіда) бар. Бұл – теориялық жағынан жеке зерттеу жұмысында (диссертацияларда, ғылыми монографияларда) сөз болатын үлкен тақырып. Ал біз мұнда осы кең тақырыптың бір пұшпағы – әдеби тілден орын алуға «құқықты» және «құқықсыз» варианкттар қатарын қарастырдық.

6) Вариант құбылысының тілдің дамуы мен өзгерістеріне тигизетін әсері, рөлі деген проблема да – дербес ғылыми ізденістің нысаны, сондықтан «Вариант және норма» атты бұл тарауда арнайы сөз етілмеді.

7) Ұсынылып отырган бұл жұмыста варианттардың пай-да болу негіздері мен себептері, уәждері, сөз тұлғаларының дыбыстық өзгеріске ұшырау жағдайлары, варианттылықтың тарихы, реттеу тарихы, реттеу кезендері сияқты тақырыптар сөз болған жоқ. Бұларды да арнайы ғылыми ізденістердің обьектілері (нысандары) деп есептейміз және бұл тақырыптар зерттеуші С.Бизаковтың көрсетілген енбегінде едәуір жақсы сөз болды.

8) Көрсетілген дублет жарыспаларды реттеу, яғни әдеби тілдегі орфографиялық, лексикалық нормасы ретінде тұрақтандыру: бір сыңарын ығыстыру немесе екі дербес сөз етіп жұмсау – күні бүгінге дейін жүргізіліп келе жатқан және біршама жүзеге асып отырган іс-әрекет. Мұнда 50-60 жыл бойы ұстанып отырган емле ережелеріміз, әр алуан сөздіктер, әсіресе емле сөздіктері, мектеп оқулықтары басты рөл атқарып келе жатыр. Демек, тілдік нормаларды сұрыптау мен орнықтыру ісі әлеуметтік саналы әрекет сипатын алып отырганы – қазақ әдеби тілінің даму бағыты мен барысы біркышыру ғылыми-теориялық негіздерге сүйеніп, жүйелі түрде өтіп жатқанын көрсетеді.

9) Дублеттердің, әсіресе фонетикалық-орфограммалық жарыспа бірліктердің толық реттелмеуі ең алдымен оқу-ағарту ісінде, әсіресе мектептердегі оқу процесінде қындық туғызып келеді. Саятты жазу, әдеби тілде сөйлеу, мұғалімдердің

сұрактарына ауызша жауап беру сияқты тұстарда емледегі ала-құлалықтар, оқушының сөзқолданысындағы ақаулықтар, яғни әдеби нормадағы сөз бен олардың қаралайым, жергілікті варианttарын ажырата білмеуі, төл тілдік сөз бен бөгде тілдік эквивалентін араластырып сөйлеулері т.т. оқушының, студенттің білім дәрежесін бағалауда, тіпті жогары дәрежедегі аттестаттар мен дипломды беру-бермеуде үлken қындық келтіріп, кейде таластарға, дау-дамайға апаратыны да белгілі. Сондықтан тіл мәдениетін көтерудегі басты жұмыстардың бірі – вариант-дублет проблемасына ерекше назар аудару міндеті күн тәртібінен түспейді. Бұл проблеманы шешуде емле ережелерінің едәуір қырналған жана редакциясын ұсыну, оны бұлжытпай колда-нуды міндеттеу, соған сәйкес түзілген қазақ тілінің толық орфографиялық сөздігін жарыққа шығару, тіл мәдениеті курсарын мектептің жоғарғы кластарында, колледждер мен гимназияларда, сондай-ақ университет пен институттардың қазақ тіліндегі барлық факультеттерінде оқыту кестесіне енгізуді Білім министрлігі қолға алуы қажет деп санаймыз. Бұтінгі үлken ұлттық саясатымызда мемлекеттік тіліміздің тек әлеуметтік қызыметін жолға қоюды ғана емес, оның дұрыс қолданылуын, мәдениетін көтеруді де қоса жүргізілетін құрес деп тану – тек ғалымдар мен мектеп мұғалімдерінің міндеті емес, алдымен және пәрменді іс-әрекет иесі – жогары әкімшілік – басшылық органдары екенін баса айтамыз.

ЛЕКСИКАЛЫҚ НОРМАЛАР

Лексика саласындағы тілдік нормаларды үш салаға бөліп сөз ету керек: бірінде жалпы жазба әдеби тілдік сөз нормаларын, екіншісінде ауызекі сөйлеу тілінің нормасын, үшіншісінде сөздердің қолданыстағы нормаларын талдап, таныту керек болады.

Тіл-тілдің лексикалық қазынасы ғасырлар бойы қалыптасып, адамдардың қатынас және эстетикалық құралы болып қызмет етегін, әлеуметтік талғамнан өткен сөздер тобы әдеби нормасы болып танылады. Диалектизмдер, қарапайым сөздер, дөрекі элементтер, жаргон, арго сияқтылар әдеби лексикалық құрамнан тыс тұрады, бірақ бұлар ауызекі сөйлеу нормасынан орын ала алады. Ал сөздердің әсерлі, орынды қолданысын бұл қолданыстың дұрыс-бұрысын таныту стилистикалық норма проблемасының өзегі болып келеді.

Лексикалық норманы сөз еткенде, әңгіме жеке сөздердің қолданыска түскендегі дұрыс-бұрыстығы, онды не сәтсіздігі туралы болмақ. Бұл – қын шаруа, өйткені сөздердің барлығы бір қалыпқа түсіп, бір үлгімен жұмсалмайды. қолданыска келгенде, әр сөздің «бас бостандығы», әр сөздің «өз қылышы» (орыс тіл білімінде мұны «поведение слов в речи» дейді) болады.

Тілдің сыртқы факторларға: қогамның әлеуметтік ахуа-лына, идеологиясына, мәдениетіне, ғылым мен техникалық дамуына тікелей қатысты болатын саласы – лексикасы, яғни сөздер. Дұрыс не бұрыс деген бағаны жиірек алатын да – сөз нормасы. Жаңа сөздердің барлық әлеуметтік топтар тара-пынан бірден қабылдана қоймайтындығы, кейбір беделді қалам иелерінің бірқатар жана тұлғаларды «көзге ілмей» қоятындығы белгілі. Мысалы, Мұхтар Әуезов *тарихи, адами, дүнияди* сияқты жат жүрттық жүрнәкпен келген сын есімдерді публицистикалық туындыларында (көркем шығармалары түгіл) қолданбағандығын, сондай-ақ Габит Мұсірепов, Габиден Мұстафин, Сәбит Мұқановтар көпке дейін *оқырман, көрермен* сөздерін жатсынып келгендігін білеміз. Эрине, лексикалық нормалардың қалыптасуы тек «беделділердің», ірі жазушылар мен журналистердің, «ақсақалдау» тіл мамандарының ғана талғамына тәуелді емес, бұл ретте тілдің ішкі құрылымдық

зандылықтарының да (мысалы, сөз мағынасының тарылу не кеңею құбылысы, сөздердің функционалдық стильдерде қолданысына қарай жіктелуі т.т.), экстралингвистикалық факторлардың да сұранысы үлкен рөл атқарады.

Тілдің өз ішкі дамуына қатысты емес, сыртқы экстралингвистикалық факторлар дегеніміз – жана атаулардың пайда болуы, белгілі бір сөздердің не лексикалық топтардың ак-тив қолданылуы, мектеп окулықтары мен әр алуан сөздіктер сияқты реттеуші каналдардың күші (қызметі) т.т.

Қысқасы, сөз әлемі – қыры мен сыры көп, күрделі де киын дүние, сондықтан оны жұмсаудың реттері, қисыны, жүйесі, түйіндеп айтсақ, нормалары туралы жеке әңгіме қозғау керек болады.

Сөз мағынасы және оны түсініп жұмсау

Алдымен, «сөз мағынасы дегеніміз не, оны тіл маманы емес өзге адамдар, қалың жүртшылық, оның ішінде жазатын, сейлейтін ақын-жазушылар, журналистер, комментаторлар, лекторлар, мұғалімдер мен өзге де ұстаздар және т.б. «жазармандар» мен «сөйлермендер» сөз мағынасын түсініп қолдану деген талапқа қалай қараулары керек?» дегенді әңгімелесек.

Жалпы тілдік норма тұрғысынан алғанда, сөздің «лексикалық мағынасы» деген болады, ол – сол сөз білдіретін негізгі мағына, номинативтік мағына. Мысалы, *күн* деген сөздің негізгі лексикалық мағынасы (оны ғылым тілінде денотатив мағынасы деп атайды) – «әлемге жарық, қызы беретін планета» («Қазақ тілінің түсіндірме сөздігі», 5-том, 311-бет). Бұл сөздің «Күн» планетасына қатысты туған «таңның атуы мен күннің батуы аралығындағы уақыт, күндіз» және «24 сағатқа тен уақыт, тәулік» деген 2-3-мағыналарын да «лексикалық мағына» деуге болар әлде оны негізгі лексикалық мағынадан ербіген «қосалқы лексикалық мағына» дейміз бе – қысқасы, ен түпкі мағынадан туындағандар.

Қазақ тілінде өзге де тілдердегі сияқты *ай*, *күн*, *жер*, *бас*, *көз*, *қол* сияқты көптеген сөздердің бірнеше мағынада жұмсалатындығы белгілі. Олардың біреуі негізгі лексикалық не жоғарыда көрсеткеніміздей, негізгіге жуық мағына бола-ды да қалғандары – не ауыспалы, не стильдік (контекстік), не тіркесімдік т.т. мағыналары болады. Айталақ, *күн* сөзін «уақыт,

мезгіл, дәүір, кез» мәнінде («Бұл күнге аман жеттім» дегендегі сияқты) немесе «өмір, тіршілік» («Бұрынғы күнім күн бе еді?» дегендегідей), «ауа райы, табигат құбылысы» («Бүгін күн ыстық дегендеге») сияқты мағыналарда қолданғанда, күн деген сөздің ауыспалы мағыналарын пайдаланамыз. Ал күн бат-ты сияқты тіркесте күн сөзі «планета» деген өз мағынасында қолданылып тұрған тәрізді болғанмен, бұл тіркесте ол мағына мүлде жок, алдымен, күн планетасы батпайды, жер планетасы күнді айналғанда, күн көрінбейтін кез туады, екіншіден, әңгіме бұл жерде тіпті күн планетасы туралы емес, қаранды шақтың түсे бастағаны, тәуліктің бір кезеңінен екіншісіне көшкені ту-ралы, демек, осы тіркесте күн сөзінің мағынасы «жіпсіз байла-нып тұр», тіркестің әр компоненті (күн, бату) өздерінің негізгі мағыналарынан айрылып, тек бір-біріне қосақталған түрінде басқа бір мағына беріп тұр.

Тілдің лексикалық қазынасындағы сөздердің көпшілігінің негізгі мағынасы айқын, баршаға түсінікті болып келеді. Оларды *бейтарап* (нейтралды) сөздер дейді. Ал енді бір топтарының мағыналары көпшілікке тегіс түсінікті бола бермейді. Ол топтарға архаизм деп аталатын көне сөздер, тарих іздері бар, қазіргі қолданыста сирек кездесетін сөздер (историзмдер), контекстік қолданыстарға жататын кейбір қарапайым сөздер, авторлық бір қолданар сөздер болып танылатын окказионализмдер, бірқатар жаңа сөздер – неологизмдер жатады. Осылардың әрқайсысын жұмысаудың норма талабынан келген-де мақсатын, орнын, қажеттігін білу бірінші кезекте тұрады да олардың орынды-орынсыз қолданыстары көзге түседі. Енді осы топтардың сыр-сипатын жеке-жеке танытсақ.

Жаңа сөздер мен қолданыстар, олардың нормалану процесі

Жаңа сөз дегендер тіл дамуының белгілі бір кезеңіне қарай танылуы тиіс. Өйткені откен кезеңдерде «жаңа сөз» болған бірліктер келесі кезеңдерде «жаңа» деген белгісінен (анықтауышынан) айрылып қалады немесе олар тілден орын ала алмай, ығысып кетеді, сондықтан бұл жерде қазақ әдеби тілі даму барысының бүгінгі кезеңіндегі жаңа сөздерге көніл аударылады. Қазіргі күні тіліміздің лексикалық қазынасының

толығу процесі әлі де жүріп жатыр. Бұл процесс кейде баяулау, кейде белгілі экстралингвистикалық факторларға байланысты едәүір қарқынмен өтіп келе жатқаны белгілі.

Сөздік қазынаны толықтыратын көздер бірнешеу, олар: ауызекі сөйлеу тілі, бұл канал арқылы әдеби тіл айналымына диалектизмдер мен қарапайым сөздер өте алады; ауыз әдебиеті үлгілері, бұл бұлактан әдеби тіл көне сөздермен, сирек сөздермен толығады; қарым-қатынасқа түскен өзге халықтардың тілі (шет тілдер), бұл көздің қазіргі кезеңдегі ең үлкені – орыс тілі арқылы русизмдер мен халықаралық немесе интернационалдық деп аталатын қор еніп отыр.

Лексикалық құрамның толығуына себепкер болатын факторлар да әр алуан: 1) тілдің өзіне тән ішкі даму заңдары: сөз мағынасының кеңеюі, әр затты, әр құбылысты, әр ұғымды даралап жеке - жеке атау қажетті; 2) экстралингвистиклық факторлар: термин жасау процесі, аударма әдебиеттің дамуы, бұкаралық акпарат құралдарының жаңа түрлерінің дамуы, қогам өміріндегі саяси-мәдени өзгерістер, ғылыми-техникалық революция. Міне, осылардың баршасы лексикалық нормалану процесіне тікелей әсер етеді.

Көрсетілген лексикалық топтардың әдеби тілдің сөздік қазынасына өтіп, тұрактану, яғни нормалану процесі едәүір қыындықпен жүреді, атап айтқанда, сөздердің біршама орнығын үшін, қолданыс жиілігі, вариантық қатарлардың тежелуі, нормативтік сөздіктерге енуі, қунделікті сөйлеу тәжірибесінен орын алуы уақытты және саналы түрде жүргізілетін жұмысты қажет етеді. Сөздердің жаңа лексикалық бірліктер ретінде тілге енуі үшін әдеби норманың өлшем-межелеріне (кри-терийлеріне) сай келуін куту керек болады, яғни бұларды көпшіліктің дұрыс деп тануы, нормативтік сөздіктерге тірке-луі, жарыспалылықтан арылуы қажет. Сол себептен де 1985 жылы тұнғыш рет жиналып «Қазақ лексикасындағы жаңа қолданыстар» деген атпен жарияланған сөздік «Жаңа сөздер» деп аталмай, «Жаңа қолданыстар» деп аталуының мәні сөздікте берілген тұлғалардың барлығы бірдей «жаңа сөз» статусына ие болу-болмауы негайбіл екендігінде. Ал бұлардың басым көпшілігі «жұз ойланып, мың толғанып барып» ұсынылған

сөздер болғандықтан, әдеби нормаға еніп, тұрақтала түскенін, енді біреулері әлеумет сыйнынан өте алмай, яғни көпшілік дұрыс деп бағалап қабылдамай қалып қойғанын (мысалы: *мұлікбасы* – «товаровед», *жүрісіші* – «пассажир», *кулдеуіш* – «пепельница», *амалии* – «иллюзионист» т.т.), келесі бір тобы екі- үш варі-антта ұзагырақ жүріп қалғанын (*балқыма* – қорытта, *қонақүй* – мейманхана – қонақ үйі, *тілдескіші* – *тілашар*) сөздіктің кейінгі (1990, 1992 жылғы) басылымдары көрсетеді.

Осы сөздіктің соңғы толықтырылған басылымдарында жаңа қолданыстардың 6-7 жылдың барысында (1985-1992) бір-шама сұрыпталып, көбінің әдеби тілге еніп, нормаланып келе жатқаны байқалады. Мысалы, сөздіктің 1990 жылғы алғашқы кітабында *айнамауз* («каток») түріндегі жаңа тұлға көрсетілген болса, келесілерінде оның *мұзойнақ* варианты қалыптаса түсті деп атайды. Дегенмен нормалану процесіне келгенде, олардың соңғы жылдардағы қолданыс жиілігіне қарап, аталған ұғымды дәлірек беретін мағынасын салмактап, әдеби тілге ену әлеуеті (потенциалы) барларын бір бөлек, жарыса қолданылып келе жатқандарын өз алдына, қолданысқа көп түспей, тілден шығып қалғандарын және ірікеп көрсеткен тағы бір жұмыс керек. Сол күнде жаңа тұлғалардың нормалану процесі айқынырақ көрінер еді. Ал әзірге біз «Жаңа қолданыстардың» үш басылымында хатқа түскен сөздердің нормалану процесін біршама талдап көрсетелік. Сол арқылы әдеби тілге енген жаңа сөздер, оларды түсініп қолдану туралы жоғарғы әңгімемізді жалғастырамыз.

Алдымен, осы кітаптардың алғы сезінде ескертілгендей, бұларда тіркелген тұлғалардың барлығы әдеби тіл нормасына сай келетін жаңа сөз ретінде берілген жоқ. Олар – қазақ тілін-дегі әр алуан жазба әдебиет үлгілерінде, әсіресе баспасөзде кез-дескен бірліктер. Бұлардың ішінде жеке жазушылардың, газет-журнал редакцияларының не өзге де авторлардың бір-екі рет-тен қолданған «жаңа сөздері» де бар. Мысалы, иллюзионисттің бір журнал *амалии* деп, екіншісі *сиқырышы* деп қазақша атап, жаңа сөз ұсынады. Әдебиетші ғалым Едігे Тұрсынов «Қазақ ауыз әдебиетін жасаушылардың байыргы өкілдері» (1976) де-ген еңбегінде бұрын көбінесе орысша атап жүрген терминдер мен өзге де сөздердің қазақша баламасын ұсынады. Мысалы,

таусынышық («реликт»), *cırı* («маска», мифтік дүниелер бейнесіндегі басқа киетін жапсырма); жазушы Д.Досжанов «Жібек жолы» романында *зертас* («мозаика»), *қышкер* («қышқұюшы»), *жисдашы* («салық жинаушы»); Сәбетқазы Ақатаев қолданған *аңсар* («трактат») сияқты соны сөздерді авторлық не-ологизмдер деуге болар, олардың жалпықолданыстық нормага енүі екіталаі.

Жаңа қолданыстардың бірқатары өлеңде келетін поэтикалық, стильдік мақсатқа қолданылған жаңа тұлғалар, мыса-лы, альпинист дегеннің *асқарпаз*, *әлем* (вселенная) дегеннің *әлемиет*, *флагман* дегеннің мағынасында *жалаугер* сөздері – өлең текстерінде ғана кездескен жаңа тұлғалар. Бұлардың да жалпыға ортақ әдеби тіл нормасына енүі екіталаі.

Жаңа қолданыстар сөздігінде екі-үш, кейде тіпті төрт вариантта хатталған қатарлар біршама реттеліп, бір варианты тұрақтала, нормалана бастаса, қалғандары әлі де қосамжарланып келе жатыр. Олар – көбінесе ғылыми, саяси, мәдени термин-дер емес, тұрмыстық зат атаулары, мысалы, құні кешеге, тіп-ті бүтінге дейін, *варенье*, *печенье*, *кнопка*, *штепсель* (вилка), *простыня*, *значок*, *ванна*, *ключка*, *наждак*, *наволочка* сияқты атаулар бұрынырақ не орысша түрінде, не суреттеме тіркес түрінде қолданылып келген болса, енді оларға қазақша балама іздел (жасап) табу әрекеті бел алды, жаңа қолданыстардың едәүір басым бөлігі осы салага кіреді. Бұлардың ішіндегі сәтті баламалардың әдеби лексика қорына енү мүмкіндіктері зор (*ақжайма*, *булау*, *жастықтыс* т.т.).

Жаңа қолданыстардың «Жаңа атаулар» деген атпен үшінші рет 1992 жылғы басылымы – алдыңғыларының (1985-1990) толықтырылып ұсынылғаны. Ең алдыңғы 1985 жылғы кітапта осыған дейінгі 10-15 жылдың ішінде жазба әдебиетте орын алған жаңа қолданыстар тіркелген. Алғашқы басылымдарда жаңа ұғым, жаңа зат атауларымен қатар бұрын орысша айты-лып келген немесе дұрыс берілмеген атауларды қазакшалап не түзетіп беруден туған жаңалықтар болса, соңғы басылымдарда солармен қатар қоғамымыздың өмірінде пайда болған жаңа зат, жаңа ұғымдардың атаулары да орын алғаны көрінеді.

«Жаңа қолданыстар» атты сөздіктерде, әрине, бүтінгі, дәлірек айтсак, соңғы ширек ғасыр барысындағы қазақ тіліндегі әр

алуан әдебиет үлгілерінде көрінген жаңа бірліктердің баршасы түгел қамтылған жоқ, дегенмен газет-журнал беттерінде, де-мек, публицистикалық стильде, сондай-ақ кейбір ғылыми ен-бектер мен оқулықтарда, демек, ғылыми стильде және көркем әдебиет стилінде, яғни прозалық шығармалар менөлөндерде сөздік құрастырушылардың көзіне түскен соны тұлғалар ғана хатталды. Бұл жұмыстың негізгі мақсаты – тек лексикалық жаңалықтарды жинап, тіркең, мағынасын түсіндіріп қою ғана емес, қалың жүртшылықтың құнделікті баспасөзді, көшілікке арналған ғылыми әдебиетті, көркем шығармаларды дұрыс түсініп, түйсініп оқуға көмектесу, жаңа ұғымдарды дәл атауға, оларды орнымен қолдана білуге септігін тигізу. Сонымен қатар сөздіктің ең басты көздегені – қазақ тілі лексикасының норма-лану процесін көрсететін материалды жинақтап, реттеп ұсыну, тіркелген сөздердің нормаға сай келгендерін тұрақтандыру, сай келмейтіндеріне жаңа варианттар іздеу, жаңа сөздердің жасалу модельдерін жүйелеу, қолданыс жиілігін анықтау, сол арқылы әдеби тіл нормасына ену-енбеу мүмкіндіктерін көрсету сияқты тіл мәдениетіне қатысты мақсат, міндеттер болатын. Бұл ізденістер әрі қарай да жүргізіле береді. Сол себептен осы басылымдарда берілген жаңа қолданыстарды нормалану түрғысынан біршама талдап, танытуды жөн көрдік.

Алдымен, жаңа қолданыстар дегеніміз – тілдің құрылымдық нормасына сәйкес келуін, көшіліктің дұрыс деп бағалаудың көздең ұсынылған сөздер болғандықтан, басым көшілігі бел-гілі мерзім ішінде, алды – 20-25 жыл, соны – 5-10 жыл барысын-да жиі қолданылып, әдеби тілдің лексикасынан норматив бір-ліктер ретінде орын алып кетті. Бұл күнде бұқаралық ақпарат құралдарында, кенсе-іс қағаздары мен ғылыми әдебиетте, тіпті көркем туындыларда да жиі қолданылып жүрген *егемен, егеменді, ақпарат, бағдарлама, құжат, ұжым, хатыны, төрага, зейнетакы, мерейтой, демеуші, айдар* (рубрика), *айыппұл, ардагер, әмбебап, балабақша, баспағер, бейнетаспа, жсанкуйер, жарнама, зілзала, кешен, өркениет* сияқты ондаган, тіп-ті жүздеген жаңа сөздер – әдеби тілден орын алған жаңа лексикалық қазына. Сонымен қатар жиі қолданылып, нормаға ене бастағандар да қомакты топ құрайды. Мысалы, *ауысым*

(смена), *ашылым* (открытие), *есімнама* (персоналий), *жүктеме* (нагрузка), *лездеме* (летучка), *уәждеме* (мотивировка), *балқыма* (сплав), *айтыскер* тәрізді соны сөздер әрі қарайы қолданыс жиіліктеріне, нормативтік сөздіктерге тіркелуі сипатына қарай әдеби лексика қорына қосылады деуге болады. Бұлардың әдеби тіл нормасының талаптарына жауап беретін белгілері бар. Атап айтқанда, бірінші белгісі – ұсынылған жаңа тұлғаның мағынасы затты не дерексіз ұғымды дұрыс білдіруі. *Айталық, мерейтой, демеуші, айппұл, зейнетақы, балабақша, жсанкүйер* сөздерінің семантикасы өздері атап тұрған затты не ұғымды дәл береді. Бұл топтағы *егемен*, *зілзала*, *әмбебап*, *төрага*, *кешен*, *ұжым*, *құжат* сияқты сөздер – «ескінің жаңалары», бұлар – осы мағынада қазактардың қолданысында бұрыннан болған сөздер, олардың ішіндегі *егемен*, *ұжым* сияқты бірен-сараны – жұмысалу өрісі шектеулі жергілікті сөздер болғанмен, жаңа сез жасаудың бір каналы – ауызекі сөйлеу тіліне иек арту арқылы пайда болған неологизмдер. *Ауысым, салым* (вклад), *салымши*, *ашылым*, *қойылым*, *оқылым*, *есімнама*, *уәждеме*, *балқыма* сөздерінің де нормативтік катардан орын алу потенциалы күшті: олардың түбір морфемасы осы сөздер білдіруге тиіс ұғымды қамтитын болса (*ауыс (ым)* – кезектің ауысуы, *сал (ым)* – ақша салу, *балқы (ма)* – металл балқыту т.т.), одан кейінгі қосымшалар тілдің морфологиялық нормасына жауап береді: - **ым/-ім, -ыл+ым/-іл+ім, -қы+ма, -де+ме, -нама** көрсеткіштері – туынды сөз жасайтын актив қосымшалар.

Жаңа сөздердің нормалану процесінде әлеуетті сөздердің (потенциальные слова) өтпелілік қызметі күшті екенін айтуға болады: әлеуетті сөздер жаңа тұлғаларды нормативтік қорға жақыннататын аралық топ.

Жаңа қолданыстардың үлкен тобын қазак өміріне кейін келген жаңа зат, бұйым, керек-жараптардың атаулары құрайды. Олар көбінесе тұрмыстық лексика қазынасына кіреді. Бұл ұғымдар бұрын көбінесе орыс сөздерімен не түсіндірме сөз тіркесімен аналитикалық амалмен берілетін. Солардың енді қазақша баламасын іздең, бір сөзben атая талабы қолға алынды. Мысалы, *значок*, *форточка*, *простыня*, *тесьма*, *оправа*, *грелка*, *коляска*, *календарь*, *компас*, *науиник* сияқты қазақ

тұрмысында бұрын болмаған зат, бұйымдарды, әрине, қазақша атаудың қажеттігі – даусыз, оның үстіне бұлардың дені – орыс сөздері, ал орыс сөздерін аударып қазақша атау дәстүрі белгілі. Зат, бұйым атауларын бірден таба қою қыынға соққанын бұлардың қазақша баламасының екі-үш, кейде тіпті төрт варианта болып келгені көрсетеді. Мысалы, аталған сөздіктің үш басылымында *наушник*-тің қазақша *құлаққалқан*, *құлаққан*, *құлақілдік*, *құлақілдірік*, *құлақтама* деген бес түрлі атауы тіркеліпті, мәшиненің кузовын – қау және қорап деп қазақшалап келеміз, *варенье* деген тәттінің *мұраппа*, *қайнатпа*, *тосап* деген қазақша вариантыны тіркеліпті, сөздік балалардың *коло-скасын* – *қолкуйме*, *куйме-бесік*, *бесік-арба* деп қазақша атандың біреуін тандауды ұсынады.

Бұл жарыспа атаулардың біреуінің бірден нормага айналуына еркін жол бермейтін себептер бар: алдымен ұсынылған балама сөздің номинативтік мағынасы аталағын затты толық бере алмайды, айталық, *қолкуйме*, *құлаққан*, *құлаққалқан* деген күрделі атаулардың *куйме*, *қап*, *қалқан* деген екінші компоненттері атайдын заттың ұғымын бермейді: коляска – *куйме* емес (күйме – ұлкен арбаның бір түрі), *қап*, *қалқан* дегендердің де мағынасы құлаққа іletін дыбыс тыңдайтын аппаратқа келмейді: наушникпен құлақты қантамайды немесе наушник – құлаққа қалқан етіп қоятын зат емес.

Көзілдіріктің морфологиялық моделімен құлақілдірік немесе құлақілдік варианты мағына жағынан дұрыстау келеді. Әрине, *қап*, *қалқан* сөздерінің де коннотатив (туынды, екінші) мағынасын пайдаланып, *құлаққан*, *құлаққалқан* сөздерін де жасауга болар. Сондықтан төрт вариант та қатар тіркеліп, норма үшін біреуін тандау процесі жүріп жатқан жайы бар. Значок сөзінің сөздікте *белгіше* деген баламасы көрсетіліпті, соңғы кезде оның *төсбелгі* деген вариантын да ұшыраттық, мұнда *белгі* сөзі мағына жағынан значок сөзін атауға қатысадын компонент ретіндегі тілдік нормага сай келеді, сірә, екеуінің бірі, әсіресе соңғысы әдеби тілге ену мүмкіндігі бар тұлға болар.

Сөздің номинатив мағынасына сүйеніп жасалған жаңа қолданыстардың біразы әдеби тілге еніп, нормаланулары әбден

мүмкін. Мысалы, *газқагар* (противогаз), *гүлкесте* (газон), *гүлтәж* (венок), *жагажай* (пляж), *жастықап* (наволочка), *жылытықы* (грелка), *қондырғы* (установка, аппарат), *құрылғы* (устройство), *тетік* (механизм), *себезгі* (душ) дегендердің қагу, *гүл, кесте, тәж, жага, қап, жылыту, қойдыру, құру, себу* деген компоненттерінің түбірлері беретін мағынасы атایтын заттар мен құрал-жабдықтардың мағынасына сай келеді.

Тұрмыста қолданылатын бұйым, зат, жабдық атаулары мен кәсіп, жұмыс иелерін білдіретін адамдарды атایтын сөздердің ішінде қазақша баламасы сәтсіз шыққандары да баршылық. Мысалы: *айыраша* (штепсельная вилка), *аларман* (покупатель), *аспансерік* (стюардесса), *аяқжол* және *жаяусоқпақ* (тротуар), *домалақшы* (анонимщик), *жапсырма шеге* (кнопка), *желкөз* (форточка), *жүргіші* (пассажир), *қызықшы* (конферансье және клоун), *сушарап* (шампанское), *тұсқагаз* (обои), *шакыру* (лонг), *тaнымгер* (мастер), *шырттепе* (включатель) деген жаңа қолданыстар «жана сөз» статусына ие болып, әдеби тілдің катан нормасына ене алмайды деуге болады, өйткені бұлардың да лексикалық бірлік (сөз) ретінде танылатын белгісі осал, яғни мағынасы мен тұлғасының (в плане содержания и в плане выражения) сай еместігі. Айталық, қала көшелерінде жаяу адам жүретін бөлігін *жаяусоқпақ* деп атағанда оның «далада түсетін жол» дегенді білдіретін *соқпақ* сыңары мағына жағынан келмейді, немесе *қызықшы* сөзінің түбірі *қызық* – концерттерде орындалатын өлең, күй, билердің атын, композиторын, сөзін, қоюшысын, орындаушысын атап, сахнага шығатын адам – конферансъєнің мағынасына тіпті жуыспайды, қалған мысал-дар да осы сипаттас.

Жаңа қолданыстар сөздігінен орын алған сөздердің ішіндеғылими, өндірістік, техникалық терминдердің қазақша баламалары аса көп емес деуге болады. *Басқосулар* (встречи), *дүниекөңыздық* (вещизм), *кеудемсоқтық* (амбиция), *мерейгер* (лауреат), *мүшелтой* (юбилей), *көземел* (гипотеза), *рәсім* (церемония), *салаяттық* (трезвость), *сарасана* (самосознание) сияқты 5-10 жаңа қолданыс әлеуметтік, саяси, мәдени терминдерге жатады деуге болады, олардың қатарында *жeңiскер* (чемпион), *желаяқ* (бегун) сияқты бірді-екілі спорт термині

де бар. Көрсетілген жаңа қолданыстардың терминдік топ құрауларынан гөрі, күнделікті мәдени өмірімізде жиі қолданылатын көпшіліккөлды сөздер ретінде сезілуі басым. Сондықтан сөздік құрастырушылар, солардың бірі және сөздіктің редакциясын басқарған мен де бұл сөздерді жай атаулар ретінде жинап, сөздіктің тұтас принципіне қайши келmedік деп есептеген болармыз. Бірақ олардың да бірқатары (*кеудесоқтық, мерейгер, сарасана сияқтылар*) – тиянақталып, нормативтік сипатқа ие бола қоймаған бірліктер. *Прописка* сөзінің қазақша баламасы ретінде біреулер *мөртанаңба*, енді біреулер *тіркелгі* деп жаңа сөздер ұсынса, бұлар да – сәтсіз. Әсіресе «робот-ты» *көктемір* деп, «интуицияны» *көкейкөз* деп, «общественность» дегенді *қауымкеш*, «кафедраны» *құжыра*, «библиографты» *әұмырнамагер*, «доносты» *көрсетінди*, «гипотеза» дегенді *көземел*, «нигилизмді» *көрсоқырлық*, «лупаны» *кунтартқыш* деп қазақша ұсынылған баламалар тіпті сәтсіз шыққан, бұлардың норма ретінде тұракталмайтындығы – даусыз, ейткені бұл жерде белгілі бір зат, ұғым атауларын дәл табу принципі емес, әйттеуір «орысшасынан» қашу мақсаты алға қойылған, сондықтан бұлардың бірде-біреуінің мағынасы атап тұрган ұғымды (орысша көрсетілген) бере алмайды: *робот* – темір ме еken және ол неге көк? *Нигилизм* дегеніміз – тек көрсоқырлық па еken? т.т.

Жаңа сөздер деп жүргеніміздің келесі бір шағын тобын *гарыш, гарышкер, галамишар* (планета), *гарышнама* (космология), *жанұя* (отбасы, семья), сондай-ақ сөздікке кірмеген *Елбасы* (Президент) сияқты қолданыстар құрайды. Бұлар – тілдік лексикалық бірлік емес, стильдік бірлік (сөз), яғни *космос, космонавт, космология, планета, отбасы, Президент* сияқты атаулардың көріктеуші, сипаттаушы, қосалқы сынарлары, олар белгілі бір көтерінкі үнмен келген мәтіндерде қолданылатын поэтикалық элементтер деуге болады. Айталық, ресми құжаттарда, ресми материалдарда республика басшысы туралы әңгіме болса, *Президент* атауы, ал публицистикада, көтерінкі үнмен келетін мәтіндерде бас әріппен *Елбасы* деп қолданылып жүр. Сондай-ақ физика, астрономия салаларына қатысты ғылыми әдебиетте өзінің тұра мағынасында келгенде,

космос, космогония, астронавт, космонавт деп қолданылуға тиіс термин атаулар публицистикада, поэзиядағы *гарыш, гарышкер* деген «көркем, сәнді» қосалқы аттармен берілуі мүмкін. Сондықтан окулықтар мен ғылыми еңбектерде, реиси құжаттарда *гарыш, гарышкер, жсанұя* деген варианttар – норма емес, олар – «*көріктеуші*», «*суреттеуші*», «*бағалаушы*» сөздер.

Бұғынгі кезеңдегі әдеби тіліміздің лексикалық нормасын реттеуде, оны дұрыс қолдануда жалпы тілдік норма мен стильдік, эстетикалық норманы шатастырмау керек. Бұл орайда *гарыш, жсанұя, жеделхат, төлкүжат* сияқты «*көріктеуші*» атаулар-ды терминдік, жалпы лексикалық норматив бірліктерге айнал-дыру әрекеті бар, бұл – әрі сөз табиғатын, сөздің терминдік ва-рианты мен оның «*сипаттауыш*» (характериологический) вар-ианты да болатындығын және олардың әрқайсысының қолда-нылатын орны, мақсаты, уәжі болатындығын жете түсінбеу-шіліктен туындаған құбылыс. Осыны сезінген біраз редакция-лар үнқагаз (газет), *көктемірлерге* (компьютер) көп әуестенбей келе жатқаны, енді біреулері әлі де «*редакторды* *сарапиы, газетті* үнжария, «*комментаторды*» *түсініктемеші*, «*па-спортты* *төлкүжат*», «*телеграмманы*» *жеделхат* деп термин-деп нормаландыруға барынша күш салып жатқаны байқалады.

Қазақтың өз сөздік қазынасынан жасалсын, өзге туысқан түрік халықтары тәжірибесінен алынсын, жоғарыдағыдай сипаттауыш қызметі жоқ жаңа атауларды, әрине, норма ретінде орнықтыруға болады. Мысалы, *ақпарат, расытхана* (обсерватория) деген 5-10 сөздің төркіні және көршілерден алынған бау-бақша, егіншілікке, жер бедерінің атауларына қатысты бірқатар сөздердің де қазақтың лексикалық қазынасына қосылып, нормаға айналып жатқанын мақұлдау керек. Деген-мен кейбіреулерінің сәтсіз екендігін де айтуда керек. Мысалы, *клоун* дегенді өзбек ағайындар *масқарапаз* десе, оны қазақ тілі үшін қабылдау – сәтсіз, өйткені қазақта *масқара* – жағымсыз мағынадағы сөз, ал *клоун ж-агымсыз* өнер иесі емес, сол сияқты *дом инвалидов* дегенді *мұсәпірхана* деп қазақшалау да ыңғайсыз: қазақтар ұғымында *мұсәпір* адам – «нагыз сорлы, әбден титығы жеткен, айналасына мейлінше жалтаңқоз болған жан», ал мүгедектер (инвалидтер), әсіресе соғыс мүгедектері

– мұсәпірлер емес қой. Мұндайда *хана*, *жай* деген қосымша іспеттес тұлғаларды (*мүгедекхана*) пайдалану қолайсыз болса, «мүгедектер үйі» дегендей аналитикалық (тіркестік) амалды пайдалануға болады.

Жаңа сөздердің теріліп көрсетілуі олардың қолданысына жарамды болып, еніп кеткен және әрі қарай еніп кететін варианттарды сұрыптауға мол мүмкіндік береді. Сондай-ақ жаңа қолданыстарды тіркеген сөздіктер казак тілінің бүгінгі кезеңдегі лексикалық құрамының статикалық та, динамикалық та тұрғыдан нормалану барысын, процесін қадағалауға, сөйтіп, саналы тұрде әсер етуге көмектеседі.

Тілдің құрылымдық жүйесіне сай келмейтіндері, көпшілік қауымның талғамы дұрыс деп танылмагандары бір-екі жер-де (бірер авторда, бір газеттің бір-екі нөмірінде, бірер мақала немесе көркем шығармада) ғана қолданылған жаңа сөздер әрі қарай жалғаспай, әдеби тіл айналымына түспей шығып қалады, мысалы, *білдірме* (сводка), *безендірме* (транспарант), *бұйырман* (заявка), *домалақшы* (анонимщик) дегендердің орнына басқа варианттар іздеңстірелі не шет тілдік сөздер қолданылады. *Мердігерлік*, *қайта құру*, *мыңышылар*, *тоқырау* (кезеңі), *айлық* (белгілі бір жұмысты, қоғамдық компанияны өткізу үшін бөлінген бір айлық уақыт, науқан, орысша *менеджер*) сияқты жаңа қолданыстардың көбі саяси-әлеуметтік әдебиетте, мерзімді баспасөз беттері мен теле, радиохабарларда орын алатындығы ескертіледі.

Ал көркем әдебиетте жаңа сөздер әлдекайда сараң кезде-седі, оның өзінде де көбінесе стильдік мақсатпен, яғни жаңа ұғым атап қажеттігінен гөрі, бұрынғы бар атауларды сол кон-тексте ұтымды деп табылған өзгеше тұлғамен ауыстыру үшін дүниеге келгендер болады. Мысалы, «Жаңа қолданыстар» сөздігіне тіркелген *базарман* сөзіне келсек, бұл сөзді жазушы М.Мағаун M.XVI-XVII ғасырлардағы оқиғаларды суреттеу үстінде пайдаланған, сол тұстағы қоғам тіршілігін баяндау-да сауда-саттықпен арнайы айналысатын әлеуметтік топтың болғандығын көрсету үшін *базарман* сөзін әдейі қолданады немесе осы шығармасында автор бұл күнде *барлауши*, *тыңшы* түрінде қалыптасқан норматив сөздердің орнына *хабаргер* сөзін

жұмсаса, шығарма тілін тарихи стиль тезіне түсіру мақсатымен, яғни бұдан 2-3 ғасыр бұрынғы әскери тыңшыны қазіргіден айырып атау мақсатын көздел, жаңа сөз ретінде ұсынып отыр. Көркем шығармаларда орын алатын стильдік немесе авторлық деп те атауға болады, жаңа сөздер көпшілікке ортақ, жалпы тілдік лексика қазынасының нормативтік бірліктері қатарына енбейді. Бірақ олардың орын алуы көркем әдебиет стилінің қолданыс нормасына жауап береді.

Жаңа қолданыстардың нормалану-нормаланбау мәселесіне орай және бір ескерттер жайт – соңғы 5-10 жылдың барысында олардың көбейе түскендігі. «Жаңа атаулар» сөздігінің соңғысы 1992 жылы жарияланған болса, содан бергі уақытта орынды-орынсыз ұсынылып жатқан жаңа сөзколданыстар қаншама! Олардың дені – ғылыми-техникалық және саяси-әлеуметтік терминдердің казакша баламасы (немесе аудармасы) ретінде дүниеге келгендер. Бұлардың ішінде бұдан 15-20 жыл бұрын пайда болған жаңа сөздердің орнына дұрысырақ деп тапқан варианты да бар. Мысалы, осыған дейін *вкладыш* деп тіркелген экономика термині соңғы жылдары *салымши* деп беріліп жүр. Осы қатарға нормаға жуықтау деген *мынақып* (некролог) сөзі қазір көбінесе *азанама* деп, бұрынғы *ауданышық* (микрорайон) сөзі *мөлтек аудан* деп ауыстырылды, *әріптес* сөзі қазірде бұрынғыдай «партнер» емес, «коллега» деген мағынада қалыптасып қалды (ал «партнердің» *ойынсерік* деген баламасы – дұрыстау). *Императрица, царица ұғымдары* ертеден қатын патша, патшайым, патшаханым сияқты бірнеше вариантта аталып келсе, әлі біреуі норма ретінде орнықкан жоқ. Бұл күнде едәуір нормаланып қалған *жанкуйер* деген спорт терминінің де *сүйермен* деген жарыспасы, 5-10 жыл бұрын «творчест-во» мағынасында *өнернама* деп қолданыла бастаған сөздің кейінрек *шығармашылық* деген жарыспа варианты, *спонсор ұғымын алдыңғы* кезде қаражатын деген келсек, енді *демеуші* варианты дүниеге келді.

Жаңа сөздерді ұсынуда байқалатын және бір құбылыс – бір тұлғамен мағыналары бөлек екі-үш ұғымды білдіру және, керісінше, бір ұғымды екі-үш тұлғамен атау. Алдыңғысына фактілер келтірсек: *жариялама* деген тұлғамен «репортаж»

және «объявление» деген ұғымдарды атап келіппіз. *Жарияла-ма* сөзі мағына жағынан соңғы ұғымға жақын келсе де (бірақ бұның *хабарлама* деп қалыптасқан варианты тағы бар той), *ре-портаж* дегенге мұлде жуыспайды. Сол сияқты *эріптес* деген сөзben «партнер» және «коллега» ұғымдарын білдірушілік бар; киімге салынатын *тесъма* деген зат атауы мен козілдіріктің әйнек кигізетін «оправасын» білдіруге *жиектеме* деген бір жаңа сөз ұсынылыпты, мағына жағынан бұл тұлға екі ұғымның екеуін де атауға жақын келеді, дегенмен *тесъма* мен *оправаны* қазакша бөлек-бөлек атағандары жөн; қойылым деген жасан-ды жаңа сөзben «постановка» (спектакльдің қойылымы) де-генді де, музейлерге қойылатын «экспозиция» дегенді де атау бар екен. Сірә, орыс сөзі *постановка*-ны аударған – дұрыс, ал «экспозиция» сияқты ұғымды, біздіңше, халықаралық термин ретіндегі сол күйінде әдеби тіл нормасында қалдыруға болады. Екінші жайтқа, яғни бір ұғымның қазақша атауын екі, кейде үш вариантта ұсынушылыққа келсек, олар бұдан да көбірек:

қаражатиши /демеуші («спонсор»), қайтарым /қайтарыс («отдача», экономика термині), дерекнама /деректеме («источник»), дәйексөз /дәйектеме («цитата») т.т. (бұлар жөнінде жоғарыда көнірек айттылды). Бұл екі түрлі фактінің екеуі де лексикалық нормалану процесінде елеулі орын алады, яғни олардың біреуін норма ретінде ұсынуда талдау, дәлелдеу сияқты реттеу жұмыстарын жүргізуге тұра келеді.

Жаңа қолданыстардың әдеби тіл қорына көшіп, норма-лану процесі уақытты және тәжірибелі қажет етеді, әсіресе көпшілік күнбек-күн пайдаланатын газет, журнал, радио, теледидар сияқты ақпарат құралдарында жиі қолданылуының мәні айрықша. Қолданылу жиілігі – нормаланудың ен пәрменді фак-торы.

Кейбір сөздер өте жиі жұмсалғандықтан, тілдің құрылымдық нормасына да, мағыналық дәлдігіне де жауап бермейтіндігіне қарамастан, нормаға айналып, әдеби тіл қазынасынан орын алғып отыр не орын ала бастады. Мысалы, «трезвость» ұғымын беретін *салауттылық* сөзі, «отбасы» мағынасындағы *жсанұя* деген нағыз жасанды тұлғалар, «космос» ғылыми терминінің «ғарыш» аудармасы, *космодром* сөзінің *гарыш айлагы*,

аэродромның әуежай болып өте жиі қолданылуы – соңғы айтылған пікіріміздің айғағы.

Лексиканың толығуы немесе біршама сапалық өзгерісі – қофамның әлеуметтік, саяси, мәдени, экономикалық дүмпүлері, күрт өзгерістері кезінде болатыны белгілі. Соңғы онжылдық – қазақ қауымы үшін осындай өзгерістер, төңкерістер, алмасулар кезеңін бастан кешуде. Қофам өмірінің әрбір сәтінің «жүрек соғысын» жедел көрсетіп отыратын тілдің лексика саласы зерттеуші ғалымдар түгіл, жай көзге, қалың жүртшылыққа бірден сезіледі, нәтижесінде лексикалық жаңалықтарды қабылдау немесе жатырқай қараша, кейде тіпті қабылдамай қою қарекеттері орын алады: пікірсайыстар, таластар, ұсыныстар көбейеді. «Тілдің лексикалық нормалануы» деген проблемаға мұның тікелей қатысы болатындығы белгілі. Және бұл – процестің дұрыс нәтижесі, яғни жаңа сөздердің нормалануы, әдеби тіл-ден орын алып тұрақтануы – қаулы-қарармен, үкім-жарлықпен, «қөпшілік дауыспен» шешілмейтін кезенде тұрмыз, бұл – «тілдің норма және оның кодификациясы» деген проблемаға ғылыми тұрғыдан қарауды қажет етеді, термин жасау саласы-нан бастап, қарапайым сөздерді де нормаға келтіруде мұқият ізденістерді талап етеді. Бұл ізденістер жаңа қолданыстарды теріп жинастыру, іріктең, жүйелеу, дұрыс-бұрысын «меніңше былай» деген принциппен емес, тіл білімінің теориялық не-гіздері бойынша дәлелдеу, әр алуан сөздіктер, анықтағыштар, көмекші құралдар арқылы жариялада отыру сияқты іс-әрекеттер түрінде жүргізілуге тиіс. Біздің бұл жұмысымыз (кітабымыз) сөздердің нормалануына арналған осындай істерге бастама әрі бағдарлама іспеттес болса дейміз.

Терминология мәселелері және норма

Жазба әдеби тіл нормаларының ең бір өзекті тұсы терминология мәселелеріне келіп тіреледі. Қазақ тілінің терминология проблемасы – XX ғасырдың жемісі мен сұранысы. Бұл проблема ана тіліміздің XX ғасырдың 20-ншы жылдарынан бер-мен қарайғы даму кезендерінің қай-қайсысында да өзектілігін жоғалтқан емес, керісінше, күні бүгінге дейін пікірсайыстар, қыыншылықтар ешбір толастар емес.

Термин дегендерді экстралингвистикалық факторлар туғызады, яғни қоғамның саяси-әлеуметтік жағдайы, оку-ағарту ісі мен жалпы мәдениетінің дамуы, шаруашылық-экономикалық құрылышының даму дәрежесі, дүниежүзілік ғылыми-техникалық төңкерістерге ілесіп отыру, ғылым салаларының пайда болуы, ол салаларда оқыту мен зерттеу жұмыстарының қолға алынуы – осылардың баршасы лексикалық қазынаның термин деп аталатын ерекше қорын дүниеге келтіреді. Терминдер негізінен атау сөздер болып келеді. Терминнің атауыштық қасиеті (белгісі) үшін оның «дефинициялық» түсіндірмесі болуы керек, яғни бір нәрсенің не құбылыстың тек қана өзіне тән ұғымдық анықтамасы ол сөзді термин етіп танылады. Терминдерді керек ететін әр алуан ғылым салалары болғандыктан, сөздің дефинициясы сол ғылымның танымы үшін ұсынылады.

Термин жасауда байырғы сөздерге үстеме мағына арту бар, жүрнақ жалғану арқылы жаңа жасанды тұлға ұсыну бар, өзге тілдерден сөз алу бар, біздің қундерімізде туып жатқан ғылым мен техникаға қатысты жаңа зат, жаңа ұғым атауларын интернационалдық қордан алу бар – қысқасы, бүгінгі қазақ жазба әдеби тілінің терминологиялық қазынасын толықтыру процесі – тек соңғы бес-он жылда басталып отырған жок, қазақ тілінің мемлекеттік деген дәрежеге ие болған кезден ғана, тек сол дәрежеге сай ету үшін ғана жүргізіліп отырған жұмыс емес, ұлттық әдеби тілдің қалыпты даму заңдылықтарының көрінісі ретінде жүріп келе жатқан процесс. Әрине, бұл процестің соңғы жылдарда жүру қарқыны күшіе түсті, бұған қоғамның әлеуметтік құштері белсенді араласа бастады, әлеуметтік пікір-лер жанданды.

Тіл дамуының осы бір заңды құбылысы – термин сөздерді ұсыну процесінде жетістіктермен қатар сәтсіздіктер де орын алып отыр. Жоғарыда айттық, бүгінгі әдеби тілімізде кейбір сөздерді орысша-қазақша жарыстыра колдану көзге түседі, яғни лексикалық варианттар қатары есті, олардың нормалану процесі қоса жүре бастады: көбінесе қазақшасы бұкаралық ақпарат құралдарында, тіпті оқу-ағарту әдебиетінде жиі қолданылып, әдеби норма ретінде қалыптасуға бет алды. Мыса-

лы, бағдарлама, әдістеме, мәтін, шығармашылық, жекешелендіру, құжат сияқты сөздердің орысша сынарлары қолданыстан ығыстырылды. Мұндай жаңа терминдер, біріншіден, қазақ тілінің құрылымдық нормасына сай жасалғандықтан, екінші-ден, реңми турде мақұлданғандықтан (Терминком бекітіп) тез қабылданып кетті және бұнда бұқаралық ақпарат құралдары айтартылтай рөл аткарып келеді: газет-журнал беттері мен ра-дио, телехабарларда жиі қолдану жаңа терминдерге қөшпіліктің құлақ-көзін үйретіп, оларды жатсынбайтын дәрежеге көтеріп келеді.

Тіл дамуының осындай оң құбылысын пайдаланып, көп-теген ғылыми терминдік атауларды, тіпті кейбір термин емес, бірақ құнделікті өмірде жиі қолданылатын, 70-80 жыл бойы қазақ тілінде әбден орныққан жай сөздердің де бірқатарын қазақшалау әрекеті де басталды. Тілдің нормалану процесінде бұл екі әрекеттің екеуінің де оң да, теріс те сәттері бар. Қазақшага алмастырылған сөз атап тұрған терминдік ұғымды дәл, толық бере алатындей болса, ол – орынды, норма тала-бын актайды. Ал ғылыми-терминдік атаулардың ішінде негізгі интернационалдық кор деп аталатын, көптеген мәдениетті, өркендерген елдердің халықтарына ортақ, тұптамыры латын, грек тілдері болып келетін мындаған терминді де барынша қазақшалау бағыты (тенденциясы) бой көрсете бастағанына сын көзімен қарау керек. Мысалы, кейбір газеттердің бетінде жарияланған мақалаларда, тіпті редакциялардың өздерінің қолданысында *депутатты* «бек», *кандидат* дегенді «үміткер», *парламент* сөзін «ұлттық құрылтай», *министрді* «үзір», *министрлікти* «үзірлік» деп атауды ұсынғандар бар. Ғылыми абстракт ұғымдағы термин емес бірқатар сөздерді де қазақшага өзгерту әрекеті бұдан да күштірек: *редакторды* «сараши», *стюардессаны* «аспансерік», *роботты* «құлтемір», *газетті* «ұнқағаз», *дыбыс жазылған кассетаны* «ұнтаспа», *радионы* «ұнсандақ», *альпинист* дегенді «асқарпаз» деп қолданған фактілері бар екенін жоғарыда да көрсеттік. Бұлардың бірқатары бірер қолданыстан, бірер автор қаламынан аспайды.

Әңгіме бұл жерде – осы қазақшаланған атаулардың әдеби тіл нормасына енетін-енбейтіндігі жайында емес, принципінде:

«жаппай қазақша балама іздеу, табу, қолдану, әдеби нормага енгізу принципін бұлжытпай ұстану керек пе әлде «өзге тілдік» терминдерге де орын қалдыру керек пе?» деген сауалдарда. Бұл – терминология саласындағы норма проблемасының өзегі және оны тек практикалық түрғыдан (аудару, жаңа термин жа-сau) ғана емес, ең алдымен, теориялық негіздерін айқындау түрғысынан термин жасаудың принциптерін, терминделетін ұғымдарды сала-салаға бөліп қарастыру керектігін термин жа-саушылар да, зерттеушілер де, оларды пайдаланатын калың жүртшылық та дұрыс түсініп, жақсы білулері керек. Мұны мүлдем білмей де отырған жоқпыз. Сондықтан болар, *Президент, парламент, сессия, депутат, экономика, бюджет, кредит, аудит, институт, университет, студент, академия* дегендерден бастап жүздеген (әлде мындаған ба) сөзді осы түрінде қолданып келеміз.

Әдеби тіл нормасын көздей әңгімелесек, аударылып жүрген терминдердің тек «қазақтығына», «түркілігіне», «мұсылман-дығына» (араб сөзі екендігіне) қызықпай, әйтеуір «орысша-лығынан» құтылуды мақсат етпей, олардың мағыналық дәлдігін, қазақ тілінің құрылымдық жүйесі мен тұлғасының сәйкестігін, ғылым мен танымның қай саласына жататындығын қатты ескеру керектігі – жалпы тіл мәдениетінің талабы, нор-ма талабы. Сондықтан ұзак жылдар қолданып келген «орыс» сөздерін арабша, парсыша, шағатайша, ұйғырша, осман түріктерінше «қазақшалаудың» жөнді-жөнсіздігін ойластырған абзal. Егер приватизация деген жаңа ұғымды жекешелендіру деп түсінікті, нағыз қазақ сөзімен беріп жатсақ, оның жөні – бір бөлек, дұрыс-ақ, ал *класс-ты сынып, процент-ті пайыз, паспорт-ты төлкүжат* деп бір шет тілдік атауды түсініксіз екінші бір шет тілдік сөзben алмастырғанда, мұнымыз тек «орысшылдықтан қашу» болып шығатын тәрізді. Ал бірқатар қазақыланған терминдер аударылып түрған сөздің мағынасын мүлдем бермейтіндігі – өз алдына. Мысалы, «ресторан-ды» мейрамхана деп аудару мүлдем келмейді: ресторан – мейрам-дайтын, той тойлайтын орын емес, көпшілік тамақтанатын орын, сол сияқты «музыка» деген – *саз* емес. *Космос, аэропорт, аэродром, паспорт, ресторан, кафе* дегендер – тіпті орыс сөздері де емес, бұлар – көптеген тілдерде қолданылатын, тек дыбысталуында айырмашылық бар «халықаралық» сөздер.

Жаңа қолданыстар мен терминдердің реттеліп, нормала-нуын сөз еткенде, олар білдіретін ұғымдарды орысша атауы-мен көрсетіп отыруымызды ескертеміз. Оның себебі негізінен мынада: жаңа сөздердің бірқатары бұрын орысша айтылып келген атаулардың қазақша баламасын ұсынуға байланысты пайда болды: *документ, программа, протокол, коллектив, рубрика, микрорайон, тротуар, коллега, значок, вклад, вкладыш, чемпион, проводник т.т.* Бұлардың көбі – терминдер емес, зат, ұғым атаулары және бірсынырасы орыс сөздері (*значок, вклад, проводник, грелка, теплица, варенье, кузов, научник, летучка, творчество, трезвость, болельщик* (спортта), *зачет, разговорник, прописка, влючатель, выпуск т.б.*). Орыс тілінің өзінен алғы жүмсалып келген сөздердің қазақша баламасын тауып атау принципі – қазақ тілі тәжірибесінде бұрыннан бар при-нцип болатын, әңгіме – олардың қазақша баламаларының көпке дейін ізделінбей келгендігінде, орысшасын қолдана салу қалың қөшшілікке де түсінікті болатындығында, әсіресе тұрмыстық сөздердің құнделікті ауызекі сөйлеу тәжірибесінде қазақшасын іздең жатпай-ак орысшасын айта салудың жөнілдігінде және со-лай дағыланып кеткендігімізде, қысқасы, осындаған сан түрлі се-бептермен ондаған (тіпті жүздеген) қарапайым сөздер (ғылыми терминдердің әңгімесі бөлек тұрады) орысша жүмсалып кел-генін мойындаймыз. Соңғы ширек ғасырдың барысында «етек-жөніміз біраз жиналып», «есіміз кіре бастағалы» олардың қазақша баламасын іздеу әрекеті дүниеге келді, бұл қарекет әлі де жалғаса бермек және оның салқыны (әсері, үрдісі) ғылыми, техникалық терминдерді де, әсіресе әлеуметтік, саяси, мәдени терминдерді де казақшалашу әрекетіне тиіп жатқан жайы да бар. Тіпті оларды жаппай қазақыландыру сияқты «ұлттық ұранды» көтерушілер де жоқ емес.

Бұл мысалдардың ішінде, әсіресе орыс сөздерімен кел-гендерінде, әрине, қазақша баламасы дұрыс табылатындары бар, олар едәуір қалыптасып та қалды. Сонымен қатар қазақ тілінің қазіргі даму сатысында ғылым мен техникаға қатыс-ты интернационалдық (халықаралық) қор деп аталатын лекси-калық қабабтың болуы – заңды. Бұл қор – көптеген мәдениетті халықтардың, әсіресе Еуропа, Америка жүргіттары мен орыс

халқының тіліне де ортақ, көбінің түптөркіні – латын сөздері, бір алуаны – ағылшын, неміс, француз сөздері болып келетін бірліктер. Олардың бәрін қазақшаға аударып, дәл балама-сын қазақша беру мүмкін де емес, қажет те емес. Терминжә-сам теориясы бойынша техника саласына жататын мәшине, аппарат, құрал-жабдық, олардың бөлшектері сияқты нақты зат атауларының дені аударуға келмейтін, түбірі көптеген мәдениетті тілдерге ортақ, түсінікті сөздер болады, олар-ды қай тілден келсе (мысалы, қазақ тіліне орыс тілі арқылы келді) сол қалпында пайдаланған жөн, ал нақты зат емес, дерексіз (абстракт) ұғым атауларын қай тілде де өз сөздерімен білдіру мүмкіндігі зор болады. Дегенмен оның ішінде де интернационалдық қор сөздерінің қалыптасып кеткен факті-лері аз емес. Мысалы, қазақ тілінде *айсберг, альманах, альбом*,

аппарат, аспирант, студент, асфальт, бак, валюта, велосипед, вирус, витамин, газет, газ, галстук, гараж, гимназия, гор-мон сияқты жүздеген нақты зат атаулары қолданылып келеді. Ал *аграрлық, академия, акт, актилеу, актив, пассив* (экономика терминдері), *акцепт, акционер, альянс, атом, валенттілік, варант, бюджет, ген, генетикалық* сияқты ұғым атаулары да шеш сөздермен беріліп, әдеби тіл нормасын білдіріп отыр.

Міне, бүгінгі қазақ әдеби тілінің лексикалық нормалануы дегендеге көніл аударатын үлкен мәселенің бірі – жаңа қолданыстар мен терминдер және олардың әдеби тіл қорына енушенбеуі, нормалану процесі, кодификациясы жөнінде зерттеуші ретінде өзіміздің пікіріміз бойынша ұсынылған мағлұматтар – осындей.

Сирек қолданылатын лексикалық топтың нормалануы

Жоғарыда айтылды, көпшіліккөлды күнделікті газет-журналдар мен теледидар, радио сияқты ақпарат көздерінде, яғни публицистикалық стиль үлгілері тілінде, сондай-ақ көркем әдебиетте, оның ішінде әсіресе поэзияда оқырман мен тындаушыга тек мәғынасы түсінікті ғана емес, әсерлі, жагымды сөздерді іздеу – занды, дұрыс әрекет. Ал әсерлі, әсем сөздер лекиканың тосын, сирек қолданылатын топтарынан табылады.

Осылардың лексикалық мағынасын дұрыс түсінбей, сондыктан жұмсалатын орындарын тап баспай қолдану нормаға қайшы келеді. Мысалы, XX ғасырдың 60-70-жылдарында *майталман* сөзін жиі қолдану етек алды. Оны мадақтау эпитеті ретінде адамдардың кез келген тобының атауына тіркестіріп, *майталман тракториши*, *майталман сауынысы*, *майталман геолог*, *майталман құрылышы* деген қолданыстардан етек алғып жүре алмай қалдық. Қебінесе осы тіркестерді жұмсаған журналистер, kommentatorлар *майталман* деген сөздің түпкі мағынасын анық білмеген.

Майталман сөзі *майталман жүйрік*, *майталман күйші*, *майталман шешен* деп қалыптасқан тұрақты тірестерде келеді. Өткен ғасырда жарық көрген Н.И.Ильминскийдің, Л.З.Будаговтың, В.В.Радловтың қазак-орыс сөздіктерінде бұл сөздің тек қана қазақ тілінде қолданылатындығы көрсетілген де ол «самый красивый (человек, лошадь), прекрасный» деп аударылған, бірақ кай сөздермен тіркесіп айтылатындығына мысалдар келтірлімеген. Соның өзі бұл сөздің өте сирек қолданылатындығын және сөз таңдап тіркесетіндігін байқа-тады. Сірә, *жүйрік*, *күйші*, *шешен* сөздерімен келетіндігіне қарағанда, *майталман* сөзінде «аттың жүрісі» (шабысы), «сөздің, күйдің төкпелілігі» сияқты қымылдың шашшандығына қатысты мағына бары байқалады. «Қазақ тілінің түсіндірме сөздігі» бұл сөздің мағынасын «қажымайтын, талмайтын, қыыншылықтан мойымайтын» деп анықтайды. Бұл түсініктің осы кездегі *майталман тракториши*, *майталман сауынысы* деген жаңа қате тіркестерден шығарып ұсынылғаны көрініп тұр. Бұрынғы да, қазіргі де сөздіктер бұл сирек ұшырасатын сөздің беретін ұғымын тап баспаған, өйткені «самый красивый, прекрасный» дегенді атайдын тұстың бәрінде, мейлі ол адам, жылқы болсын-ақ, *майталман* эпитетін қатыстыруға болмай-ды. Жүзі сұлу қызды *майталман қызы* деп, мүсіні әсем құлынды *майталман құлын* деп сөз танитын қазақ айтпайды. Бұл – сөз мағынасын түсінбей қолданып, жай бір-екі рет айтып қоймай, әрі қарай жаңа тіркестермен жалғастырып, лексикалық норма-дан ауытқудың классикалық көрінісі. Құдай оңғарғанда, бұл қолданыс соңғы 15-20 жылда саябырлап, әйтеуір әрі қарай

майталман бухгалтер, майталман етікші, майталман сатуши деп жалғаспай, тоқтап тынды: оған бір емес, бірнеше рет жазған біздің сын-ескертпелеріміз әсер етті ме әлде сөз мағынасын түсініп барып қолданатындар көбейді ме, сөз мәдениетінің арта түскен жалпы ахуалы себепкер болды ма – қайткенде де «Қудай сақтады».

Дәл осы қатарға *саңлақ* сөзінің де 60-70-жылдардағы қолданысын қосуға болады. Жылқыға байланысты «сәйгүлік, аса жүйрік, ұшқыр» ұғымын беретін *саңлақ* сөзі де – талғампаз әпитет, ол көбінесе «ұшқыр, аса жүйрік» деген өз мағынасында поэтикалық стильде қолданылады: «қазақы жылқыдан алуан түрлі *саңлақ* шыққан»... Ал *саңлақ ұшақ, саңлақ мәшине* тіркестерін сөз қадірін білетін ауыз айтпас болар.

Қазақ тілінде негізгі де, ауыспалы да мағынасына орай сөз тандап тіркесетін әпитет сөздер аз емес: *асқар* сөзінің түпкі мағынасында «бiiktik» ұғымы болғанмен, *асқар үй, асқар адам, асқар мұнара* деп айтылмайды, қазақ құлағына *асқар may* тіркесі ғана жағымды, дұрыс естіледі. «Өте нәзік, жіңішке» ұғымын бергенмен, *қыпша* сөзінен *қыпша жеіп, қыпша саусақ* деген тіркестер құрастыруға болмайды, ол көбінесе *қыпша бел* тіркесін ғана қалайды. Демек, лексикалық норманың бір талабы – сөз тандап тіркесетін поэтикалық әпитеттердің қолданылатын орнын жақсы білу, сондықтан олардың қалыпты тіркестердегі мағынасын кез келген сөзбен тіркестіріп пайдалану нормадан ауытқу, норманы бұзу болып шығады.

О бастагы лексикалық мағынасынан ажырап бара жатқан сирек сөздердің бірі – *удере*. Бұл – қазақ халқының көшпелі кезеңінде баршаға әбден түсінікті, жиі қолданылатын сөз болған, ол *көшу* сөзімен ғана тіркесіп, *удере көшу* деп айтылған, мағынасы көштің кештетіп жүріп келіп, бір жер-ге қонып, ертеңіне ертемен қайтадан ілгері қарай көшу, яғни көштің талтұсте аялдан тынығуы, өйткені талтұстегі ыстықта жүргеннен гөрі, таңертеңгі және кешкі салқынмен көшу – адамдарға да, көлікке де, айдан отыратын малға да қолайлы. Бұл сөздің дұрыс мағынасын өткен ғасырдағы қазақ тілі сөздіктері анық, айқын, дұрыс берген болатын, өйткені ол кезде қоғам қауымы жаз жайлайға, қыс қыстауға көшуді бастарынан әлі өткізіп жататын.

Бұрын *үдерім жер* деген де өлшем болған, ол – 20-25 шақырымдық жер, яғни 20-25 шақырымының бір бөлігін кештетіп, қалғанын ертеңіне ертелең тәсілде көшіп жететін қашықтық. *Үдеру*, *үдерім* сөздерінің түбірі – *үд*, бұл монгол тілінде «талтұс» де-ген мағынаны білдіреді, осы түбірден жасалған *үделе-* етістігі Сібір түркілерінің бірі – алтай тілінде де болғандығын, оның «көштің күндіз демалу үшін аялдауы, түскі тамақтарын ішуі» деген мағынаны беретіндігін өткен ғасырда Л.Будагов көрсеткен болатын. Демек, *үд* түбірінен жасалған сөздер көшпелі түрмис кешкен қазак, алтай, монгол сияқты халықтардың тілдерінде кездесетіндігі осы халықтардың (өзге түркі халықтарының тілдерінің сөздіктерінен бұл сөзді кездестірмейдік) мекендеген жерлерінің ландшафт және климат ынгайына қарай күндізгі ыстықта аялдаап, кешкі және ертеңгі салқында көшу тәртібі болғандығында деп түюге болады. Көшпендейтілік түрмис тоқтағаннан кейінгі соңғы кезендерде бұл сөздердің мағынасы құнгірттеніп, оны өз орнында қолданбау фактілері кездеседі.

Үдеру сөзін «жаппай қозғалу, жұру, аттану, бірінің артынан бірі жұру» деген мағынада қолдануышылық та бар, бұны біліп, дұрыс жұмыссау керек. Бұл да (*үд-*) – деген көне түркілік «жалпы жұру, бірінің артынан бірі жұру» мағына беретін етістік. Осы етістіктің *үдере тарту*, *үдере шабу* сияқты тіркестермен келуі сөз мағынасын айқындаі түседі. *Үдеру* етістігінің екі түрлі мағынада жұмысалатын көне сөз екенін айырып, әрқайсысын өз орнында жұмыссау нормаға сыйымды болады.

Мағынасын түсінбей қолданылатын сөздердің тағы бірі – *сұрқылтай*. Бұл да – көне этнографизм, сирек кездесетін сөз, түркі-монгол төркінді тұлға. Ол монгол тілінде – «хан, сұлтан, әмір сияқты билеушінің жанында болатын кенесші міндеттін атқаратын сановниктің лауазымы». Сөз түбірі – сірә, монголдың «окыту», «бір нәрсені үйрету», «тәрбиелеу» мағынасын беретін *сурға* (*x*) болу керек, сөз түбіріне жалғанған **-тай** – монгол тілінде сын есім тудыратын жүрнақ, демек, *сурғаалтай*, қазаша *сұрқылтай* «үйретуші, ақыл-кенес беруші» деген сөз болып шығады. Бұл сөздің «кеңесші, ақылшы» мағынасы «әр ханның тұсында – бір *сұрқылтай*» деген мәтеде сақталған. Мәтедің мәнісі – «әр билеушінің өз кеңесшісі, өз ақылшысы болады, соған орай әр ханның ұстанатын саясаты, жүргізетін

билігі әртүрлі болып келеді» дегенді танытады. *Сұрқылтай* сөзін өткен ғасырлардағы қазақ ақын-жыраулары мен шешендері өз мағынасында, дұрыс қолданған. Мысалы, өткен ғасырда Жетісуда Шыңғыс әuletінен төрелік еткен Тезек төре Сүйінбаймен айттысында:

«Тұсында Абылайдың Бұхар жырау,
Хан әділдің кезінде Тұбек тұр-ая.

«Әр заманның бар дейді *сұрқылтайы*,
Сұрқылтайым мениң де еken мынау», – дейді.

Бұдан *сұрқылтай* сөзі «ханның кеңесшісі, ақылшысы, идеологы, сөзін сөйлейтін ділмари, ақыны» мағынасында жұмсалғаны көрінеді, демек, Бұхар – Абылай ханның ақылшысы, *сұрқылтайы*, Тезек төренің айтуына қарағанда, әділ ханның *сұрқылтайы* – Тұбек жырау болған. Әдебиеттанушы ғалым – Мырзатай Жолдасбеков: «Тезек төре Сүйінбайды да, Бөлтірікті де өзінің *сұрқылтайы* еткісі келген», – деп жазады. Сөз түбірі – таза қазақтық емес әрі *сұрқылтайлық* институт хандары бір кездерде Шыңғыс әuletінен болып келген қазақ қоғамында ұмыт болғаннан кейін, оны атайтын сөздердің де мағынасы күнгірттеніп, көшілікке түсініксіз сирек сөздер корына ауыскан. Кейбір жазушылар осы сөздің мағынасын түсінбей қолданған тұстары бар. Мысалы, Сәкен Жұнісов: «Көп *сұрқылтайды* көрген көзі... тәжірибелі, арлан аттарды түр-түсіне дейін анық көрді», – деп жазады. Бұл жазушы тағы бір-екі жерде *сұрқылтай* сөзін жылқыға қатысты қолданады. Енді бірқатар жазушылар *сұрқылтай* сөзін жағымсыз мағынада жүмсайды. Мысалы, Д.Досжановта: «*сұрқылтай* оқиға...», Қ.Ісқақовта: «Бұл *сұрқылтайдың* да жаны сірі еken... таңнан қара кешке дейін нәр татпай іздептін – ілік». Сірә, бұл жерде *сұрқылтай* сөзінің *сұрқия*, *сұрқиялылық* сөздерімен сырттай дыбыстық ұқастығына қарай топшылаған мағынасы болар.

Сирек кездесетін, оның ішінде көбінесе көне болып келетін сөздердің әдеби тілде қолданылуын шектеуге болмайды, дегенмен олардың көбіне-көп номинатив мағыналарында жұмсалуарынан гөрі, образ жасауда жиірек кездесетіндігін айту керек. Ол үшін де сөз мағынасын дұрыс танудың мәні зор, өйткені образдың негізінде оны жасап тұрған сөздердің түпкі семантикасы немесе мағыналық ренктері (семалары)

жатады. Мысалы, Махамбет ақын: «Мен қарақұстан туған қалықпан» деп жауынгер ақын образын жасағанда қолданған қалықпан сөзінің күстың атауы екенін білеміз, өйткені өлеңнің тағы бір жерінде қалықпандай қомданып дейді, сондықтан өзі қарақұстан туған болса, өзі қомданатын болса, күс емей, немене! Ал ақын бұл образға қыран атауын алуды да болар еді, қыран сөзі – өз замандастарына да, кейінгі оқырмандары – біздерге де әбден түсінікті, батырлықтың, биік дәрежеге көтерілудің көнігі символы, үйреншікті образы. Бірақ ақын тыңдаушысын отты сөзімен шарпып өтетін тіл құралдарын іздейді, ол ушін қалың жүртшылық құлағына таныс ескі образдарды да, бұрын көп естімеген сиректерін де табады. Бұл ізденіс архаизмге айналған қалықпан сөзіне алып келген. Сөз түбірі – қалық, ол көне түркі тілдерінде «көк, аспан» дегенді білдірген, сол аспанда биіктеп ұшатын күстың қалықпан атауы ата-бабаларымызың тіліндегі өзінің тұра номинатив мағынасында қолданылып, келе-келе тілден ығысқан да енді образ жасайтын элементтердің бірі ретінде поэзия тілінде, мүмкін мақал-мәтелдерде де сақталған. Ақын сөз мағынасын жақсы біліп, оны әсерлі образға пайдаланған. Қазактың өткен ғасырлардағы поэзиясында және фольклор мұраларында қалықпан сөзі сияқты *тарпаң*, *тарлан*, *құлан*, *бұлан* сөздері де актив қордан гөрі, қолданыс шенбері тарылған көне поэтизмдер қатарында тұратынын бүгінгі жа-зуышылар мен оқырмандар жақсы білсе, мұндай сөздердің қолданысында нормадан ауытқушылықтары кемде-кем болмак.

Сирек қолданылатын сөздердің келесі тобы – тарих іздері бар (*тарихи*, *тарихтық*, *тарихаят* сөздеп те аталып жүр), күні бүгінге дейін ғылыми әдебиетте орысшалап «историзм» деп келген атаулар. Көне сөз – архаизм мен тарих ізі бар сөз – историзм дегендер бір емес: архаизмдер актив қолданыстан шығып қалған, мағыналары күнгірттенген, яғни көнерген сөздер, ол атаулардың өздері көнергенмен, олар – білдіретін заттар, ұғымдар жойылмаған, өмірде әлі барлар, ал исто-ризмдер – тарихтың көбінесе бізге белгілі, «күні кешегі» бір кезеңінде болған заттарды, оқигаларды, адамдар тіршілігін т.т. білдірген сөздер. Қогам дамуының келесі кезеңдерінде бұл сөздер білдіретін объектілер тарих сахнасынан кетеді де бұларды атайдын сөздердің мағыналары да бірте-бірте ұмытыла

бастайды, екінің бірі дәл біле бермейтін сипатқа ие болады. Мысалы, *сауын айту*, *қандақ*, *ереуіл ат*, *шоры* сияқты сөздер мен әскери, кару-жарақ атаулары болып келетін *кертартар*, *көбе*, *қылышан*, *білтелі*, *саржан* тәрізді сөздер, ертеректе қазақ тілінде болған *аталық*, *емелдес*, *бөкеуіл*, *ертеуіл* деген атаулар, *шөншік*, *тальс* тәрізді ыдыс аттары, *кебенек*, *жалаңқат*, *сақсыр* тәрізді күім-кешек атаулары, бүгінгі ата-әжелеріміз жиі қолданған *еңбеккүн*, *социалистік* *жарыс*, *колхоздастыру*, *белсенді*, *тыңшы* сияқты сөздер, күні кешегі *ауылнай*, *елубасы*, *жұзбасы*, *шабарман*, *поштабай*, *атшабар* дегендер – «историзм» – тарихтық сөздер.

Тарихтық сөздердің де заман өткен сайын мағыналары түсініксізденіп, әркім әрқалай ұғатындығына классикалық мысалдың бірі – *ереуіл ат* дегендегі *ереуіл* сөзі. Оның ұмытыла бастағаны соншалық – тіпті тұлғалық кейпіне де таласып, біреулер *ереуіл*, енді біреулер *ереулі*, *ерулі*, тіпті *ерттеулі* деп айтылуға тиіс деген де пікірсайыстарға барып қалды. Осы жұмыста (кітапта) окушыларға түсініктілеу болу үшін *ереуіл* сөзінің түптеркіні мен мағынасы туралы өзге зерттеушілердің және өзіміздің талдауларымыз бен танымдарымызды баяндаған «Сөздер сөйлейді» деген еңбегіміздегі пікірімізді қайталап берелік: Махамбет Өтемісұлының (XIX ғасырдың I жарты-сы) атақты «Ереуіл атқа ер салмай» деп басталатын өлеңіндегі *ереуіл* сөзі ақын жинақтары мен оқулықтарда көпкө дейін «ерттеулі ат» деп түсіндіріліп келді. Бұл – әрине, мұлде кате. Бұл сөздің тәркінін арнайы зерттеген Құлмат Өмірәлиев оны монголдың *ирәгуль* сөзінен шығарады, ол «қан майданда жек-пе-жеке шығатын батырлардың сайысы, одан барып сол ба-тырлар мінетін ат дегенді білдірген» деп табады. Махамбеттің осы өлеңдері жарияланған 1910 жылғы «Шайыр» жинағын құрастыруши Фабдолла Мұштақ (Ғұмар Қарашев) мұны «мінбей сақталған ат» деп түсіндіреді. Біздің топшылауымыз-ша, монгол, қалмақ тілдерінде *эрүүл*, *эрүл* деген сөздер «дені сау», яғни «мықты, тың» деген мағынаны білдіреді. Ертерек-те үлкен, ұзақ жорыққа шыққанда, астындағы атпен қоса және бір мықты ат ала шығу дәстүрі түркі-монгол халықтарында орын алған. Ұрыста не жолда астындағы аты мертіксе, окка ұшса не өліп қалса, жорықшы алып шыққан қосалқы атына ер

салып мінетін болған. Махамбет айтқан *ereuıl atы* «мықты, тың қосалқы ат» дегенді білдірген деп санаймыз. *Ereuıl* сөзінің бұл мағынасы қазак тілі үшін құнгірттеніп, бір жағынан, бұл сөзді мұлде қате түсінуге («ерттеулі ат» деп) алып келсе, екінші жағынан, тұлғасының құбылып кетуіне (*ereuıl*, *ereuıl*, *erulı*) жол берген. Көне түркі, монгол сөздерін образ үшін пайдалану – қазақ көркем тілінің ең бір әсерлі, актив тәсілі.

Ereuıl сөзінің бүгінгі таныс мағынасы да бар: *ereuılge шызыу*, *ereuıldeу* «белгілі бір іс-әрекетке алдын ала, өзгелерден бұрын шығу» деген мағынаны білдіреді. Осыдан «қарсылық көрсету, наразы болу, көтеріле қозгалу» деген мағына тұган. «Забастовка»-ны *ereuıl* деп терминдеуде осы мағынаға сүйенген.

Ereuıl at пен *ereuılge шызыу* дегендеге *ereuıl* – екеуі екі бөлек сөздер, сірә, омонимдер деуге болар. Сондықтан орындарын шатастырып (алмастырып) қолдану – нормадан жөнсіз ауытқу болады.

Сірә, омонимдер (тұлғалары бірдей, мағыналары әр бөлек сөздер) болып келетін *ereuıl* сөзінің екінші «қарсылық көрсету, наразылық білдіру, көтеріле қозгалу» немесе «өзгелердің алдын ала, жұрттан бұрын» деген семалары (мағыналық қосалқы реңктері) бар «саяси-әлеуметтік қурес, жорық, ат-таныс» деген мағынасы – көнерген де емес, тарихтық сөз де емес, бүгінгі актив сөз, сондықтан *ereuıl* сөзінің және одан туындаған *ereuıldeу*, *ereuılдi*, *ereuılши*, *ereuılшил* сөздерінің соңғы мағынасын көпшілік жаксы біліп, көбінесе орнымен қолданады, лексикалық норма бұзылмайды («Қазақ тілінің түсіндірме сөздігінде» берілген түсініктемелер мен мысалдар-ды қараңыз – ҚТТС, 3-том, 395-396 беттер).

Сауын айту дегендегі *сауын* сөзі де, жалпы тіркестің өзі – құні кешеге дейін қазақ қауымының тыным-тіршілігінде, тұрмыс-салтында орын алып келген этнографизм (белгілі бір халықтың тұрмыс-салтына қатысты сөздер). Бүгінгі адам-дар тіркестің мағынасын ертедегі өлең-жырлардағы, әсіресе ауыз әдебиеті үлгілеріндегі, сондай-ақ тарихи роман, әңгіме, повестердегі, поэмалардағы қолданысына қарап жалпы-лай біршама түсінеді, *сауын айту* берілетін үлкен астарға, үлкен тойларға, жиындарға қаратада айтылатындығын біледі,

мағынасын «осы ас-тойларға шақыру» деп ұгады, бірақ *сauын* сөзінің жеке алғандағы семантикасын біле бермейді, оның түбірі – *сauу* етістігі деп топшылап, «асқа, тойға сауын-қымыз әкелуді хабарлау» деп түсінетіндер де бар, ал, шындығында, *сauын* сөзінің түбірі – *саb/can* көне түркі тілдерінде «1) сөз, 2) сөйлеу, 3) хабар, хат, 4) мақал, мәтел, 5) баяндау, әнгіме, 6) сауегейлік» деген 5-6 ұқсас, тақырыптас мағыналарды білдірген. Көне түркілік 6-мағынасы қазактың *сaуегей* сөзінде, алғашқы еki мағына *сөз саптай* тіркесінде сақталған: *сөз саптай* – қазіргі «сөз сөйлеу» дегенниң варианты. Ал *саb/can* түбірінің *сauын*, *сaу(егей)* тұлғасына айналуы – түркі тілдерінің «дыбыс алмасу» деп аталатын фонетикалық зандылықтарының жемісі. Демек, «сөз айту, хабарлау» мағынасындағы көне этнографизм *сauын айтu* сияқты бірліктер де – бұл күнде сирек кездесетін сөздер, оларды да түсініп барып жұмсай – әдеби тіл нормасының талабы болмак.

Көнерген, тарихтық сөздерген өзге де сирек қолданылатын, негізінен лексиканың пассив қорына жататын сөздердің келесі тобын бір алуан сипаттама есімдер, жер бедерін білдіретін бірқатар сөздер, кейбір аң-құс, өсімдіктердің атаулары, кәсіби сөздер құрайды. Айтальық, бүгінгі кейбір ірі жазушылардың шығармаларында кездесетін «жұлмыт елші», «мұғдарлы әсер», «марайма мінез», «тымсақ адам», «қойторы тірлік», «қоймірет адам», «жөші куаныш», «сарамжасал қызы», «тотанақ мезгіл» сияқты анықтауыш болып түрған сипаттама сөздер – сирек кездесетін бірліктер, бұлардың көбін диалектизмдер деуге де болмас немесе жазушылардың өздері жасап алған авторлық неологизмдер деп тануга да болмайды, тілде, қолданыста (демек, өзгелерде де) бар әсерлі, экспрессиясы күшті сөздер. Сірә, кейінгі өздері тіркесетін сөздеріне қаралғанда, шығарма авторлары мағыналарын аңғарып барып қолданған тәрізді. Ал енді осы тұлғаларды өзге авторлар, әсіресе қолдарына қаламды енді ала бастаған жастар жұмсай қалса, бұл бейтаныстау, сирек кездесетін дүниеліктерді әрқайсысы өзінше түсініп, өзінше келтіре салулары мүмкін, ол күнде лексикалық норма бұзылады.

Көркем әдебиетте сирек қолданылатын тұлғалардың орын алуы – нормадағы құбылыс, өйткені олардың экспрессивтік

бояулары қалың болады да оқырманға эмоциялық әсері күшті сезіледі. Мысалы, Мұхтар Әуезов «Абай жолы» романында *қозгалақтау, қымыңдау, қозғақ қағу* деген сөздерді бір сөйлемде келтіреді: «Қасқа тілмаш Құнанбай мен майырға кезек жалтақтады. Жүгінген бойында құнысып қозгалақтай берді. Кейде жер шүкіп қап, кейде қымыңдан, қозғақ қағады» (М.Әуезов, I том, 113-бет). Мұндағы көрсетілген сөздердің мағыналары түсінікті, бірақ сирек жүмсалатын тұлғалар: *қозгалақтау* – тыныссыз қозгала беру, *қымыңдау* – жайсыз-дану, *қозғақ қағу* – қозгала түсу. Осы үш сөздің үшеуінің де қызметі, экспрессивтік жүгі – алдыңғы сөйлемдегі тілмаштың әкімдер алдында жалтақтаған қылғының күшайте түсу. Демек, сирек қолданылатын сөздер болып танылатын *қозгалақтау, қозғақ қағу* сияқты дағдылы емес тұлғалар стильдік мақсатта келгенде, нормадағы қолданыс болып шығады. Жазушы олардың түсініктілігін контекст арқылы қамтамасыз етеді.

Жалпы білдіретін мағынасы сөз түбіріндегі семантикасы-нан немесе контекстең біршама түсінікті сөздердің үлкен то-бын экспрессиясы күшті сөздер құрайды, олар көбінесе сын есімдер мен зат есімдер, сондай-ақ үстеулер болады. Әдеби нор-ма тұрғысынан келгенде, олардың да мағынасын жақсы біліп, орнымен жүмсау керектігін қазактың мықты жазушыларының сөзқолданыстары көрсетеді. Мысалы, *сарылтаң, қырымпоздану, кеңкелесу, төмілжысу, сүркіл, мұғдарлы, қотын, аңқиттау* сияқты экспрессоидтарды (әдебі стильдік мақсатта қолданылатын әсерлі сөздерді) F.Мұсіреповтің, О.Бекеевтің, Д.Досжановтың көркем шығармаларынан кездестіреміз. Бұлардың көпшілігінің нормативтік сөздіктерде не мағынасы дұрыс көрсетілмеген, не диалектизм деп белгіленген (*сүркіл*), не тіпті сөздікке енбей қалған (*қотын*). Көрсетілген сөздердің барлығы да – лексикалық қорда бар бірліктер, бірақ орын тан-дап сирек жүмсалатын, көбінесе стильдік мақсатпен көркем әдебиет тілінде кездесетін сөздер. Әдеби норма мұндай тұлғаларды мейлінше дұрыс тандап, белгілі экспрессиялық жүк артып, дәл қажет жерінде қолдануды талап етеді. Экспрес-сиялыштығына қызығып, оларды орынсыз жерде қолдану тек тілдік норманы емес, алдымен қолданыстық-стильдік норманы бұзушылық болады. Мысалы, *қырымпоздану* сөзін қазақ тілінің

толық түсіндірме сөздігі «жинақы жүретін; сылан, кербез» мағынасындағы қырымтаз сөзінің ауызекі сөйлеу тіліндегі, демек, әдеби нормадан тыс тұратын сөз» деп көрсеткен (ҚТТС, 7-том, 18-бет). Ал Ф.Мұсіреповтің: «Мұны да қырымпозданбай, қиқаңдамай істеді» («Оянган өлке», 1955, 2-том, 59-бет) дегенінде жаралы жалшы жігіт – Жабайға Игілік байдың ерке жиені – Сейіттің қызмет еткенін, ол қызметін міндет етпей, қалтқысыз істегенін айтып отыр. Бұл жерде түсіндірме сөздік көрсеткен «кербездену, сыландау» немесе «жинақы, әсем журу» деген мағына емес, автор мұнда «сыр алыспаған жас жігіттің жаралы жалшы жігіт – Жабайға әйелдер араласа алмайтын күтімдерге шейін риясыз көңілмен, жиіркенбей, іркілмей істегенін» қырымпозданбай, қиқаңдамай деген экспрессивті етістіктермен әдемі суреттейді. Демек, осы екі сөз өз орындағында, контекст сұранысында дәл жауап беріп тұр.

Әрбір сөзді тандап, талғап барып, өз орында жұмсайтын Габит Мұсіропов, Мұхтар Әуезов сияқты ұлы жазушылардың тілінде кездесетін *қәүгөрік* («...Осы елдің көп *қәүгөрік* еркегі айтқанына түсінбейді» – Тандамалы шығармалар. - Алматы, 1955. - 2-том. - 36-бет), *құнезер* («Такымдарына бір-бір темір күрек, сірі жан торсықтарын қанжығаларына тізіп алып онай кесіптін *құнезерлері* ойды-қырды ылғи шарлап жүреді» – сон-да, 60-бет)). Бұл сөз дыбыстары алмасып ұшыраған, сондықтан оның *құннерез* варианты да бар. Сол сияқты ұлы Мұхтар Әуезовтің «Абай жолы» эпопеясының тілінде кездесетін *жошиын* («... Осы, ана Ыскәқ бір *жошиын*» – М.Әуезов Таңдамалы шығармалар. - I том. - Алматы, 1955. - 17-бет), *құж* («Жаным-ау, қасқыр бала мынау фой! –*құж* десенші» – сонда, 19-бет), «молда *сүрей* кәрі» (146-бет), *нор* («қалың нөпір қара *нор*» – 189-бет), *қыжал* сияқты сөздерді де не жергілікті сөз, не автордың өзі жасаған неологизм, не этнографизм, не тіпті көне сөз, тарихтық сөз деуге болмайды. Олар – сирек қолданылатын, көбі экспрессивті тұлғалар. Бірқатары сөздіктерге енбей қалған. Ал енгендерінің сөздікте көрсетілген мағынасы жазу-шы қолданған мағынасынан бөлек. Мысалы, *жошиын* сөзі – ҚТТС-да бар болғанмен, Әуезов қолданған мағынадағы тұлға емес, *сүрей* – бұл да сондай: М.Әуезовте сөздікте «есуас, делқұлы» деген мағынада жұмсалып тұрған жоқ, *нор* – бұл да алдыңғылардай.

Демек, көркем әдебиетте болсын, публицистикада болсын оларда кездесетін сөздер мен сөз тұлғалары нормадан тыс элементтер болып танылмайды, керісінше, бұлардың жазушы, ақын, публицист сияқты қалам иелерінің тілінде жұмсалуы – белгілі бір колданыстық, стильдік мақсатпен келетін, нормаға сай тілдік (лексикалық) құралдар деп есептеледі.

Қолданыстағы жоғарыда көрсетілгендей номинативтік (негізгі лексикалық) мағыналары жеке алғанда қалың қөвшілікке түсініксіздеу сөздерді іріктеп жинап алып, олар-ды жергілікті сөз – диалектизмдерден, ұмытылып бара жатқан этнографизмдерден, әдеби нормадан тыс тұратын қарапайым не дөрекі сөздерден, мағыналары күнгірттенген архаизмдер мен тарихтық сөздерден ажыратып қарап, әрқайсысының жал-пы тілдік те, контекстік те (қолданыстық та) мағыналарын көрсетіп беру – тілді нормалаудың үлкен бір шаруасы болуға тиіс. Алдағы уақыттарда бұндай сөздердің сөздігі жасалып, түсіндіріліп берілсе, ол – қөвшілік қауымның, қазақ тілін үйренушілер мен пайдаланушылардың, оның ішінде жазу-шы қауым мен қалың оқырмандардың тіл нормаларын игере түсулеріне көмектесер нақты істердің бірі болмак.

Құрылымдық нормаға да, қолданыстық-стильдік нормаға да жатпайтындағы болып көрінетін сөздердің аса бір шағын тобы – окказионализм деп аталатын бір қолданар сөздер, яғни авторлық түзілімдер (тұлғалар). Көркем әдебиетте, әсіресе өлең тілінде жазушы мен ақын айтпақ идеясын (ойын) әсерлеп, бейнелеп беру үшін қалыптан тыс, яғни семантикалық, морфологиялық, кейде синтаксистік нормаға сәйкеспейтін жасанды тұлғаларды «окказионализмдер» деп атайды, кейбір сөздер өздеріне тән дағдылы мағынасынан басқа ұғымда жұмсалса, олар да окказионалдық құбылыс болып шығады. Мысалы, ақын Кәкімбек Салықовтың: «Бір ақын бір ақыннан *ақынырақ*, өйткені ол жүрекке жакынырақ. Ел-жұртқа қалды десек қалай унап, Күшті ақын құрделі де жабайырақ. Қашанда мықты ақындар *Махамбеттеу*, Кеменгер ойлы ақындар *Абайырақ*. Жақсы ақын – әлеуметтің жаңашыры, Даралау, ке-мел, дана *Пушкинірек*» деген жолдарындағы *ақынырақ*, *Махамбеттеу*, *Абайырақ*, *Пушкинірек* деген қолданыстары тілдің құрылымдық нормасына мұлде қайшы, өйткені **-рак/-рек**,

-ырак/-ірек, -тау/-теу, -лау/-леу жұрнақтары адам, жер-су аттары сияқты жалқы есімдерге жалғанбайды, олар – сын есім шырайларының жұрнақтары, ягни *бала*, жас сияқты сындық мәнді де қоса беретін сөздер болмаса, жалпы зат есімдерден грамматикалық мағына тудырмайтын қосымша. Мұндағы «бейнормалық» болып түрған сөздер – өлең тілі үшін нормалы (норматив) қолданыс: олар – көріктеу құралдарының бірі – окказионализмдер. Мұнда Кәкімбек Салықов ақындарға сипаттама береді: «мықты ақындар Махамбет сияқты ақындардың мықтысы, Абай сияқты кеменгер, ойлы ақындардың Пушкиндей ең күштісі дара, кемел ақындардың асқаны» деп көп сөзben айтылуға тиіс поэтикалық идеясын (оыйн), жалпы тілдік нормадан ауытқып, шырай жұрнақтарын жалқы есімдерге «заңсыз» жалғаған бір ғана сөзben – окказионализммен беріп түр.

Екінші бір мысал: окказионализм құбылысын арнайы зерттеген Г.Муратова өз жұмысында ақын Исарайл Сапарбаевтың: «Сарқылған Балқаш – мынау, Арап – мынау, *Жазылмас* жәми жүрттың тағдырымен *Жазылмас* жанымда бір жара бар-ау» деген жолдарындағы *жазылмас* сөзін окказионализм деп көрсетеді, бұл да – «заңсыз» жасалған авторлық неология: *жазылмас* болу, *жазылмас* жасау, *жазылмас* қылу деген сияқты тіркестермен келетін «жазатайым болған сәтсіз оқиға» дегенді білдіретін *жазылмас* сөзі *жолдас*, *құрдас*, *сыбайлас*, *енишлес*, *курстас* сияқты сөздерді жасайтын **-дас/-дес, -лас/-лес, -тас/-тес** жұрнағын қабылдамауга тиіс, өйткені бұл сөздің семантикалық мағынасы оған жібермейді, *влімдес*, *тірілес*, *аурулас* деп айтуға болмайтыны сияқты, *жазылмас* «ортактасу, еншілесу» мағынасын қабылдамайды, тіпті жазатайым болған сәтсіз оқиғаға, айта-лық, аяғын сындырып алуға біреу емес, бірнеше адам бірден ұшырасада, тілдік нормада *жазылмас* деп айтпайды. Ал ақын айтады, ақын үшін *жазылмас* деген норма шырқын бұзып, қолдан өзі жасаған тосын сөз бүгінгі замандағы қалың жүртшылықтың (жәми жүрттың) өмір тіршілігі, тағдыры тар-тылып бара жатқан Балқаш көлінің, тартылып қалған Арап тенізінің табиғаттың ба, адамдардың ба тарапынан «жаза-тайым», «күтпеген жерден», күтпеген кезде жайсыз оқиғаға – суалып қалуына саясаттың ба, шаруашылықтың ба салдарынан қоғам тарихында тап болған жоқшылық, берекесіздік,

тәртіпсіздік тағдыры, жазымы ұқсас, бірдей: «жазымда». Сол сияқты Сұлтанмахмұттың «ойлау» мағынасында *мыйлау* сөзін жасап алуы, И.Сапарбаевтың *Хиросима* топонимінің, яғни атом бомбасының апатына ұшыраған қала атауының моделімен *Жеросима* сөзін тіл нормасын бұзып (- **осима** деген жұрнак жок) авторлық меншікті сөз – окказионализмді пайдалану – занды, нормадағы қолданыс. Мұндай «бір қолданар» сөздер тілдің құрылымдық нормасына қайшы жасалғанымен, көркем әдеби тілінің стильдік нормасына сай келеді. Бірақ бұл сияқты «нор-ма бұзарлар» мын ойланып, жұз толғанып барып табылған, қайткен күнде де өзінің сол жерде (тексте) қажеттігін, яғни стильдік жүгін дәлелдей алатын элемент болуға тиіс. Окказио-нализмдер – ете сирек кездесетін құбылыш.

Авторлық неологизмдер – қандай сөздер? Тілдегі бар сөздер шығарманың тақырыбына, автордың айтпақ ойына, поэтикалық идеясына қатысты ұғымды дәл бере алмайды-ау деп санаған тұста өздері жаңа сөз ұсынады, ол жаңалар не мағынасы ауыстырылған байырғы сөз, не қолдан жасалған туынды сөз, не мағынасы жаңғырған көне сөз, не әдеби тілге ену құқығы бар жергілікті сөздер немесе ауызекі тілдік қарапайым сөздер бо-лып келеді. Бұлардың да мағынасы көпшілікке бірден түсінікті болмауы мүмкін, өйткені олар – әрі «жана», әрі «авторлық» деген «паспорты барлар», әрі ете сирек кездесетіндер. Соған қарамастан, бұлар да тілдің құрылымдық нормасынан да, әсіресе қолданыстық-стильдік нормасынан толық орын ала-ды. Мысалы, F.Мұсіреповтің «Оянған өлке» романының әңгіме өзегі (тақырыбы) – казак жеріндегі алғашқы өндіріс, көмір өндірісі, техникалық жаңалықтар екенін білеміз. Мұнда «Қызылжар капиталисі – Никон Ушаков қазақ даласын көкжал бөрідей кезіп, Сарыарқаның әр қырқасына бір қызық қағып, ...

таңба бастырып, өз атына бекіттіріп алып, Жезқазған, Нілді, Ақбұйрат, Құлжұмыр, Сасық, Соран, Қарағанды сияқты кенді шиырларды кесек-кесегімен қылғып келеді» (F.Мұсірепов Танダメлі шаңығармалар, 2-том, 65-бет) деген сөйлемді оқымыз. Бұл жердегі *шиыр* сөзі – автордың «туындысы», өйткені жа-зуши *кенді шиырлар* деп қазіргі *кен орындары, рудниктер* деген сөздердің авторлық баламасын ұсынған, ал бұл сөздің лексикалық мағынасы – «айқыш-үйқыш, қым-қигаш, шытыр-

ман, шым-шытырық» (КТТС, 10-том, 231-бет). Мұсірепов бұл сөзді «орын, мекен» деген мүлде жаңа мағына беріп қолданған (мүмкін, бұл сөздің «айқыш-ұйқыш», «әр тұстағы» деген семасын – қосымша мағыналық реңкін де пайдаланған болар).

Сол сияқты домна пешінде мыс корытуда шығатын шлактың бұрын қазақша терминдік атауы болмаған, оны осы күнге дейін «шлак» деп жүрміз. Осы өндірістік зат атауын жазушы *боқат* деп, өзінше жаңа тұлғамен береді: «Карл Карлович біраз асықтырмағанда үйіндігে кететін *боқатты* бұдан гөрі де қактап, тазалап қалуға болатын еді» (Сонда, 76-бет).

Тері, көркем шығармада мұндай авторлық жаңа сөздер өте аз болады, олар да дәл сол жерде қолданылу қажеттігін дәлел-дей алатын заңды, нормаға сыйымды лексикалық бірліктер қатарын құрайды. Әрине, авторлық неологизмдер – тек өнді-ріске, ғылымға, техникаға қатысты туынды атаулар ғана емес, өзге де «қаралайым» мағынадағы сөздер де болады. Бірқатар диалектизмдер мен сирек сөздерге жазушы жаңа мағына беріп қолдана алады. Мысалы, *сөдегей* деген жергілікті сөз – диалектологтардың көрсетуі бойынша, Қазақстанның шығыс өлкелері мен Жетісу тұрғындарының тілінде «бейсауат, оқшау» және «түрпайы, өрескел, жағымсыз» деген мағынаны білдіреді: *сөдегей сөз, сөдегей нарсе*, ал солтүстік аудандарда «икемсіз, ебедейсіз, сөлемек» деген мағыналарда қолданылады, бұл тұста *сөдегей-солтақ* түрінде кос сөз құрамында да келеді (Ж.Доссараев Қазақ тілінің жергілікті ерекшеліктері (лексика). - II бөлім. - Алматы, 1955. - 107-бет). Ал осы сөзді ұлы Мұхтар Әуезов Қазақстан жерінде тың көтеріліп жатқан алғашқы жылдардың бірінде, сірә, газеттің сұрауы бойынша жазған кішігірім мақаласында «Бұрын жер өгей, жел *сөдегей* еді» деген сөйлемде келтіреді. «Біз бұрын естімеген *сөдегей* сөзін қай мағынада жұмсадыңыз, Мұхтар аға?» деп сұраганымызда: «Босқа соғып жатқан» деген мәндеге әрі *өгей* сөзіне үйқастырып алғаным ғой», – деген-ді. Бұл сөз Мұхана біршама бұрын да таныс болғанын оның 20-жылдарда жазылған бір мақаласынан кейін көрдік. Демек, жалпы әдеби тілде жоқ болғанымен, кейір жергілікті сөздерді де жазушы реті келгенде не сол диалектілік мағынасында, не мағынасын ауыстырып өзге мәндеге, көбінесе стильдік мақсатта жұмсай алады.

Қарапайым сөздер, жаргондар және әдеби норма

Қарапайым сөздер деп аталағын лексикалық топ та, жаргон деп аталағын шағын бірліктер де – әдеби нормадан тыс тұратын сөздер. Олар – негізінен ауызекі сөйлеу үрдісінің дүниелері. Қарапайым сөздердің жазба үлгілерде кездесуі шектеулі, көбінесе көркем әдебиетте, оның ішінде де прозалық шығармалар мен драмалық туындыларда қолданылады. Мұның өзінде де жазушы, драматург оларды негізінен кейіпкерлердің аузына салады. Демек, қарапайым, жаргон сөздер ауызекі сөйлеу тілінің нормасы болады. Сонымен қатар оларды көркемсез иелері стильдік мақсатта өз баяндауларында да қолдана алады.

Қарапайым элементтердің көркем әдебиетте қолданыла алатын құқығы бар тұсы, ол – адамның ішкі дүниесіне үңіліп, психологиялық күй-калыпты шынайы беруді мақсат еткен жазушы айтпак ойын (идеясын) кейіпкерлердің көзімен, дүниетанымымен беруге ұмтылады. Мысалы, Әбіш Кекілбаевтың «Құс қанаты» атты повесінде бірнеше диалектизм, қарапайым сөз, сөз тіркестері, тіпті ауызекі сөйлеу тіліне тән синтаксистік құрылымдарды авторлық баяндау тілінде қолданады. По-весьте ауылдан қалаға, баласының қолына келген «салпы етек, шұбалан жаулық қара кемпірдің» психологиясымен баян-далады. Кемпір – оқымаған, сауаты жоқ, баяғының «өкілі». Сондықтан мұнда сол кемпірдің аузына оралуға тиісті сөздер көбірек орын алған, бірақ сөйлейтін – кемпірдің өзі емес, жазушы. Автордың баяндауында бозымбай (әдеби нормада

– бозөкпе), шұқыншақ (енбеккор), тасырайып отыру (шалқып отыру), бұтқа толу (бәлдену), тортиып жүру (ренжу), жырырқылдау (орынсыз күлу) сияқты қарапайым элемент-тер және бөтеке (әдеби нормада – бүйрек), бойлы-сойлы (текті, жақсы) сияқты жергілікті қолданыстар да орын алған.

Кемпірдің қалалық келіні «сідаңдаған қу сирақ, шүйке бас» болуы мүмкін, «бұл жақтың үкіметі» (қалалық кенес) де-ген сөздер де – автордікі, бірақ кара кемпірдің көніл-күйімен, танымымен аталған сөздер. Үй ішіндегі әжетханадағы уни-таз – «тас кели». Соңғы мысалдардагы қу сирақ, шүйке бас, бұл жақтың үкіметі, тас кели деген сөздер – жеке алғанда, қарапайым бірліктер емес, олардың қарапайымдық статусы

– контекстік, ягни бұлар – «шұбалаң жаулық» кемпірдің та-
нымы, бірақ оларды айтып отырган – кемпір-кейіпкер емес,
жазушының өзі. Соған қарамастан, бұл қарапайым элементтер
– өз орнында қолданылған сөздер.

Бұл повестегі бейнорма деп саналатын элементтер: көрсө-
тілген қарапайым сөздердің, диалектизмдердің, *жүзіқара*,
итжегір, *құрып қалғыр*, *пәтишагар*, *кәпір*, *бетпақ* сияқты
дөрекі ұрыс-қарғыс сөздердің, тіпті бұзылып айтылған *божа-
лыста*, *бәбушке*, *кәзит*, *қуаз* (квас), *іздірәсти* сияқты орыс сөз-
дерінің – барлығының көркем шығармадан орын алып тұрған
үәжі (мотиві) бар: ол – шығарманың баяндау стилі, ягни кейіп-
кердің көзімен, психологиясымен, демек, сөзімен баяндау
қажеттігі. Мұндай фактілерді көп болмағанмен, сөзге (шығарма
стиліне) дең қоятын қалам иелерінен табуға әбден болады.
Мысалы, жазушы Марат Қабанбайдың балалар өмірінен жаз-
ылған әңгімелеріндегі көптеген қарапайым сөздерді автордың өз
тілінен (баяндауынан) кездестірсек, олардың да қолданысы
– уәжді, демек, сол шығарма тілі үшін норма.

Көркем әдебиет тілінде қарапайым сөздер әрдайым стильдік
мақсатпен келмеуі де мүмкін. Ол қунде, әрине, бейнормалық,
нормадан уәжісіз (жөңсіз) ауытқушылық болып шығады.

Демек, қарапайым, жаргон сөздердің көркем шығармаларда
белгілі бір стильдік жүк арқалап қолданылуы – занды, уәжді
құбылыс. Бұған мысалдарды өзге жазушылардан да табамыз.
Жазушы Қалихан Ысқақов «Ақсу – жер жаннаты» атты рома-
нында қарапайым сөздерді кейіпкерлерінің аузына да салады, өз
баяндауында да қолданады: «Бекет осымен біржола *шоң-
қиган...*», «Ол *қойт-қойттан* қоймады...», «Қағазсыз қара
басыңыз *қотқа жүрмейді...*». Бұл қолданыстарды да жазу-шы өз
тіліне тектен-тек қатыстырып отырган жок. Бұлардың
экспрессиясы нормадағы әдеби вариантынан (*ұтылған*,
жесеңілген, *отырып қалған...* *айдал салуын қоймады...* *түккे
турмайды*, *кәдеге аспайды* деген сияқты) әлдеқайда күшті,
әсерлі. Жоғарыда бірінші келтірілген сөйлемді жазушы: «Бе-
кет осымен біржола *жесеңілген*» деп норматив сөзben жазса,
оның экспрессиялық әсері күшті сезілмес еді. Демек, бұл
қолданыстар – әдеби тіл нормасынан уәжді (себепті)
ауытқулар болып танылады. Оның үстіне автордың
баяндауында сәл әжуа, мыскыл (сарказм, юмор) тоны сезіледі.

Қарапайым сөздердің мағыналары көпшілікке таныс боп келеді, сондықтан ол келеке-сықақ жанрындағы немесе үнін-дегі туындыларда белгілі бір стильдік мақсатпен еркін қол-данылады. Бұларды да уәжді қолданыстар деп атаяу керек. Сонымен қатар тек көне, сирек сөздер емес, кейбір дағдылы, ұғымы айқын сөздердің де лексикалық та, стильдік те мағыналарына зер салмай, кейде тіпті түсінбей не жаңсақ ұғынып уәжсіз қолданушылық та әдеби тіл нормасына қайшы келеді. Мысалы, жолшыбай жолдасы жоқ салт келе жатқан адамды *жалғызлікті жолаушы* дегу (*жалғызлікті* сөзі күнделікті «тұрмыста колғабыс ететін, қарайласатын ешкімі жоқ» дегенді білдіреді және ол көбінесе үй шаруасымен, күнделікті тұрмыс карекеттерімен айналысатын әйелге қарата айтылуға бейім), *жігерлене жұтыну*, тұн *кеекінінде* (*баласында* деудің орнына), асықша *ширатылу* (*үйірілу* болса керек), көңілі *қайысу* (*қалды* деудің орнына), іші *еріді* (*жылыды* дегу керек), төсек *жсанарту* (*жсанғырту* деудің орнына) деген қолданыстарда жазушы-лар көрсетілген сөздердің мағыналарына үңілмеген (негізгі мағыналарын мұлде білмейді деуге болмас), бұлар – әдеби нор-мадан уәжсіз ауытқулар болып табылады.

Сейтіп, көркем әдебиетте болсын, өзге функционалдық стильдерде болсын, жеке сөздерді қолдануда әдеби нормага қайшы келіп, ол нормадан уәжсіз ауытқуға себеп болатын факт-торлар бірнешеу болады. Олардың бірі – көне, сирек, жергілікті, сөздердің мағыналарын жете білмей қолдану болса, екінші бір сәттерде ұқыпсыздық, лексикалық нормага салғырт қарау се-беп болады, үшіншіде функционалдық стильдердің өздеріне тән ерекшеліктерін араластырып жіберу (мысалы, ғылыми стильде диалектизмдерді, қарапайым сөздерді қолдану) сияқты ағаттықтар орын алады.

Әдеби тілдің ғылыми және реєми (кенсе-іс қағаздары, қаулы-қарапарлар, жоспарлар т.т.) стильдерінде қарапайым сөздер қолданылмайды, олар мұнда нормадан тыс тұрады. Публистикалық стильде қолданылуы да кемде-кем, стильдік мақсат-пен, көбінесе тырнақшаға алынып келтірілуі мүмкін. Мысалы, *iwip-jep қою* – сөйлеу тіліндегі жиі қолданылатын, ауыспалы мағына келтірілген тіркес, «Жас Алаш» газеті информациалық мақалада «қайырымдылық шараларына арналған қаражатты

Бразилияның бұрынғы Президентінің жұбайы «ішіп-жеп» қойыпты» (ЖА, 20.05.2000) деп жазғанда, көрсетілген тіркесті қарапайым элемент ретінде, хабарды жағымсыздық болумен беріп тұр. Сірә, бұл іспеттес сөздер мен тіркестерді «контекстік қарапайым сөз статусына ие болғандар» деп тану керек, яғни бірліктердің өздері қарапайым лексика тобына жатпайды, бірақ келеке, мазак үндерімен берілген сөйлемдерде сол жағымсыз реңкті білдіретін тілдік элементтің бірі ретінде нормадағы сөздердің өзін қарапайымға айналдырып қолдана алады. Мысалы, «Жас Алаштың» көрсетілген нөмірінің тағы бір жерінен: «Мәжіліс депутаты Ф.Қасымов әріптестеріне ренжігөн сондай, жеке партия құрып, «куреске» шығуға бел буыпты» деген сөйлемді оқымыз. Мұндағы *курес* сөзі өзінің нормативтік мағынасында емес, ол – нағыз курсес емес, келеке етіп көрсетілген жағымсыз қарекет, сондықтан сөз өзінің нормативтік мағынасынан ажырап, қарапайым сөз сияқты пәс (төмен) стиль элементтіне айналып тұр.

Диалектизмдер және әдеби норма

Лексиканың нормалану процесін әңгімеледе диалектілік бірліктердің қолданысына айрықша назар аударылады. Қазақ әдеби тілінің бүгінгі даму кезеңінде мұның бірнеше себептері бар. Алдымен, «Қазақстанның әр өлкесінде тек өз шенберінде қолданылатын, яғни таралу шегі бар жергілікті сөздердің бүгінгі лексикалық, стилистикалық статустары қандай? Диалектизмдердің әдеби лексиканы байытудың негізгі көзі болып келді ме немесе әрі қарай бола ала ма?» деген проблемалардың бар екендігінде. Екіншіден, «диалек-тизмдердің көркем әдебиеттегі қолданысы мен өзге функцио-налдық стильдердегі орын алуындағы ерекшеліктерді дұрыс танып жүрміз бе? Қазіргі қазақ тілінің тірек диалектісі болды ма, жоқ па? Болса – қай диалект негіз болып танылады?» деген теориялық-тәнымдық проблемаларды былай қойғанда, жоғарыда көрсетілген сауалдар «диалектизмдер және әдеби норма» деген тақырыпты алға тартады. Әрине, бұл тақырып – бір емес, бірнеше ғылыми монографиялардың нысаны (объектісі) екені даусызы. Сондықтан біз бұл жерде қазақ тіл

білімінде біршама орныққан пікірлер мен диалектизмдердің колданысындағы уәжді-уәжсіз ауытқуларды қысқаша баяндаймыз.

Жергілікті сөздер – ауызекі сөйлеу тілінің элементтері. Ал сейлеу тілі – әдеби тілдің қайнар көзі. Соңдықтан ұлттық жазба әдеби тілдіңқалыптасып, сөздік қазынасыныңтолығуында диалектизмдердің орны, рөлі бар екендігі даусыз.

Тілдің лексикалық қорының толығу занылыштарына сәйкес, диалектизмдер де аз-аздап әдеби айналымға түседі. Оған әр алуан тілдік те, экстраграфикалық та сұраныстар себеп болады. Айталық, шаруашылықтың, кәсіптің бұрын қазақ далаына тегіс жайылмаған түрлөрі енді қоғам өмірінен орын алғып жатса, бұларға қатысты зат, құбылыс, ұғым атауларын жергілікті қолданыстардан ауыстырып алу фактісі бар, бұл қазақ тілінде де орын алғып келгендігін зерттеуші-диалек-тологтер көрсетіп келеді. Мысалы, бау-бақшаның және егін-шіліктің басқа да кейбір түрлөрінің балық есірудің, балық аулаудың, бұғы, түйе есірудің кейбір атаулары жергілікті қордан алынып отырғанын көптеген мысалдармен дәлелдеуге болады. Айталық, диалектологтер бұл қатарға бағбан, мұрап, зембіл, гүлзар, атыз, женсе, жозы, дәліз, мәре, арықтың жан арық, бас арық, бау арық, желке арық, қол арық, оман арық, оң арық сияқты он шақты түрінің атауын көрсетеді.

Диалектизм дегеніміз – әдетте әдеби баламасы бар бірліктер, соңдықтан жалпыхалықтың баламалары жоқ жоғарыда көрсетілген сөздердің әдеби тіл нормасынан орын алуы – орынды. Диалектілік ерекшеліктер тек зат атаулары емес, қимыл, сын атауларынан да кездеседі. Қазіргі қалың көпшілікке едәуір таныс болып қалған *багамдау*, *тәжікелесу*, *сейдін*, *албаты* сияқты сын есім, үстеу, етістіктердің де түтпөркіні жергілікті қолданыстар екенін екінің бірі біле бермейді. Бұлар – әдеби баламасы бар сөздердің синонимдік қатарлары ретінде әдеби тіл айналымына түскендер. Соңғылардың әдеби нормаға ену мүмкіндігін өзге сұраныстар туғызып отыр, олар: әр сөздің мағыналық реңктерін пайдалану, экспрессиялық боя-уы қалыңдау қатарларды іздеу, көркем шығармада стильдік мақсаттарды көздеу т.т.

Сірә, көркем әдебиетте кейбір жазушылардың диалектизмдерге көбірек баруының бірнеше себебі бар, олардың бірі – «әркім өзі туып-өсken өлкеде қолданылатын тіл элементтерін, бала кезінен құлаққа сініп, үйреншікті болып кеткен сөздерді қимай, соны дұрыс деп есептейтіндіктері» (Ш.Сарыбаев), екіншісі – әсерлі, экспрессивті сөздерді іздеуі. Алғашқысы – көбінесе санадан тыс, оның үстіне әдеби нормадағы сөз-дер мен нормадан тыскары тұратын сөздерді ажыратып танымайтындықтан болып жатса, соңғысы – саналы түрде, бірақ кейде сәтсіз (үәжіз) шығатын әрекеттер болып кетеді.

Жалпы тіл білімінде *диалектизация* деген термин бар, ол – көркем әдебиетте (кейде тіпті тұтас әдеби тілде) жергілікті ерекшеліктерді еркін әрі молынан жұмсау әрекеті. Тілдер дамуының белгілі бір кезеңінде бұл процесс орын алуы мүмкін. Қазақ тілінде диалектілендіру (диалектизация) құбылысы айқын және қарқынды түрде болмағанмен, XX ғасырдың 70-80-жылдарында қылаң беріп қалғанын айтуга болады. Көркемсөз шеберлерінің бірқатарының (Д.Досжанов, Т.Әлімқұлов т.б.) шығармаларында жергілікті тіл ерекшеліктерінің айтарлықтай орын алғанын F.Мұсірепов сияқты аға жазушылар мен кейбір тіл мамандары (Б.Қалиев) баяндамалары мен мақалаларында арнайы атағаны мәлім. Диалектизмдерді стилизация мақса-тында пайдалану айтарлықтай күш алып, әрі қарай дамыма-ғанымен, көркем дүниені диалектизмдермен өрнектеудің шама-шегін, амал-тәсілін, орын-кезеңін тап баса алмай, әдеби норма-дан шығып кетіп жатқан фактілерді 80-жылдардағы туындылар-дан тауып, жинап біз де көрсетіп едік. 1984 жылы жарияланған бір мақаламызда айтылған пікірлер мен келтірілген мы-салдарды қайталасақ. Жазушы Бекділда Алдамжаровтың «Қара нөсер» атты кітабында («Жазушы», 1981) ояқ, анаяқ,

іжсайда, ақ кейіл, еге, мәттәқым, ауыш, бәте (бата-ның орнына), қайтіп, дайра, керпіш, отқан (отырган-ның орнына), ешек, пәт (бет), ыңғи, кәдірлі, бір күншидегі сияқты диалектизмдер кейіпкерлерінің де аузында (мұны дұрыс-ақ делік, егер кейіпкерлердің белгілі бір өнірдің адамдары екендігін жазушы әдейі көрсеткісі келген болса), автордың өз баяндаудың да кездеседі. Бұл жергілікті ерекшеліктерді осы автор ешбір стилизация мақсатын көзdemей, тек өзінің сөз машиғы

бойынша қолданып түр. Мұндай «тогытып» жіберілген диалектизмдер ешбір мақсатсыз қолданылғанда, әдеби норма-дан ауытқушылық болып табылады. Бұл жерде диалектиза-ция құбылысы емес, тілге, әдеби нормага жауапсыздық (әлде білмestіk, әлде салақтық) таныту деп бағаланады.

Диалектизм және әдеби норма мәселесінде «әдеби баламасы бар ұғым атауларына жарыстыра жергілікті сөздерді пайдалану жөн бе, жөнсіз бе?» деген мәселе де пікірталас тудырып келе жатыр, соның бірі – әдеби баламасы бар, тіпті әдеби синонимдік қатары мол кейбір сын есім, үстене, етістіктердің диалектілік варианттарын оларға семантикалық реңк үстеп (дәлірек айтсақ, олардың семалық ренктерін пайдаланып) әдеби тіл нормасына ауыстыруға болады. Әйткені етістік, сын есім, үстене де-гендер – экспрессивтік бояуын қалындағып, құбылта түсуге бейім элементтер. Біздіңше, *лақса* (әбден картайған), *бодау* (өтесін, төлеу, қарым), *бағамдау* (пайымдау, анғару), *мәуріт* (шак, мезгіл, кез), *оңаза* (ашқарап), *сейдін* (сергек), *мондыбас* (жуас) деген сөздердің көбінің «тұрағы» – белгілі бір өңірлер болар, бірақ олардың жақша ішіндегі әдеби баламаларының барына қарамастан, оларды 60-90-жылдардағы әр автордан кездестіреміз, ол – бұлардың әдеби тілге енгенін танытады.

Диалектизмдерді әдеби тілге енгізуде уәжіде де-гендер (мотивация), шама - шарықтық (пропорция) және ұтымдылық принциптерін қатты ұстасу керек. Әйтпесе, ауызекі сөйлеу тілі элементтерінің көбінің экспрессиясының құштілігіне, сонылығына (көпшілік үшін тың, жана сез болып көрінетіндігіне) қарап, оларды әдеби үлгідегі жазба дүниелерімізге тоғытып жіберсек, норма бұзылады. Мұны ескермессек, әдеби тілді диалектілендіру қаупі тууы әбден мүмкін. Ал тілді диалектілендіру – көпшілікке ортақ, тұракталған әдеби тіл нормаларына нұқсан келтіру де-ген сөз, яғни әдеби үлгілер тілінің барлық өнір тұрғындарына түсініктілігі, айқындығы, жүйелілігі бұзылады деген сөз. Диалектизмдерді уәжіз қолдану – нормадан ауытқу, сондықтан кейбір жазушыларымызда кездесетін *бөлtek-saltaқ* (бөлек-салак), *ypirmeli-shypirmeli* (үбірлі-шүбірлі), *қападар* (қапалы),

тоңқару (төңкериу), *міселі қайту* (меселі қайту), *пәре* (пара беру) деген сөздерді жақша ішінде көрсетілген әдеби түрлері тұрғанда, ешбір уәжіз қолданудың реті жоқ.

Қысқасы, әдеби норма тұрғысынан келгенде, диалектизмдер сияқты мол қордың өзіне үлкен сақтықпен қарау керек. Оның лексикалық қазынага қосар үлесі барын еске ала отырып, жазба тілге, әсіреле көркем әдебиеттен өзге стильдерге енгізу әрекетінде белгілі бір шек қойылғаны жөн.

Сөйтіп, жергілікті элементтердің әдеби нормаға қатысы, әдеби тілге ену әлеуеті (мүмкіндігі), көркем әдебиеттегі орны, қызметі туралы қысқаша қайырылған мағлұмат-тәнымдарды қорытындыласақ:

1) қазақ тілінің қазіргі даму сатысында диалектизмдер деп аталағын едәуір мол лексикалық топтар мен жергілікті фонетикалық, грамматикалық бірліктер бар. Олар – негізінде, әдеби тіл нормасынан тыс тұратын элементтер.

2) Жергілікті тіл ерекшеліктері – ауызекі сөйлеу бірліктері, ал халықтың ауызекі сөйлеу үрдісі – жазба әдеби тілді толықтыратын көздердің бірі, сондықтан баламасы жоқ зат ата-уларын, кәсіпке, әр алуан шаруашылық ұғымдарына, әр өлкеге тән ландшафтыға және тағы да басқаларына қатысты сөздерді жергілікті сөйлеу тәжірибесінен – диалектизмдер құрамынан тандап алу процесін әлі де тоқтатуға болмайды.

3) Диалектизмдер көркем әдебиетте суреткерлік құралдың бірі ретінде қолданылады. Олар тек кейіпкерлердің диалог, монологтеріндеған емес, шығарманың стильдік тонына қарай автордың баяндауында да жұмысала алады, бірақ мұнда қайткенде де бейәдеби сөздің қолданысы уәжі (мотиві, себебі, қажеттігі) болуы керек және ол уәж ғылыми тұрғыдан дәлелденетіндей болуы шарт.

4) «Қазақ тілінің диалектологиялық сөздігі» сияқты құнды материалдардың ішінен бүгінгі және өртөндік жазба әдеби тіліміздің лексикалық қазынасын байытуға қажет бірліктерді іздестіру, іріктеу, тандап алу қарекетін жүргізе беру – алдағы міндеттеріміздің бірі ретінде саналады.

Сөйтіп, жана сөздер, көне сөздер, сирек қолданылатын лексикалық топтар, терминдер, диалектизмдер деп топтан бөліп алып, олардың әрқайсысының әдеби тілдегі орны, қызметі, қазіргі қүйі, нормалану процесі жайында жасаған талдау-ларымыз беру – алдағы пікірлеріміз мынадай қорытындыға келтіреді:

1) қазіргі қазақ жазба әдеби тілінің лексика саласы айтарлықтай нормаланып, ол нормаларды қалыптастыру (кодификация) процесі жүргізілуде. Әдеби лексикалық нормалардың негізгі базасы – халықтың сөйлеу тілі мен жазба тіл үлгілері: көркем әдебиет, публицистика, ғылыми әдебиет бо-лып саналады, олар қазақ сөздерінің әдеби қазынасын танытады. Оларды норма ретінде тұрактандырып, қалыптастыруда окуағарту құралдарының, баспасөздің, әр алуан сөздіктердің, оның ішінде анықтағыш құралдардың қызметі айрықша.

2) Қазіргі күнде лексикалық нормалардың ішінде вариантар қатарын туғызып, пікірталастарға шақырып отырғандары – терминдерге қатыстылары, мұнда тек термин жасау принциптері ғана емес, кірме терминдердің тұлғалануы, оларға қазақша қосымшалар жалғану ерекшеліктері туралы да әртүрлі пікірлер мен ұсыныстар айтылуда.

3) Әдеби нормадан тысқары тұратын лексикалық топтардың ішінде әдеби үлгілерде орнымен (үәжді) қолданылатын сәттерімен катар, нормадан ауытқытын қолданыстар да орын алуда. Әдеби норма шарттарына мұқият карайтын, ғылыми ізденістерді талап ететін саланың бірі – бейәдеби элементтердің қолданысы.

Қазақтың әдеби тілінің сөздік құрамын толықтыра түсу – әлі де жүріп жатқан процесс, соңдықтан ауызекі сөйлеу бірліктерінен, әсірссе диалектизмдерден мұлде бас тарту әлі ерте. Оларды тек стильдік мақсатпен көбінесе көркем әдебиетте ғана қолданып қоймай, жаңа ұғымдарды атаудың бір көзі ретінде қараша керек.

4) Лексикалық нормаланудың ең өзекті мәселесі – варианты жайы. Оларды да айырып қарап, әдеби нормага енетін қатарлар мен бір сыңарын әдеби норма ретінде тұрактандырып, қалғандарын бірте-бірте қолданыстан ығыстыру әрекеті дұрыс бағыт алып келе жатқандығын айтуға болады.

5) Лексика саласындағы әдеби нормаларға келгенде, көркем әдебиет стилі өзге функционалдық стильдерден бөлек тұрады. Соңдықтан «көркем әдебиеттегі сөзқолданыс және әдеби норма» деген тақырып өз алдына талдауды қажет етеді.

6) Әдеби нормадан жөнсіз ауытқуға аппаратын тұстарды жинақтап көрсетсек, олар мыналар: қазақтың бүгінгі кең

байтақ даласының түкпір-түкпіріне тегіс түсініксіз жергілікті сөздерді молынан не орынсыз келтіру, көне сөздердің мағынасын дұрыс түсінбей жұмсау, қолданыстан шығып қалған «пассив» сөздерді «тықпалау», қажетсіз тұста жана сөз жа-сай қою не оның сәтсіз шығуы, «орыншылдықтан» орынды-орынсыз қашқақтау, яғни орыс тілі арқылы енген, едәуір орын тепкен, нормага айналған халықаралық кірме сөздерді аударап, қазақша балама «тауып беру» немесе сыртқы тұлғасын өзгертіп, «қазақыландырып» жұмсау, штамп элементтерге, жылтырауық «әдемі» сөздерге үйірсектік таныту, сөздердің стильдік қызметін дұрыс танымай т.т.

Осы көрсетілген тұстардағы ағаттықтар мен кемшіліктерді болдырмау үшін жүргізілетін іс-әрекеттердің, ұсынылатын анықтағыш құралдардың, ғылыми ізденістердің мақсаты – қазақтың қазіргі ұлттық жазба әдеби тілінің нормаларын реттеу, айқындау, орнықтыру, қалыптастыру (кодификациялау) жолындағы үлкен әлеуметтік, тіпті саяси мәні бар шаруа. Тіл мәдениетін көтеру қарекеті – мемлекеттік тілдің жетілген, сын-дарлы болуы үшін жүргізілетін күрес.

КӨРКЕМ ӘДЕБИЕТТЕГІ СӨЗҚОЛДАНЫС ЖӘНЕ ӘДЕБИ ТІЛДІК НОРМА

Көркем әдебиет тілінің өзге функционалдық стильдерден айырмашылығы бар екендігі жалпы тіл білімінде бұрыннан айтылып келеді. Соңдықтан да кейбір ғалымдар көркем әдебиет үлгілерін функционалдық стильдер қатарына қоспауды ұсынады. Функционалдық стильдердің әрқайсысы: пуб-лицистикалық, ғылыми және кеңсе-іс қағаздары үлгілері бір-бірінен өзіне тән белгілерімен азды-көпті болынп тұратын болса, көркем әдебиетте мұндай стильдік тұбықтық болмайды, көркем шығармаларда барлық стильдердің де, ауызекі сөйлеу тілінің де элементтері орын ала алады. Және бұл – бейнормалық, нормадан ауытқушылық емес, көркемсөз нормасының өзіне тән белгілері болып саналады.

Қай тілдің болмасын көркем әдебиет стилі өзге халықтар-дың көркем дүниесінен өзінің ұлттық көркемсөз нормалары-мен (белгілерімен) ажыратылады. Көркем әдебиет, бір жағынан, жалпы әдеби тілдің құрылымдық нормаларына, екінші жағынан, көркем сөздің ұлттық нормаларына иек артады. Ұлттық нормалар деп отырғанымыз – қазақтың көркем әдебиет негізін жалпыхалықтың тілден, ұзақ дәстүрлі ауыз әдебиеті тілі мен ауызша дамыған ақын- жыраулар тілінен алады, бұлар – бүгінгі қазақ жазба көркем әдебиетінің лексикалық қазынасы мен көріктеуіш құралдарының қайнар көзі. Жалпы қазақ әдеби тілінің екінші ұлттық белгісі – оның аса бейнелі тіл екендігі, әсіресе синонимдер мен жалпы әдеби сипаттағы жарыспа қатарлардың молдығы. Осы белгіні көркем әдебиет барынша пайдаланады. Үшінші белгісі – қазақ тілінде диалектілік ерекшеліктердің аз байқалатындығы, бұл – көркем әдебиет тілін Қазакстанның барлық аймағына түсінікті тіл болып танылуына мүмкіндік береді. Қысқасы, қазақтың жазба көркем әдебиеті санғасырлық жазба дәстүрге емес, өте ертеден келе жаткан аса бай ауызша тараган көркемсөз дәстүріне иек артып, дамыды. Қазақ көркем сөзінің дамуында поэзия ерекше орын алды. Ал кейінгі ғасырларда (XIX-XX) қазақ әдеби тілі, өзге тілдер сияқты, ұлттық жазба статусқа ие болып, оның өзге де

функционалдық стильдері пайда болды, ол стильдер көркем әдебиеттің белгілерін айқындай, ажырата тұсті.

Поэтикалық тіл теориясындағы тұжырымдарға қарағанда, көркем әдебиетте сөз, бір жағынан, жалпы ұлттық нормаға сай қолданылуы тиіс болса, екінші жағынан, көркем дүние жа-сau міндеттін көздеуі керек. Осыған орай көркем шығарманың лексикасын тілдік норма тұрғысынан екі бөліп қарастырылады: бірі – сөздің жалпы дұрыс қолдану, екіншісі – әсем қолдану. Алдыңғысында сөздің жалпы нейтралдық, атауыштық қызметі, соңғыда көркемдік қызметі нысанана алынады.

Тіл мәдениетінің негізгі қарастыратыны – әдеби нормалану процесі, ол нормалардың қалыптастырылуы (кодификациясы). Қазақ көркем әдебиетіндегі бүгінгі лексикалық нормаларды әңгімелегенде, жоғарыдағы тарауларда көрсетілген мына мәселелерге назар аударылды: а) әр алуан жарыспа қатарлардың сынарларын таңдал, өз орнында жұмсау; ә) көне, жана, сирек, қарапайым, жергілікті сөздердің мағыналарын жақсы біліп, керек жерінде ғана дұрыс қолдану; б) өзге стильдердей емес, көркем әдебиетте жана сөз жасауға әуестенбей; в) ғылыми-өндірістік терминдерді кемде-кем жұмсау; г) әдеби нормадан тыскары тұратын сөздер тобын, әсіресе көне сөздер мен диалектизмдерді, сирек қолданылатын сөздерді көбінесе белгілі бір стильдік мақсатпен, образ жасауда пайдалану; д) публицистика мен ресми құжаттар тілінде орын алатын штамп сөздер мен стереотип тіркестерге бой алдырмау. Бұлар – норманы ұстануга қажет шарттар. Қазіргі қазақ көркем әдебиеті осы көрсетілген талаптарды біршама орынданап отыр.

Соңғы онжылдықтардың барысында қазақ көркем әдебиеттінде тілдің сөздік байлығын мейлінше кең қамту бағыты сезіледі. Ол үшін алдыңғы тарауларда көрсеткеніміздей, жұмсалу аймағы шектеулі диалектизмдерді де, мағынасы күңгірттеу көне сөздерді де, мағынасы бейттаныстау сирек кездесеттің сөздерді де, тіпті кейбір қарапайым сөздерді де әдеби тіл нормасына икемдеу фактілері бар. Бұл құбылыстың салындырылғанда, белгілі бір стильдік мақсатпен де, ешбір уәжсіз, білмestікпен де жүріп жатқаны байқалады.

Бүгінгі қазақ жазба әдеби тілінің даму кезеңінде сөздік құрамды толықтыра тузы, жауыр болған «терминмен» айтсақ,

«сарқа пайдалану» – әлі де жүріп жатқан процесс. Бұл – тек көркем әдебиеттің ғана емес, публицистика мен ғылыми әдебиеттің, әсіресе соңғы стильдің басты мұддесі. Сөздің семантикалық реңктерін ажыратып атауда, бұрынғы сөздердің, терминдердің мағынасын айқындаپ, дұрысын ұсынуда жаңа зат, құбылыс, ұғымдарды білдіруде әдеби тілге көптеген лексикалық жаңалықтар еніп жатыр. 80-90-жылдарда жаңа қолданыстардың бумы (қауырт көбеюі, тасқындауы) басталды деуге болады. Бұл процесте әдеби тілдің сусындастын көзі, бір жағынан, көне, сирек, жергілікті сөздер қоймасы болса, екін-ші көзі – жаңа тұлғаларды қолдан жасау (аффиксация арқылы және мағына ауыстыру арқылы), үшінші каналы – шет тіл-дерден сөздерді, көбінесе ғылыми-техникалық терминдерді қабылдау.

Көркем әдебиет тілінде осылардың біріншісі, ішінара екін-ші көздері іске қосылды. Көне, сирек сөздерді не өз мағына-сында, нежаңа мағына үстеп жаңғыртып қолдануға тарихи тақырыптарға жазылған шығармалар, мысалы, Ә.Кекілбаевтың, М.Мағауиннің, С.Сыматаевтың, И.Есенберлиннің, Д.Досжановтың, Қ.Жұмаділовтің романдары мен Т.Ахтановтың, Қ.Бекхожиннің, С.Сыматаевтың, Ә.Кекілбаевтың драмалық шығармалары себепкер болды. Демек, лексикалық қазынаның толыға түсіне экстралингвистикалық факторлардың үлкен мәні бар екені байқалды (мысалдарды, яғни фактілерді алдыңғы тараулардан оқып көруге болады).

Көркем әдебиет сөздік құрамға әдеби нормадан шет тұра-тын қарапайым сөз, жергілікті сөз сияқты элементтерді тек қана белгілі бір стильдік мақсатпен енгізетіндігін және мұны қазіргі белгілі жазушылар саналы түрде, шеберлікпен жүргізіп отырғандығын баса айтуда болады. Мұны тарихи шығармалардағы көне қару-жарапқ, киім-кешек, әскери зат, ұғым, қимыл атаулары, яғни алдыңғы тарауларда Ә.Кекілбаевтың, М.Мағауиннің, Т.Ахтановтың романдары мен драмалық шығармаларынан келтірген фактілер дәлелдейді. Сол сияқты бір-катаң қарапайым сөздердің автордың тілінде (баяндауында) қолданылуы да белгілі бір стильдік жүк арқалап тұрса, олар – әдеби нормадан ауытқу болып табылмайды. Мысалы, жазу-

шы Марат Қабанбаев «Бақбақ басы толған күн» деген шағын әңгімесін баланың көзімен ұсынады, сондықтан мұнда кейбір жеке сөздердің, теңеулердің, суреттеулердің баланың аузызекі сөйлеуінде болатын қарапайым, кейде тіпті тұрпайлау вариантыры қолданылған. Мысалы, бұл баяндауда автор – бала – кейіпкер қосылып кетеді, сол себептен автордың баяндау тілінде «адамдар ыстық күн астында *тоңқаңдал* шөмелесала-ды», «дәрігер бостан-босқа *сарнайды*» («денсаулық жайында әңгіме еткізеді» дегені), «еттің тұрамшалары *жүдеду*» («тым кішкентай, аузың толмайды» дегені баланың), «шешесі басына еріксіз байлап жіберген орамал *оңбаган...*», «Оқас шалқасынан *тыраң құлайды*», «класты қыздар *өріп жүреді*» («көп»), «бала мықтап *есінеп тастайды*». Бұларда көрсетілген қарапайым немесе мағыналары сай болмай қолданылған сөздер (мысалы, орамал оңбаган бола алмайды, есінеу тастап жіберілмейді), сырт қарағанда, яғни осы әңгіменің кімнің көзімен, танымымен, ойымен беріліп отырғаны ескерілмесе, әдеби нормага қайши элементтер болып көріну мүмкін. Бірақ дәл осы шығармада олардың қолданысы – уәжді. Мұндай қолданыстарды тіл білімінде «уәжді ауытқулар» деп атайды.

Тағы бір мысал келтірсек. Жазушы Дулат Исабековтің бір пьесасының аты – «Әпке». Бұл – бірге туған балалардың кішілерінен үлкен қызы бала (орысша – «старшая сестра») де-ген мағынада қолданылған атау. Әпке- диалектизм, әдеби варианты – *ана*, мұны *апалы-сіңлілі*, *апалы-жезделі*, *ана-жездесі*, *ана-інісі* деген оппозиттер арқылы дәлелдеуге болады. Бірақ бұл сөз – қазақтың сөйлеу тілінде әр өлкеде әртүрлі қызметте (мағынада) жұмсалатын тұлға: Қазақстанның көп жерлерінде *ана* – баланың шешесі, тіпті әжесі, бұл өнірлерде әдеби нормадағы *ана* дегеннің әпке варианты бар. Жазушы осы варианты таңдаған, өйткені Қазақстанның барлық өнірінде қойылатын бұл пьесаның атын «Апа» деп қойса, әңгіме кім туралы, бірге туған баланың жасы үлкені ме әлде ол баланың (не балалардың) анасы ма, әжесі ме – бірден түсініксіз болар еді. Міне, осы қолданысты да әдеби нормадан уәжді ауытқу деу керек. Ілгеріде жазылған бір мақаламызда зуза деген жергілікті сөзді дұрыс қолданып, оны әдеби тілге енгізу

мүмкіндігі бар тұлға деп таптық. Бұл – «өлікті қабір басына алып баратын зембіл» дегенді білдіретін диалектизм, ал *табыт* – өлікпен бірге көмілетін орысша «гроб» дегеннің баламасы, зембіл – кәдімгі «носилки».

Бірақ ауызекі сөйлеу тілінен ауысып, әдеби тілге еніп, нормага айналып жатқан сөздердің болу фактісін пайдаланып, *ege* (ие), *бостекі* (бос), *нәжүүе* (жүйесіз), *акырамаш* (акырғы), *ұқшасатын* (ұқсайтын), *құсан* (ұқсан), *кермеқар* (кеңеғар), *ауыш* (аудыс), *еме-жемге келгенде* (жеме-жемге келгенде) деген сөздерді автордың өз тілінде бір емес, бірнеше рет және ешбір стильдік мақсат көзделмей, жақша ішіндегі әдеби вариантының орнына текten-тек («аузына түскендіктен», «ауылы солай айттындықтан») қолдана беру – лексикалық та, стилистикалық та нормадан уәжісіз, жөнсіз, себепсіз ауытқу болады.

Көркем мәтіндегі әдеби нормадан уәжісіз ауытқу жөніндегі пікірлерімізді толық жалғастыра түсү үшін бұрын жазылған кейір талдауларымызды қайталап келтірелік.

Уәжісіз (жөнсіз) ауытқуларды да екі тұстан қарастыру керек: бірі – жалпы әдеби тіл нормасына қайшы келетін қолданыстар, екіншісі – көркем әдеби тіл нормасын бұзатын қолданыстар.

Лексикалық қолданыстарда жалпы әдеби тіл нормасына сай келмейтін ауытқулар, біздіңше, мынадай сәттерде байқалады:

Сөзді өз орнында жұмсамау. Бұл көбінесе сөздің дербес лексикалық мағынасын дұрыс түсінбеуден туады. Мысалы, жазушы Т.Шадықұловтан бірнеше фактін келтіруге бола-ды: «...Қазынаның елу мын ақшасын аман-сау қауыштырды» («Соңғы тілек», 1985) деген сөйлемде қауыштырды етістігінің мағынасын автор дұрыс білмеген. Қауышу іс-әрекеті адамдарға байланысты айтылады, сондықтан қазынаға түгел қайтып оралған ақша қазынамен қауыштайты, қайтарылады, толтырылады, орнына салынады. Сол сияқты: «Ауылдағы екі көтерем шал әрі жұбатты, бері жұбатты» (Сонда) деген сөйлемде көтерем сөзі өз орнында емес: бұл сөз малға қатысты айтылады, адам көтерем болмайды, жүдеде, арық болады.

Бірқатар жазушылар кейір көне сөздер мен сирек қолданылатын сөздердің немесе этнографизмдердің мағынасын жете түсінбей, орынсыз жұмсайды. Мысалы, алдыңғы та-

рауларда *сүрқылтай* деген көне сөзді бірқатар қалам иелері жансақ жұмсағанын көрсеттік.

Сөз мағынасы түсініксізденіп, көпшілікке нақты белгісіз болғандықтан, әр жазушы өзінше топшыладап, өз түсінігінше, біреуі – зат есім, екіншісі – сын есім т.т. ретінде құбылтып, әртүрлі мағынада жұмсауы, әрине, нормалылыққа қайшы ке-леді: біріншіден, текстің түсініктілігіне нұқсан келтіреді, екін-шіден, сөздің, әсіресе көне, сирек сөздердің тұрақты мағынада қалуына кедергі келтіреді. Көне, сирек сөздер көбінесе образ жасауға жұмсалатындықтан, олардың белгілі бір мағынада орнығуы өте қажет, өйткені көркем әдебиетте ұлттық образдар әлемін бұзы – көркемсөз нормасын бұзы болып табылады.

Тек көне, сирек сөздер емес, кейбір дағдылы сөздердің де лексикалық мағынасын түсінбей қолдану – қазіргі қазақ проза-сында орын алғып келеді деуге болады. Мысалы, *жалғызлікті* сөзі – «тұрмыста қолғабыс ететін, қарайлласар ешкімі жоқ» адамға қарата айтылатын сөз, сондықтан жазушы жалғыз бала-ны өсірген адам туралы: «Бәрінен де *шиеттей* баланы даラға тастамай өсіріп адам қылғанын айтсайшы!» (Қ.Жұмаділов) деп қолданғанда, автор *шиеттей* сөзінің мағынасын тап баспаған: ол көп бала жайында сөз болғанда айтылуы керек, жалғыз бала шиеттей бола алмайды, өйткені *шиеттей* сөзі «көп, то-лып жатқан» деген ұғымды береді. Тағы бір жазушы: «Жігіт жігерлене жұтынды» (Шадықұлов) деп жазады. Мұндагы *жі-герлене* сөзі жұтынудың амалын бере алмайды, адам *жігерлене сөйлеуі, жігерлене іске кірсіүі* мүмкін, ал жұтыну үшін жігердің қажеті жоқ. «Үлкен кісі қанат жая (?) жарқылдап қарсы алды» (Шадықұлов), «Қызметші екі-үш жігіт қайта *жосқындаі* (?) кірді» (Д.Досжанов) деген сөйлемдердегі сұрақ қойылған сөздердің де мағынасын жазушы жақсы түсініп қолданған деу киын. Келтірілген мысалдар көрсеткендей, қазіргі қазақ прозасында әсіресе сипаттамалық қызметтегі сын есімдер мен үстеулердің мағынасын шатастыру жиірек кездесетін байқалады.

Әдеби тіл нормасынан ауытқудың ерекше, яғни уәжді деп те, уәжісіз деп те тануға болатын және бір түрі бар. Жазушы әлдебір себеппен (мотивпен) тұрақты тіркестердің немесе

мақал-мәтелдердің құрамындағы сөздерді өзгертіп пайдалануы мүмкін. Бұл амалға апаратын себептер әртүрлі. Бірі – дыбыстар үнділігін (әуезділігін) көздеу, яғни аллитерациялы, ассонансты құрылым түзу. Осы себептен болу керек, О.Бекеев «тасы *tauea* домалаған жігіттің Құдаймен жұмысы қанша?» деген сөйлем ұсынады. Фразаның қалыпты түрі – «тасы *өрге* домалаған» болуы керек. Мұнда жазушы **т - т - д** (*тасы-тауга-домалаған*) дыбыстарынан басталатын аллитерациялық қатар түзу үшін *өрге* сөзін *тауга* деген мағынасы жуық сөзben алмастырған.

Халық тілінде, оның әдеби түрінде қалыптастан тіркес-тер сөздердің өзара іштей семантикалық жымдасуы арқылы немесе аллитерациялық-ассонанстық әуезділік жолымен, я болмаса ғасырлар бойы солайша қалыптастан дағдысымен тұрақты болып келеді. Сондықтан олардың құрамын себепсіз өзгерту әрдайым орынды да, сәтті де бола бермейді. Мысалы, *өтірікті судай сапырып* деген тіркестегі соңғы екі сөз аллите-рация үдерісінен шығып тұр, оның үстіне *судай сапыру* деген образ өзінің берекесіз іс-әрекетті білдіретін мәнімен экспрес-сивтік өн алып тұр: өзі өтірік болса, сол өтірікті онды-солды араластырып, үстемелеп көпке жаяр болса және суды қаншама сапырганмен, берекелі еш нәрсе шықпайтыны сияқты, өтірікті де қанша құбылтып, араластырып, үстемелегенмен, берекесіз әрекет болып шығатынын дәл әрі әсерлі етіп білдіру үшін тек осы *өтірікті судай сапыру* деген тұрақты тіркес қолайлы. Де-мек, мұны өтірікті *судай араластырып* деп берген (өзгерткен) жазушы еш нәрсе ұтып тұрган жоқ. Осы қатарға *тұн кескінінде* (баласында деудің орнына), *жсаны ауырды* (*ашыды* деудің орнына), *асықша ширатылды* (*үйірлі* деудің орнына – мысалдар Θ.Ахметовтен), менің *қөңілім қайысты* (*қалды* немесе *қайтты* деудің орнына), *жүргегімді шымырқанты* (*тербеді* деудің орнына – Т.Тілеуханов), *етті-жесенді толық адам* (дұрысы: *ет-жесенді* болуы керек), *іші еріді* (*жылды* деудің орнына), *төсек жсанартты* (*жсанғыртты* болса керек – М.Ысқақбаев) т.б. мысалдарды қосып кебейте беруге де болар еді. Бұл жерде мақсатымыз – жеке бір жазушылардың қателіктерін көрсету емес, нормадан осындай сипатта ауыткушылықтардың бар екенін айтуду.

Екінші – кейбір мақал-мәтелдерде сақталған дөрекі естілетін қарапайым сөздерді «әдептілеу, әдемілеу» вариантымен ал-мастырып қолдану қазір дәстүрге айналып барады. Мысалы, «иттің бояғы дәрі болса, дарияға тышады» деген мақалда екі дөрекі сөз бар, халық тілінде бұлар осы мақалда айтылмақ сентенцияны мейлінше өткір етіп жеткізу үшін келтірілген, ал осыны жазушы «иттің тезегі дәрі болса, дарияға көмеді» деп береді (Қ.Ысқақов «Кара орман»). Сол сияқты «аузында тиек, артында орнық болсашы» дегендеге де артында сөзі өзге дөрекілеу сөзді ауыстырып тұр; «жылап ішіп, шыңғырып қыр астына жугірген» дегендеге соңғы сөздер išit-ке үйқасатын, дөрекі тышып сөзінің «кезекшісі» болып тұр. Мұндай ауыстырулардың ішінде сәтсіз шығатындары да аз емес. Мысалы, бөрінің көмекейінше шулап деген қолданыс сәтті емес, мұнда автор бөрінің көтініше дегендегі сыпайыламақ болып «әдепсіз» сөзге дұрыс эквивалент таба алмаған. Сол сияқты «шілдің балапанынша (?) тоз- тоз болып шашыраған бірдене» (Қ.Ысқақов) деген сыпайылық та сәтсіз: шілдің балапаны ша-шырамайды, боғы шашыраса – бір жөн.

Мұндай әр алуан мақсатпен сөз құрамы өзгертулған фразеологизмдер мен мақал-мәтелдерді стильдік не өзге себептерсіз қолдану – жөнсіз (мотивсіз) ауытқу болмак. Қазіргі қазақ прозасында бұл да – көзге түсерлік дәрежеде етек алып бара жатқан жағымсыз құбылыс. Мысалы, жсанын шытқа түйген (Т.Жұртбаев), дұрысы – жсанын шуберекке тую, ал ол шүберек шыт па, жібек пе – әнгіме онда емес, әйтеуір түйіп алуда, ягни жсанын шуберекке тую – образ. Сондай-ақ көлеңкесінен қалтыраган (қорықсан болса керек), қылтасы қалтырап (*тізе-сі* қалтырап деудің орнына), жүрекке су құю деген образды қазақ айтпаса керек), біреу кыз алып қашса, біреу босқа (қызығына болу ке-рек) қашады (Қ.Жұмаділов), мұрттарын балта кесер ме (бал-та шабар ма деудің орнына), аузынан азу тісі аршилганиша (түскение болса керек, егер аршилу етістігі қолданылса, аузынан емес, аузы болуы керек, өйткені аршилатын – азу тіс емес, ауыз ғой, демек, бұл қолданыста бір ауытқу, бір грамматикалық қате бар), елмен (көппен болуы керек) көрген – ұлы той, абырайын айрандай ақтарып алған (Қажыбаев) (төгіп болса

керек: *ақтару* – саналы түрде істелетін нәтижелі іс, ал *төгү* – абайсызда болатын шығынды іс, демек, бұл етістік атауалары бірін-бірі алмастыра алмайды), *жібек шыттай үлбіреу* (жібектей немесе жібек матадай болса керек, өйткені *шыт* – мақта матаңың атауы, бір мата әрі *жібек*, әрі *шыт* деп атамайды гой), менің *қөңілім қайысты* – қабырга қайысады, ал *қөңіл қалады, жабырқайды*) т.т. Осылардың барлығы тұрақты құрылымдарды уәжіз құбылту болып шығады. Бұлар – норма-дан жөнсіз ауытқулар.

Мақал-мәтелдердің құрамындағы сөздерді себепсіз өзгерту тіпті жирик кездеседі. Мысалы, «жерден жеті *теңге*» (халық қоян деп айтады) тапқандай; қызыштай *қорғап* (*қорып* болуы керек); «*күңірдақ* (дұрысы: *ет*) тәттілігін қойса, мен ұрлығымды қояр ем»; «*бір аязын еki етікке тығын*» (С.Досанов); «алақанындағы *аялысы*» (*аяулысы* болар? – Тілеуханов); «*хабарына кіріп шықтайды*» (*қаперіне* болар? – Қ.Исабаев). Жазушының (Т.Жұртбаев) *Ерегіскен ел болмас* деп келтірген мәтелі – сірә, Махамбет ақынның атақты *Егескен жау ел болмас* деген өлең жолының қайталанған варианты бо-лар. Жазушы егер бұл әдемі сентенцияны орайы келіп тұрғанда қолданғысы келген болса, сөздерін бұзбай алуы қажет еді, өйткені *егесу* етістігінің де, *егегісу* сөзіндегі сияқты «*аразда-су*», «*жанжалдасу, дауласу*» семантикасы болғанмен, бұл сен-тенция осы бір бейтаныстау, бірақ тілде бар тұлғаның (*егесу* сөзінің) қатысуымен әсерлі болып түр.

Сөздерді өз орнында жұмсамау этнографиялық ұғымдарға байланысты қалыптасқан қолданыстарды (сөз тіркестерін, құрделі етістіктерді, мақал-мәтелдерді т.б.) бұзып, олардың құрамын өзгертіп, компоненттерін мағыналас синонимдер-мен ауыстырып атауда көзге түседі. Мысалы, *құйрық-бауыр жеу* – этнографиялық рәсім атауы, ол құда түскендерге келісім беру рәсімі, сондықтан бұл тіркес көбінесе *құда бо-лып, құйрық-бауыр жесті* түрінде қолданылады. Осы құрделі этнографизмді *құйрық-бауыр асасын тараасты* деп өзгертіп қолданғанда (У.Қалижанов) оны рәсім атауы ретінде емес, жайғана тағам жеу, қонақ болу мағынасында деп түсіну керек бо-лады. Сол сияқты бел сөзі *бел баласы, бел құда* тіркестерінде келіп, біріншіде «*әкесінің өз баласы, туған баласы*» ұғымын

береді, ал бел құдалар деген этнографиялық атау – тумай жа-тып ұл-қыздарын атастырган адамдардың атауы. Сондықтан *нагашыммен бел құрдастыз* деген сөйлемде бел сөзі орынсыз жүмсалған.

Казіргі қазак әдебиеті тілінде сипаттама сын есімдердің ішінде де өте сирек қолданылатын не жергілікті, не көне, не жасанды тұлғалары жиірек көріне бастады. Мысалы, Д.Досжановта: «*жұлмыт жігіттер*», «*жұлмыт елші*», «*мұғдарлы күй*», «*мұғдарлы әсер*», «*марайма мінез*»; О.Бекеевте: «*мантырақ ой*», «*тымсақ адам*», «*қойторы тірлік*», «*қоймырем адам*», «*жөн куаныш*»; Т.Әлімқұловта: «*мондыбас біреу*», «*сарам-жасал қызы*»; С.Бердікуловта: «*тотанақ мезгіл*» т.б. сияқты анықтауыш сөздер кездеседі. Мұндай сөздердің бірқатарын бірнеше жазушы бірдей қолданып, тұрақтандыра бастағандары да байқалады. Мысалы, 20-40-жылдардағы қазак прозасы тілінде көп ұшыраспайтын *можантопай* (қыздар), *ұлы жіңіріп* (той), *мамырстан* (заман), *төрткүл* (дүние), *құйын-перен* (спорты) сияқты сөздер О.Бекеев, Ә.Кекілбаев, С.Жұнисов, С.Бердіқұлов т.б. жазушыларда жиі кездеседі. Бұл сөздердің әдеби тілде әлі берік орын теуіп лексикалық нормаға еніп болмағандығын олардың әртүрлі жазылып, кейде тіпті әртүрлі мағынада қолданылып жүргендігі танытады. Мысалы: *можантопай / мөжсен топай / мөж топай; ұлы жіңіріп / ұлы жәңіріп; құйын-перен / құйын-перін* деген орфографиялық дублеттер түрінде ұшырасады. Бұлардың *мамырстан*, *төрткіл* сияқты бірен-сараны болмаса, көпшілігі не жергілікті сөйлеу тілінде қолданылатын, не көнеріп, ұмыт болған ежелгі сөздер болып келеді. Қалам иелерінің бұл сияқты сипаттама сөздерді қолдануы – тіпті кейбіреулерін активтендіруі – принципінде құптарлық іс. Өйткені бұларды іздеттіріп, жұмсаттырып отырған себеп, уәж бар, ол – бір нәрсені сипаттаудың ең дәл әсерлі атауын табу. Бірақ әңгіме – осындай сөздердің түсініктілігін қамтамасыз ете білуде. Көркем әдебиет дүниесіне қойылатын шарттардың бірі – тілінің қалың оқырманға түсінікті болуы, автордың айтпақ ойының оқырманға қындықсыз әрі әсерлі түрде жеткізілуі. Сондықтан мағынасы қалың көпшілікке бейтанастыстау немесе мұлде түсініксіз тұлғаларды белгілі бір зәрулікпен қолданған күнде, олардың окушыға жетуін ойласты-

ру керек. Бұлардың семантикасын жалпы контекстен шығатын етіп бере ме, өзге синонимдерін қатар келтіріп ұсна ма, бет сонында сілтемеде түсіндіріп бере ме – қысқасы, әр алудан жол-ды пайдалану – жазушының өз шаруасы. Осы жағдайда ғана бейтаныс сипаттама сөздердің қолданысын уәжді деп тануға болады.

Нормадан жөнімен немесе жөнісіз ауытқу қарапайым сөздердің қолданысында да байқалады. Қарапайым сөздер – ауыз-екі тілдік категория, олар әдеби тілден тыскары тұратын дұниеліктер екені мәлім. Қарапайым сөздердің әдетте әдеби тілдік эквиваленті болады. Жазба стильдердің ішінде қарапайым сөздердің молынан пайдаланылатын орны – көркем әдебиет тілі. Оның ішінде әсіресе драмалық шығармалар мен көркем прозада қарапайым элементтер кейіпкерлер тілінде де, автордың өз баяндауында да еркінірек жұмысалады. Кейіпкерлер тілінде келуі – сол кейіпкерлердің образын жасау үшін қажет болса, автор сөзінде келуі белгілі бір стильдік мақсатты етеу үшін қажет.

Халықтың ауызекі сөйлеу тіліндегі қарапайым сөздердің экспрессиясы күшті болып келеді. Сондықтан олар, ең ал-дымен, өмірде қолданылатын сәттерінде кейіпкерлер тілінде бұлжытпай беріледі. Мысалы, С.Жұнісов кейіпкерін: «Әкесінің бар малын *куди-суди ғып...* (шашып болды)» деп сөйлеткенде, осындағы орыс тілінен алынған *кудисуди* (*куда-сюда* дегеннен) тұлғасы ауызекі тілде «малды қалай болса солай бейбереркет шашу» ұғымын беруде ең бір әсерлі сөз болып танылады. Сол сияқты F.Мұсіреповке жиен Сейіттің аузына: «*Тырқиоыңа болайын!*» деген сөздерді салғанда да ауызекі тілдің осы табиғатын сақтап, экспрессивтілігін көздеген.

Осы ретте *бозымбай* («Бұл неғып тап осынша *бозымбай* болды екен? – Ә.Кекілбаев), *келгінбай* («Тетеден қосылған келгінбайлар» – С.Жұнісов), *оттаубай* («Оспанның шығарып жүрген *оттаубайы*» – О.Бекеев) сияқты адамды мінездей атايтын дәрекілеу сөздер мен *помыштату* («Мұны да мұжықтармен бірігіп, *помыштап* көтердік, қазакта да ұдықтасу деген болушы еді ғой» – С.Жұнісов), *тырапай асу* («баяғыда *тырапай асар* еді»), *сумақайлану* («Бір көрген қызыға қырындалап, *сумақайланы*»)

беру – қадетіне жат»), қотиын («Біз оның қотиын қылышына өкпелеген жоқпызы»), аңқиттау («суырша аңқиттап...» – соңғы сөздердің бәрі де О.Бекеев шығармаларында), құйтакандай («құйтакандай арманы боушы еді» – Д.Досжанов) сияқты қарапайым сөздердің кейіпкерлер тілінде де, авторлық баянда-уларда да орынды, белгілі бір стильдік жүкпен қолданылғанын көрсетуге болады.

Ал аңқиттама, ботырама, аталақтама, оттама, не мантырап отырысың сияқты адамның мінез-қылышына қатысты халық тіліндегі «уытты» сөздер кейіпкерлер аузына орынды салынған.

Қазіргі көркем әдебиетте кейбір қарапайым сөздерді актив-тендіру нышаны байқалады. Мысалы, толайым сөзін лексикологтар әдетте қарапайым элемент қатарында санайды. Бұл тұлға М.Әуезов тілінде де бар, бірақ оны автор көбінесе кейіпкерлердің диалогтерінде көлтіреді: «Байсал:

– Сокпа! Сырттың соқпасы ма? Ішті жеген жегінің соқпасы ма? Эйтеуір келді ғой толайым » («Абай жолы», I). Ал О.Бекеев сияқты кейінгі жазушылар бұл сөзді өз тілінде де, кейіпкерлер диалогтерінде де жирик жұмысайды: «Дүние толайымы аппақ нұрға бөленді» («Өз отынды өшірме»); Мамырлап басатын саржағал бәйбіше... толайым баланы... («Мұзтау»). Бұл тұлға арагідік өзге авторларда да қолданыла бастады. Осы заман саудасында орын алған «оптовая торговля» дегенді толайым сауда немесе толайым сату деп бере бастағанын да көреміз. Пойым сөзі де – тұр, бейне сөздерінің қарапайым эквиваленті. Бұл сөзді де әдеби айналымға түсіру әрекеті жоқ емес. Мыса-лы, О.Бекеевте: «Тек пошымы ғана сүлделенеді», «Алтайдың алып пошымы көріністене бастады...», «Үңілген пошымын танытады» т.б. әдетте ауызекі сөйлеу дағдысына тән болып саналатын жыны келді, ит жыны келді, жынына тиді деген сөздерді де автор тілінде жиі көлтіріп, әдеби нормага айналды-ру ниеті бұдан да құштірек сезіледі. Соңғы сөздер осы күнгі орта және жас буын прозаиктердің бірқатарында жиі кездеседі деуге болады және олар ешқандай стильдік жук арқаламайды.

Тегінде, автор тілінде қарапайым элементтер экспрессия үдесінен шыққанда ғана жұмсалуға тиіс. Мысалы, Т.Ахтанов

тырқылдақ катер деп анықтағыш сөздің қарапайым вариантын (*тырқылдақ*) алғанда, катердің «оңып тұрмадағыны» мейлінше әсерлі етіп көрсететін тек қана осы сөз болғандығына қызықкан. Ал мұндай мақсат болмаса, қарапайым сөздерді автор баяндаудында талғаусыз қолдану – әдеби нормадан жөнсіз ауытқу боллады. Сондықтан қазіргі қазақ прозасы тілінде әйтеүір халық аузында барын желеу етіп, кейбір қарапайым сөздерді көркем дүние тіліне тықпалау, сол арқылы жарыспалы қатарлар то-бын мұктажсыз көбейту – құптарлық әрекет емес. Айталақ,

ақырамаши, ілә, мұттәйім, тәмпішке сөздерін олардың әдеби сыңарлары бар тұрғанда және оларға ешқандай стильдік жүк артылмай қолданылғанда, жазушы не үтпак?

Сейтіп, қазіргі қазақ көркем әдебиеті тіліндегі сөзқолданыс проблемасын жалпы әдеби тіл нормасынан да, көркем әдебиеттің ұлттық нормалары тұрғысынан да қарастырганда, мәселе әдеби стандарт (қалып) және сол қалыптан жөнді-жөнсіз ауытқушылық деп қойылады да сөз тандау проблема-сына барып тіреледі.

Сөз белгілі стильдік үн (бояу) алғанда, өзінің номинативтік мағынасынан, қалыпты қызметінен ауытқып қолданылуы – занұды. Сондықтан жалпы әдеби тілдің лексикалық нормасына сәйкеспейтін қолданыстардың барлығы бейнормалық құбылыс болып табылмайды. Стильдік мақсатпен келген ауытқулар көркем әдебиет тілінің нормасына сай келеді. Осы себептен көркем әдебиеттің лексикасын норма тұрғысынан зерттеу-де ауытқудың жөнімен-жөнсіз (уәжді-уәжісіз) тұрлерін айыра білу – басты шарт. Жөнсіз ауытқу жалпы әдеби тіл талабы тұрғысынан да, көркем тіл занұлықтары тұрғысынан да болуы мүмкін. Әсіресе, көркем тіл нормасына қайшы қолданыстың баршасы дерлік уәжісіз ауытқу болып шығады.

Жазушы жеке сөздің лексикалық (номинатив) мағынасын дұрыс түсінбей, орынсыз (өз орнын таптай) қолданса, тұрақты тіркестердің, мақал-мәтелдердің компоненттерін ешбір стиль-дік мақсат көзdemей өзгертіп жіберсе, әдеби тілдің сыртында тұратын диалектизм, жаргонизм, қарапайым сөз, жасанды сөз сияқтыларды ешбір зәруліксіз жұмысаса, бұлар жалпы ұлттық әдеби тіл нормасынан жөнсіз ауытқу болмақ.

Нормадан тыскары тұратын элементтердің уәжді қолданыстарының ішінде бірер рет, бірер автордаған емес кезде-

сетіндері де, сол қызметте сол уәжділікпен сан рет қайталаңып жұмсалғандары да болады және соңғылары бір жазушыдан емес, бірнешеуінен табылады, демек, көне, сирек, жергілікті болып табылатын бұл сөздерді әдеби тілге әкелу әрекеті бар деп тану керек, яғни бір жазушыда сәтті, орынды шыққан көпшілікке әзірге бейтаныстай сөзді не сөздерді өзге жазу-шылар да қош көріп, қабылдағаны деп білеміз. Мысалы, осы қатардан қазіргі күнде бірнеше автордың көркем туындылары тілінен табылатын *құянпұрыс*, *можсан-топай*, *төрткіл дүние*, *құсу* (безу), *лақса* (әбден қартайған, көбінесе мал, ит-құсқа қараты айтылады: лақса төбет, лақса бие) сияқты сөздер – көркем әдебиет арқылы бірте-бірте әдеби тілге ене бастаған бірліктер деуге болады.

Жазушы әдетеобраз іздейді, өйткені көркем әдебиет бір нәрсені, затты, құбылысты баяндамайды, суреттейді. Сурет-теу үшін оқырманға әсер ететін бейнелі сөздер керек. Ондай бірліктер, яғни экспрессивтік бояуы бар сөздер диалектизмдерден, көне, сирек сөздерден, тіпті тосын жана тұлғалардан табылады. Әсіресе мұндай сөздер сын есім, үстеу, етістіктер болып келеді. Бұл – тіл-тілдің баршасына ортақ зандалық. Қазақтың мықты жазушылары мен ақындары, драматургтері бұл зандалықты мұлт жібермейді. Бірақ бұл жерде әңгіме – бейнелі сөздерді тауып, құр қолдана салуда емес, орнымен, дұрыс қолдана білуде. Жазушының бейнорматив сөзді дәл сол жерде (контексте) неге қолданып отырғаны мейлінше занды, дәлелді болуға тиіс және әңгіме желісінен, мазмұнынан, алды-артындағы сөздерден, яғни контекстен сол сөздің түсініктілігі, қажеттілігі байқалатын болуы керек. Алдыңғы тарауларда келтіргеніміздей, Мұхтар Әуезовтің *жошын*, О.Бекеевтің

мантырап отыру, Д.Досжановтың *кермалдасу*, Т.Әлімқұловтың *сейдін* деп қолданған варианты – осындау уәжді қолданыстар. Қысқасы, бүгінгі қазақ көркем сөзінде мұндай уәжді-уәжсіз қолданыстарды тіл мамандары да, оның ішінде біз де, жазушы-журналистердің өздері де, әдебиеттанушы ғалымдар да жақсы байқап, сан рет әңгіме өзегі етіп келеді. Біздің бұл кітаптағы мақсатымыз – көркем әдебиет стиліндегі байқалған тілдік және стильдік жетістік-кемістіктерді түстеп, түгендеп беру емес, әдеби тіліміздің лексикалық нормасының жазба әдебиеттің осы саласында жай-құйін көрсету.

ГРАММАТИКАЛЫҚ НОРМАЛАНУ

Қазақ тілінің грамматика саласындағы құрылымдық заңдылықтары біздің кезеңімізден көп бұрын қалыптасып, едәуір нормага түскен болатын. Сөздердің септелу, жіктелу, тәуелдену парадигмалары әбден қалыптасып, параллель (вариант) қатарларының қолданылып келеді. Етістіктің етіс категориясы, сын есімнің шырай түрлері де бір тұлғада көрініс тапты.

Қазіргі әдеби тілімізге осы нормаларды жік-жікке таратып, хатқа түсіру (фиксация) үлесі тиді. Қай-қай тілдің де грамматикалық заңдылықтары лексикасына қарағанда, әлдеқайда тұрақты болатындығын зерттеушілер айтып келеді. Грамматика саласындағы нормалану процесінің айқынырақ көрінетін тұсы – синтаксистік құрылымында. Бұған, бір жағынан, жазба тілдің стандарттыққа бейімделе түсуі себеп болса, екіншіден, функционалдық стильдердің бір-бірінен ара-жігін аша түсіп, белгілерінің орныға беруі әсер етті.

Дегенмен соңғы XX ғасырдың барысында, әсіресе оның екінші жартысында қазақ жазба әдеби тілінің морфологиясы мен синтаксисінде нормаланудың динамикасын көрсететін фактілер жоқ емес. Бұл қозғалыс тілдің өзіндік даму нәтижесінде болатын эволюциялық та, сыртқы күштердің әсерімен болатын экстралингвистикалық та сипатта жүрді.

Қазақ тілінің өзінің ішкі даму заңдылығы бойынша, кейбір морфологиялық көрсеткіштердің тұлғалық жағынан ықшамдалу процесі бел алғаны байқалады. Ауызекі сөйлеу тілі мен көркем әдебиет стилінен басқаларында **-тын < -тұғын < тұрған; -ғасын < -ған соң < -ғанин соң**; **да < дағы; мен < менен** қатарларының ең алдыңғы көрсетілген ықшам вариантыны норма ретінде қалыптасты, бұлардың публицистика, реєсми-іс қағаздары үлгілерінде вариантызың жұмсалуы берік орын тепті. Тек жазба үлгілерде көркем әдебиетте, әсіресе оның поэзия жанрында **-тұғын, -ған соң, -ғанин соң, -менен** деген толық түрлері қолданыла береді. Көркем әдебиет стилі ушін бұлар да – норматив тұлғалар. Бұлардың қолданылатын орындары жай-ында «Варианттар» деген тарауда кенірек айтылды.

Жалғаулық шылаулардыңактив қолданылуы да – соңғы XX ғасырдың жемісі. Ауызекі сөйлеу тілінде жалғаулық шылаулардың қолданылуы сараң. Оның классикалық үлгілерін мақал-мәтелдерден, қарапайым сөздерден табамыз. Мысалы, *Үйде батыр – жауда жоқ, үйде шешен – дауда жоқ* деген мәтелде *бірақ* шылауы сұранып тұрады. Мақал-мәтелдердегі жалғаулық шылаулардың болмауы, ең алдымен, мақал, мәтел, қанатты сөз сияқты құрылымдардың мейлінше ықшам болу табиғаты-нан (нормасынан) туындал тұрса, екіншіден, бұлардың синтак-систік құрылымы сөйлеу тілі зандаулықтарына бағынды-рылатыны мәлім. Осы зандаулық жазба әдеби тілдің алдыңғы кезендеріне де тән болады. Ал қазіргі кезенде функционалдық стильдердің қай-қайсысында да *бірақ, ал, сондықтан, алайда, өйткені, да* сияқты жалғаулықтардың қолданылуы – норма та-лабы. әсіресе публицистикалық, ғылыми, ресми-іс қағаздары стильдерінде жалғаулық шылаулардың келуі – міндетті.

Бұл саладағы нормаланудың екінші түрі – жалғаулықтардың, оның ішінде демеуліктердің де көп вариантты болып келген-дігіне қатысты. Қарсылықты білдіретін *бірақ* шылауының *сон-да да, сөйтсе де, алайда, дегенмен* деген қатарлары, сондай-ақ соңғы жылдарда ауызекі сөйлеу тілінен алынған *дей тұрганмен* және ортаазиялық әдеби тіл дәстүрінен келген *ләкин, уа ләкин* варианттары бар. Мұның контекстік ыңғайына қарай *ал, ал бірақ* сияқты қатары да қолданылады. Бұл күнде *да* варианты – норма, оның *дагы* варианты тек көркем стильде орын ала-ды. *Туралы* деген демеулік шылаудың осы тұлғада нормалануы – тіпті соңғы кезеңнің жемісі. Мұның *турасында, жайында, жайлы, жөнінде, хақында, хұсасында* варианттары да жаз-ба тілімізде орын алып келеді, дегенмен *туралы* варианты – әсіресе ресми-іс қағаздарында негізгі нормативтік қолданыс. *Туралы* шылауының *хақында, хұсасында* варианттары тіп-ті сирек қолданылатын пассив элементке айналды. *Өйткені* шылауының *себебі* вариантының қолданылуы солғындау, *сондықтан* шылауының *сол себептен, солай болғандықтан* тәрізді аналитикалық (тіркеспен келген) варианттары да – контекстік орын тандап қана қолданылатындар, ал *сондықтан* тұлғасы – нормативтік деп ұсынылып жүр. *Және жалғаулығы*

да – көп варианты. Кітаби тілдік *уа*, һәм қатарлары қазақ жазба тілінде сирек қолданылады, қолданылған күнде де публицистика мен көркем әдебиетте стильдік мақсатпен келуі мүмкін.

Кейбір демеулік шылаулардың өзіне қатысты сөзбен меңгерілу амалында да нормалану процесі байқалады. Мысалы, күні кешеге дейінгі жазбаларда *менің туралы*, *менің үшін*, *соның үшін* сияқты ілік жалғаулы сөзді меңгеріп тұрса, бұл күнде *мен туралы*, *мен үшін*, *сол үшін* деген жалғаусыз (немесе атау тұлғалы) сөзбен жүмсалуы нормага айналды.

Жазба әдеби тіліміздің ілгергі кезеңдерінде откен шақ есімшениң оғұздық **-мыш** жүрнағымен берілуі жирик ұшырасатын, осы дағды XX ғасырдың басында-ақ тежеліп, есімшениң қазактық (қыпшақтық) **-ған** жүрнағымен келуі норма болды. Соңғы 30-40 жыл ішінде **-мыш** көрсеткішін қайтадан жандандыру әрекеті байқалды: *аталмыши* оқиға, бірақ бұл тек *айтылмыши*, *аталмыши* деген сөздермен ғана және ол есімше тұлғаларының анықтауыштық қызметте келген сәтімен ғана жүмсалып жүр.

Түйық етістік **-у** (*бару*, *жүру*, *оку*) және **-мақ** (*бармақ*, *жүрмек*, *окымақ*) жүрнектарымен келетіні белгілі, бірақ бұл вариантардың **-у** тұлғалы сынары – қазіргі кезеңдегі әдеби тіл үшін жиі қолданылатын нейтралды варианты. Ал **-мақ** вариантында күні кешеге, тіпті Абай тілінің өзінде **-у** вариантымен тепе-тең қолданылған. Түйық етістіктің *керек* сөзімен тіркескен тұлғасында да өзгеріс бар: бұрынырақ, XV-XVIII ғасырлардағы ақын-жыраулар шығармаларында, XIX ғасырдың өн бойын-дағы ауызша, жазбаша үлгілерде, Абайдың тілінде бұл тіркес барыс септігімен келген: *баруга керек*, *бармаққа керек*, тіпті супиндік (мақсаттық) мәнде **-арға** *керек* (*барарға керек*) тұлғасымен де беріліп келген. Бұл күнде барлық стильтеге тән болып **-у керек** (*бару керек*, *келу керек*) варианты норма болып қалыптасты да, өлеңдерде, жалпы көркем әдебиетте **- мақ керек** (*бармақ керек*, *келмек керек*) варианты да қолданылу құқығына ие болып қалды, ал **-арға керек** (*барарға керек*) жарыспасы нормадан мұлде ығысып қалды.

Морфология саласындағы нормалану жайын сөз еткенде кейбір жүрнектардың активтеніп, енді бірқатарының сөз жа-

сау әлеуеті азайып бара жатқанын айтуға болады. Мысалы, **-шы/-ші** жүрнағының шет тілдік тұбірлерге жалғануы орын алды: *футболышы, гипнозиши, комбайнши, колхозиши*, дегенмен адамның кәсібін, мамандығын, бір нәрсеге икемдігін, қабілетін т.б. көрсететін **-шы, -гер, -кеш** жүрнақтары көптеген кірме сөздердегі **-ист, -ор, -щик, -ант (-ент), -ург, -ер** т.б. сияқты орыс тілі қосымшаларын алмастыра алмай келеді. Мысалы, *гастролер, акционер, монтер, гимназист, диктор, диктатор, конструктор, аспирант, комендант, металлург, анархист, социалист* сияқты сөздер қазақ тілі үшін тұбір мен жүрнақтан тұратын морфемалар тіркесі ретінде емес, тұтас тұлға (сөз) ретінде қабылданды деуге болады.

Аталған мағынаны білдіруде бұл күнде **-гер** (*баспагер, айтыскер, қаламгер, тәлімгер, танымгер* (знаток), *мерей-гер* (дипломант), *майдангер, иегер*) жүрнағы активтенді. Сол сияқты жаңа сөз жасауда **-ым** (*қойылым, оқылым, сұраным*), **-ыс** жүрнақтары да жиі кездесе бастады.

Қысқасы, бірқатар сөз тудырушы жүрнақтардың вариантар қатары ұлғая түскені байқалады. Ал, керісінше, жалғаулықтардың кітаби тілдік (*шагатайлық, арабтық, парсылық*) жары-спа катарлары тежеліп, қолданыстан, демек, әдеби нормадан ығыстырылғаны да байқалады.

Морфологиялық нормалардың бүгінгі күй-қалпын анықтау үшін, сөз жоқ, кешегі қалпымен салыстыра қарастыру керек болады, біздің жоғарыда көрсеткендеріміз – өзіміздің XV-XIX ғасырлардағы қазақ әдеби тілін зерттеу нәтижесінде көзге шалынған фактілер. Грамматикалық тұлға-тәсілдердің бүгінгі әдеби нормасы мектептің грамматикаға арналған оқулықтарында, қазақ тілінің жоғары оку орындарына жазылған ғылыми курстарында, академиялық грамматикасында баяндалады. Норманы сөз еткенде, осыларда көрсетілген зандылықтардың бүгінгі күй-қалыпқа түскенге дейінгі эволюциясын танып-білу керек болады.

Синтаксис саласына келсек, мұндағы нормалану процесі де едәуір қарқынмен дамып келіп, бұл күнде көптеген амалтәсілдері әбден орнықты деуге болады. Ол тәсілердің басты-бас-

тылары: сөйлем мүшелерінің орналасу тәртібі, яғни бағының мүшениң басыңы мүшеден бұрын тұруы, құрмалас сөйлем түрлерінің реттелуі, көркем әдебиет стилінде диалогтардың берілу тәртібінің түрленуі, стильтік мақсатпен қолданылатын қайталама тәсілінің дамуы, парцелляцияның қолданылуы, атаулы сөйлемдердің көрінуі т.т. осы сияқты синтаксистік-стиль-дік амал-тәсілдер бір жүйеге түсіп, әдеби нормага айналды. Бұлардың да қазіргі нормативтік түрлері қазақ тілі окулықтары мен ғылыми курсарында толық көрсетілген.

Синтаксис саласындағы нормалану процесінде бірнеше фактордың үлкен рөлі барын айтуда болады, алдымен, мұнда күнделікті баспасөздің рөлі айрықша, әсіресе реесми стильтердің синтаксистік нормалары газет-журнал беттерінде қалыптасып, ғылыми және іс-қағаздары үлгілерінен орын алады. Екінші, әрбір функционалдық стильтің сөйлем құрылымында, түрлерінде бір- бірінен ажыратылатын тұстары болады. Мысалы, кенсе-іс қағаздарының, оның ішінде қаулы-қарапарларды, сот ісі баптарының, әр алуан нұсқау, бағдарламалардың сөйлемдері мейлінше қыска, түсінігі жеңіл, мазмұны (беретін информациясы) айқын болып келуі керек. Кейбір іс қағаздарының сөйлем құрылышы, баяндау стилі тіпті стереотип түрінде келеді.

Ал көркем әдебиеттегі синтаксистік құрылыштар мен құрылымдар сан түрлі болады, онда жарты беттік, ширек беттік бір сөйлемнің де, бір-екі сөзден тұратын атаулы сөйлемдер мен парцелляциялардың да кездесетіндігі белгілі. Тіпті стильтік мақсатпен синтаксистік құрылымдық нормалардың бұзылуы да әбден мүмкін. Мысалы, Габиден Мұстафиннің романда-рында «төңкеріліп жүрген», яғни бастауышы баяндауыштан соң орналасқан сөйлемдер кездеседі, оларды жазушы норма-ны бұзу мақсатымен емес, белгілі бір стильтік жүк арқалатып қолданған. Сәбит Мұқановта кездесетін бағының сөйлемнің басыңыдан соң келген құрылымдары да стильтік ерекшелік-тер қатарынан саналады.

Ал поэзияның синтаксисі – әдеби тілдің қай кезеңінде де өз алдына автономиялық дүние, онда стандарт кемде-кем, бір ақынның әр өлеziнің синтаксистік құрылымы әртүрлі болып берілуі – заңды құбылыс.

Синтаксистік нормалар – стилистикамен тығыз байланысып жататын сала. Бұл нормалардың қатаң сақталуы мен одан уәжді (мотивпен) ауытқуы көбіне-көп стильдік мақсаттарға орай орын алады. Оның үстіне, жоғарыда айтылғандай, әрбір функционалдық стиль ұлгілерінің қатаң ұстанатын немесе түрленіп келетін синтаксистік амал-тәсілдері болады, норманың да сипатын солар танытады.

Синтаксистік нормаларды ұстану өзге салалардың зандылықтарына қарағанда, әлдеқайда еркіндеу болып келеді. Синтаксис – автор стилінің көрінісі, айнасы, қолтаңбасы. Сондықтан синтаксистік нормалардың көп түрлілігі, құбылып отыратындығы, уәжді ауытқуларға жиірек ұшырауы – тілдік нормалардың өзіне байланысты емес, шығарма жанры-на, авторына, автордың көркемдік идеалына қатысты болады. Зерттеушілердің айтуынша, синтаксис – стиль, ал стиль дегеніміз – автордың өзі. Демек, синтаксистік нормалардың жалпы тілдік (ұлттық) сипатын көрсетумен қатар, әр жазушының, ақынның, әр ғалымның – қысқасы, әр автордың жазу мәнерін арнайы зерттеп талдау керек болады.

ОРФОГРАФИЯЛЫҚ НОРМАЛАР

Бұл күнде адамдар айтайын деген ойын бір-біріне ауызша, жазба түрде де жеткізеді. Жазба түрде жеткізу үшін сол халық пайдаланып отырган жазу (*жазу деген терминнің графика, әліпби* деген балама синонимдері бар) түрімен қоса белгілі бір жазу тәртібі, яғни нормалары болуы керек. Ол тәртіптер хатқа түсіп реттелген болуы да мүмкін, тіпті ереже турінде хатталмай-ақ, бірінен бірі оқып, көріп дегендей жаза беретін болуы да мүмкін. Дегенмен ұлттық жазба әдеби тілдің, яғни бүгінгі қазақ тілінің дұрыс сауатты жазу қафидалары түзіліп, хатқа түскен нормаларды көрсетуі – шарт. Ұлттық тілдің емле нормалары көпшілікке ортақ әрі міндетті сипатта болуы және шарт.

Емле зандастырылғарды да – тілдің өзі сияқты, өмірмен тығыз байланысты болып, әрдайым даму, жаңару үстінде көрінетін құбылыс. Қазіргі таңдағы мәдени тіршілігіміздің басты тала-бы – жазу таңбаларының (графиканың) тілдің дыбыс жүйесіне сай түсіп, көпшіліктің пайдалануына қолайлы болуы және сол таңбалармен сауатты жазу үшін емле ережелерінің дұрыс түзілуі. Ол емле қафидалары, әрине, белгілі бір принциптерді ұстанған, теориялық негіздерге сүйенген болуы және шарт. Бұл айтылғандар – баршаға аян жалпы әңгіме. Енді бүгінгі қазақ емлесі жайында нақты әңгімеге көшсек.

Қазіргі емле ережелерінің қысқаша тарихына көз жіберсек, оның іргесі 1940 жылы кириллицаға (халық тілімен айтсақ, «орыс жазуына») көшкен кезде қаланды. Қазақ тілі емлесінің осы жазу бойынша түзілген қағидаларының 15-16 жылдық тәжірибеден кейін кем-кетігі ескеріліп, едәуір реттелген нұсқасы 1957 жылы ұсынылып, зандастырылды. «Зандастырылды» дегеніміз реєми түрде үкімет қаулысымен бекітілді. Еуропа елдері мен қытай, үнді, жапон сияқты халықтардың, жүздеген, тіпті кейбіреуінде мындаған жылдарға созылған жазу үрдісі бар халықтардың дұрыс жазу қағидаларын Үкімет тарарапынан бекітіп, көпшілікті соған бағынуға міндеттеу шарт та болmas. Бұларда дәстүр факторы өз-өзінен қызмет етіп жатады. Ал 1940 жылға дейін бас-аяғы он бес-жырма жылдың ішінде үш түрлі: Ахмет Байтұрсынов түзген қазақтың тұңғыш ұлттық жа-

зуы – араб таңбаларын, одан кейін он шақты жыл (1929-1940) қолданған латын жазуын, 1940 жылдан бастап қабылданған кириллицаны пайдалануға мәжбүр болған қазақ сияқты халықтың әр жазудың емлесінде дәстүрі қалыптасып, орнығып үлгермеді, сондықтан әркім бұрынғы жазудың тәртібін сақтап, ала-құлалық туғызы әбден ықтимал еді, сол себептен 1940 жылы жана «орыс» жазуына қошкендегі емле ережелері де, 1957 жылғы оның қырналған, біршама түзетілген жаңа редакциясы да ресми Үкімет тараапынан арнайы қаулымен бекітілген болатын.

Емле немесе сауатты жазу нормалары да ең бір «көпшіліккөлді», «талқыға түскіш» құбылыс болғандықтан, үнемі түзету, қырнау, толықтыру, қысқасы, неғұрлым жетілдіре түсу процесін басынан кешіреді. Қазақ тілі емлесі де бұдан шет қалмады. Тағы да әрі қарай жазу тәжірибелі көрсеткендегі әрі енді жазу мәдениетіне де көніл бөліне бастағандықтан, сауаттылықтың тетігін ғылыми негізге сүйеніп табу әрекеті қолға алына бастағандықтан, 1983 жылы қазақ емле ережелері кодексінің біраз түзетулер мен өзгерістер енгізілген жаңа редакциясы ұсынылды. Бұл соңғы нұсқа да заң жүзінде қабылданды: 1983 жылы 23 тамызда Қазақ ССР Жоғарғы Советі Президиумының Указымен (сол кездегі терминдер мен атауларды сақтап келтіріп отырмыз) бекітілді және бұл қаулыда: «Министрліктерге, мемлекеттік комитеттерге, ведомстволарға, газет-журнал редакцияларына, баспаларға, ғылыми-зерттеу мекемелеріне, оку орындарына қазақ тілі орфографиясының осы негізгі ережелері жарияланған күннен бастап оларды жазу практикасында алу міндеттеледі», – деп жазылды.

Дәл бүгінге дейінгі қолданып отырган сауатты жазу әрекетіміз осы қаулыға бағынып келе жатыр. Қоғам өмірінде небір курделі де зор әлеуметтік-саяси өзгерістер болып жатқанымен, сауатты жазуға қойылатын талаптар түбегейлі өзгеріске ұшырамауға тиіс болып келеді. Әңгіме тек ресми заң құшінде емес, заң болсын-болмасын, қабылданған ережелерді (тәртіпті, зандарды т.т.) орындан отыруға қалың жұртшылық өзін-өзі міндеттемесе, ол ережелерді әркім өзінше бұра тартып өзгеше қолданып жатса, ол – мәдениетті жұрттың, көзі ашық, жаппай сауатты елдің нышаны емес. Сондықтан да болар, қунделікті

баспасөздің басым көпшілігі, оқу-ағарту орындары: мектептер мен институт, университеттер, ресми мекемелер құнделікті жазу тәжірибесінде қазақ тілінің 1983 жылғы соңғы бекітілген емле ережелерін, негізінен, ұстанып отыр.

Әрине, қазақ емлесінің сан рет қырналған, түзетілген, толықтырылған ең соңғы нұсқасында ешбір ақау жоқ, ойла-натын тұстары мулде аз деуге болмайды. Тілдің көмекшісі – жазу да – таңба талдаудан бастап, дұрыс жазу тәртіпперіне дейін уақыт өткен сайын жаңарып, жақсарып отыруы – табиғи құбылыс. Жаңа графикаға көшкен 60 жылдың ішіндегі дұрыс жазу заңдылықтары сөз болып отырган қазақ тілі түгіл, санғасырлық орыс емлесінің де бірнеше онжылдық өткен сайын кейде көп, кейде аз өзгерістер, түзетулер енгізіп отырганын білеміз.

Орфографиялық нормалардың дұрыс көрсетілуі мен олардың берік орнығына тек емле ережелерінің дұрыс-бұрысы емес, сол ережелер қамтитын тілдік құбылыстың дәл, анық танылмауында, ғылыми негізде оның сыр-сипатының дәлелденбеуінде. Мысалы, емле ережесі бойынша «Біріккен сөздер бірге (немесе косылып) жазылады» деген бап бар. Ереже бабы айқын, анық айтылған. Ал бірақ бөлек және бірге жазылатын сөздер – қазақ емлесіндегі ең бір катесі көп, қайшылығы мол, қын бөлік болып отыр. Бұл жерде «кінә» – емле ережесінде емес, сөз табиғатын танытатын лексиколог мамандардың таным-түсінігінде, дәлірек айтсақ, сол таным-түсініктің саяздығында, дәлелсіздігінде.

Қазақ тілінде, өзге де түркі тілдері сияқты, күрделі сөз дегендер болады. Олар екі, кейде одан көп сөзден құралып, бір мағынаны білдіреді. Мысалы, *келе жатыр*, *көріп отыр*, *құлап қала жазададым* деген етістіктер – күрделі сөздер, бұл тіркестердің әрқайсысы бір-бір ұғымды береді, олардың құрамындағы екі сөз жеке екі ұғымды, үш сөз үш бөлек-бөлек үш ұғымды емес, бір-ақ ұғымды білдіретін күрделі сөздер болып танылады. Күрделі етістіктерді жазуға келгенде көп қателеспейміз, оларды тіркес ретінде әр компонентің бөлек-бөлек жазамыз.

Күрделі сөз категориясы басқа сөз таптарында да бар: зат есімдер де (*жсан қалта*, *төс қалта*, *бет орамал*, *қол орамал*,

жасақ сүйек), сын есімдер де (*ақ сары, қара көк, қызыл курең, ал қызыл; ұзын бойлы, ақ көңіл, қара ниетті*), үстеулер де (*таң ата, ат үсті*), сан есімдер де (*он бір, отыз бес, он бес*) күрделі болып келе береді. Бірақ бұлар – бір мағынаны бергенмен, біріккен сөздер емес, әр компоненті (құрамды бөлігі) бөлек-бөлек жазылатын күрделі сөздер дегенді мектептен бастап мықтап үйрете алмай келеміз немесе күрделі сөздердің семантикалық-тілдік табиғатын зерттейтін лексиколог мамандар көшпілік қауымға мұны айқын, анық етіп түсіндіріп, дәлелдеп бере алмай келе жатыр. Нәтижесінде біреулер қате *атусті, алқызыл, таңата, онбір* деп жазса, оған емле ережесі «кінәлі» болып шығады. Демек, кей сәттерде сөздерді қосып, не бөлек, не дефис арқылы жазылуын реттейтін емле ережесінің өзі емес, сол ережеге мысал болып келетін сөз табиғатын дұрыс танытатын ғылым саласы болып шығады.

Фразеология деп аталатын сөз тіркестерін жазуда ереже анық: фразеология компоненттері бөлек-бөлек жазылады. Соған қарамастан, *атсалысты* деп қосып жазушылық жиі ұшырасады, ал осыдан табиғаты жағынан взгешелігі жоқ *құйрық тістесті, қамыт киді, қамиши жеді, шошқа тазалады, узеңгі қазысты* деген тіркестерді бөлек жазамыз. Бұл көрсетілген әрбір тіркес бір ғана ұғымды, ауыспалы, бейнелі ұғымды білдіреді, фразеология дегеннің көп қасиетінің бірі де – осында.

Тері, кейбір екі компонентті тіркесті қосып жіберуге олардың біреуінің не екеуінің де аз буынды сөздер болып келетіндігі болар деп топшылаймыз. Мысалы, *ат салысты* дегенде бірінші сөз – бір буынды, ал *uzeңгі қазысты* дегенді қосуға екі сөздің де көп буындылығы кедергі жасай ма еken? Әрине, бұл – әлсіз топшылау. Ал, шындығында, *атусті, атсалысты* дегендерді бір кезде қосып жазып жіберіп, дағдыға айналу факторын жоққа шығаруға болмайды. Емле мәселесінде қалың жүртшылықтың көзін үйрету, дағдыландыру дегеннің рөлі өте зор, өйткені жазу процесі, ауызша сөйлеу сияқты, негізінен автоматизм сипатында жүреді, яғни сауатты адам әрбір сөздің жазылу ережесін есіне түсіріп ізденіп отырмайды, сөздер «өзінен-өзі» жазылып жатады.

Жазба дүниенің көп оқытын адам сауатты жазады. Олардан *атұсті, атсалысты, алқызыл* деп жазылғандарды оқи-оқи, көз алдында бұл сөздердің осылайша қосылып жазылған таңба-лары санадан тыс түрде сакталып отырады. Сондықтан сау-атты жазуда кітап, газет, журнал сияқты дүниелердің жауап-кершілігі, қызметі орасан зор болады. Емле ережелерін адам мектепте не өзге де оку орындарында, олардың да филология факультеттерінде бір-ақ рет оқиды, ол ережелердің көбі уақыт өткен сайын ересектердің есінде де қалмайды, бірақ қатесіз жазады, өйткені әрі қарай жазу дағдысы іске қосылады, сол дағдының бір каналы – жазба дүние беттеріндегі сөздердің «суреті».

Емле қағидаларын түзуде қыындық келтіріп, кейде пікір-таластарға соқтырып отыратын түстар – жалғыз біріккен, бір-ікпеген сөздер емес, қазақ тілінің сингармонизм зандарын сақтап жазу не олардан ауытқу, кірме сөздерде түбір мен қосым-шалардың жазылуындағы ерекшеліктерді ескеру сияқты сәт-тер де қазіргі ұстанып отырған емле ережелерімізге корректив-тер енгізуді: қайта қарастыруды, түзетуді, реттеуді, бір жүйеге келтіруді қажет етеді. Бұл реттегі мәселенің ең үлкені – орыс тілінен енген сөздердің қазақ жазуындағы танбалануы жай-ында. Жалпы қазақ тіліне, тіпті оның емле сияқты «қосалқы бөлшегіне» заманымыздың «құқайы» – саясаттың араласқан тұснының бірі – осында.

Орыс тілінен енген (әлде «кеңген, алынған» дейміз бе, өйткені енген сез – кірме сез, ал кірме сездің статусы – өз алдына бөлек таным) сөздерді генетикалық, яғни төркіні жағынан екі топқа бөліп әнгімелу керек. Орыс тілінің өз сөздері және өзге тілдік, негізінен интернационалдық, халықаралық деп аталатын, ғылым, мәдениет, техника салаларына жататын сөздер қоры. Алдыңғысы сан жағынан соңғы топқа қарағанда әлдекайда аз және көбі – қаралайым сөздер, интернационалдық сөздер негізінен терминдер болып келеді, олар қазіргі қазақ тілінің жазба дүниесінде бірнеше есе көп. Оған нақты мысал ретінде мынадай статистикалық мәліметті келтіруге болады. Бұдан 7-8 жыл бұрын бір мақала жазу үстінде мынадай фактілерді жинап алдық: «Егемен Қазақстан» сияқты саяси-әлеуметтік беделді газеттің 1992 жылдың 21 кантарындағы бір нөмірінде орыс

тілінен (тілі арқылы деуге де болады) алынып, газет бетіне түскен 862 сөз бар еken. Олардың 12-сі қазақша тұлғаланған: *газет, облыс, сот, сома, пойыз, нөмір, жеребе, минот, килә, рөл, зауыт, тауар*. Бұл сөздердің қайталап келуімен коса есептегенде, «қазақыланған» кірме сөздердің барлығы – 34 еken. Демек, 862 «орыс» сөзінің қалған 828-і орысша тұлғасында жазылыпты. Сол кезде шығып тұрған «Халық кенесі», «Алматы ақшамы» газеттерінен де жинаған фактілер де осы шамадағы арасалмақты көрсетті. Әр сөздің қайталанғанын есептемей, жеке-жеке бір сөз деп санағанымызда, бұл үш газеттің бес нөмірінде барлығы 521 сөз орыс тілінен алғынды орысша тұлғада, олардың тек 14-i ғана «қазақы» тұлғада жазылыпты. Сірә, қазіргі кездегі фактілердің де осыдан көп айырмасы жоқ болар. Мұның сыры, себебі неде?

Шеттеген кіретін сөздердің қабылдаушы тілдің фонетикалық занұлдылықтарына бағындырылып, «сындырылып» қолданылуы – көптеген тілдерге ортақ құбылыс. Мысалы, орыс тілінің өзіндегі мындаған кірме сөздер «орысшаланып» алынған және түптілдегіден өзгеше, орысша жазылады. Бұл – тіл-тілдің ішкі занұлдылығы. Осы занұлдықтың бұзылған фактілері де бар еken, бұған қазақ тілі және орыс графикасын қабылдаған біраз түркі тілдері мысал бола алады.

Қазақ тіліне орыс тілінен сөз ауысу процесі ертеректен басталғаны мәлім. Бодандықтың, сауда-саттықтың, қазақ жеріне орыс шаруаларын, әскери адамдарын қоныстандырудың нәтижесінде қазақтың сөйлеу тіліне бірқатар тұрмыс-салттық сөздер мен әкімшілікке қатысты атаулар кіре бастады. Олар ауызекі тіл арқылы енді, сондықтан *шәй, самауыр, бәтес, сәтен, шыт, пәннесе, құнт* (қазақша қамши сөзі барына қарамастан, орыстың *кнут* сөзін қабылдаудың да дәлелі бар шығар: салт атты адамның қолындағы қамши мен арбаға, шанаға жегілген майды айдайтын қамшылардың айырмасын көрсеткісі келді ме еken), *пәкөс* (бұрын шөп шауып, жинап алуды көп білмеген қазаққа орыстың шабылған шепті *pokos* деп атайтыны ұнап кеткен болар), *кір* (сауда-саттықпен көп айналыспаған қазекем қолына безбениң *гиря* деп аталағын бөлігін білмегендіктен, орыстан қазақшалап *кір* деп «жымқыра» қойған той), бертін келе XIX ғасырда орыс империясының ел билеу, сот, әкімшілік,

оку, ағарту, мәдениет жүйесіне қатысты ояз, жандарал, боп-лыс, сом, содия, ыстатия, закон, газет, кінеге, ушкол, зауыт сияқты сөздері де қазак түрде еніп, қалыптасты. Бұлар қазіргі қазақ тілінің орфографиялық та, орфоэпиялық та нормасын-да сол қалыптастан тұлғаларын сактап жазылады, айтылады. Емленің бұл ережесіне қазір ешкім таласпайды.

Талас туғызып отырған – осы топтан бірнеше ондаған есе көп болып келетін «орыс» сөздері туралы. Олардың бірен-сараны болмаса, басымы – интернационалдық сөздер, олардың да дені – латын, грек тілдерінен дүние жүзіне ертеден тараған ғылыми терминдер, кейінгі кезеңдерде, әсіресе XX ғасырдың II жартысында күрт дамыған техника, космология, космо-навтика, аэронавтика, биология салалары әкелген ағылшын, неміс, франуз, орыс тілдерінен (*спутник*, *совет* сияқты бес-он сөз) пайда болған терминдік атаулар. «Осыларды қазақ тілі қалай игеріп, қалайша жазып, қалайша дыбыстауы тиіс?» де-ген сауалдың көтерілуі – занды. Өйткені соңғы аталған топ бүтінде орыс тіліндегі қалпынша жазылып, тіпті орысша ай-тылып (дыбысталып) келеді. Және бұл тәртіп – соңғы бес-он жылдың жемісі емес, алпыс жылдан бері қолданылып келе жатқан тәжірибе. Оның объективті себебі бар. Бұл себепті қазақ тілінің ішкі құрылымдық даму зандылығынан ізdemей, сыртқы экстралингвистикалық факторлардан іздеу керек. Ол факторлардың бірі – орыс (кириллица) жазуына көшүіміз болса, екіншісі – орыс тілін «екінші ана тіліміз» деп қоса менгеру қажеттігін мойындаған саясат, империялық саясаттың тепкіні.

Орыс тілін жаксы білу талап етілген соң, оны тез, дұрыс менгеруді женілдететін жолдың бірі – осы тілден алынған сөздердің тұлғасын бұзбай айту, бұзбай жазу болып келді. Өмір мен саясат осыған мойынсұндырыды. Ушінші фактор және бар. Интернационалдық терминдер қазақ жазба тіліне 30-жылдардың өзінде-ак молынан енебастаған-ды. 1929 жылы да саясаттың тепкінімен араб әліпбіне негізделген қазақтың тұңғыш ұлттық жазуы – Байтұрсынов жазуын тәрк етіп, латынға көшкенде қабылданған емле ережелеріміз бойынша «бөгде тілдік» сөздерді қазақша естілүінше, айтылуынша жазу тәртібі ұсынылды. Осы кітаптың өзінде бірнеше жерде айтып көрсеткеніміздей, 1929-1940 жылдарда латынша жазу кезінде

орыс тілінен келген сөздердің әрқайсысы бірнеше варианта жазылды. Проф. Құдайберген Жұбанов көрсеткендей, бір гана коммунист деген сөз 16 түрлі болып жазылып жүріпті.

Орыстардың өздері қолданып отырған графикадан өзге жазу түрлерін пайдаланған кезде, әрине, ол сөздерді дәл орыс тіліндегідей етіп бұлжытпай жазу мүмкін емес. Әсіреле **я, ю, з, ё, ь, ى, ч, щ** таңбаларымен келетін сөздер дәл орыс-ша тұлғасында жазылмайды. Ал кириллицаны қабылдағанда бұл сөздердің жазылуында тығырықтан шығатын тәсіл табылғандай болды: оларды орысша тұлғасында жазу ережесін қабылдап, әрі ала-құлалықтан құтылуға, әрі орыс тіліне «бауыр баса тұсуге» мүмкіндік туған сияқты болды.

Бұл құндерде Ресейдің империялық өктемдік, билеушілік ықпалынан босанып, аз жылдың ішінде тәуелсіздікке, дербестікке жедел жеткенімізben, бұл жеделдікті тілге кел-генде жүргізе алмайтын жайымыз бар: бас-аяғы 9-10 жылдың ішінде бір, бір жарым ғасырлап енген сөздерді кейбіреулер та-лап еткендей түгел аударып, қазақша баламасын тауып беру, аударылмағандарын, тіпті соңғы жарты ғасырда молынан енген интернационалдық ғылыми-техникалық терминдерді түгел қазақ тілінің фонетикалық зандарына икемдеп, өзгертіп, қазақша тұлғада жазу – қызын шаруа екенін өмір көрсетіп келеді. Қындық – тек дәстүрдің бұзылуында емес (үйреніп қалғаннан көз жаза алмай отырғаннан емес), бұл орайда біраз нәрсені ескеру керек болады. Алдымен, ана тілімізге қатысты соңғы он шакты жылдың барысындағы іс-шаралардың ең негізгісі – қазақ тілін мемлекеттік тіл статусына көтеру, тіпті дәлірек айтсак, әлеуметтік қызмет аясы тарылып, тарих төрінен ығыса бастаған қазақ тілін сақтап қалу үшін курсес. Ол

– көп күшті, нақты жүргізілетін қыруар іс-карекеттерді қажет етіп отырған майдан. Екіншіден, кірме сөздердің фонетикалық тұлғасын қазақшалап жазуды жаппай жүргізу үшін бүкіл ба-спа ісін жаңғырту, газет- журнaldарды, оқулықтарды, бүкіл терминологиялық сөздіктерді, екі-үш тілдік сөздіктерді, анықтағыш құралдарды, жылма-жыл шығып отыратын өзге де әдебиет түрлерін, қайта басылатын немесе баспаға ұсынылған кітаптарды, құралдарды, жарнамаларды, қала, көше аттарын – қысқасы, есебі жок жазбаларды жаңаша басып шығару үшін

көп қаражат керек екендігі де ескерілуі керек. Мұндай жазба дүниенің жартысын бұрынғыша, жартысын жаңаша емлемен ұсынуға мүлде болмайды. Осы кезге дейін шығып келгендеріне дауа жоқ, ал енді баспа жүзін көретіндер бірізді, бір сипатты болуы шарт. Ушіншіден, кириллицаны пайдаланып отырған кезеңде орыс тілінен келген кірме сөздерді фонетикалық тұлғасын өзгертіп казакшалаудың қажеті бар ма? Оның үстіне «күні ертең жазу графикамызды латынға ауыстыргалы отырғанда, алдағы 5-10 жыл үшін қазақшасы шала, сауаты мәз емес халқымызды уақытша қайтадан жазу үрдісін өзгертіп қиналадың пайdasы мен зияны қандай?» деген пікір-ой туады. Бұл пікірлер айтылып, жазылып келеді. Сірә, дұрысы – осы бо-лар.

Сөйтіп, кірме сөздер кай тілден келсе де, қазақ тілінің табиғи дыбыс заңдарына бағындырыла айтылысын және сол бағынған түрінде жазылсын деген идея – теориялық тұрғыдан дұрыс. Бірақ сол идеяны жүзеге асиратын негіздермен санасуға бүгінгі қоғам өмірінің шындығы мәжбүр етіп отырғанын дәлелдедік.

Ал жаңа латын жазуына көшкен кезде кірме сөздерді қазақ тілінің өз заңдарына икемдеп айту және жазу идеясының жүзеге асатыны – даусыз. Бірақ ол енді 1-рет қолданылған латын кезіндегідей әркім өз естуінше, өз айтуынша жазыл-май, белгілі емле ережесі бойынша таңбаланатын болады, өйткені бір тілдің сөздері өзге тілде айтылғанда белгілі бір фонетикалық заңдылықтарға негізделеді және ол заңдылықтар жүйелі түрде келеді. Жаңа латын жазуының емлесі бірден ғылыми-теориялық негізде түзілетін болады. Бұл талап кірме сөздердің орфограммасында да берік сақталады.

Орфографиялық нормаларды, дәлірек айтсақ, дұрыс жазу ережелерін тұрақтандырып, нормаға айналдыруда ғылыми пікірталастар да жоқ емес. Бірқатар фонетист мамандар қазіргі емле ережелеріміз қазақ тілінің үндестік заңдарын бұзып барады, яғни екінші, үшінші буындарда езулік **i**, **ы** әріпттерін жазу (*құлып*, *күміс*) тілімізге тән ерін үндестігін жойып келеді, сондықтан түбір сөздің өз ішінде де, қосымшаларда да ерін үндестігін сақтап *құлұп*, *құлұнұм*, *күмүс*, *күмүстү* деп жазу керек, сондай-ақ қазақ тілінің буын үндестігі деп аталатын фонетикалық нормасын жазуда да сақтау керек, ол үшін төл

сөздерді де, кірме сөздерді де тұтас не жуан, не жінішке дауыстылармен таңбалалу керек (*кітәп, қызмет, тәкәннәр, көзәйім, аттан* келдік, *қаламман* жаздық, *ауылдықи*, *қаланықи*) деген пікірлер айта бастады.

Қысқасы, сөздің дыбысталуы мен жазылуын бірдейлестіру арқылы қазақ тілінің фонетикалық табиғатын сақтау керек де-ген идея ұсынады. Әрине, қай-қай тілдің де ұлттық сипатының бірі, әсіресе өзге туыс тілдерден ажыратып тұратын белгісі – дыбыстық ерекшеліктерін сақтау – игілікті идея. Бірақ кез келген дұрыс идеяны жүзеге асыруда көлденең тұратын объективті факторлар бары және аян. Айталық, қазақ тілі ешбір кірме элементтерсіз жалаң өз сөздерінен ғана құралған болса, бір сәрі (онда да ойланатын тұстар көп), ал кірме сөз, кірме жүрнақ дегендер қазақ тіліне тән фонетикалық вариантының болып келеді. Мысалы, **-кор**, **-паз**, **-кой** жүрнектарының жінішке вариантыны да, басқы дауыссыздарының қатаң-ұян болып құбылатын вариантыны да жоқ. Оларды жінішке сөздерге қалай жалғаймыз: *санқой*, *әсемпаз*, *өнерпаз*, *әүесқой* деген сөздерді қалай айту керек: *санқой*, *асампаз*, *онарпаз*, *аудасқой* деп айту мүмкін бе?

Кірме сөздердің ішінде буындары жуан-жінішке болып ара-ласып келетін мындаған бірліктер бар, оларды қалай жазуымыз керек: *құрмат* (құрмет), *қытап* (кітап), *парламант* (парламент), *декләрәциә* (декларация), *көнгірес* (конгрес) деп жазу қазақ тілінің буын үндестігін сақтауға септігін тигізер ме еді? Тіпті қазақтың өз бірліктерінің де не тек жуан, көбінесе тек жінішке болып келетіндері бар: көмектес септігі тек жінішке (*мен*, *бен*, *пен*), тәуелдік жүрнағы да сондай (**-нікі**, **-дікі**, **-тікі**), бір дауыс ырғағымен айтылатын қос сөздердің, біріккен сөздердің ішінде бірі – жуан, екіншісі – жінішке буынды сөздер аз емес: *аз-кем*, *Айгүл*, *Гулзайша*, бұларды қалай біркелкі жуан, не жінішке ай-туымыз және жазуымыз керек: *әз-кем*, *әйгүл*, *Гулгәйшә* ма әлде басқаша ма?

Әрине, тіл – тарихи құбылмалы, аса құрделі, үнемі дамушы құбылыс, сондықтан ол өзгеріссіз болмайды, кейбір тұстары септінеп де жатуы мүмкін. Арасынан буынды кірме элементтердің мол болуы және көбінің құнделікті қолданыста жиі келетіндігі бір кездегі буын үндестігін әлсірете бастаған тәрізді. Сірә,

кейбір араб, парсы сөздерін аралас буынды етіп жазуды өзіміз жасағанға ұқсаймыз, өйткені *mұғалім*, *қадір*, *қазір*, *қауіп*, *қате*

сияқты сөздер күні кешеге дейін, әсіресе араб, латын жазуы кезінде *mұғалым*, *қадыр*, *қазыр* немесе *қазір*, *қауып*, *қата* вариантында жазылып келді. Буын үндестігін қазіргі кезде, орфографияда (сөзді дыбыстауда) біршама ұстануға болар, ал орфографияда кірме сөздердің басым көпшілігін жазуда буын үндестігіне сәйкестендіру мүмкін емес тәрізді.

Емле нормаларын реттеуде көніл аударатын және бір тұсы – біріккен сөздердің ара-жігіндегі **к**, **қ** қатаң дыбыстарын сөздің айтылу нормасына сай ұяндатып айту және жазылуын соған сәйкестендіру мәселесі. Мысалы, қазіргі емле ережеміз бойынша *шекара*, *қыркүйек*, *көкөніс*, *қылқалам* түрінде жазып жүрген сөздер айтылуда *шегара*, *қыргүйек*, *көгөніс*, *қылғалам* түрінде келеді, емле ережелерінің латын жазулы жаңа кодексінде (тіпті оған дейін де) бұл тәрізді коррективтер болуы мүмкін.

Сейтіп, бүгінгі жазу мәдениетіміздің бірнеше онжылдық тәжірибесінде ойласатын, пікір алысатын, әрі қарай ғылыми негізде зерттеп, дәлелдейтін, жаңа ұсыныстар жасайтын тұстары барышылығына қарамастан, қазақ тілінің орфографиялық нормалары біршама айқындалып, көбі тұрақталып, қызмет етіп отыр. Олар емле ережелері ретінде көрсетіліп, сол ережелер бойынша орфографиялық сөздіктер ұсынылып келеді.

Орфографиялық ережелер белгілі **принциптер** негізінде түзіледі. Көптеген тілдердің емле зандарына екі-үш, кейде үш-төрт түрлі принцип негіз болады. Олар: фонематикалық, фонетикалық, морфологиялық, тарихи-дәстүрлік т.б.

Морфологиялық принцип бойынша, сөз бөлшектерінің (морфемалардың) түбір тұлғалары сакталып жазылады, фонематикалық принцип бойынша жазуда дыбыстардың бір сөз ішіндегі немесе сөз аралықтарындағы бір-біріне тигизетін әсер-лері ескерілмей, олардың негізгі фонемалық түрі сакталады. Фонетикалық принцип бойынша, сөз бөлшектерінің дыбыстық өзгеріске ұшырауы есепке алынып, олар айтылуынша жазылады, ал тарихи - дәстүрлік принцип бойынша жазу сөз бөлшектерінің түбір тұлғасын сақтау ережесіне де, естілуйнше жазу ережесіне де сай келмейді, мұнда сөздердің бір кездегі қалыптастып, үйреншікті болып кеткен жазылу түрі сакталады.

Қазақ орфографиясының негізгі принциптері морфологиялық, фонематикалық және фонетикалық, сонымен қатар тарихи-дәстүрлік принцип те орын алады. Бұл принциптердің әрқайсысының қолданылатын түстары жайында қысқаша мәлімет берсек.

Морфологиялық принцип сөз бөлшектерінің, яғни түбір, жүрнак, жалғауларының түбір тұлғаларының сакталып жазылуын талап етеді. Мысалы, *жұмыс*, *іс*, *аи* деген түбірлерге -шы, -шен, -са деген қосымшалар жалғанғанда, олардағы аралық дыбыстар бір-біріне әсер етіп, сөздер *жұмушы*, *ішиең*, *аиша* болып айтылады және солай естіледі, бірақ сөздердің түбірлері мен жалғанған қосымшалар өз тұлғаларын сактап, *жұмышы*, *ішиең*, *аиса* болып жазылады.

Фонематикалық принцип бойынша, жазуда бір сөз ішінде дыбыстардың (фонемалардың) қосалқы реңкі (варианты) ескерілмейді, сөз бөлшектеріндегі фонемалардың негізгі реңкі (инвариантты) сакталады. Мысалы, *қашанғы*, *тұнгі*, *күнгे* деп жазылған сөздер *қашаңғы*, *тұңғұ*, *күңғө* болып айтылады, естіледі. Қазақ орфографиясында морфологиялық принцип пен фонематикалық принциптердің тоғысып келетін сәттері жиі кездеседі. Сондықтан қазақ емле нормаларының негізі – морфологиялық-фонематикалық деп ұластырылып (қосақтап) атауға болады. Мысалы, біріккен сөздер мен қос сөздердің, негізінен, әр құрамды бөлігінің жеке тұлғасы сакталынып жазылады, ол компоненттердің аралығындағы дыбыстардың айтылуда бір-біріне ететін әсері ескерілмейді. Айталық, *қара+күйе* (құрт), *қара+құйрық* (жануар), *жар+қабақ*, *орын+басар*, *шек+ара*, *алма+кезек*, *көзбе+көз*, *қиян+ке斯基* деген сөздер біріккенде не қосарланғанда, айтылуы *қарагүйө*, *қаралұйруқ*, *жарғабақ*, *орымбасар*, *шегара*, *алмагезек*, *көзбөгөз*, *қыйдаңгескі* болып естіледі, бірақ морфологиялық- фонематикалық принциппен әр компоненттің түбір тұлғасы сакталып, *қаралұйье*, *қаралұйрық*, *жарқабақ*, *орынбасар*, *шекара*, *алма-кезек*, *көзбекөз*, *қиян-ке斯基* болып жазылады.

Қазақ орфографиясында фонетикалық принцип те кеңінен қолданылады. Ол принципке а) септік, көптік, тәуелдік, жіктік жалғауларының, сондай-ақ жүрнактардың көвшілігінің сөздің соңғы буынының жуан-жінішке әуеніне қарай және

ең соңғы дыбысына қарай түрленіп келетіндігі (-лар / -лер, -тар / -тер, -дар / -дер; -шы / -ші; -дың / -дің, -тың / -тің, -ның / -нің т.т.); ә) сөз соңындағы қатаң қ, қ, п дыбыстарының дауыстыдан басталатын қосымшалар жалғанғанда, ұяндал ғ, ғ, ғ болып өзгеретіндігі; б) бірқатар кірігіп кеткен біріккен сөздердің компоненттерінің айтылуынша жазылуы (*бүгін, биыл, қолгабыс, қолган, белбеу, екіншігәрі*); в) бірқатар кірме сөздердің казак фонетиасына икемделген түрінде жазылуы (*пәуеске, самауыр, божы, шөген, әділ, пайда, ақпар, пәнсі, ауа*) сияқты тұстары бағынады.

Тарихи-дәстүрлік принцип бойынша жазу үрдісі бізде түрі жағынан аса ұлken емес. Оған шартты түрде орыс тілінен енген сөздердің орысша тұлғасын сақтап жазылуын және бірқатар араб, парсы сөздерінің х, қ еріптерімен жазылуын (*халық, хабар, хат, Ахмет, Гауяр, жиңан, Хамит*) жатқызып жүрміз, яғни осылай жазылсын деп 1940 жылы үйғарып, содан бері дәстүрге айналған жазуымыз. Бұл принципті «тарихи» деп атау да – шартты. Қазіргі емлеміздің тарихы жарты ғасырдан асар-аспас болған соң, жазуда сірілген тарихы бар сәттер жоқ де-уге болады.

Бұл кітапта емле ережелерін жеке-жеке көрсетіп баян-дап беру мақсаты көзделген жоқ, емле қағидалары «Қазақ тілі орфографиясының негізгі ережелері» атты кодексте (ол «Қазақ тілінің орфографиялық сөздігінің» 1988 жылғы кітабында берілді) орын алды және біздің 1960 жылы баспа қызметкерлері мен мұғалімдерге арналған қазақ тілі емлесі мен тыныс белгілері ережелерінің тұнғыш анықтағышының әр ба-сылымында баптарға таратылып, кеңінен баяндалған болатын. Қазақ емлесінің накты ережелерін білгісі келгендер, әсіресе ба-спа қызметкерлері мен мұғалімдер, окушылар, студенттер осы аталған құралдарды пайдаланып отыр.

Біз бұл енбекте қазақ тілінің орфографиялық нормалануының тарихын да сөз етпедік, ол – жеке ғылыми ізденіс нысаны болмаққа керек. Қазіргі қазақ жазба әдеби тілінің қай саласының нормалануын сөз етсек те, зерттеу нысанымыздың бір жүйеде, бір мақсатта баяндалуын көздедік, сондықтан әр саланың нормалану тарихы, жеке-жеке қағидалары (ережелері), олардың келешегін болжаяу сияқты мақсат қойылған жок.

ОРФОЭПИЯЛЫҚ НОРМАЛАНУ

Қазақтың бүгінгі ұлттық әдеби тілі жазбаша және ауызша түрде қызмет етеді. Жазба әдеби тіл жазба әдебиеттің өмір сүруі мен дамуына қатысты болғандықтан, ол көркем әдебиет пен баспасөзде, ғылыми әдебиет пен оқу-тәрбие кітаптарын-да, ресми құжаттар мен кеңсе-іс қағаздары беттерінде көрініс табады. Аты айтып тұрғандай, жазба әдеби тіл – жазылған дүниелердің тілі, ал әдеби тілдің ауызша түрдегі қызметінің мәні бүгінгі қазақ қоғамының тіршілік-тынысында жазба тіл-ден кем емес. «Ауызша әдеби тіл» деген термин мен «ауызекі сөйлеу тілі» деген категориялар – бір емес, соңғыда адамдар бір-бірімен таза әдеби тілде емес, құнделікті тұрмыстағы өзара сөйлесу мәнерінде қарым-қатынас жасайды, ол – әлдеқайда еркіндеу, өзіне тән ерекшеліктері бар тіл үрдісі, бұл ерек-шешілтер сөйлем құрастырудан бастап, сөз тандауға дейінгі өрісті қамтиды, мұндауда адамдар бөгде тілдік элементтерді (көбінесе орыс сөздерін) қосып жіберу, қарапайым сөздерді, «паразит» сөздерді арапастыру, одагай сиякты «көніл күйі» сөздеріне салмақ салу дегендеге барады. Ауызекі сөйлеу тілі – адамдардың үй ішінде, үйден, жұмыстан тыс кездесken жерде, ресми емес орындарда (айталық, отырыстарда, қонақта) өзара қарым-қатынас жасайтын тұрмыстық тіл, қарапайым тіл.

Ал ауызша әдеби тіл – әдеби тілдің бір түрі. Оның жұмысалатын орындары тұрмыстағы сэттерден өзгеше, олар: әр алуан көп не аз адам қатысатын жиын-жиналыстар, мәжіліс-мәслихаттар, саясат, ғылым, өнер, шаруашылық тақырыптарына арналып көпшілік алдында айтылатын сөздер, әңгімелер, лекциялар, ақыл-кенестер, нұсқаулар, балабақшалардан бастап мектеп, жоғарғы оку орындарына дейінгі оқу-тәрбие жұмыстары, ра-дио мен теледидардан берілетін хабарлар, бұларда сөйленетін сөздер, театрлар мен өзге де өнер сахналарынан айтылатын және шырқалатын ән сөздері. Бұларда айтылатын, естілетін тіл ауызша әдеби тіл деген дәрежеге ие. Демек, оның нормалары жазба әдеби тілден де, ауызекі сөйлеу тілінен де өзгеше болуга тиіс. Ауызша әдеби тілге қойылатын басты талап – сөйлеу ак-тісінде сөздерді дұрыс дыбыстау, дұрыс айтту. Бұл нормаларды

ғылымда орфоэпиялық нормалартдеп атайды, ал біз осы нормаларды қалың жүртшылыққа ереже түрінде талдап баяндаған көмекші құрал ретіндегі еңбегімізде мұны қарапайым халықта түсінікті болу үшін «Сөз сазы» деп атадық (Р.Сыздықова. Сөз сазы. Алматы: Санат, 1995. 2-басылым). Сөз сазын талап ететін жер – шаршы топ алдында ауызша сөйлеу сәттері. «Шаршы топ» дегеніміз – көпке арналып сөз айттылатын жер, яғни сол сөзді тыңдайтын адамдар тобы. Шаршы топ алдындағы сөз (орынша «публичная речь») аз болсын, көп болсын әлеуметтік мәні бар, яғни жүртшылық назарына ұсынылған, қоғам мұддесіне арналған әңгіме болуы керек. «Шаршы топ алдындағы сөз» деп ұзындау сөз тіркесімен атап отырған категорияны тер-миндер атаудың да қажеттігі байқалады. 20- жылдардағы ғалымдарымыз публицистика терминін көсемсөз деп атапты. Тегі, көсемсөз термині публицистикадан ғөрі, «шаршы топ алдындағы сөз» дегенге мағына жағынан жақындау келетін сияқты, өйткені көсемдік сөз, әдетте ақыл-насихат сөзі ғой, көсем – халықты «идеология» жағынан басқаратын, ол үшін ақыл сөзін айттын адам ғой, яғни көсем – рухани басшы, ал ондай басшының «бес каруы» – тілі және жай тіл емес, ақылды, логикалы, әсерлі, құлаққа жағымды, ойға қонымды, көпшілік қауымға арналатын тіл болмаққа керек.

Ондай тілмен ұсынылатын сөзді қазақ «шешендік сөз» деп те атайды. Бұл тұрғыдан келгенде, шаршы топ алдындағы сөзді «шешендік сөз» деп атауга да болар. Бірақ бұның қисыны кел-мейтін себептері бар: біріншіден, бұл терминнің бұрыннан қалыптасқан ұғымы бар, ол – «шешендер» деп аталатын би, рубасы, елағасы сияқты әлеуметтік топтың сөз үрдісі, дәлірек айтсақ, әр алуан дауларды қазактың әдет-ғұрып заңы бойын-ша (бұл заңды орыс тіліндегі ғылыми әдебиетте «обычное право казахов» деп атап жур) шешіп, үкім айттын билер ай-тысы, әрқиыл дауға барған жақтардың өзара айттыстары, ел қорғауга шақыратын жиындардағы хандар мен батырлардың сөздері, ас-тойларда көпке қаратып айттылатын ру-тайпа, ауыл-ел ағаларының (басыларының) сөздері, киелі ауыз иелерінің көпке арналған ақыл-кенестері, тілек-баталары, қысқасы, өлең-толғаумен емес, қара сөзбен айттылатын сөздері «шешен-дік сөздер» деп аталған.

Ал біздің заманымыздағы шаршы топ алдындағы «шешен-дік сөздердің» айтылатын орындары да, сипаты да (мазмұны, тақырыбы да), тыңдаушылардың топтары да мүлде басқаша екендігі белгілі. Сондыктан бүгінгі шаршы топ алдындағы сөздің бәрі, мысалы мұғалімнің сабак түсіндіруі, ұжым жиналыстарында жұмыс жөнінде пікір айту сияқтылар «шешен» деген анықтамаға (эпитетке) сай келмейді, олар да, әрине, дұрыс құрылған, түсінкіті, дұрыс дыбысталған болуы ке-рек, бірақ мұнда қазақтың «шешендік сөз» деп аталатын сөз үрдісінің атрибуттары табылмайды. Осы себептен не «шаршы топ алдындағы сөз» деп тіркеспен атауды қалдырған, не «көсемсөз» деп «ығыстырып» алған термин дұрыс болар деп топшылаймыз.

Қайткенде де бүгінгі қазақ тілінің жұмсалу тәжірибесінде ауызша әдеби тілде сөйлеудің осы түрінің бары анық және оның әрі қарай дами түсері де даусыз. Өйткені бұл күнде қазақ тіліндең «шаршы топ» аясы, түрлері көбейіп отыр. Әсіресе «шаршы топтағы» сөздің ен жиі, ең «көпшілік қолдысы» – теледидар мен радиодан ауызша «табан аузында» айтылатын сөздер жиі естіле бастады. «Орыс тілді» бастық (әкім) қазақтарды бір-бір сөйлеммен болса да, қазақша сөйлетуді теледидар дағдыға айналдырып келеді. Сірә, бұл – үлкен істің барлық іс-әкімшілік тұтқасын ұстап отырған адамдар мемлекеттік тілде сөйлей алатын, жаза алатын болуға міндетті болуы үшін қурестің (іс-шаралардың) бастамасы шығар деп танимыз. Біздің бұл жер-дегі айтпағымыз – бүгінгі шаршы топ алдындағы сөздердің, жалпы шешендік сөздің тарихы, түрлері, қолданылатын орындары, маңызы жайындағы ой-толғамдарымыз емес, сол сөздің бір шарты – сөйлеу актісіндегі сөздердің дұрыс айтылуы, дыбысталуы жайындағы пікірлеріміз, талдауларымыз, яғни орфоэпия проблемасы.

Бұл проблема да – ғылымның, оның ішінде тіл білімінің нысаны (объектісі), бірақ ең кенжелеп дұниеге келетін, кеш қолға алынатын және қалың бұқара онша көп мән бере қоймайтын саласы. Бұл – халықтардың қай-қайсысының да мәдени, ғылыми дүниесінде өзге салалардан гөрі қолға кейінрек алынатын сала. Атап айтқанда, орфоэпия мәселелері әдеби тілдің ұлттық

сипатқа ие болғаннан кейін, оның лексикалық, грамматикалық, стилистикалық нормалары едәуір қалыптасып, орныққаннан соң, яғни әдеби тілді пайдалану жалпыхалықтық, баршага ортақтық дәрежеге жеткеннен кейін, оның өзінде де жалпы ауызша сөйлеу, оның ішінде шаршы топ алдында сөйлеу өрісі кеңейген соң, қысқасы, «тіл мәдениеті» мықтап назарға ілік-кенде пайда болады, ғылым-таным объектісіне айналады.

Казак тілінің орфоэпиялық зандылықтарын танып-білу мен зерделеп-тәншіту, нормаларын әңгіме ету – соңғы онжылдықтардың жемісі. Тіл білімінің бұл тармағы 60-жылдардың ішінде қауырт қолға алынып, едәуір жұмыстар да істелді: орфоэпиялық сөздіктер жарық көрді; орфоэпиялық ережелер ұсынылды; ондаған мақала жарияланды. Бірақ бұлардың барлығы да – үлкен істің беташарыға болып ке-леді. Орфоэпиялық нормаларды қазіргі аппараттарды пайдалана-на отырып, ғылыми негізде зерттеу, орфоэпия ережелерін де, емле ережелері сияқты, дұрыс пайдалануды қалың көпшілікке міндеттеу, ол үшін орфоэпиялық жаңа құралдар, ережелер кодексі, сөздік, анықтағыштар шығару жұмыстары тұр.

Біз бұл жұмыста орфоэпиялық нормалардың өзін жеке-жеке талдап көрсетуді мақсат етпейміз (олар «Сөз сазы» атты екі рет жарық көрген көмекші қуралда жақсы, толық көрсетілді).

Орфография мен орфоэпияның бір-біріне үқсас жақтары бар: екеуі де – практикалық - қолданбалы сала, ережелер-ге сүйенеді, жалпыға ортақ болады, міндетті болады. Сөйте тұра үлкен айырмасы да бар. Сөздерді дұрыс жазуға арналған орфографиялық ережелерді өзіміз жасаймыз, ол жазу таңбасы өзгерген сайын жаңадан түзіліп, оның өзі уақыт озған сайын жетілдіре түсу мақсатымен өндөліп, қырналып, толықтырылып отырады. Ал сөздерді дұрыс дыбыстау нормаларын біз жасамаймыз, ол – қазақ тілін қолданушылардың ұрпақтан ұрпаққа көшіп, жалғасып отыратын ежелгі тәртібі, тілдің табиғи құбылысы. Ол нормаларды, емле ережелері сияқты, әлсін-әлсін өзгерте алмаймыз. Орфография нормалары, оның көрінетін жері – тілге сырттай қабыстырылған нәрсе, бұл күні кеше пайда болуы да мүмкін (мысалы, қазіргі жазуымыз берілгенде емлесінің тарихына бар-жоғы 50-60 жылға өтті), ал қазақ тілінің орфоэпиялық нормалары – тіліміздің өзімен бірге ежелден келе жатқан табиғи зандылықтар.

Тілдің жазудағы нормалары мен дыбысталудағы нормала-рын бір-бірінен мүмкіндігінше алшақтатпау әрекеті қашанда да орын алып келеді. Дегенмен өзге де көптеген мәдениетті жазу дәстүрі ұзак Еуропа халықтары, оның ішнде орыстардағы сияқты, сөздерді жазу мен оларды дұрыс дыбыстауда бір-біріне сай келмейтін тұстар қазақ тәжірибесінде де бар. Бұл да – занды құбылыс. Мысалы, көптеген сәттерде қатаң **к**, **к**, **п** әріптерімен жазылатын сөздер айтуда ұяндалап **ғ**, **г**, **б** болып естілетіндігі (дыбысталатындығы) жиі кездеседі. Мысалы, орфографиялық норма бойынша *өнеркәсіп*, *Қазақстан*, келе қалды, келе-кеle, ала көбеден деп жазылған сөздер *өнөргәсіп*, *Қазақстан*, келегалды, келегеле, алагөбөден болып айтылуы – орфоэпиялық норма талабы.

Орфоэпиялық нормаларды сөз еткенде, бүгінде бізді алаңдататын жайттар бар. Олар:

- 1) жазу мен сөзді дыбыстаудың бір-біріне қатысы, әсері;
- 2) орфоэпияға әлеуметтік көзқарастың қалыптаспай келе жатқандығы;
- 3) орфоэпия нормаларын үйрету, сактау, насиҳаттау жұмыс-тарының әлсіздігі;
- 4) қазақ орфоэпиясы бойынша ғылыми зерттеулердің енді-енді, яғни кеш басталып келе жатқандығы. Осылардың әрқайсының сыр-сипатын танып көрелік.

1) Жазу – адам баласының мәдени-рухани тірлігінде тапқан орасан зор табысы. Катынас құралы ретіндегі тілдің осы қызметтің түрлендіре түсінен, күшійте түсінен ғажайып дүние. Бірақ медаль сияқты оның екі жағы бары байқалды: бірі – халықты тегіс сауаттылыққа көтерді, екіншісі – тілдің табиғи дыбысталу зандылықтарына ықпал етті. Бұл құбылыс тек қазақ тілі емес, өзге тілдерде де байқалғанын білеміз. Атақты орыс ғалымы акад. Л.В.Щерба: «тілді жазудың бұғауынан құтқарып (эмансипация от письменного языка), жанды тілге бет бүраторын кез келді», – деген болатын XX ғасырдың 20-жылдарының өзінде-ақ. «Жанды тіл» деп отырғаны – табиғи зандылықтарымен қолданған тіл, оның сөйлеу актісіндегі көрінісі.

Қазақ тілінің сөздерді сөйлеу актісінде дұрыс дыбыстауга оның жазба түрінің ықпалы соңғы кезендерде едәуір болып

келе жатқаны байқалады. Сөздерді жазылған түрінде айту (оку) етек алды. Мектеп балалары түгіл, институт, университеттердің филология, журналистика факультеттерін бітірген мамандардың өзі мәтінді оқып тұрғанда былай тұрысын, айтпақ ойын қағазсыз ауызша білдіріп тұрғанда да сөздерді ұндастік зандарына бағындырып, қиуластырмай, олардың жазудағы көрінісін кез алдарына келтіріп, жазылған түріндегідей айта-тындықтарының қуәсіміз. Мұны әсіресе радио мен теледидар-дан хабар жүргізетін дикторлар мен журналист- тілшілердің, ауызша интервью берушілердің, сөзге тартқан адамдардың сөздерінен жиі кездестіреміз. Теледидардан әр алуан хабар жүргізетін дикторлардың *шекара*, *қыркүйек*, *қол қойды* деп қы-қылап тұрмай, *шегара*,*қыргүйек*, *қолгойду* деп дұрыс айтатын-дары кемде-кем.

Жазудың ықпалын құшті қабылдайтындар лекция оқытындардың, тіпті мектеп мұғалімдері мен жоғары оку орында-ры оқытушыларының, кейбір әншілердің, драма актерлерінің арасынан да табылады. Бұл сияқты жазудың ықпалымен тілдің табиғи зандылықтарының бұзылуының бірнеше себебі бар: алдымен, орфоэпиялық нормалар мектепте дұрыс үйретілмей-ді, дәлірек айтсақ, бұған көніл бөлінбейді, баланың білімін бағалауда сөзді дұрыс-бұрыс айтып тұрғаны ешбір есепке алынбайды; жоғары оку орындарының қазақ бөлімдерінде, тіпті олардың филология, журналистика факультеттерінде тіл мәдениеті пәні, оның ішінде тілдік нормалар дегендер, сірә, мұлдем жүргізілмейтін болу керек, сабак кестесінде бұл пәндер бар болса да, оған мән беріп, дұрыс жүргізетін маман-дар да жоқ болар.

Екінші фактор – сөздерді нақла-нақтап, қалай жазыл-са, солай оқып (айтып) берсем, тындаушыларға анығырақ, түсініктірек шығады деген жансақ ой да орын алуы мүмкін. Әр сөзді жазылғанынша айтқанда олар анық, түсінікті шығуы мүмкін, бірақ есесіне сөздер сіресіп естіледі, тілдің ұнді сазы жоғалады, бояуы солғынадайды.

Сөйтіп, жазу және дыбыстау дегендерді айырып таныту, әрқайсысының тіл мәдениеті үшін мәнін білу, бірін екіншісінің құрбандығына шалмау керектігін білетін кез туды деуіміз ке-рек.

2) Кезінде сөздерді дұрыс қолдану, сөйлемді дұрыс құрасыра білу, сауатты жаза білу сиякты лексикалық, грамматикалық, орфографиялық нормаларды үйретуге, насиҳаттауға үлкен мән берілді, талап етілді, ал осындай қажет нормалардың тағы бірі – орфоэпиялық сауаттылық бізде әлі әлеумет назарына ілікпей келеді, қалың жүртшылық сөзді дұрыс дыбыстаудың тәртібі, заңдылығы болады дегенді тіпті білмейді де. Қалың көпшілік тұгіл, көптеген мектеп мұғалімдерінің де бұл сала-дағы таным-білімі аз ба деп қалдық. Жақында мектеп окулықтарын шығарып жатқан баспа редакторларының бірі маған мынадай адам нанғысыз бір әңгімені айтты: «Оқулықтың бір авторы: Сөзді дұрыс айту нормасы деген не? Оны ғалымдар шығарып жүр. Мектеп үшін керегі жок» дегенде қатты шошы-дым». Әрине, бұл – тек шошитын емес, тіпті айтып жеткізуге болмайтын сауатсызың, өресіздік. «Егер оқулық жазып жүрген мұғалім «тілдік норма» дегендерді осылай танитын болса, ағартушыларға әбден жарыған екенбіз, мектеп мұғалімдері тіпті еш нәрсе оқымайтыны ғой, бір кезде училищеде не институттарда шала-шарпы алған білімімен қалып қояды екен ғой» деген ой келді маған. Әрине, барлық мұғалім дәл мұндан болмас, дегенмен ең мықты деп оқулық жазуға сенген маманның сөзі жоғарыдағыдай болса, тіл, оның мәдениеті, тілдік норма-лар, олардың түрлері, бұл нормаларды мектепте оқыту, үйрету дегендер мүлде қалып келе жатқан майдан деуге болады. Де-мек, сейлеу үстінде сөздерді бір- бірімен дыбысталуы жағынан үндестіріп, «сындырып», құлаққа жағымды, тілге ынғайлы етіп айту туралы нормаларға көпшілік назарын аудартуды, әсіресе балабакшадан бастап, мектептерде, жоғары оку орын-дарында мықтап қолға алу керектігі – қазақ тілі мәдениетін көтерудің басты міндеттерінің бірі.

3) Орфоэпиялық нормаларға баулу, ол нормаларды арнайы үйрету жұмыстары – өз дәрежесінде емес.

Баланың тілі, ең алдымен, үй ішінде, отбасында шығады, баланы тілге үйрететін тұңғыш ұстазы – ата-анасы мен үй ішіндегі өзге де үлкендер болады. Сейлеу үстінде сөздерді бір- бірімен үндестіре айта білуге баулуда балаға ертегі, әңгімелер айтып (оқып) берудің мәні зор. Мұнда орфоэпиялық нормаларды сактауға үлкендер мейлінше көніл қоюға тиісті. Балаға

ертегі, әңгімелердің мазмұны ғана емес, оның тіліндегі үннің музикалығы қатты әсер етеді, үйқасы мен ыргағы әсем болып келген өлең шумактарын, қызықты, әсем тілді ертегі-лерді жаттап алуға құштар болады. Бізде, қазақ қоғамында, отбасылық тәрбиеде де орны толмай жатқан жайттар баршылық.

Жас бұлдіршіндердің ана тілін жақсы менгеруіне, оның әсіресе дыбыстық заңдылықтарын бұзбай, дұрыс қолдануына тәрбиелейтін бастанқы орын – балабақшалар. Мұндағы тәрбиешілер тек баланы бағып-күтүшілер емес, тәлім-тәрбиенің өзге түрлерімен катар тіл үйрететін, тілдің дұрыстығына баулитын нағыз ұстаздар болмақça керек. Әзірge азын-аулақ болса да, бұлдіршіндерге арналған өлең, тақпак, ертегілерді дұрыс жаттатқызу, дыбыс үйлесімін келтіріп айтқызу – тәрбиешінің педагогтік бірінші міндеті. Әрі қарай, әрине, бұл жұмысты мектеп жалғастырады. Мектепте, біздің байқауымызша және бағдарламалармен, оқулықтармен танысқанымызға қарап, орфоэпиялық заңдылықтарды оқыту өз дәрежесінде емес деп табамыз. Баставыш кластардан бастан қазақ тілі сабактарында, кейінірек грамматика бағдарламасы бойынша қазақ тілінің үндестік заңдарын өтеді, баптарға таратып жаттайты, окушы ереженің өзін жап-жақсы айтып береді, бірақ оны іс жүзінде қолдануды білмейді. Сөздерді дұрыс айтуға мектепте тек қазақ тілі сабағында ғана емес, барлық пәндердің сабактарында да үйрете беруді, күт айтса, түзетіп отыруды қолға алса, бұл саладан бүгінгі кездесіп келе жатқан кемшіліктер кеми түсер еді.

Орфоэпиялық нормаларды үйренудің ерекшелігі сонда – олар негізінен «теория жүзінде» білу, яғни оку, жаттау арқылы емес, құлақпен тыңдал үйрену арқылы игереді. Бұл ретте күнде тыңдайтын радионың, күнде қарайтын теледидардың және сахнадан естілетін сөздер мен әндердің рөлі айрықша. Сөзді дұрыс айтуға баулитындар нағыз осылар: радио, теледи-дар қызметкерлері, сахна қайраткерлері. Дыбыстар гармония-сын сақтау – сахна мен радио, теледидар сөздеріне мамандық тұрғысынан қойылатын талаптар. Актерлер мен әншілерді, жалпы сахна қайраткерлерін дайындаудың оку орындарында да тіл мәдениеті, сауатты жазу, сөзді дұрыс дыбыстау нормалары деген пәндерді міндетті түрде енгізуі талап етер едік. Тек актерлер емес, режиссерлер де, көркемдік жетекшілер де

өз мамандықтарының тетіктерін жақсы білумен қатар, қазақ тілінің де сөз сазын дұрыс сақтауды естен шығармаса.

4) Орфоэпия тақырыбының тәжірибедегі күй-қалпын, зандылықтарын танудың өзі кешендер қолға алынғандықтан, оның жеке мәселелерін ғылым нысаны (объектісі) ретіндегі зерттеу жұмыстары да кенжелеп келеді. Бұл іске ғылыми қызыметкерлермен қатар, мектеп мұғалімдері, баспа ісіндеңгілер, баспасөзде қызымет ететіндер де нақты ұсыныстарымен, күнделікті тәжірибеде байқалған жетістік-кемістіктерді көрсетуімен араласса, тіпті орынды болар еді. Бірақ, өкінішке орай, жазудың (емленің) тауқыметін тартып отырған осы топ, әсіресе қазак мұғалімдері, тіл нормаларын сөз етуге мүлде енжар, ынтастыз, дағыланбаған. Ал тіл – тек тіл мамандарының ғана «мұлқі» емес, қалың жүртшылықтың, оның ішінде тікелей тілмен жұмыс істейтіндердің құзырындағы нәрсе. Рас, «Қазақ әдебиеті», «Ана тілі», ара-тұра «Жас алаш» сияқты газет беттерінде, бір кезде араб жазуымен шығып тұратын «Шалқар» газеттерінің беттерінде сөзді дұрыс қолдану, әсіресе бұл орайдағы кемшіліктер, орфография мен орфоэпия тақырыптарына жазылған мақалалар жарияланып тұрды, авторлары – тіл мамандарын былай қойғанда, көбінесе жазушы, журналистер мен өзге де мамандық иелері, бірқатары қазақ сөзінің табигатын, сыр-сипатын жақсы білетін зейнеткерлер. Бірақ осылардың ішінде сөз сазы туралы мақала-пікірлер мүлде аз (біздің әр кезде әр газетте жарияланған 5-6 мақаламыз болмаса, мүлде жоқ деуге болады). Бұл, сірә, көпшілігіміздің орфоэпия проблемасына не тісіміз батпай жатқанын, не сөзді дұрыс дыбыстау дегенге немкүрайды қарап келе жатқанымызды көрсететін сияқты.

Бұл айтылғандардан шығатын бір түйін – қазір қазақ орфоэпиясы нормаларын реттеп баяндау, ережелерін түзу сияқты атқарылған істер бар, бірақ бұл нормалардың кодификация-сы әлі жоқ, яғни ол зандылықтар зандастырылып (окытылып, міндеттеліп, тіпті емле ережелері сияқты ресми түрде бекітіліп) тұрактандырылған жоқ. Сол себептен орфоэпия мәселелеріне мамандар болып және қалың жүртшылық болып назар аударсақ, тілдің бұл қырының да барынша реттеліп, нормалары орнығып, тіл мәдениетіміздің де, сол арқылы жалпы ұлттық мәдениетіміздің де көтеріле тусуі хақ.

СӨЗ САЗЫ

Сөзді дұрыс айту нормалары



Белгілі бір тілде сөйлеу үстінде сөздерді дұрыс дыбыстау заңдылықтарын айқындаپ, оларды қалың жүргітшылықта, әсіресе жастарға үйретуде оқу орындарымен қатар, радио мен теледидардың және сахна өнерінің, сондай-ақ баласын ана тілінде тәрбие-лейтін әрбір ата-ана мен отбасындағы өзге де ересектердің рөлі өте зор. Қазақ тілінде сөз қагидаларын жақсы білу мүгалімдер мен лекторларга, дикторлар мен актерлерге өте-мөте қажет. Бұл құрал осы қажеттікіті өтешу түрғысында сөздерді қазақша дұрыс дыбыстау заңдылықтарын түсіндіреді. Сонымен қатар мұнда сөз сазының көркем әдебиет пен өнердегі маңызы, қазақша сөзді дұрыс айту нормаларының қазіргі қолданыстағы жай -куйі гылыми негізде әрі тәжірибелік мақсатта кеңінен сөз болады.

Бұл еңбек мектеп мүгалімдері мен жогары оқу орындарының студенттеріне, сахна қайраткерлері мен радио, теледидар дикторларына және ана тілінің сөйлеу мәдениетіне көңіл аударатын қалың көпшілікке арналады.

ҚАЗАҚ ӘДЕБИ ТІЛІНІҢ АУЫЗША ТҮРІ ЖӘНЕ ОНЫҢ ҚОЛДАНЫЛУ ӨРІСІ

Бұл күнде қазақ тілі білім мен ғылымның, әдебиет пен мәдениеттің, әлеуметтік-саяси өмір мен өндірістік-шаруашылық тірліктердің, күнделікті тұрмыс-тіршіліктің барлық саласына қызмет ететін жоғары сатыда дамыған әдеби тілге айналып отыр. Ол – мемлекеттік дәреже (статус) алған ұлттық тіл. Ұлттық әдеби тіл болғандықтан, қазіргі қазақ тілі – қоғамның барлық мүшелеріне бірдей және Қазақстан жерінің бүкіл аймағында біркелкі қолданылатын, сондай-ақ қазақ жерінен тыс өлкелерді мекендеген қазақтар үшін де дағдылы тіл, яғни баршаға ортақ жазу, сөйлеу тәжірибесі бар тіл.

Мемлекеттік тіл дәрежесі қазақ әдеби тілінің бүгінгі қоғамға қызмет ету өрісін көңейте тусты: бұл күнде қазақ тілі – ең ал-дымен, оқу-ағарту, тәрбие құралы, одан соң сан салада дамып, жоғары деңгейге көтерілген ұлттық көркем әдебиеттің тілі, мазмұны мен мақсаты түрлене түсken баспасөздің тілі, енді өрістей түсken ғылым тілі, республика қолданатын занбар мен ресми іс қағаздары тілі, театрлар мен радионың тілі, кино мен теледидардың тілі.

Сонымен қатар, әрине, қазіргі қазақ тілі – бүгінгі адамдардың күнделікті тұрмыс-тіршілігінде өзара ұғынысатын ауызша сөйлеу тілі мен ауызекі сөйлесу тілі. Қысқасы, қазақ тілі – бұл күнде республикамыздағы 7-8 миллионға жуық, ал жалпы дүниежүзіндегі 10 миллионнан асатын қазақ халқының ана тілі.

Әдетте ұлттық әдеби тілдер қоғамға жазба және ауызша түрде қызмет етеді. Жазба әдеби тіл жазба әдебиеттің өмір сүруі мен дамуына, оның түрлері мен өрісіне байланысты болғандықтан, ол көркем сөз (керкем әдебиет) пен баспасөздө, ғылым сөзі мен оқу-тәрбие сөзінде, ресми құжаттар мен көңсес-іс қағаздары тілінде көрініс табады. Қазіргі күнде бұлардың көнінен өріс ала бастауы жазба тілдің әр саладағы (стильдегі) занылықтарын орнықтырып, оның әлеуметтік қызмет ету пәрменін қүшейтіп отыр. Бұдан біз жазба әдеби тілдің қоғам өміріндегі рөлі мен маңызы зор екенін аңғарамыз.

Ал әдеби тілдің ауызша түрдегі қызметі бүгінгі қазақ қоғамының тіршілік-тынысы үшін бұдан еш кем емес деп

тану керек. Өйткені мұның да қолданылар өрісі кеңеңе ба-стады. Қазақ тілінің мемлекеттік тіл дәрежесіне ие болуы әр алуан жиын, жиналыс, мәслихаттардың қазақ тілінде жүргізуіне жол ашты; саясат, ғылым, өнер, шаруашылық т.б. тақырыптарына арналған лекция-әңгімелердің қазақ тілінде кеңірек өткізілуін күн тәртібіне қойды; балабақшаларда қазақ бүлдіршіндерін ана тілінде тәрбиелеуді қолға алуға мүмкіндік берді; қазақ мектептерінің көбейіп, оларда оку-тәрбие жұмыстарын ана тілінде жүргізуге, жоғары оку орындарының барлық факультеттерінде дерлік (әзірге тіпті түгел болмай, көпшілігінде-ақ болсын) қазақ бөлімдері ашылып, оларда білім-ғылымның көптеген салаларынан қазақ тілінде лекция-лар оқылып, сабак жүргізуіне кеңінен жол ашты; радио мен теледидардан қазақ тілінде берілетін хабарлар сағаты көбейіп, бұл каналдар бойынша қазақша сөйлейтіндердің жиірек көріне бастауын, ұлттық саҳна өнерінің түр-түрінің дамуын қамтамасыз етті. Осылардың баршасы қазақ тілінің ауыз-ша түрін, яғни ауызша қолданылуын, айтылмақ ойды ауызша түрде білдіру тәжірибесін жандандырды.

Бұлардың ішінде радио, теледидар, театр, киноның орындары айрықша, өйткені бұлар ең кемі жүздеген, әйтпесе мыңдаған, кейде тіпті жұз мыңдаған адамдарды қамтиды. Сахнадан айтылатын сөзді бір спектакльдің өзінде жүздеген адам естиді, бір концертте айтылған ән мен көркем сөзді де жүздеген, кей-де мыңдаған адам тыңдайды. Ал радио мен теледидардан және қазақша дыбысталған кинодан ауызша айтылған сөзді мыңдаған, жұз мыңдаған адамдар есітіп, тамашалайды. Демек, жазба тіл сияқты, ауызша тілдің де қоғамдағы орны зор екенін өмірдің өзі көрсетіп отыр.

Мемлекеттік ұлттық тілдің баршага ортақтығы осы тілді қолдануда белгілі бір зандылықтардың, яғни нормалардың болуын талап етеді. Тілдік нормалар оның барлық қаттауында: сөздік саласында (лексикасында), грамматикасында, дыбыстар жүйесінде, стильдік-көркемдік тәсілдерінде болуы – шарт. Норма сондай-ақ тілдің қолданылу түрлерінде де, яғни жазба және ауызша түрде қызмет ету барысында да орын алуы қажет. Сондықтан ана тіліміздің жазба түрімен қатар, ауызша түріне қойылатын талаптардың да күшейе түсі – занды.

Демек, қазақ әдеби тілінің барша занұлықтарын, оның ішінде ауызша сөйлеу, әсіресе шаршы топ алдында сөз айту нормаларын бұзбай, дұрыс пайдалануда, тек пайдалануғана емес, ол нормаларды көпшілікке үйретіп, таратуда, орнықтырып, бекітуде балабақша тәрбиешілерінен бастап, мектеп мұғалімдерінің, институт, университет оқытушыларымен қатар, қазақ сахна қайраткерлерінің, радио, теледидар дикторлары мен хабар жүргізушілерінің, әншілер мен эстрада шеберлерінің міндеттері мен қызметтері орасан зор екенін айту керек. Әрине, ана тілін игеру, оны дұрыс жұмсай білу отбасынан, баланың ата-анасы мен айналасындағы үлкендерден басталуы керек екендігі – даусыз ақыят.

Тәрбиешілер мен мұғалімдер – жасөспірімдерді тек тәрбиелеп, білім берушілер ғана емес, сонымен қатар тіл үйретушілер, тілдің байлығы мен әсемдігін бала бойына сіңірушілер. Ал актерлар мен әншілер – халыққа тек өнер көрсетіп, эстетикалық ләззат берушілер ғана емес, сонымен қатар ана тілінің құдіретін танытушылар. Дикторлар мен комментаторлар – радио мен теледидардан тек әр алуан хабар берушілер ғана емес, сонымен қатар сөзді дұрыс айта білуді, дұрыс дыбыстай білуді үйрететін ұстаздар болуға тиіс. Демек, бұл топтардың әрқайсысының төл қызметтерімен қатар, тілге қатысты міндеттерінің де әлеуметтік мәні бар екенін жеке-жеке баса айту қажет.

Бұл жұмыстағы негізгі тақырып қазақ сөзін дұрыс айту занұлықтары жайында болғандықтан, аталған топтардың жалпы тілге қатысты оны үйрету, сөздік байлығын молықтыру, грамматикалық тұлға-тәсілдерді дұрыс қолдана білуге бау-лу, ана тіліміздің көркемдік-бейнелеуіш құралдарын игерту сияқты мәселелерін емес, тек қана қазақша сөйлегенде (не дауыстап оқығанда) сөздерді табиғи түрде дұрыс дыбыстай білуге қатысты жайттарға ғана назар аударамыз.

Ең алдымен, баланың тілі үй ішінде, отбасында шығады, демек, баланы ана тіліне баулуда, оның ішінде сөздерді дұрыс дыбыстай білуге үйрететін тұңғыш ұстазы – ата-анасы және үй ішіндегі өзге де үлкендер екені мәлім. Сөйлеу үстінде сөздерді бір-бірімен жындастыра, үйлестіре айта білуге, қазақ тілінің өзіне тән дыбыс занұлықтарын сақтап сөйлеуге ба-

улуда балаға ертегі, әңгімелер айтудың мәні зор. Үлкендер ертегі, әңгімелерді баппен мәнерлеп, яғни үндестік зандарын сақтап, сөздерді қиоластырып айтуга мейлінше көңіл қоюлары қажет. Сірә, өсіп келе жатқан баланың таным-білімдік талабы мен психологиясына әңгіме, ертегілердің мазмұны ғана емес, оның тіліндегі үннің құлаққа жағымды, музыкалығы да қатты әсер ететін сияқты. Баланың өлең сөзге құштарлығының сыры осында жатады. Үн (дыбыс) гармониясы – адамның жан дүниесі қажет ететін зандылықтардың бірі. Сондықтан жас балаға тек прозамен ұсынылған әңгіме, ертегілерді емес, өздеріне арналған өлеңдерді оқып беруге ұмтылу керек. Ол өлеңдерді балалар жатқа айтқанда, сөздерін дұрыс дыбыстауына назар аударып, кате тұстарын түзетіп отыруды қазақ ата-аналары мен өзге үлкендері де дағдыға айналдырыса. Шынына келсек, отбасылық тәрбиенің осы түрі бізде айтартықтай емес екенін мектеп табалдырығын жаңа аттаған балалардың сөйлеу тәжірибесінен анғарамыз. Сірә, үй ішінде баланың сөзді қалай айтудына зер салып, түзетіп отыру машығы бізде жоққа тән.

Айталық, бала өзінің құрбысын «қалқан құлак» деп мазақтағанда, әр сөздің жеке-жеке күйіндегіше екінші сөзді құбы-сынан бастап, алдыңғы сөзді һә дыбысына аяқтап, қалқанқұлақ, қалқанқұлақ деп жатса, «Жок, балам, сен оны құлағы үшін мазақтама, ал мазақтайды екенсің, онда қалқанқұлақ деме, бұл сөзді сен қалқаңғұлақ деп айт» деген сияқты түзету жасап жат-пайтын тәріздіміз.

Әрине, ол үшін қазақ тіліндегі сөздердің дыбыстары бір-бірімен қиоласып, үндесіп айтылатын зандылықтарын алдымен ересектердің, ата-аналардың өздері жақсы білулері керек (бұл құрал сондықтан осы мақсатты өтеуге арналады).

Осы талаптар балабақша тәрбиешілеріне де қойылады. Олардың «Мәнерлеп оку» сияқты тәрбие сафаттарында көнілді тек оқып беруге ғана аудармай, сол оқыған мәтіндегі сөздердің дұрыс айтылуына зер қою абзал. Бұлдірішіндерге өлең-такпақ айтқызығанда, олардың тек тілі келмейтін дыбыстарын түзету емес, ең алдымен, сөздерді қиоластырмай, бөлек-бөлек айтудары сияқты қателіктеріне де көңіл аудару қажет. Бүгінгі қала балалары әр нәрсеге үйренуді отбасынан гөрі балабақшалардан бастайды, өйткені ата-аналардың көбі жұмыс істейді,

олардың кешкі екі-үш сағат баламен бірге болған уақыттары күн ұзакқа балабақшада өткізген тәрбие-сабакпен тенесе ал-майды. Оның үстіне, жоғарыда айттық, әзірге біздің жас ата-аналарымыздың, оның ішінде әсіресе қала тұрғындарының өздері қазақ тілінің сөзді дұрыс айту нормаларын, ғылыми тілмен айтқанда, орфоэпиялық ережелерін жақсы білмейтіндіктерін ескеру қажет. Сол себептен ана тілімізді үйретуде алғашқы үлкен жук балабақша тәрбиешілеріне түседі.

Бұл орайда балабақша тәрбиесіне ұсынылатын оқу-методикалық құралдарда қазақ тілінің орфоэпиялық занылыштарына арнайы назар аударылса, тіпті бүлдіршіндерге арналған кейбір өлеңдердің дұрыс айтылу (окылу) үлгісін қоса көрсетіп отырсақ, артық болmas еді. Мысалы, балабақшаларда оқуға арналған бір жинақта («Оқып, ойнап, ән шырқайық», 1983) берілген «Бұл қалай?» деген 8 жолдық өлеңнің мәтіні мынау:

Аппақ гүлден
Қызыл алма өседі.
Кара бұлттан От
шығады деседі.
Аппақ гүлден
Ақ бұлт неге
өнбейді? Бұлт ішінде
От қалайша
сөнбейді?

Жазуда осылай берілген бұл өлеңді тәрбиеші балаларға былайша оқып беруі керек:

Әппақ гүлден
Қызыл алма өсөді.
Кара бұлттан От
шығады деседі.
Әппақ гүлдөн
Ақ бұлт неге
өмбөйді? Бұлт ішінде
От қалайша
сөмбөйді?

Осылайша оқығандағанда өлең құлаққа жағымды, тілге (айтуға) женіл болып шығады. Мұны бүлдіршіндер жаттап алғанда, жазылуынша емес, осылайша оқылуынша жаттауға тиіс. Бұл мәтінде еріндік дыбыстардың үндесуіне және **б** дыбы-

сынан бұрын тұрған и дыбысының м болып айтылатындығына (өсөді, өмбөйді, сөмбөйді) көніл бөлінеді.

Тағы бір мысал. 5-6 жастағы балаларға арнап, Тұманбай Молдағалиевтың «Көл» деген шағын өлеңің ұсынылған, оны ба-лалар былайша айтып жаттаса:

Жатыр әсем көл тұнүп,
Көзүндей жас ботаның.
Құшақтаймын
толқұнын, Құуанышқа
батамын. Жағадағы тал
гұрақ Өзүн содан көрөді.
Қозұлардай жамырап,
Құстар үшүп келеді.
Күлүмсүреп күн гүндүз,
Көг аспанды шолады.
Кешке ғарай көб жұлдұз
Кеудесіне қонады.
Әлдилейді майда жел,
Таң нұрланыб атады.
Тербетіліп айна ғөл
Жерде аунап жатады.

Мұнда *тұнүп*, *көзіндей*, *тал құрақ*, *өзін*, *көреді*, *қозылардай*, *үшүп*, *күлімсүреп*, *күн күндіз*, *көк аспанды*, *кешке қарай*, *көп жұлдұз*, *нұрланып атады*, *айна көл* деп жазылған сөздердің өлең тексінде келгендердегі дұрыс айтылуы (окылуы) көрсетілді. Егер тәрбиеші өлеңнің осы көрсетілген тұстарын жазылған түрінде оқыса, ол сөз сазынан үлкен қате жібереді, ейткені мұнда еріндік дыбыстар ұнdestігін де, қатаң дыбыстардың ұяңдайтын сәттерін де ескеру қажет.

Балаларға жасы өсінкіреген кезде (5-6 жастарында), әсіреле мектеп жасында Абайдың табиғат туралы немесе «Аттың сыны» сияқты өлеңдерінен үзінділер оқып, жаттатуды дағдыға айналдыру қажет, ейткені Абай өлеңдері әуенде (музыкалы) бо-лып келеді, ол әуенде бұзбас үшін, өлең сөздерінің бір-біріне ұндетсін сазын сақтап айту керек. Мысалы, «Жаз» деген өлеңінен мына бір үзіндіні былайша оқыған дұрыс (бір деммен айтылатын сөздерді қосып жібердік, ал жазуда бұлар түбірлері сақталып, бөлек-бөлек жазылады, мысалы, *көшип ауыл*, *үшүп тұрса* т.т.):

Жаздыгүн шілде болғанда,
Көгорай шалғын, бәйшешек
Ұзарыбөсүп толғанда.
Күркүрөб жатқан өзенге
Көшүбауыл конғанда.
Шұркұраб жатқан жылқының
Шалғыннан жонұ қылтылдап.
Атайдырлар, бійелер Бүйүрү
шығып, ыңқылдап, Сұда
тұрғып, шыбындаң,
Күйрұғұмен шылпылдап.
Арасында құлқұнтай Айнала
шауұп бұлтұлдап. Жоғары
төмөн үйрекқаз Ұшұптұрса
сылпылдап.

Бұл үзікте еріндік үндесуімен келген сөздердің шоғырланып келуі өлеңнің бірыңғай дыбыс үнін сақтауды, сол арқылы белгілі бір әуезben айттылуын қажет етіп тұр. Бұл әуенде сақтамасақ, өлеңнің музыкалық бояуы жоғалып, құлаққа түрпідей тиер еді. Міне, осы жайттарды мектепке дейінгі бала тәр-биесімен айналысатындар ата-аналар мен балабакша тәрбие-шілерінен бастап, даярлық кластардың мұғалімдері, тіпті 1, 2-кластарда сабак беретіндер, оларға арнап оқу-методика-лық құралдар ұсынатын авторлар жақсы біліп, ескеріп, көңіл аударулары өте-мөте қажет.

Мектепке дейінгі бала тәрбиесінің ана тілімізде жүргізілуі енді ғана қолға алына бастағандықтан, әлі көп нәрсе жоқ екендігі мәлім. Бұлдіршіндерге казақ тілінде оқытын өлеңдердің, айтатын ертегілердің өте аз екендігі, кейбіреулері баланың жасына, танымына, психологиясына сай еместігі, дидактика-лық материалдардың, методикалық құралдардың кемшіні – осылардың барлығы – сөз жоқ, баланы ана тілімізде тәрбиелеуде салқының тигізетін жайттар. Дегенмен баланы қазақ тіліне баулуда бірнеше міндетті қатар атқаруға тұра келеді. Солардың бірі және бүгінгі күнде ақсан жатқан саласы – сөзді дұрыс айту болса, ауызша сөйлеу барысында сөздерді дұрыс дыбыстауға үйретуді бір сәт көңілден шығаруға болмайды.

Адамның тіл үйренудегі, ана тілін жақсы игерудегі келесі баспалдағы – мектеп. Мектептің алдыңғы сатыдан үлкен айыр-

масы – мұнда тілді игеруде тек үлгі көрсетіп, ауызша түзетіп отырмайды, сонымен қатар тіл заңдарын оқытып үйретеді. Ол заңдардың ішінде, әрине, сөзді дұрыс айту қағидалары да бар. **Үндестік заңдары** деп аталатын құбылыстың мектепте төмөнгі кластардан бастап оқылатыны мәлім. Бірақ тағы да, өкінішке орай, ережені оқытып жаттатуымыз бар да окушылардың сөйлеу үстінде оларды қалай сақтайтынын қадағалап отыру бар. Міне, осыған қөніл бөлүшілік шамалы тәрізді. Қай пәннен болса да, окушы тақырыптың мазмұнын толық, бұзбай айтып берсе, баға көбінесе осы дәрежеге қарап қойылады, ал сол тақырыпты баяндау барысында сөздерді қалай дыбыстап тұрғаны көбінесе ескерілмейтіндігі байқалады. Оған он жыл-дық қазақ мектебін, төрт-бес жылдық институттар мен универ-ситеттердің қазақ бөлімдерін бітірген диктор, kommentator, журналистердің көшпілігінің үндестік заңдарын сақтамай,

бір қатар, бұл күнде, қол қойды, Жез қазған деп қа-қақалап тұратындары күә.

Қазақ мектептерінде әлі қүнге дейін тіл мәдениеті де-ген проблемаға жеткілікті мән берілмей келеді. Қазақ тілін оқыту бағдарламасында бір кездерде «Тіл мәдениеті» деген тақырып енгізілгенмен, кейін ол алынып тасталыныпты, яғни бұған арнағы сағат бөлінбей, оның міндеті «Тіл ұстарту» де-ген бағдарламаға жүктелген сияқты. Бірақ оқулықтардағы «Тіл ұстарту» дегенге берілген материалдар бірер беттік қана екі-үш тапсырмадан тұрады (мысалы, 8-класс оқулығын қараңыз), түсіндіру деген жоқ. Сонда окушы тіл ұстартатын, яғни тіл мәдениетіне баулытын бұл тапсырмаларды (онда да бұлар мақсатқа сай келіп жатса) қалайша орындаіды? «Тіл ұстарту» бөлігінің бағдарламада көрсетілген міндеті дұрыс-ак: «Мектептегі қазақ тілінің жүйелі курсы негізінде жүргізілетін тіл дамыту жұмыстарында окушының сөздік корын, сөз байлығын толықтыру, ой ерісін кеңейту, дамыту және өз ойын анық, дұрыс етіп ауызша, жазбаша жеткізе білу жолдарына баулу мақсаты көзделеді» дегенді оқымыз. Бірақ әңгіме – осы мақсаттың орындалу сапасында, амалдары мен әдістерінің әлсіздігінде, тіл мәдениетіне баулудың нақты көрнекі, матери-алды негізде жүргізілмейтіндігінде және осы шараның тек тіл дамытуға арналған сабактардаған емес, 10-11 жылдық оқу

процесінің бүкіл барысында, барлық пәндерді оқыту үстінде үзбей қолданылмайтындығында.

«Сөз мәдениеті», «дұрыс сөйлеу мәдениеті», «сауатты жазу дағдысы» дегендерді тек бөлінген сафаттың бойында ғана үйреніп шығуға болмайды. Тіл мәдениетін, сөзді дұрыс қолданып, дұрыс дыбыстаپ, дұрыс жазу дағдысын мектеп табалдырығын аттаған күннен бастап, оны бітіргенге дейін (тіпті одан кейін де) үзбестен игертуді тек тіл мен әдебиет пәні мұғалімдері ғана емес, барлық пәннен сабак берушілер сезініп, күш жұмысағанда ғана ана тіліміздің табиғи қасиетін, ғасырлар бойы жиналған мол қазынасын, бабалар қалдырған көркемдік құдіретін сактай аламыз. Әсіресе бүгінгі осал тұсымыз – сөйлеу үстінде сөздерді дұрыс айтпау, яғни орфоэпиялық нор-маларды білмеу, оған мән бермеу сияқты кеселдерден арылуға ең алдымен мектеп күш салуы керек. Ол үшін сөзді сазына келтіріп айта білуді мұғалімдердің өздері жақсы менгерулері қажет болса, әзірге бұл саладан олардың қолдарында арнаулы құралдар да шамалы. Ұсынылып отырған құрал мұғалімдердің осы қажеттігін өтейтін орфоэпиялық анықтағыш болмақ. Бұл ережелер – тек қазақ тілі пәнін оқытатындар үшін ғана емес, барлық пәндердің мұғалімдері үшін де қолдан түсірмес күнделікті көмекші құралы болуы тиіс.

Адам орфоэпиялық нормаларды, олар жөніндегі ережелерді негізінен жаттау арқылы емес, құлақпен тыңдаپ, үйрену арқылы игереді. Бұл ретте күнде тыңдайтын радионың, теле-дидар үнінің және сахнадан естілер сөздер мен әндерді і ң орны айрықша. Бұлар сөйлеу барысында сөздерді дұрыс айтуға үйрететін нағыз ұстаздар болуға тиіс. Сахна қайраткерлері мен радио, теледидар қызыметкерлеріне тілге келгенде қойылатын талап – айтылмақ сөздің (бұл жердегі «сөз» деп отырғанымыз жеке сөздер емес, жалпы айтылмақ ой, хабар т.т.) анық және әсем болуы. Анықтықты актерлер, әншілер, дикторлар, негі-зінен, сөйлеу техникасын жетілдіру мен сөз логикасына қоңыл қою амалдары арқылы қамтамасыз етсе, әсемдік пен әсерлілік, негізінен, сөзді дұрыс әрі көркемдеп айту арқылы жүзеге асы-рылады. Ал құлаққа естілер сөздің көркем айтылуы дегеніміз – оның үнді, әуезділігі (музыкалылығы). Үнділік сөйлеу үстінде дыбыстардың бір-бірімен үндесіп, тілдің табиғи дыбыс

зандағына бағынып айтылуы арқылы пайда болады. Дыбыстар әуезін (гармониясын) сақтау – сахна сөзі мен радио, теледидар сөздеріне мамандық түрғыдан қойылатын талаптардың бірі.

Тіл жайындағы әңгіме бүгінгідей арнайы көтерілмеген құннің өзінде де қазақ сахна өнері мен радиосының өмірге келген алғашқы кезендерінде қазақ сөзі бұларда негізінен дұрыс, көркем түрде айтылып келді. Қазақ сахна шеберлерінің алғашқы буындары өз мамандықтары бойынша білім-ғылым-ның теориялық жағын оқып білмесе де, қазақ тілінің ана сүтімен кірген нормаларын іштей түсініп, тілдің табиғи үйлесімін бұзбай айта білген, сөз арқылы жететін өнерді көрерменге (тындаушыға) жақсы ұсына білген. Ал соңғы кезендерде бұл орайда бірнеше объективті-субъективті себеп-термен тындаушыларды да, педагог, режиссерлерді де, әсіресе тіл мәдениетін қадағалауыш ғалымдарды да алаңдатар жайттар пайда бола бастады. Олар:

1) драма актерлері мен опера және эстрада әншілерінің, сондай-ақ радио мен теледидар дикторларының, комментаторларының, жергілікті тілшілерінің, кинодубляж жасаушылардың қазақ тіліндегі дауысты, дауыссыз дыбыстардың үндестік зандаres – сингармонизм занылықтары деп аталатын табиғи гармониясын (үйлесімін) сақтамай, бұзып айтулары;

2) сейлеу үстінде болатын логикалық паузалар, яғни ой екпіні түсken сөздерді сәл кідіріп, бөліп айтуды немесе сөздер-дің мағыналық топтарына қарай қажет жерінде оларды айрық-ша бөліп я болмаса ұластыра қосып айту сәттерін біле бермеу;

3) «қос қанаттың сыңары» деп келген орыс тілінің әсеріне байланысты кейбір қазақ тілі дауыстыларын сәл өзгертіп (орыс тіліндегіше) айту фактісі;

4) әрбір сөйлемнің мағыналық интонациясын тап баса алмағандықтан, оның ішіндегі сөздерді дұрыс айта алмаушылық;

5) казак сөздеріндегі жіңішке дауысты дыбыстарды кейбір әншілердің жуандатып (*айтеуыр, саулем, саулем, саулемсың*) немесе, керісінше, жуан сөздерді жіңішкертіп айтулары (мені сүйген бір әдәм бар) т.т.

Әрине, бұл көрсетілген кемшіліктер мен ағаттықтардың орын алу себептері – біреу емес, бірнешеу. Ең алдымен,

жоғарыда айтылған проблема алдымыздан тағы шығады, яғни күні бүгінге дейін қазақша тіл мәдениетіне, орфоэпиялық норма дегендеге, логикалық екін, логикалық паузаларды дұрыс сақтай білуге отбасы мен балабақшадан бастап, тіпті институт, университеттерге дейін жеткілікті мән берілмей келе жатқандығының салдары сахна, радио, теледидардан айтыла-тын сөзге де кері әсерін тигізіп отыр.

Екіншіден, қазіргі барша шаруамыз жазу арқылы жүретіні мәлім. Актерлар пьесадағы рөлдерін жазылған текст бойынша игеріп, жаттайды, әншілер де шырқайтын өлең текстерімен қағаз арқылы танысады, дикторлар да жазылған тексті алда-рына қойып немесе көз алдында жылжып өтіп жатқан лен-тадан оқып отырады, радио хабарлары да көбінесе жазылған дүние бойынша айтылады (оқылады). Осыдан барып ауызша айтылған тексте жазба дүниенің ізі сайрап тұрады. Бұдан кейбір адамдардың орфоэпиялық ережелерді қашама жақсы біліп тұrsa да, оның көз жадында сөздердің жазылған түрі мықты сақталып, сол қалпында айтуға бейімдеу болатыны байқалады. Оның үстіне әрбір айтуши (актер, әнші, диктор т.б.) аузынан шығатын сөзін тындаушыға неғұрлым анық, айқын, түсінікті етіп жеткізуге тырысады. Мұндайда әдеттегі ауызша сөйлеуге тән интуитивті автоматизмге, яғни сөздің дыбысталуының дұрыс-бұрысын ойламастан, сөйлеу дағдысы бойынша өзінен-өзі дұрыс шығуына (айтылуына) емес, керісінше, осылай айтсам, сөзім тындаушыға анығырақ, түсініктірек жетеді-ау деген ойға жол беріледі. Осыдан барып, әрбір сөзді жеке айт-қандагы қалпынша дыбыстап, *колгойұлды, біргатар, Алматының жаңбыр жсауып тұр* деп жазылуынша айтатын, оқитын дикторларды күн сайын тындаимыз.

Сахна қайраткерлінің орфоэпиялық нормаларды сақтаудыңда жүк олардың өздерімен қатар, актерлер дайындастын оку орындарының педагогтеріне, театрлардың режиссерлеріне, эстрада нөмірлерін даярлайтын көркемдік жетекшілерге артылады. Драма театrlарының режиссерлері тек спектакль қоюшылар ғана емес, сол пьесадағы сөздің, яғни ойдың, идеяның тындаушыға дұрыс, айқын жетуін көздеуши де болула-

ры тиіс, өйткені драма театрының негізгі мақсаты – спектакльдің ұсынбақ идеясын сөз арқылы да жеткізу. Сондыктан сах-на сезінің анықтығы, құлаққа жағымды тиоі – актерлер мен режиссерлерге қойылатын басты талап, негізгі шарт. Бұл та-лап, әрине, эстрада әншілеріне де кинода сөйлейтіндерге де қойылады. Өйткені ән тек мелодиясының әсемдігімен ғана емес, жүрекке жылы тиетін сезімен де қымбат. Бұларға сол сөзді анық, бұзбай жеткізетін тамаша дауысты әнші қосылса, ол ән, ол ария миллиондардың жүргегіне жол табады. Мысалы, кезінде атақты әнші Роза Бағланованы сүйсіне тыңдағандар тек сирек кездесетін әсем үніне ғана емес, қазақ өлеңінің әрбір сезін анық етіп, дұрыс дыбыстап айтқаны үшін де мейлінше тәнті болатын.

Бүгінгі қазақ сахна тілінің мәдениетін көтеруде, ең алдымен, сахна қайраткерлерін дайындастын оку орындары мен театрларда жұмыс істейтін өнер иелерінің қазақ тілінің орфоэпиялық нормаларын жақсы игерулеріне күш салу міндегін арқалайды. Ол үшін актерлік, режиссерлік, әншілік мамандықтарына оқыту, үйрету процесінде қазақ әдеби тілінің зандылықтарын, әр алуан нормалық ережелерін арнайы пән ретінде де, факультатив курстар ретінде де оқытуды мықтап қолға алу қажет. Әрине, бұл үшін арнаулы оку құралдары, методикалық нұсқаулар мен практикалық жаттығу жұмыстары ұсынылуға тиіс. Біздің бұл құралымыз осындан қажеттіктердің бірін өтеуге арналады.

Сөйтіп, ауызша сөйлеудің өзі екі түрлі болады, бірі – күнделікті тұрмыста қолданылатын ауызекі сөйлесу тілі, екіншісі – топ алдында ауызша сөйлеу (орысша «публичная речь»). Жоғарыда көрсетілген салалардың барлығы үлкенді-кішілі топ алдындағы сөйлеуге жатады, яғни жиын-жиналыстарға қатысушылар да, мектеп кластары мен студенттер аудиториялары да, мың-мындаған радио тыңдаушылар мен теледидар тамашалаушылар да, сахна өнерін қызықтаушы көрермендер де – барлығы да «шаршы топ» (публика). Топ алдына ауыз-ша түрде шығатын сөз қалай болса солай, бейберекет айтыла салмауы керек әрі құлаққа жағымды болуы шарт. Басқаша айтқанда, шаршы топқа ауызша ұсынылатын сөздің нәрі (мағынасы) мен сазы (жағымды, табиги үні) болуға тиіс.

СӨЗ САЗЫ, ЯГНИ СӨЗДІ ДҮРЫС АЙТУ (ДЫБЫСТАУ) ЗАҢДЫЛЫҚТАРЫ

Сөз сазыдегеніміз – сөйлеу үстінде (актісінде) сөздердің дұрыс айтылып, құлаққа жағымды естілуі. Ал сөздерді дұрыс айту дегеніміз – тілдің табиғи дыбыс занұлдылықтарын сақтау болып табылады.

Қазақ тілінің, өзге де ұлттық әдеби тілдер сияқты, ек-шешіп, қырланған, тұрақталған, жалпыға ортақ занұлдылықтары, яғни нормалары бар. Ол занұлдылықтардың бір бөлігі сөздерді дұрыс таңдаپ, орнымен жұмсауға қатысты болып келеді, оны лексикалық нормалар деп. атайдыз, енді бір саласы сөздерді бір-бірімен дұрыс байланыстырып, сейлемдерді құрастыра білуге қатысты болып келеді, оны грамматикалық нормалар дейміз. Дұрыс жазу занұлдылықтарын орфографиялық нормалар, ал дұрыс айту (дыбыстау) занұлдылықтарын орфоэпиялық нормалар деп атайдыз. Бұлар – ғылымдағы атаулар.

Соңғы орфоэпиялық нормалар деп отырғанымыз – жоғарыда айтылған «сөз сазы» деген ұғымға қатысты. Бұл нормалардың барлығының да тіл үшін бір-бірінен артық-кемі жоқ, маңызы бірдей. Сауатты, мәдениетті адам үшін дұрыс сөйлеп, катесіз жазу – қандай міндет болса, сөздерді дұрыс айтуы (дыбыстауы) – сондай шарт. Бұл нормаларды берік сақтап, іс жүзінде ұстана білу «тіл мәдениеті» деген үлкен бір әлеуметтік мәні бар құбылысқа, талапқа барып тіреледі. Осыдан барып «тіл мәдениеті» дегеннің ішінен «ауызша сөйлеу мәдениеті» деген саланы бөліп әңгіме етуге болады.

Алдымен, ауызша сөйлеу мәдениеті мен сөйлеу техни-касы дегендер – бір нәрсе емес екенін ескеру қажет. Сөйлеу техникасы сөйлеушінің, яғни актердің, диктордың, мінбeden сөйлейтін шешенінің, кафедрадан сөйлейтін мұғалімнің өз даусын менгеруіне байланысты сөз болады. Адамның өз даусын менгеруі оның тынысына, сөйлеу мүшелерінің қызметтіне, интонацияға, сөйлеу шапшаңдығына (темпоритмге), паузага, дикцияға байланысты болады. Біздің әңгімеміздің өзегі – сөйлеу техникасы емес, сөз сазы, яғни сөйлеу мәдениеті.

Сөйлеу мәдениеті дегеніміз – ауызша сөйлеудің жалпы тіл мәдениетіне қойылатын талаптармен қатар, өзіне тән норм-

маларды сактауы болып табылады. Бұл нормаларға сөйлеу үстінде сөздерді дұрыс дыбыстау, сөздің сазын келтіріп айту тәртібі жатады.

Сөздің сазын келтіріп айту әсіресе шаршы топ алдына шыққандарға қойылады. Шаршы топ алдында сейлеушілердің өзі біркелкі болмайды. Жиналыстарда ойын ауызша білдіретіндер мен жазып алған оқып беретіндер, спектакльдерде ойнайтын актерлар мен табан аузында репортаж жүргізетін журналистер, kommentatorлар, дикторлар мен интервью берушілер – әрине, бірдей емес. Бірқатары – жазылғанды оқитындар болса, енді бірқатары – табан аузында ауызша сейлейтіндер. Бірақ барлығы да – топ алдында шығатындар болғандықтан, олардың ауызша сөйлеу нормаларын, оның ішінде орфоэпиялық заңдылықтарды сактаулары қатаң талап етіледі.

Әдетте актер жазылған пьесаның сөздерін айтады, диктор жазылған материалды оқиды, лекторлар көбінесе жазылған текстке карап сөйлейді. Демек, олар – әдеби тілде дайындалған сөзді ауызша айтып жеткізуілер ғана сияқты. Сырт қарағанда, бұларға тіл мәдениеті жөнінен көп салмақ түспейтін тәрізді болып көрінеді. Ал, шындығында, тілге қатысты ең үлкен талаптың бірі осыларға қойылады. Өйткені сейлеу мәдениетінің бір шарты – жазылған материалды немесе айтылмақ ойды да-уыс ырғағын дұрыс келтіріп, табиги түрде оқып немесе айтып беру, яғни сөз сазын келтіріп дыбыстау болса, бұлардан сол та-лап етіледі.

Сөздің жеке тұрғандағы дыбысталуы мен сөйлеу үстіндегі айтылуы әрдайым бірдей болып келмейді. Сол сияқты сөздердің жазылған түрі мен оның оқылуы да үнемі бірдей түсे бермей-ді. Сөйлеу үстінде немесе жазылғанды оқып беру процесінде сөздер бір-бірімен «тіл табысып», үндесіп, үйлесіп жатады. Сол үйлесімдік үшін сөздердің кейбіреулері бір-екі дыбысын «сындыруға», өзгертуге, кейде тіпті жоғалтуға дейін барады. Мұндай үйлесімдік – қазақ тілінің ғасырлар бойы қалыптасқан табиги заңдылықтары.

Әрбір тілдің өзіне ғана тән дыбысталу ерекшеліктері – сол тілді өзге туыс тілдерден болек дербес тіл етіп тұратын белгілердің бірі. Ол ерекшеліктер сакталмаса, сол тілдің

табиғатына нұқсан келді деген сөз. Мысалы, алдыңғы сөз **а, е, ы**, **і** сияқты дауысты дыбыстарға аяқталып тұрса немесе **р, л, з, й**, үнді **у** (*may, бау* деген сөздердегі) дыбыстарына аяқталған болса, дауыс ырғағы жағынан сол сөзben тұтасып айтылатын келесі сөздің баскы **қ**, **қ** дыбыстары ұяндалап, **ғ**, **ғ** дыбыстарына алмасады. Мысалы, *бала кездे, келе қалды, күні кеше, кез келген, бұл күндері, қол қойды, қаз-қатар, ай қабақ* деп жазылған сөздер *балагезде, келегалды, күнүгеше, кезгелген, бұлғундөрі, қолгойдұқ, қазгатар, айғабақ* болып айтылуға тиіс.

Біріккен сөздердің ішінде де аралық дыбыстары жоғарыдағы көрсетілген түрде келгендері осылайша «сындырылып», яғни **қ**, **қ** дыбыстары ұяндалап айтылады. Сондықтан *Меңді-қызы, Талдықорған, Жезқазған, Жаңақорған, өнеркәсіп, бірқатар, қылқалам* түрінде жазылатын біріккен сөздер *Меңді-ғызы, Талдығорған, Жезгазған, Жаңағорған, өнөркәсіп, біргатар, қылғалам* болып айтылуы керек.

Сөздер аралығындағы бұл дыбыстар көрісінше орналасқан жағдайда да, яғни алғашқы сөз **қ**, **қ**, **п** дыбыстарына аяқталып, бір ырғақпен айтылатын келесі сөз дауысты дыбыстардан басталса, бұл дауыстылар алдыңғы қатаң дыбыстарды «сындырып», жұмсартады, яғни ұяндатып жібереді. Мысалы, *шекара, көк ала, көкөніс, қарап отыр, сатып алдым* сияқты сөздер *шегара, көгала, көгөнүс, қаработұр, сатыбалдым* болып айтылуы – зандылық.

Мектепте казақ тілі бағдарламасының фонетика, грамматика салаларынан «Қазақ тілінің үндестік зандары» деген тақырып етіледі. Тіл білімінде «үндестік заны» дегеннің баламасы ретінде «сингармонизм» деген термин қолданылады. Әдетте дауыс-ты дыбыстың жуан-жіңішкелігі жағынан қосымшаларды өзіне үйлестіруін «сингармонизм» деп атап келдік. Ал, шындығында, сингармонизм – тек дауыстылардың үндесуі емес, сөзді құрап түрған барлық дыбыстардың біркелкі не жуан, не жіңішке болып үндесуі екенін соңғы кездердегі зерттеулер баса айтады¹¹. Оның үстіне бұл үндестік қазақтың төл сөздеріне және ерте-ректе енген кірме сөздерге, олардың бір буынды түрлеріне де,

¹¹ Страй казахского языка. Фонетика. - Алматы: Наука, 1991. - С. 70.

көп буындыларына да тән екендігі көрсетіледі²², яғни сөздің қалай таңбаланғанына қарамастан, ішінде жуан-жіңішке дауысты дыбыс әріптері жазылғанмен, тұтасымен не жуан, не жіңішке дыбысталуы тиіс деп танылуы кажет. Мысалы, *kītan*, *күмән*, *кінә* деп жазылған сөздердегі дыбыстар *kītən*, *күмән*, *кінә* түрінде үндессе, *bıraz*, *bıraq*, *қауіп*, *қазір* сияқты сөздер тұтасымен жуан айтылып, олардағы дыбыстар *быraz*, *быraq*, *қауып*, *қазыр* (немесе *кәзір*) болып үндеседі.

Міне, осы сияқты сингармонизм заңы жазудың ыңғайымен, яғни бір сөз ішінде жуан да, жіңішке де дауыстылардың жазылғанына қарай, өзінің табиғи түрде айтылуын бұзып жіберетін фактісі байқалады. Мұндайда дыбыстау автоматизмі-нен гөрі, сөзді «ойланып» айту жүзеге асады: *қа+зір*, *бір+аз*, *бі+рақ*.

Қазақ тіліндегі сөздер сингармониялық тембріне қарай жалпы төрт түрде үндеседі: олар жуан, жіңішке, еріндік, езулік. Жоғарыда көрсеткеніміз – жуан-жіңішкелікке қарай үндесу, ал еріндік-езулік дыбыстардың бір-біріне ықпалына қарай бола-тын гармония «ерін үндестігі» деп аталады. Сөз басында не-месе сөздің бірінші буынында келген **о**, **ө**, **ұ**, **ү** еріндік дауысты дыбыстар аралас айтылатын фактілері бар. Айталық, *құрұқ*, *кулұмғөз*, *өлөң*, *өнөр*, *өсүм* деп дыбысталуға тиісті сөздерді *құрық*, *кулімкөз*, *өләң* немесе *өлең*, *өнэр*, *өнер*, *өсім* деп айту жиі кездеседі.

Тек үндестік зандары бойынша емес, қазақ тілінің орфө-пиялық зандылықтары өзге сәттерде де орын алады. Мысалы, бір әуенмен (ыргакпен) айтылатын екі сөздің арасындағы (алдыңғы сөздің соңғы дыбысы мен келесі сөздің басқа дыбысы) дауыстылардың бірі «жұтылып» кетеді, дәлірек айтсак, соңғысы алдыңғысын «жұтып» қояды. Мысалы, *Сары арқа* де-ген екі сөз бір әуенмен, яғни қосылып айтылуға тиіс, сондықтан оның дұрыс дыбысталуы – *Сарарқа*. Сол сияқты *келе алма-*

²² Сонда, 73-б.

ды деген күрделі етістік те бір әуенмен айтылатын сөздерден тұрады, оның да орфоэпиялық суреті – *келалмады* болу керек. Бұлардың екеуінде де алдыңғы сөздің соңғы дауыстысы «*тұсіп қалып*», аралық тұста соңғы сөздің алғашқы дауыстысымен екі сөз қосылып айтылады.

Сөздердің жазылған түрі мен (графемамен) дыбысталу (айтылу) сазы бірдей бола бермейтіндігі и әрпімен келген сөздерде де көзге түседі. Анығында, бұл бір таңбамен *ый*, *ий* деген дыбыстар қосындысы (тіркесі) таңбаланады: *сипат* – айтылуда: *сыпат*, *сиыр* – айтылуда: *сыйыр*, *шикі* – айтылуда: *шікі*, *ақ тиін* – айтылуда: *ақ тийін*. Жеке айтқанда и таңбасын жіңішке дыбыстаймыз. Екі-үш (көп) буынды сөздерде келген (жазылған) и әрпін жуан не жіңішке дыбыстастау оңай, ол сол сөздегі өзге дауыстылардың ыңғайымен айтылады. Мысалы, бір *тиын* (акша) дегенде, и-ді сөз ішіндегі *ы*-ға қарай жуан айтамыз: *тыын*, *ақ тиін* дегенде келесі буындағы і жіңішке дауыстыға қарай ий етіп айтамыз: *тиін*. Ал бір буынды сөздерде жазылған

и әрпін айтуда қындық тууы мүмкін. Мысалы, *ми* деп жазылған сөз *мый* ма әлде *мій* ме? Мұндауда осы сөзге іштей қосымша жалғап көріп, егер ол жуан жалғанса («*мыйы+ма* қонбайды», «*мый+ы* жок» дегендер сияқты) *мый* деп айту керек болады. Сондықтан жазылуына қарап, и дыбысының жіңішкелігін еске алып, *мій* деп айтуға болмайды. Сол сияқты *бидай* деп жазылған сөздің алғашқы буынын жіңішке (*бій*), соңғысын жуан (*дай*) дыбыстастау қазақ тілінің дыбыс әуеніне қайшы ке-леді, бұл сөздегі **би** буыны – таза **бый** да емес, сондықтан бо-лар, айтылуда бұл сөз көбінесе *бүйдай* түрінде келеді. Әрине, қазіргі жазуымызда бір әріппен әрі жуан, әрі жіңішке дыбыстар қосындысын таңбалау ұтымды болмай шықты. Әсіреле сөзді буындауда, соған қарай дұрыс тасымалдауда қындық пайда болып отыр. Қазақ тілінің буындау тәртібі (заны) бойынша екінші, үшінші буындар еш уақыт дауысты дыбыстан басталмауы керек, тек дауыссыздан немесе ұнді (сонор) *у*, *й* дыбыстарынан басталуы тиіс: *қа-ла-лық* (*қал-ал-лық емес*), *та-уық* (*тау-ық емес*), *қа-йық* (*қай-ық емес*). Мұны бұдан 80-90 жыл бұрын Ахмет Байтұрсынов жақсы көрсетіп, айтЫп берген-ді³¹.

³¹ А. Байтұрсынов Тіл тағлымы. - Алматы: Ана тілі, 1992.

Ал қазіргі емлеміз бойынша, *сывр*, *қыыр*, *тыын*, *тиін*, *тиіс* де-ген сөздерді қалай буынтаймыз? Дұрыс буындалуы: *сы-йыр*, *қы-йыр*, *ты-йын*, *ти-йін* болуы керек. Ол үшін *сыйыр*, *қыйыр*, *тыйын*, *тийін* деп жазылуы керек еді. **и** дыбысының бір буын-ды сөздерде жуан не жінішке айттылының (яғни бұл әріптің **ый** немесе **ій** деген дыбыстар қосындысын таңбалауының) сез мағынасын айыруда ұлken мәні бар. Сол себептен қазіргі емле ережелерімізде ескерту (ауытқу) ретінде *тый/ти*, *сый/си* де-ген сөздерді осы көрсетілген түрінде жазылады деп көрсетіп келеміз. Қалған тұлғалардың бәрінде **и** әрпі жуан дыбыстың да, жінішке дыбыстың да таңбасы болып жазылатындықтан, бұл әріппен келген сөздерді дұрыс айтуда ұқыптылық қажет.

Сөз сазына келгенде, мәселе тек үндестік зандарымен не-месе дыбыстар кірігуі (жұтылуы) сияқты құбылыстармен шектелмейді. Ғылыми түрғыдан келгенде, шешіліп (зерт-теліп) жатқан, әлі де қарастырыла түсуге тиісті мәселелер аз емес. Әсіресе тіл-тілдің дыбыстар жүйесін мәшинеге салып, бақылау барысында оны құлақпен есітіп қана талдау әдісі то-льымсыз екендігі айқындалып отыр. Мамандардың айтуына қарағанда, эксперименттік-фонетикалық әдіс дыбыстаудың құлаққа естілмейтін нәзік сэттерін тануға мүмкіндік береді, осының нәтижесінде құлақпен тыңдағанда тұтас дұние болып естілетін кейбір дыбыстар артикуляция (айтылуы) жағынан бір-неше элементтен тұратындығы байқалады екен⁴¹. Сөздің жеке түрғандағы дыбыстық құрылымы мен фразадағы құрылымында айтарлықтай өзгешелік бар екендігі тек қазақ тілі бойынша емес, өзге тілдердің материалдары бойынша да дәлелденүnde. Зерттеуші Мұхаметжан Исаев қазақ тілінде сөздердің сөйлем ішінде орналасуы (айналасы) олардағы дауыстылардың айты-луына әсер етеді дейді⁵².

Қазақ тілінің дыбыстық жүйесін зерттеуде дифтонгоидтық деп аталатын құбылысқа ерекше назар аударылады. Бұл – **е**, **о**, **ө** сияқты дауыстылардың алдында **й**, **у** деген қосамжар дыбыстардың айтылуы (естілуі). Әдетте мектеп оқулықтары мен орфоэпиялық ережелерімізде **е**, **о**, **ө** дауыстыларының

⁴¹ Зиндер Р.Л. Общая фонетика. - Л., 1961. - С. 70.

⁵² Исаев М.К. Фразовые модификации гласных в структуре казахского слова // Вопросы казахской фонетики и фонологии. - Алма-Ата, 1979. - С. 92-97.

қосарланып дыбысталуы, яғни олардың алдында **й**, у қосамжар элементтерінің айқын байқалатын жері сөздің басында ке-луі деп айтылып жүр. Ал қазақ фонетикасын эксперименттік әдіспен зерттеуші маман – Ә.Жұнісбековтың көрсетуі бойынша **е** дыбысының дифтонгоидтық сипаты дауыссыздан кейін тұрганда едауір әлсірейтіндігімен, мұлде жойылып кетпейді екен⁶³, яғни **bes, bet, бер** сияқты сөздердің айтылуында да **е** дыбысы э-ге жуықтап емес, алдынан сәл **й** қосамжар элементі қатысатындығы мәшиненің (эксперименттің) көрсетуінен ғана байқалмайды, тіпті ауызша айту мен құлақпен естуде де байқалады. Мысалы, орыс тіліндегі **bes** (жын, сиқыршы) сөзі мен қазақ тіліндегі **bes** (сан) сөзін әр тілдің өз орфоэпиялық заңымен дұрыс айтып көрініз. Зерттеушілер аталған дыбыстың дифтонгоидтық сипаты орыс тіліне қарағанда, әлдеқайда күшті болғандықтан, қазақ тіліндегі **е** дыбысымен келген кейбір есімдерді орысша таңбалауда оның естілуіндегі дифтонгоидтық сазы (**ие** болып айтылуы) әсер етіп, **е**-мен жазылуға тиісті тұстарында **и** әрпі жазылып кеткенін көрсетеді. Мысалы, Ал-маты маңындағы үстіне тау құлап, жоғалып кеткен *Есік* көлін *Иссық* деп, *Шелек* деген жер атауын *Чилик* деп жазылып жүргенін білеміз⁷¹.

Қосамжар дыбыстар көрінісі, яғни протеза құбылысы **ы**, **і** қысаң дауыстыларының жазылу-жазылмау, соған орай айтылу-айтылмау мәселесін де қамтиды. Бұл мәселеге арнағы назар аударған зерттеушілер (Ш.Сарыбаев, Б.Қалиев, I.Кеңесбаев, И.Ұйықбаев т.б.) қолданылып жүрген емле ережелерімізде сөз ішінде және сөз басында **ы**, **і** әріптерінің жазылу-жазылма-уында қайшылықтар бар екенін айтады. Шынында да, солай. Әрине, сөздің жазылуы, яғни орфография ережелері – өз ал-дына бөлек дүние, бірақ біз әңгіме өзегі етіп отырған сөз сазы-на, яғни орфоэпияға қатысы зор, әсері бар мәселе. Сондықтан емле зандалықтарының бірізді болып келуі сөздерді дұрыс дыбыстауға жәрдемін тигізеді. Дегенмен сөз сазының, яғни графема мен фонеманың әрдайым үйлес келе бермейтіндігі белгілі, сондықтан қалай жазылса, солай оқу мүмкін емес болады.

6 Джунисбеков А. Заметки о фонеме (е) в казахском языке //Вопросы казахской фонетики и фонологии. - Алма-Ата, 1979, с. 90.

7Сонда, 90-бет.

Қазіргі емле ережесі бойынша *сахна*, *рахмет*, *ресми* сияқты бесон сөздің екі буынының ортасына **ы**, **i** әріптерін кірістірмей жазып жүрміз. Сондай-ақ *ерін*, *орын*, *халық*, *ауыл*, *әріп*, *көрік*, *құлық* сияқты сөздерге **-ым**, **-ың**, **-ы** (**-ім**, **-ің**, **-і**) деген тәуелдік жалғаулары жалғанғанда, екінші буындағы **ы**, **i** дыбыстары «сузып түсіп қалады» деп, олардың таңбаларын жазбаймыз: *орным*, *орның*, *орны*, *халқы*, *халқымыз*, *ауым*, *аулың*, *әрпі*, *көркі*, *құлқы* (мінез-құлқы) т.т. Ал осыған ұқсас екінші буыны **ы**, **i** дыбыстарымен келетін сөздердің енді бір тобында тәуелдік жалғаулары жалғанғанда, **ы**, **i** әріптерін түсірмей жазып жүрміз: *дауыл* – *дауылы*, *қайыс* – *қайысы*, *бауыр* – *бауыры*, *ойын* – *ойыны*, *құйын* – *құйыны*. Екінші буыны **ы**, **i** дыбыстарымен келетін сөздер **к**, **к** сияқты қатаң дыбыстарға аяқталған болса және тәуелдік жалғаулары жалғанғанда, бұл қатаң дыбыстар ұяндал кететін болса, ол қунде **ы**, **i** дыбыстары түсірілмейтіндігі тіпті даусыз: *қайық* – *қайығы*, *тулік* – *тулігі*, *қорық* – *қорығы*, *көрік* – *ұстаның* *көрігі*, *қалып* (*форма*) – *қалыбы*. Мұндай сөздерге тәуелдік жалғаулары жалғанғанда, олардың соңғы қатаң дыбы-сы ұяндамаса, **ы**, **i** әріптерін түсіріп жазамыз: «әдемі жүз, шы-рай» мағынасындағы *көрік* сөзі тәуелденгенде, *көркім*, *көркің*, *көркі* болады, «мінез-құлқы» дегендегі *құлқы* сөзі *құлқы* болып тәуелденеді де *құлақтың* *құлғығы* дегендегі *құлқы* сөзі *құлғығы* болып өзгереді.

Дауысты дыбыстарға аяқталатын сөздерге дауыстыдан тұратын немесе дауыстыдан басталатын қосымшалар жалғанғанда я болмаса дауыстыдан басталатын сөз тіркес құрай ұласа айтылғанда, қысан **ұ**, **i** дыбыстары айтуда да, кейде жазуда да түсіп қалады: *жеті+еу* – *жетeу*, *қара+агаш* – *қарағаш*, *сары+алтын* – *саралтын* (айтылуы).

Осы реггегі қысан **ы**, **i** дыбыстары түсіріліп не сакталып жазылатын сөздердің қай-қайсысын айтуда да біздің «сузып түсіп қалады» деп жүрген күбылысымыз – абсолюттік емес, яғни сөздің айтылуында **ы**, **i** дыбыстары мүлде «ғайып» болмайды, олардың сарқыншағы сакталады. Атап айтсак, *ерні*, *халқы*, *ауру*, *уақтылы*, *қаupі*, *ойна* деп жазылған сөздер (айтылар-айтылмас, естілер-естілмес ілеспе-протезалық **ы**, **i** дыбыстарын жақша ішіне алып таңбаласақ) *ер[i]ні*, *хал[ы]қы*,

ay/[ы]ру, уақ/[ы]тылы, қау/[ы]пы, ой/[ы]на болып айтылады.

Тіпті *Сарагаш, Сарәзек, саралтын* сияқты **ы** дыбысы мұлде «жұтылып» кететін сөздердің өзін дыбыстауда да оның «ілеспе» түрі (орысша: призвук) сақталады: *Cap/[ы]өзек, Cap/[ы]агаш, cap/[ы]алтын*. Егер (бұл сөздерде **ы**, **i** қысаң дыбыстары мұлде «жұтылып» (сусып, жогалып) кеткен болса, *er//ni* (осылайша екі бөліп айтып көрініз), *хал/ /қы, Cap//агаш, cap//алтын* деп айтылуға тиіс болар еді.

Л, **p** әріптерінен басталып жазылып жүрген сөздердегі сөз басындағы ілеспе (немесе қосамжар) **ы**, **i** дыбыстары да назар аударады. Бұл күнде *лақ, рет, рас, ру, лас, лек* деп жазып жүрген сөздеріміз бір кездерде *ылақ, iрет, ырыс, ұру, ылас, ілек* түрінде жазылып жүрді. Бұлайша жазудың шынында да, қисыны бар еді, өйткені осы сөздердің алдында айтылуда ілеспе **ы**, **i** дыбыстарының бары – даусыз.

Мамандардың зерттеулеріне қарағанда, **p** дыбысы түркі сөздерінің басында келмейді. Көне түркі ескерткіштері тілінде кездесетін **p**-дан басталатын 50 шақты сөздің бәрі араб, пар-сы, санскрит тілдерінен енген кірме сөздер екендігі көрінеді⁸¹. Қазақ тілінің орфографиялық сөздігінде (3-басылым, 1988) және «Анықтағышта» ұсынылған орфографиялық сөздіктеге **p** әрпінен басталып жазылып берілген сөздердің барлығы дерлік – кірме тұлғалар, басым көпшілігі – *радар, радио, ракета, ревизор, рельс* сияқты орыс тілі арқылы енген сөздер, қалғандары – *разы, ракым, ракат, рэсуга, рия* сияқты араб, парсы сөздері, тек *ру, рет, рас, рай* тәрізді 5-6 тұлғағана – *ұру, iрет, ырас, ырай* деген төл сөздердің жоғарғы топқа қолдан жетелеп әкеп қосылғандары.

Бұлардың барлығында, тіпті орыс тілі арқылы енген *radio, рельс, роман* сияқты сөздердің өзін қазақша сойлеу актісінде айтуда сөз басындағы **p** дыбысының алдында ілеспе **ы**, **i** дыбыстары орын алады. **л** -дан бастап жазып жүрген сөздеріміз де – осы сияқты: көбі – кірме сөздер (*лаборант, лазер, лексика*), ал араб, парсы тілдерінен еніп, «қазақыланып кеткен» немесе казактың төл сөзі деп табылатын тұлғалардың да жа-

⁸¹ Талипов Т. Т. К истории употребления фонемы (р) в тюрских языках // Вопросы казахской фонетики и фонологии. - Алма-Ата, 1979. - С. 158.

зылуы қолдан жасалынды, сондықтан айтылуда *ылай*, *ылақ*, *ылау* болып айтылады. Бұл топтағы *луп*, *лүпіл*, *лық* (толы), *лып-лып* сияқты **ұ**, **ы**, **і** дыбыстарымен буын құрайтын сөздердің басындағы ілеспе дауыстылардың айтылу (естілу) сапасы (күші) алдыңғы топтан төмендеу екенін жай құлақпен де байқаймыз.

Сөздің жазылуы мен айтылуына келгенде, қайшылығы көрініп, біраз пікір таласын туғызып келе жатқан тұстың бірі – **ж**, **ш** дыбыстарынан кейінгі **а**, **ә** дыбыстарының орфограммасы мен орфоэпиясы. Тек қазақ тілі емес, жалпы түркі тіл-дерін зерттеген мамандар сөз басындағы **ш**, **ж** (**дж**) мен **й** дыбыстарының ортасында келген **а** дыбысы жіңішке айтылатындығын көрсетеді⁹¹. Қазақ тілінде де солай: *шай*, *жай* және *жай* буынан басталатын көп буынды *жайғасу*, *жайдақ*, *жайдарлы*, *жайнақы*, *жайнаң* т.б. сияқты сөздер *шәй*, *жәй*, *жәйдақ*, *жәйдарлы*... болып айтылады, ал *шай*, *жай* деген бір буынды сөздерге қосымша жуан жалғанады: *шәй+га* кел (*шәй+ге* кел емес), *жәй+ы+ң+a* қара (*жәйіңе* қара емес). *Жай* дегеннен басталатын көп буынды сөздердің барлығы да – жуан сөздер, яғни екінші, үшінші... буындары **а**, **ы** жуан дауыстыла-рымен келеді. Осы зандылықты ескеріп, емле сөздігінде *шай*, *жай* деген бір буынды сөздерді жуан **а** дыбыс әрпімен жазу ұсынылған. Соған қарамастан, айтылу (естілу) зандылығына қарай осы сөздер жеке бір буынды болып тұрганда, кейде тіпті оларға жуан қосымшалар жалғанып тұрган құннің өзінде *шәй*, *жәй*, *жәйдан-жәй*, *жәйғасу* деп жазу жиі кездеседі. Сингар-монизм заңы бойынша, сөз тұтас не жуан, не жіңішке айтылуға тиіс болса, қазақ тілінде мұндай үндестік қатардың көрнекті түрде бұзылатын тұсы – осы жерде тәрізді. Мысалы, *жайдақ шам* деп жазылғанды *жәйдақ шам* деп айтамыз, ал үндестік заңы бойынша, бұл сөз не *жайдақ*, не *жәйдек* болып дыбыста-луы қажет қой.

Қазақ сөздерінде сөз басында немесе ішінде келген **ж** дыбысының айтылуында да ескеретін жайт бар. Эксперимент-тік байқау қазақ әдеби тіл нормасында **ж** дыбысының таза аффрикат **дж** түрінде айтылмағанымен, **ж**-ның алдында өте

⁹¹ Щербак А.М. Сравнительная грамматика тюрских языков. - Л., 1970.

әлсіз ілеспе д жаңғырығының барын айтады. Таза аффрикат дж қазақ тілінде диалектілік ерекшелік ретінде көрсетіледі. Бұл жөнінде кеңінен талданған еңбектер бар¹⁰². Мысалы, қарақалпақтар арасында тұратын қазактар сөз басында келген ж дыбысын дж деп айттындығын (джоқ, джігіт, джантак) көрсетеді. Бұл ерекшелік Қазақстанның онтүстігіндегі кейбір аудандардағы қазактар тілінде де ұшырайтындығы тіркелген. Мысалы, зерттеуші О.Нақысбеков Шу ауданындағы қазактар тілінде дж аффрикат джайлау, джасуын, джулде сияқты сөздердің басында айтылса, олжаса, болджаса сияқты сөздердің ортасында қолданылатынын көрсетеді. Бұл құбылыс Сары-су ауданы тұрғындарында (С.Омарбеков), Жамбыл, Шығыс Қазақстан облыстары мен Шымкент, Семей облыстарының кейбір аудандарындағы, Монголиядағы қазактар тілінде де байқалады (Ж.Досқараев). Ал әдеби тіліміздің орфоэпиялық нормасы бойынша, сөздің басындағы да, ортасындағы да ж дыбысы таза, айқын дыбысталатын дж аффрикаты болып емес, жалаң ж (тіпті алдында өте әлсіз д жаңғырығы болған күннің өзінде де) дыбысы болып айтылуға тиіс, яғни ж-ның алдынан жогарыда көрсетілген жергілікті жердегідей д қосалқы дыбы-сы айқын айтылмайды.

Қазақ тіліндегі ш дыбысынан басталатын сөздердің ч-мен айтылуы (чал, чатақ, чырак) да – осы іспеттес: ол да – диалектілік ерекшелік. Сөз басында ч дыбысын айту Қазақстанның шығыс, онтүстік-шығыс өнірі мен Монголия, Шыңжан өлкелеріндегі қазактардың сөйлеу тілінде орын алады. Ал әдеби тіл нормасы бойынша, қазак сөздері тек ш дыбысымен айтылады: шал, шатақ, шырақ. Сөз ортасында және соңында келген ш дыбысының осы түрінде айтылуында тіпті дау жок: ақша (ақча емес), қанша (қанча емес), қалаш (қалач емес), күш (күч емес). Бұл зандағылық тіпті жергілікті жерлерде сөз басында ч-мен сөйлейтіндердің тіліне де тән.

Сөз сазын, орфоэпиялық норманы әңгіме еткенде, қазактың өз тілінің дыбыстық жүйесіне тән емес, тек кірме сөздерде жазылатын в, ф, х, ы, ң таңбаларын дыбыстау жайына тоқтауға

¹⁰ Жунісбеков Ә., Нұрмагамбетов Ә. Қазақ сойленістеріндегі «дж» аффрикатының қолданылуы //Вопросы казахской фонетики и фонологии. - Алма-Ата, 1979. - С. 232-237.

тура келеді. Бұлардың ішінде **ң** таңбасы тек араб, парсы тілдерінен енген сөздерде ғана, ал **х**, **ф** әріптері араб, парсы тіл-дері мен орыс тілі арқылы енген сөздерде жазылып жүрсе, **в**, **ч**, **и**, **щ**-мен тек орыс тілі арқылы енген халықаралық сөздер мен орыстың өз сөздерінде жазылады. Бұл сөздерді, әсіресе орыс тілі арқылы енгендерді қазақ тілінде негізінен сол әріптер бел-гілеп тұрған дыбыстарды өзгертпей айтқан жөн: *вагон (бәгөн емес), факультет (пәнкүлтет емес), химия (қимия емес), гаувар (гауқар немесе гаухар емес), цирк (сирк емес)*: **щ** әрпімен келген сөз қай тілдің сөзі болса да **ш** дыбысымен айтылады: *училище (училище), ашины (ащи), түшины (түщы)*. Сөйлеу үстінде **ң**, **х** дыбыстарымен келген араб, парсы сөздері қазақша **қ** дыбысына жуық айтылу фактісі жиірек кездеседі, бұл да – кате емес, біріншіден, оның себебі бұл дауыссыздардың қазақ тіліне тән емес екендігінде болса, екіншіден, **ң**, **х** дыбысты көптеген араб, парсы сөздерінің ертеректе енген не **қ**-мен айтылып кеткендігіне немесе олардың түсіп қалу дәстүріне байланысты. Мысалы, *хаким* сөзі әкім болып, *һәр* сөзі *әр*, *һәм* шылауы *әм*, *рахим* сөзі *рақым*, *Зухра* жалқы есім *Зура* (*Зэрле*), *Зере* түрінде қалыптасқаны бұл күнде тарихи дәстүрмен *Ахмет*, *Мұхит*, *сахна* деп жазып жүрген сөздерді *Ақымет*, *Мұқыйт*, *сақына* деп айтуға ерік береді.

Демек, сөздің жазылуы мен айтылуы үнемі бірдей түсे бермейді еken, яғни сөз қалай таңбаланса, сол таңбаларды ғана сақтап айту – әрдайым шарт та емес, мүмкін де емес. Әрине, қазақ тілінде жазылуы бойынша айтылатын сөздер де аз емес. Мысалы, *ара*, *ала*, *алау*, *аламан*, *алмақ*, *алғы*, *алғашқы* деген сияқты сөздердің жеке тұрғандағы айтылуы олардың таңбалауымен бірдей.

Міне, қазақ тіліндегі сөз сазының басты-басты құбылыс-тары жайында жалпы таныстыруды осымен аяқтауға бола-ды. Әрине, бұл жерде біз қазақ орфоэпиялық заңдылықтарын бастаң-аяқ түгел баянdap отырған жокпзыз, өйткені бұл заңдылықтардың норма ретіндегі көрінісі осы кітапта ереже-лер түрінде түгелге жуық ұсынылады. Мұнда көзделген мақсат – тілдің сөздік қазынасы (лексикасы), грамматикасы, дыбыстық жүйесі (фонетикасы), жазу жүйесі (орфографиясы) салала-

рында өздеріне тән занұлдылықтары болатыны сияқты, сөздерді дұрыс айтудың да, дұрыс дыбыстаудың да (орфоэпияның да) табиғи тәртібі, нормалары болатындығына назар аударту.

Өзге салаларға қарағанда, орфоэпия мәселелері назарға кешендең ілініп отыр. Оның да себептері бар. Тіл-тілдің қай-қайсысында да орфоэпиялық нормаларды арнайы сөз ету, ягни оларды көрсету, зерттеу, реттеу кешендең қолға алы-нады, өйткені ұлттық әдеби тіл әбден қалыптасып, барлық адамдарға, тіл қолданысының барлық саласында, сол ұлт мемлекеттеген барлық өлкеге ортақ, бірдей болған күнде ғана сол тілде ауызша дұрыс сөйлеудің нормасы, оның ішінде орфо-эпия тәртіптері баршаға түгел міндettі сипат алады. Қазақ тілінің сөз сазының орфоэпиялық жүйесін арнайы сөз ету кейін, үстіміздегі ғасырдың 60-70-жылдарынан бастап қолға алынды. А.Байтұрсынұлы атындағы Тіл білімі институты 60-жылдардың соңғы кезінде «Тіл мәдениеті» деген бөлім ашып, белгілі ғалым М.Балақаев қазақ тілінің сөз мәдениетін, ор-фотографиясы мен орфоэпиясын зерттеуге басшылық етті, езі де «Қазақ тілінің мәдениеті» (1971), «Қазақ әдеби тілі және оның нормалары» (1984) атты еңбектерді жарыққа шығарды, бөлім қызыметкері Қ.Неталиева «Қазақ тілінің орфоэпиялық сөздігін» құрастырып, ол 1977 жылы жүртшылық қолына тиді. М.Дүйсебаева «Қазақ әдеби тілі орфоэпиясының кей-бір мәселелері» атты еңбегін 1973 жылы ұсынды, мектепке арналған «Қазақ тілінің қысқаша орфоэпиялық сөздігі» (1981) шықты. 1983 жылы және 1995 жылы біз «Сөз сазы» (сөзді дұрыс айту нормалары) атты арнайы кітапша шығарып, оны мектеп мұғалімдері мен жоғары оку орындарының студенттері-не, сахна қайраткерлері мен радио, теледидар дикторларына, комментатор мен журналистерге нақты құрал ретінде ұсындық. Онда тұңғыш рет казақ тілінің орфоэпиялық ережелері берілді. Бұл ережелер қолданбалылық (практикалық) мақсатта түзілді, сондықтан көрсетілген қағидаларды жаттықтыратын мысалдар мен тапсырмалар беріліп отырды.

СӨЗ САЗЫНЫҢ КӨРКЕМ ӘДЕБИЕТ ПЕН ӨНЕРДЕГІ МАҢЫЗЫ

Сөз сазы дегеніміз – сөйлеу актісінде сөз ішіндегі немесе сөз аралығындағы дыбыстардың бір-біріне әсер етіп, бірін-бірі өз ынғайына иіп айтылуы болса, ол, бір жағынан, сөйлеу мүшелерінің жұмысын женілдетуге, әр алуан кедергіні кемітүге ұмтылуын көздейді, екінші жағынан, сөз сазы айтылған сөздің тыңдаушы құлағына жұмсақ тиіп, сөзге әуендей үн береді.

Тілдің мұндай үйлесімді үндестігін және құлаққа жағымды әуендейділігін өлең тілі шебер пайдаланады. Мысалы, өлең жолдарындағы сөздердің буындарын жеке-жеке санағанда, сол өлеңге тиісті өлшемнен артық шығуы мүмкін, бірақ айтылуда дыбыстар үндестігіне сай, өлеңнің әр жолының (тармағының) дәл 7-8 немесе 11 буын болып шығатыны еске алынады, я болмаса, керісінше, кейбір сөздерге артық буын қосылып айтылатыны ескеріледі. Айтальық, Біржан салдың «Жанбота» деген өлеңі 11 буынды өлшеммен құрылған. Оның:

Жанбота, осы ма еді өлген жерім,

Көкшетау боктығына көмген жерің –

деген жолдарындағы сөздерді жеке-жеке алыш

1 2 3 4 5 6 7 8 9 10 11 12

буынданап санасақ: *Жан-бо-та о-сы ма е-ди өл-ген же-рім бо-*лып 12 буын шығады. Ал айтылуда ортадағы сөздер *осымеді* болып *ма* деген буынның соңғы дауыстысы мен одан кейін келген *еді* сөзінің басқы дауыстысы кірігіп, *ма-е-ди* деген уш буынның орнына *ме-ди* болып, екі буын айтылғандықтан, осы өлеңнің өлшеміне сай 11 буын шығады. Бір ырғақпен айтылатын сөздердің аралығындағы екі дауыстының бірі «жұтылып», өлең өлшемі дәл шығатын мұндай мысалдарды көптеп көлтіру-ге болады. Мысалы, Абайдың:

Аласы аз, кара көзі айнадайын,

Жүрекке ыстық тиіп салған сайын, –

деген өлең жолдарының алғашқысы жазуда 12 буын болғанмен, алдыңғы сөздің соңғы **ы** дыбысы мен келесі сөздің басқы **а** дыбысы кірігіп, *аласаз* болып айтылады да өлең өлшемі дұрыс шығады, Өлең жолдарындағы бір ырғақты сөздердің

арасындағы екі дауыстының бірі әрдайым «жұтыла» бермейді: егер буын саны дәл келсе, мұндай екі сөз бірінің соны, екіншісінің басындағы дауыстыны кіріктірмей, олар сақталып айтылады. Мысалы, Абайдың:

Жаздың көркі енеді жыл құсымен

Жайрандасып жас құлер құрбысымен, –

деген өлең жолдарындағы *көркі енеді* деген сөздер қатар түрганмен бірінші (*көркі*) сөздің соңғы дауыстысы да, екін-ші (*енеді*) сөздің басқы дауыстысы да жеке-жеке айтылады, өйткені өлеңнің бұл тармағы осы түрысында 11 буынды, оларды кіріктіріп айтса, 10 буын болып, өлеңнің өлшемі де, ырғағы да бұзылады.

Кейде өлшемге қажет буын саны жетпей тұрса, «жедел жәрдемге» **ы**, **і** дыбыстары «шақырылады». Мысалы:

Баянауыл басынан бұлт кетпес,

Киядағы тұлкіге құсым жетпес, –

деген өлеңдегі бірінші тармақтың жолдарын жазылуы бойынша санаңақ – 10 буын, сондықтан бұл өлең айтылуда: *ба-я-на-уыл ба-сы- нан бұ-лыт кет-пес* болып, *бұлт* сөзі *бұлты* болып дыбысталады. Бұл – алдыңғы екі дауыстының біреуінің «жұтылып» кетуіне қатысты құбылысқа қарағанда, әлдекайда сиректеу кездеседі, дегенмен қазақ өлеңнің сазында орын ала-тынын айтуға болады.

Қазақ поэзиясы ассонанс пен аллитерация деп аталатын дыбыстар біркелкілігінен туатын құбылысты да стильдік мақсатпен кеңінен пайдаланады. Өлең жолдарында немесе қатар келген сөздердің басында, мақал-мәтеддерде, тұракты тіркестерде, монологтерде, мақала, кітап т.б. аттарында, газет-журналдардың айдарларында немесе тақырып аттарында, қысқасы, текст ішіндегі сөздер біркелкі немесе бір-біріне жуық (мысалы: **т-д**, **б-п**, **с-з** сияқты дыбыстар) дауыссыздардан бас-талып келсе, ол аллитерация деп аталады. Мысалы, Мұқагали Мақатаевтың «Жастық» атты өлеңнің мына шумағына назар аударалық:

Жастық менің жанымға жыр байлады,

Жастық мені жалтартпай, **шыңға** айдады,

Жастық мені шындағы, **шынықтырды,**

Жастық шіркін өмірді шын ұқтырды.

Мұнда **ж** және **ш** дыбыстарынан басталатын бірқатар сөз шоғырланған. Екінші мысал Қуандық Шаңғытбаевтан:

Кімде жоқ кіrbің көңіл, күрсін арман,

Кейде мен шығай маңып, үн шығарман.

Кей уақыт көңіл шіркін көкке шалқып,

Күндер көп күмбірлетіп, құй шығарған –

деп алынған өлең жолдары **к** және **ш** дауыссыз дыбыстарынан басталатын сөздерді қатыстыру арқылы жасалған. Мұнда осы шумақтың әр тармағы **к** дыбысынан басталатын сөздермен келген. Өлеңнің жеке шумактарының немесе кейбір шағын өлеңнің бірінші сөзі тұтасымен бір дыбыстан басталатын сөздерден құралатынына Абайдың інісі – Оспанның өліміне шығарған «Жайнаған туың жығылмай» деп басталатын шағын өлеңін келтіруге болады. Бұл өлеңнің 16 тармағы (жолы) түгелімен **ж** дыбысымен келген сөздерден басталады:

Жайнаған туың жығылмай,

Жасқанып жаудан тығылмай,

Жасаулы жаудан бұрылмай,

Жаужүрек жомарт құбылмай,

Жақсы өмірің бұзылмай, Жас

куатың тозылмай, Жалын

жүрек суынбай, Жан

біткеннен тұңғламай, Жагалай

жайлау дәүлетің, Жасыл шөбі

қуармай, Жарқырап жатқан

өзенің Жайдақ тартып

суалмай, Жайдары жүзің

жабылмай, Жайдақтап қашып

сабылмай, Жан біткенге

жалаңбай, Жақсы өліпсің,

япырмай!

Мұнда **ж** дыбысы тек жол басындағы сөздерде ғана емес, тармақ ішіндегі сөздерде де келіп отырады: **жайнаған туың жығылмай, жасқанып жаудан тығылмай, жасаулы жаудан бұрылмай** т.т.

Аллитерацияның қулаққа жағымды саздық қызметін мақал-мәтелдер де жақсы пайдаланады. Мысалы, «**Құлан құдыққа құла-**

са, құлағында құрбақа ойнар» деген мақал құбысынан ба-
сталатын сөздерді шоғырлап, белгілі әсер беріп тұр. «Көппен
көрген ұлы той» деген мәтелді елмен көрген, жүртпен
көрген, халықпен көрген деп ауыстырып айтуга болмайды,
өйткені мұнда көппен көрген деген сөздер аллитерацияны
пайдаланғандықтан, құлаққа жағымды, айтуга женіл, еске
сақтауға қолайлы мәтел болып тұр.

Қазақтың атақты билерінің сөздері көбінесе аллитерация-
лы болып келеді. Мысалы, «Төле би айтыпты» деген
сөздерден: «Батыр деген – барақ ит, екі долы қатынның бірі¹
табады, би деген – бір бұлақ, қатынның ілүде бірі табады»
деген шешендікте батыр, би деген сөздеріне б құбысынан
bastala-tyn барақ, бұлақ деген теңеулер алғынған.

Осы құбылыс дауысты дыбыстарға қатысты болып келсе,
ассонанс деп аталады. Бұл да қазақ тілінде орын алады. Бұған
классикалық мысал ретінде Махамбеттің атақты «Ереуіл атқа
ер салмай» деп басталатын өлеңін келтіруге болады. Мұнда
өлеңнің әрбір тармағы е дыбысынан басталатын сөзben келеді.
Сондай-ақ ақындар өлеңнің бір жолында біркелкі дауыстыдан
басталатын сөздерді алу арқылы да ассонанс тәсілін
қолданады. Мысалы, Фариза Онғарсынованың:

Айналайын, ауылдың адамдары-ай,
Сендер барда бұзылар заман қалай? –

деген өлең жолдарында а дауысты дыбысымен ассонанс жаса-
лып тұр.

Аллитерация мен ассонанс құбылыстары тек үн сазын
келті-ру үшін ғана емес, айтылмақ ойға екпін түсіру, ақынның
көңіл күйін білдіру сияқты стильдік қызмет те атқарады.
Мысалы, Жамбылдың Алғадай деген баласы Ұлы Отан
соғысында қаза тапқанын естігенде:

Алатайды айналсам
Алғадайым табам ба?!
Сарыарқаны сандалсам
Саңлағымды табам ба?! –

деп күнірену үстінде Алатауды айналсам, Алғадайым... Сары-
арқаны сандалсам, саңлағымды... деген ассонанс пен алли-
терация жасап, Алғадай, саңлақ сөздеріне екпін түсіріп, әке

зарын мейлінше әсерлі етіп беріп тұр. Біркелкі дыбыстар-ды не буындарды таңдап, катар тұрған сөздердің басында не ортасында келтіру айтылмақ ойга әсерлі оң беріп, образ жасауға да қатысады. Мысалы, Мұхтар Әуезов «Еңлік-Кебек» пьесасындағы Абызды сейлеткенде: «Сыбдыр сөзбен шығарып сап, сынайын деп **к** епсін ғой, **к**өлгір сөзбен **к**өлденең болғың кепті ғой», – деп, **с**, **к** дыбыстарын ойнатады. Демек, бұл рөлді ойнаушы актер аллитерация жасап тұрған дыбыстар-ды ерекше мәнерлеп айтса, құба-құп болар еді. Екінші мысал: «Қарагөз» пьесасындағы Сырымның сүйген жары жынданып кеткен сәттегі ышқына күйінген образын беру үшін, оның монологіне **с**, **з** дыбыстары бар сөздерді шоғырладап келтіреді: «Өсер.., өсер.., не өсер?. Тек зұлымдық өсер нөсер болып се-нен. Сор өсер, ар өшер! Өскенде тек зар өсер сениң лағынет табаның астында!». Мұнда да дыбыстардың айтылуы ерекше калыптасып, жай сөйлеу нормасынан өзгеше болуы керек, яғни **с**, **з** дыбыстарын өзге дыбыстардан бөліңкіреп айтқан аб-зал, сонда ыза, қайғы, зар буган кейіпкердің образы айқындала түседі.

Сейтіп, көркем әдебиет пен сахна өнері сөз сазы-на, сөздердің дыбысталу сипатына бейтарап емес екендігі байқалады. Сондықтан бұл жайтқа көркем әдебиетті оқытып үйрететін мектеп мұгалімдері мен сахна шеберлерін: актерлер мен әншілерді, көркем сөз айтушыларды тәрбиелейтін оку орындарының ұстаздары мен режиссерлер назар аударулары шарт.

СӨЗ САЗЫ НОРМАЛАРЫНЫҢ ҚОЛДАНЫЛУ ЖАЙЫ

Сөзді дыбыстай, яғни дұрыс айту нормалары – барлық сәттерде бірдей, ешбір бүлжымайтын нәрсе емес. Жалпы ауызша сөйлеудің, яғни сөзді ауызша жеткізуің екі типі бар: бірі – сөздерді толық әуенмен (ғылымда ол «толық стиль» деп аталады) айту, екіншісі – әдеттегі сөйлесу әуенінде айту. Сөздерді толық әуенмен айтқанда, оларды нақпа-нақтап, бір-бірімен аса жылдастырмай, кейде сөз аяғын созып, әр сөзді тындаушыға мейлінше анық етіп жеткіземіз. Бұл әуен ми-тинг сияқты аса көп жұрт жиналған жерлерде қолданылады, өйткені митингілерде мындаған адамға қарата айтылатын сөз өте маңызды болғандықтан, ол сөздің барша тындаушыға ба-рынша түсінікті болып, мейлінше анық естілуі көзделеді. Сондай-ақ айтылмақ сөзді (ойды) тілі жана шығып келе жатқан сәбиге немесе сол тілді әлі әбден менгермеген өзге ұлт өкіліне түсінікті етіп білдіру үшін де толық айту мәнерін қолданамыз. Бірақ өмірде сөздерді толық айту мәнерінен гөрі сөйлесу әуені әлдеқайда жиі қолданылады. Бұл мәнерде сөздер аса шапшаң емес, бірқызырыу баяулата, бірақ дауыс ырғагы жағынан топ-тастырыла, бір-бірімен киюластырыла айтылады. Театрларда, радио мен теледидарда, топ алдына айтылатын (окылатын) лекция-баяндамаларда сөз айтудың осы әуені пайдаланылады.

Сөйлесу мәнерінің өзі де біркелкі емес. Оның көтерінкі, салтанатты үнмен және жай үнмен айтылуы бар. Салтанатты үнде кейбір сөздерді әдейі бөліп айту немесе созып айту, кейде тіпті толық әуенмен айтқандай, әрбір сөзді нақпа-нақтап дыбыстай орын алады. Мысалы, радио мен теледидардан берілетін мемлекеттік, халықаралық манызы аса зор реєсми хабарлар көбінесе салтанатты әуенмен беріледі. Пьесаларда да белгілі бір жағдайға (ситуацияға) орай кейбір монологтер немесе тіпті бірекі ауыз сөз де көтерінкі үнмен айтылуы мүмкін. Бірақ қай-қайсысында да тындаушыға түсінікті болып шығатын айқындықпен қатар, сөздердің сөйлеу актісіндегі бір-біріне ететін әсері, дыбыстардың бір-бірінің ынғайына қарай үндесіп, үйлесіп айтылуы қатаң сақталуға тиіс. Бұл талап әншілер мен актерлерге, дикторлар мен комментаторларға, мұғалімдер

мен лекторларға және жиын-жиналыстарда сөйлеушілерге, баяндамашыларға қойылады.

Сөздердің бір-бірімен үндесетін дыбыстық зандарының күші барлық жерде: күнделікті сөйлеу тәжірибесінде, мектеп оқушылары мен студенттердің сабак үстіндегі сөйлегендерінде, беретін жауаптарында, драма, комедия, трагедия сиякты пьесаларда ойнағанда, такпак айтқанда, кинода, радио мен телевізияларда, жиналыстар мен митингілерде сөйлегенде бірдей болғанмен, әр жанрдың, тіпті бір жанрдағы әр шығарма түрінің, әр жағдайдағы сөйленген сөздің айтылу мәнерінде айырмашылықтар болады. Мысалы, сөз дыбыстарын «ойна-тып» әрі белгілі бір өлшеммен жазылған, мақал, мәтел, фразеологизмдерге бай «Еңлік-Кебек», «Қарақышшак Қобыланды», «Айман-Шолпан», «Қарагөз» пьесалары (бәрі де – Мұхтар Әуезовтікі), Фабит Мұсіреповтің «Ақан сері-Ақтоқты», «Қозы Көрпеш-Баян сұлу» пьесалары, Қалижан Бекхожиннің «Ұлан асуы», Тахау Ахтановтың «Ант» драмасы, С. Сыматаевтың «Зар заман» пьесаларының сөздерін айту мен біздің күндеріміздің тақырыптарына арналған пьесалардың сөздерін айтудың арасында айтарлықтай айырмашылықтар бар. Алдыңғылардың тілі дыбыстар гармониясын (сазын) көбірек талап етеді, сөздің музыкалығын, әуезді болуын қалайды. Олардағы ырғактық-мелодикалық топтардың өзі тілімізде әбден қалыптасқан, сөздері бір-бірімен үйкас, өлшем дегендер-мен «цементтелген», яғни жымдастан, үндескен болып келеді. Мысалы, «Еңлік-Кебектегі» Көбей мен Еспембеттің айтысын алайық. Мұндағы курсивпен теріліп көрсетілген сөздердің ай-тылуына назар аударыңыз (жазуда бүкіл тексті мүмкіндігінше транскрипциялап көрсетуге тырыстық, дегенмен сөздердің сөйлеу актісіндегі дыбысталуын таңбалармен білдіру өте қыын, яғни транскрипцияда сөздің жазылуы мен айтылуы айна-қатесіз дәлме-дәл түсे бермейді):

Еспембет. Тобұқты / шайалығығыңды гылдыңба / білегі жұғандығыңды гылдыңба / алалы жылқы / ақтылы гойұн / жосылтұб алдың // ата ғонұсұнан / іргесін аудардың / ай дер ажса / қой дер қожса / болған жоқ // жетіботұрган жесірімді / бір тентегің/ат сауұрұна салыб әкетіб отұр // ағайын // үзүнда өшту / қысқада кектімессің // бітім сұрап / кісі салсам / бақайыңнан гелтірмейсің //.

Көбей. Еспембет / кеден недем болт / кедергі недем болт / деб отұрсұң ... қой асығын / қолұңап / қолайыңа жақса / сақа гой // саптайқақша / ас құйып / сабынан /қарауұл гарайтын болсаң / мем біллік айттайым//.

Бұл үздіктердегі тұрақты тіркестер (фразеологизмдер) мен мақал-мәтелдер курсивпен көрсетілді. Бұлар текстің белгілі бір өлшеммен, ырғакпен айтылуына жәрдемдесіп, айтысуышы би-лер сезін құлаққа жағымды сазбен жеткізеді.

Тұтасынан өлеңмен, оның ішінде ақ өлеңмен де (ақ өлең дегеніміз – үйқасты, ырғакты сөз орайымен берілген мәтін) жазылған пьесалар тілінің музыкалығы тіпті күшті болады. Ал жай диалогтермен берілген, яғни кейіпкерлерін әдеттегі ауызекі тілмен сөйletкен пьесаларда бұл кейіпкерлер, сөз жоқ, Еспембетше, Абызша, Көбейше немесе Ақан сері мен Ақтоқтыша сөйлемейді. Әрине, қалыптағы түрмисқа сай сойлегенде де, мақал-мәтелдер мен айшықты сөз тіркестерін қолданамыз, бұл – пьесаларда да орын алады. Дегенмен Еспем-беттің сөзі мен қазіргі бір инженердің немесе «қаладан келген қылжақпастың» сөзі ішінде мақал-мәтел, ырғакты тіркестер болғанмен, олардың сөздері дыбысталуы мен сазы жағынан бірдей айтылмайды.

Бұдан «өткен замандардағы кейіпкерлердің сөзін айту қын, қазіргі адамдардың сөзін айту оңай» деген тұжырым шықпайды: әңгіме – кейіпкердің кай кездің адамы екендігін-де емес, пьесаның жанрлық ерекшелігінде, кай стилде ұсынылғандығында. Романтикалық стиль көбінесе көтеріңкі саз-бен, белгілі бір ырғакпен айтуды қалайды. Ал бүгінгі күнделікті өмір тақырыбына жазылған пьесалардағы кейіпкерлердің дені әдеттегі сөйлеу үнін ұстанады. Әрине, қазіргі сөйлеу тілімізде де белгілі нақышқа келтіре ерекше айтатын тұстар аз емес.

Қысқасы, бұл айтылғандардан, актерлер сахна сезінде өздері ойнайтын әр пьесаның жанрлық-стильдік сипатын, кейіпкердің образын қатты ескерулері қажет. Қай заманды суреттеген шығарма болмасын, қай тақырыпқа жазылған пьеса болма-сын, қай жанрдағы өлең мен мәтін (тақпак, терме т.т.) болма-сын – барлығы да қазақ сахнасы мен киносынан, радиосы мен теледидарынан көркем сөздің құлаққа жағымды келіп, табиғи түрде айтылуы (дыбысталуы) талап етіледі.

Сөзді дұрыс жазу (орфография) сияқты, дұрыс айту да (орфоэпия да) – әдеби тілдің бір қыры. Екеуінің де міндеті – тілді әркім өз қалауынша, өз білгенінше жұмсамай, оның көпшілікке ортақ барша заңдылықтарын сақтап пайдалану болып та-былады. Ондай ортақтық пен ыңғайлышық үшін белгілі бір орфоэпиялық нормалардың болуы – заңды да, міндетті де. Ол нормаларды қатаң сактау, жетілдіру, орнықтыру – қазақ тілінде сөйлейтін барша жүрттың (әр адамның) борышы. Әсіресе бұл абыройлы міндет мұғалімдер мен мәдениет қызметкерлерінің, сахна қайраткерлері мен әншілердің, жиналыс, жиындар-да шығып сөйлеушілердің, дикторлар мен жалпы радио-дан, теледидардан сөйлеушілердің алдында тұрады. Бұлар тіл мәдениетінің бір ұшы – сөзді дұрыс айту заңдылықтарын (ережелерін) берік ұстанып, оларды қалың жүртшылыққа жаю-шылар, орфоэпиялық нормалардың жоктаушылары болулары тиіс.

Өкінішке орай, бүгінгі таңда бұл талап толық орындалып отырған жоқ. Сөзді (ойды) ауызша айтуда әркілі себептерден болып жатқан кателіктер мен жайсыздықтар орын алып келеді. Солардың ішінде ең жиі кездесетіні – қазақ тілінің дыбыс жүйесінің табиғи тәртібі болып саналатын үндестік заңдарын сақтамай, сөздерді қалай жазылса, солай оку (айту) немесе сөздің жеке тұрғандағы тұлғасы қандай болса, сол күйінде айтуда кателігі. Мысалы, **қ**, **қ**, **п** сияқты қатаң дыбыстарды қажет жерінде ұяңдатпай айтуда жиі ұшырасады. Соның салдарынан *күңгерүү, негерек, аздаңгейін, құргол, агала* болып айтылуға тиіс сөздерді жазылуынша *күнкөрү, некерек, азданкейін, құрқол, ақала* түрінде айтушылық етек алып барады (бұл сөздер бір ыргакпен айтылатын топтар болғандықтан, біріктіріп жаздық, әйтпесе олардың жазылууда *күн көрү, не керек, аздан кейін, құрқол, ақ ала* болып, бөлек-бөлек таңбаланатыны аян). Сондай-ақ *бәлгер, сәудегер, шәй, Жәмила* деп дыбысталуға тиіс сөздерді жазылуынша *балгер, саудагер, шай, Жәмила* деп айтудыңың та жоқ емес.

Бұл күнде сөз сазына қатысты қындықтың көзге түсетін және бір тұсы – **о**, **ө**, **е** дауысты дыбыстарының қазақ сөзінің басында келгендегі айтылуы. Қазақ сөздерінің басындағы осы дыбыстардың алдында қосамжар **ү**, **й** дыбыстары айтылуы

керек болса, бұл заңдылықты сақтамай, сөздерді «орысша» айту байқалады: *отан* сөзінің қазақша айтылуы *уотан* болуы керек, *ел* сөзі орысша айтсақ, эль, қазақша дұрыс айтар болсақ, *йел*. Сол сияқты сөз басында немесе бірінші буында келген **о**, **ө**, **ү**, **ұ** еріндік дыбыстарының келесі буындардағы **ы**, **і**, **е** де-ген езулік дауыстыларын өздеріне ұқсатып айтқызатыны да ескерілмей, сөздердің жазылуынша оқылуы орын алып келеді. Мысалы, *құрұқ*, *кулумгөз*, *кумұс* деп айтылуға тиіс сөздерді *құрық*, *кулімкөз*, *куміс* деп айту әсіресе жастардың тілінде жиі кездеседі.

Дикторлар мен хабар, концерт жүргізушилердің, окушы жастардың сөз сазындағы тағы бір катесі – сөздердің ешбір дыбысын түсірмей, әр сөзді немесе біріккен сөз, қос сөздердің әр бөлігін (компонентін) бөліп-бөліп айтатын тұстарында көзге түседі (дәлірек айтсақ, құлаққа шалынады). Мысалы, *Құрман газының қүйі Сары арқа*, *Ықыластың қүйі Кері толғау*, *Мұхиттың әні Кіші айдай* деп, ән-күй аттарын (білдіріп тұрған екі сөздің әрқайсысын бөлек-бөлек айтатын конференсьелер мен дикторлар жоқ емес. Эрине, олардың бұл әрекеттегі ниеттері адал, өйткені бұл орайда шығарма аттарын тыңдаушыға анық етіп жеткізсем дегенді көздейтін болар. Бірақ сөздің түсінікті, анықтығы әр сөздің жеке-жеке айтылуынан шықпайды. Сондықтан жоғарғы ән-күй аттары қазақ құлағы кәнігі түрде қабылдайтын *Сарарқа*, *Кертолғау*, *Кішайдай* деген әуенде, яғни екі сөздің аралығындағы дауыстылардың бірінің «жұтылып» кеткен түрінде айтылуға тиіс, себебі *Сарарқа* атавы *сары* және *арқа* деген сөздердің жеке-жеке мағыналарынан хабар бермейді, екеуін қосып (тіркестіріп) айтудан жаңа сөз – жер атын білдіретін жалқы есім болып тұрғанын нысанага алу қажет.

Қазақ тілінің орфоэпиялық нормаларының бұзылуына себеп болатын факторлардың және бірі – сөзді ауызша айтудағы жазба тілдің, жазудың ықпалы, яғни сөзді жазылуынша оку дәстүрі.

Әдеби тілді дамытуда, оны ұрпақтан ұрпаққа жеткізуде, лексика-грамматикалық және орфографиялық нормаларын қалыптастырып, көпшілікке жаюда жазудың рөлі зор екені мәлім. Жазу – бұл күнде әдебиеттің барлық түрін таратудың

басты құралы. Осындаған орны ерекше жазудың сөзді дұрыс айту саласына келгенде, ескеретін бір жайы бар. Ол – сөздің жазылуы оның дыбысталуымен, әсіресе сөйлеу актісінде ай-тылуымен әрдайым сайма-сай келе бермейтіндігі. Сөзді дұрыс жазу бар да дұрыс айту бар, яғни сөздің орфографиялық нормалары бар да орфоэпиялық нормалары бар. Бұл екеуінің дәлме-дәл түсетең сәттері де аз емес. Мысалы, сөздердің қалай жа-зылса, солай оқылатын жерлері болады. Айтальық, *кіндігімнің жас қаны тамған жері* – аулым деген өлең жолының бірер сөзінен (*аулым – ауғұлұм*) басқасы осы жазылған түрінде ай-тылады. Мұнда дыбыстары бір-біріне әсер етіп, бірін-бірі сәл өзгеретін орындар жок. Ал көптеген жағдайда сөздер жазылуынша айтылмайды (оқылмайды). Мысалы, Абайдың:

Жарқ етпес қара көңілім не қылса да,

Аспанда ай мен күн шағылса да, –

деген өлең жолдарын дәл осылай жазылғанынша оқу (айту) – өрекел қате болар еді, яғни «тілге женіл, жүрекке жылы тиодін» орнына құлақты кесіп, түрпідей тиер еді. Мұнда дыбыстардың айтылууда бірін-бірі өз ынғайына көндірген сәттері бар, сондықтан:

Жарқетпес / қарагөңүлұм/ неғылсада //

Аспанда / аймененгүн / шағылсада // –

түрінде оқылып, жазылуы мен айтылуында айырмашылық болады. Бұл жерде сөздерді соңғы көрсетілгендей айтылуынша жазу қандай қате болса, жазылуынша оқу (айту) сондай қате болып шыгады.

Сөздерді жазылуынша окудың өзі де – себепсіз емес. Оны тек жауапсыздықтан немесе білмestіктен деуге болмас. Радио мен теледидар тыңдаушыларына, оқушылар мен студенттерге, жиын-жиналыстарға қатысушылар сияқты қалың көпшілікке қарата айтылған сөздің неғұрлым түсінікті, айқын болуын діттейміз, ал сөздерді нақпа-нақтаң жеке-жеке айтқанда, олар анығырақ естіледі де түсініктірек болып шыгады. Анығы – анық, бірақ бірді іздел, екіншіні жоғалтып аламыз: анықтық бар, сөз сазы жок. Мұндайда ой болады және ол ойды білдіріп тұрған сөздер жеке-жеке түсінікті, анық болады, бірақ олардың бір-бірімен қиояласқан үйлесімі жок болып шыгады. Бұл – сөздерді қазақша айту емес, қазақша тізбектеп өтү болып

шығады. Алдымызда тілдің өзі емес, фотосуреті көрсетілгендей әсер етеді, өйткені ғалымдардың біреуінің тауып айтқанында, жазу – тілдің фотосуреті іспетті, ал нағыз тілдің өзі – оның сөйлеу барысындағы көрінісі.

Кейбіреулер актер мен әншілердің, дикторлардың, окушылардың және жалпы көшіліктің ауызша тіліндегі жоғарыдағыдан қателіктерінің басты себебін қазақ тілінің жергілікі ерекшеліктеріне байланыстырып, содан іздептін сияқты. Бұл – дұрыс емес.

Сөз жоқ, қазақ тілінің кейбір дыбыстарының айтылуына қатысты жер-жерге қарай ажыратылатын айырмашылықтары бар. Мысалы, әдеби тіліміздегі сөз басында келетін **ш** дыбысын **ч** етіп айту (*чатақ, чын, чырак*), сөз ортасында келген **и** дыбыстарының орнына **и**л дыбыстарын айту (*маңтай, таңтай, аңтай*), сол сияқты сөз ішіндегі **л** дыбысын түсіріп айту (*бол-майды* деудің орнына *бомайды, келген жеқ* деудің орнына *кеғен жеқ* деу), сөзге **р** дыбысын косып жіберу (*жоңыришка, меруерт*), **ж** дыбысының орнына **й** дыбысын айту (*ойақ- бұяқ*

– **ол жақ, бұл жақ** деудің орнына) т.т. осы тәрізді құбылыстар – Казакстанның белгілі бір өлкесі түрғындарының сөйлеу тілінде кездесетін ерекшеліктері. Жергілікті ерекшеліктерге қарай екі түрлі дыбысталатын едәуір сөздердің әдеби варианты бұл күнде бірқыдыру тұрақталып, нормага айналды. Мысалы, *маңдай* (*маңтай* емес), *таңдай* (*таңтай* емес), *ие* (*еге* емес). Бұл көрсетілгендердің жақша ішіндегі варианттарын жазушы өз кейіпкерлерінің тіліне әдейі келтіргенде ғана солай айтып, өзге жағдайда әдеби нормасымен айту қажет.

Бір жақсысы – актерлер мен әншілердің, дикторлардың сөздерінде әркімнің өз ортасында (отбасында, аулында) сөйлеп үйренген дағдысына тартып, әдеби нормадан ауытқышылық аса көп байқалмайды, тіпті жоққа тән. Мұндай ауытқышылық көбінесе қарапайым адамдардың өзара сөйлескендегі күнде-лікті тәжірибесінде байқалады.

Сірә, сөздерді дыбыстауға келгенде, көшілік алдында сөйленетін тұстарда диалектілік ерекшеліктердің көп байқал-май отырғаны жазуға байланысты болар: әдетте жазба дүние әдеби норманы сақтайды. Демек, *таңдай, жоңышиқа, бұжақ, о жақ* деп жазылған дүниені осы түрінде айту – сөзді жоғарыда өзіміз кате деп көрсеткен жазылуынша оку дегеннің көрінісі.

Бұл жерде жазылуынша окудың зияны емес, пайдасы тиіп тұр. Бірақ, оған қарап, сөздерді жазылуынша оку пайдалы деген қорытынды шығаруға болмайды: жергілікті сөздер әдеби нормадағы сөздердің ішінде теңізегі тамшыдай ғана, теңізге зиянды нәрсені тамшыға тигізетін пайда басып кетпейді.

Қазіргі кезде кездесетін орфоэпиялық қателер – осылар ғана емес, өзге тұстарда да бары даусыз. Сөзді дұрыс дыбы-стауда бұл сияқты бұрыстықтардың орын алу себебі неде деп іздесек, олардың бірнешеу екенін көреміз. Ең бастысы және ең қауіптісі, әдетке айналғаны – тілге, оның қолданылу мәдениетіне деген жауапсыздық, немікүрайдыштық көзқарастың орын алып отырғандығы, екіншісі – қалың жұртшылыққа тіл нормаларын үйретудің, тіл мәдениетіне баулудың әлсіз, жүйесіз болып келгендейді. Әсіреле қазақша сөйлеу үстінде сөздерді дұрыс қиуластырып, ана тіліміздің табиғи дыбыс зандарына бағындырып айту нормаларын үйрету сияқты іс-әрекеттердің мектептерден бастап, барлық ортада, оның ішінде радио, теледидар, театр, сахна өнері сияқты ауызша тілді кеңінен пайдаланып жерлерде мардымсыз жүргізіліп жатқандығы. Бұл ретте орфоэпиялық анықтама құралдардың: сөз сазы ережелерінің, орфоэпиялық сөздіктердің және өзге де толып жатқан көмекші материалдардың ете аздығы, бірді-екілі мұндай құралдардың бір басылымынан екіншісіне дейін ондаған жылдардың өтіп жатқандығын баса айтуға болады. Мысалы, А.Байтұрсынов атындағы Тіл білімі институты тарапынан ұсынылған «Қазақ тілінің орфоэпиялық сөздігі» (авторы – Қ.Неталиева, жаупапты редакторы – М.Балақаев) 1977 жылы бір-ақ рет жарық көрді. М.Дүйсебаевың мектеп окушыларына арналған «Қазақ тілінің қысқаша орфоэпиялық сөздігі» 1981 жылы шықты. Сөзді дұрыс айту ережелері берілген құрал («Сөз сазы», авторы – Р.Сыздықова) «Ғылым» баспасынан 1983, 1995 жылдары баржоғы 1000 дана болып жарияланды. Демек, бұл құралдардың шыққанына он жылдан астам уақыт өтіп бара жатқаны – сөз, сөйлеу мәдениетімізді көтеруге сеп болып отырған жоқ.

Ана тіліміздің ауызаша қызмет ету өрісі кеңейіп, оған үлкен әлеуметтік мән беріліп жатқан бұл күндерде сөз сазы-на арналған мұндай анықтама құралдардың түрлерін көбейту және мол тиражben жиі-жиі жарыққа шығару қажеттігі туып отыр. Осы кітап – сол қажеттікі өтеудің бір ғана құралы.

СӨЗ САЗЫ ЕРЕЖЕЛЕРІН ИГЕРУДЕ ЕСКЕРІЛЕТІН ЖАЙТТАР

Қазақ тілінде сөздерді дұрыс айтудың (дыбыстаудың) неғізгі-негізгі заңдылықтарын, яғни сөз сазы ережелерін сарапал көрсетпес бұрын, осы қагидаларды жақсы түсініп, дұрыс игеруге қатысты бірқатар жайттарды әңгімелу қажет. Олардың бірі – сөйлеу үстінде сөздердің екіден-үштен топтасып, бір деммен айтылатындығы.

Сөйлеу актісінде айтылуы жағынан сөздердің бір-біріне ететін ықпалы, дыбыстық өзгерістері бір деммен топтасқан сөздердің¹¹¹ ара-жігінде және өн бойларында пайда болады. Соңдықтан, ең алдымен, «бір деммен топтасқан сөздер» дегеніміз не, яғни сөздер қандай жағдайда бір деммен, бір ырғақпен, бір ритмикаға топтасып айтылатындығын біліп алған жөн. Өйткені сөйлеу барысында қатар айтылатын кез келген сөздер бір-біріне әсер етіп, дыбыстық өзгерістерге ұшыратпайды, белгілі бір тіл заңдылығымен ғана топтасатын сөздердің аралығында немесе өн бойларында фонетикалық құбылулар пайда болады.

Қазақ тілінде сөйлем ішіндегі сөздер даусы ырғағы жағынан әрқайсысы бөлек-бөлек айтыла бермейді, көбінесе екі-екіден немесе екі-үштен бір ырғақты топ құрап, бір деммен үндесіп, үйлесіп айтылады. Мысалы, анықтауыш пен анықталатын сөздер бір ырғақпен жымдасып, дыбыстары бір-біріне ықпалын тигізіп айтылады: *айдыңғол* (жазылуы: *айдын көл*), *сұлұғызыз* (*сұлу қызы*), *қарөлең* (*қара өлең*), *агайдын* (*ақ айдын*), *саратан* (*сары аттан*). Сол сияқты екі сөзден тұратын құрделі етістіктер де бір ырғақты топ құрайады: *келегалды* (жазылуы: *келе қалды*), *алалмады* (*ала алмады*), *жетіппарды* (*жетіп барды*), *қолгойду* (*қол қойды*). Бұл айтылғандарға мәтін арқылы мысал берелік. Мысалды жазуда әр топтың жігін бір тік сыйықшамен, сөйлем аяқталып, толық тыныс (пауза) болған жерді қос тік сыйықшамен (ажыратып көрсеттік, демек, бір тік сыйықшаның ішінде тұрган сөздер ырғақты бір топ болып саналады. Топ құрайтын сөздер шартты түрде қосылып жазылып, дыбысталу калпы транскрипцияланып көрсетілді. Мысалы:

¹¹ «Сөз сазы» орфозиялық ережелерді ұсынған («Ғылым» баспасы, 1983) анықтағыш құралда бұларды «ритмикалық топ » деп « орысшалау» атаған болатынбыз. Енді «казақшалап» «ырғақтык топ» деп атағанды жөн таптық.

Құйрұғұжоқ / жалыжоқ/
Құланғайтып / күнгөрөр //
Айагыжоқ / қолұжоқ/
Жылаң файтып / күнгөрөр //

«Асанқайғы толғауынан» деп айтылып жүрген бұл сөздердің жазылуы:

Қүйрығы жоқ, жалы жоқ
Құлан қайтіп күн көрер.
Аяғы жоқ, қолы жоқ
Жылан қайтіп күн көрер.

Прозага қарағанда, өлең тіркестеріндегі сөздердің топтарын ажырату оңайырақ, ейткені өлеңнің өзі ырғакқа құрылтындықтан, ондағы сөздердің топтасуы өз-өзінен шығып түрады, оның үстіне бұған әр тармақтың ара-жігі, үйқас деген-дер де көмектеседі.

Кара сөзбен келген текстерде де сөздер топтарға жіктеліп айтылады. Мысалы, «Карагөз» драмасындағы Сырымның мына монологіндегі сөздер былайша топтасады:

Қырықұн // қаралығайғымен / жылаумен /
қырықұнётту // алдағашан / өлөрмін / итөмүрден /
кетермін / дебедім // әлігүнгө / менарсыз / тірімін //
кімдігүтөм / нені / медеуғылам / нетілеймін //.

Бұл текстің жазудағы түрі: Қырық құн! Қаралы қайғымен, жылаумен қырық құн өтті. Әлдеқашан өлөрмін, ит өмірден кетермін деп едім. Әлі қүнге мен арсыз тірімін! Кімді күтем, нені медеу қылам, не тілеймін ?

Іырғактық-мелодикалық топтардың ара-жігінде әрдайым айқын сезінерлікте дауыс кідірісі (пауза) бола бермейді, анық пауза көбінесе сөйлемнің соңында, бірыңғай мүшелердің арасында, оңашаланған не айқындалған мүшелердің айтылуында, тағы сол сияқты синтаксистік жіктедің аралығында болады. Мысалы, жоғарғы тексті терен паузаларға қарай ажыратсақ, былайша белгіленер еді! (бұл жерде паузалардың ара-жігіне үш тік сызықша қойылды): Қырықұн /// қаралы қайғымен /// жылаумен қырыққұн өттү /// алдағашан өлөрмін /// ит өмірден кетермін дебемім /// әлігүнгө /// менарсыз /// тірімін /// кімдігүтөм /// нені медеуғылам /// нетілеймін ///.

Мұндағы бірінші пауза (қырық құн дегеннен дейінгі) – өз алдына сөйлем іспетті. Сырым бұл монологінде «қырық

күн» деп бөліп айту арқылы Қарагөздің қазасын, ол қазаның халық дәстүрі бойынша белгілі бір меже-мерзімі өткенін (қырқы өткенін) білдіреді де сол уақыттың ішіндегі өзінің жан күйінішін баяндайды. Қаралы қайғымен, жылаумен деген-дердің арасындағы пауза бірыңғай мүшелерді ажыратады. Қырық, күн өтті дегеннен кейінгі пауза сөйлемнің соңындағы дауыс үзілісін танытады. Келесі екі пауза тағы да бірыңғай мүшелерді ажыратады да *деп едім* дегеннен кейін сөйлем аяқ-талады. Ал мен *арсыз* дегеннің екі жағынан паузаның болуы оның орны ауысқан, логикалық екпін түскен бастауыш екеніне байланысты. *Тірімін, кімді күтем, нені медеу қылам,*
не тілеймін дегендердің арасындағы пауза олардың бірыңғай баяндауыштар екендігіне байланысты.

Міне, сөйлем ішінде осы тәріздес ырғактық топтардың аражігінен өзге тұстарда да паузалар болады екен. Бұл паузалардың басым көшілігі ырғактық топтардың жігіне сай келеді.

Сөйлеу үстінде сөздер мынадай сәттерде бір ырғакпен айтылып, топ құрайды.

1.Анықтауыш пен анықталатын сөздер бір деммен айтылады да бір топқа енеді. Мысалы, қалқан құлақ, шегір көз, қара қарындаш, ақ ерке, тас жол, аяmas жау, алты ай, қара аспан, ақ орамал, екі қап дегендердің алдыңғы сөздері (қалқан, шегір т.б.) – заттың түрін, түсін, сипатын, қасиетін, тегін білдіретін анықтауыштар, соңғылары – анықталып тұрган сөздер. Мұндай бір ырғакты сөз топтарының компоненттері (құрамды бөлшектері) бір-біріне ықпалын тигізеді, сондықтан олардың жазылуы мен айтылуы бірдей түсे бермейді. Жоғарғы сөздердің дұрыс

Жазылуы:

қалқан құлақ
шегір көз
қара қарындаш
ақ ерке
тас жол
аяmas жау
алты ай
қара аспан

Айтылуы

қалқанғұлақ
шегіргөз
қарағарындаш
ажерке
ташшол
айамашшау
алтай
қараспан

Бұл айтылғанға мысал ретінде Абайдың мына бір шумақ өлеңінің дүрыс оқылуын (айтылуын) көрсетейік:

Аласаз / қарагөз / айнадайын //
Жүрекке / ыстықтійіп / салған сайын //
Үлбүрөген / агетті / ашығжұзді //
Тісәдемі / көруппең / қыздыңжайын //.

Анықтауыш пен анықталғыштан тұратын топтардың барлығының бірдей айтылуы мен жазылудың үлесінде алшақтана бермейді. Мысалы, *алтын сағат, агаши қасық, бұран бел, жо-марта адам, арық кой* деген топтар қалай жазылса, солай айтылады, өйткені бұлардағы сөздердің бір-біріне тигізетін әсерінде дыбыстық өзгерістер болатын сэттер жоқ.

2. Толықтауыш пен баяндауыш, бастауыш пен баяндауыш, пысықтауыш пен баяндауыш араларына сөз түсірмей қатар келсе, жай хабарлау ретіндегі сөйлемдерде олар бір деммен айтылады. Мысалы, *Біз үйге кеттік* деген сөйлем *Біз/үйгөгеттік* болып айтылады. Сол сияқты *Жолаушы тез келді* дегенді *Жолаушы / тезгелді* деп айту керек. Мұндағы *үйге, тез* деген сөздер – толықтауыш, пысықтауыштар да *кетті, келді* дегендер – баяндауыштар. Соңдықтан *тезгелді, үйгөгеттік* болып үндесіп айтылады.

Кейде баяндауышқа логикалық екпін түсіру керек болады. Ондайда баяндауыш дауыс ырғағы жағынан дара айтылады да алдыңғы сөзбен үндеспейді. Мысалы, «Еңлік-Кебек» пьесасында Кебек елден пана таба алмай, тау кезіп, тас кешіп кететінін білдіріп: «*Ал / біз / кеттік!*» дейді. Мұнда *кеттік* сөзіне ой екпіні түсу керек, соңдықтан бастауыш, баяндауыштар қатар тұрғанмен, *кеттік* сөзі ырғақтық топқа кірмейді, демек, басқы дыбысы ұяңдамайды. Тағы бір мысалға мына екі сөйлемді салыстырайық: *Менгөрдім / ұзұнғайың / құлағанын //* (Абай). Мен қазақпын / мың өліп / мың тірілген // (Ж.Молдағалиев). Алғашқы өлең жолында бастауыш пен баяндауыш үндесіп айтылады (*меңгөрдім*), өйткені мұнда *көрдім* сөзіне ой екпіні түсіп тұрған жоқ, ал соңғы өлең жолында *мен / қазақпын* деген бастауыш пен баяндауыш екі бөліктеге айтылуға тиіс, өйткені ой екпіні өзге ұлт емес, *қазақпын* дегенге түсіп тұр, соңдықтан *мен* қазақтың деп үндестірмей, *мен қазақпын* деп оқыған дүрыс.

3. Қазақ тілінде фраза мен идиом деп аталағын қалыптасқан тұрақты тіркестер бар, олардың көпшілігі еki-үш сөзден тұрады. Бұлар да бір деммен дыбысталатын тұтастық құрап, жымдасып, кірігіп айтылады. Мысалы:

Жазылуы:

ашық ауыз
көз көрім (жер)
қарға адым
қас пен көздің арасында
қырғи қабак

Айтылуы:

ашығауұз
көзгерүм
қарғадым
қаспенгөздүң арасында
қырғиғабақ

Әрине, тұрақты тіркестердің барлығы айтылуда бұлайша дыбыстық өзгеріске ұшырай бермейді. Мысалы, *ам ізін салмады, таң сыз берді, ауа жайылды* деген сияқтылар жазылған күйінше айтылады, өйткені бұларда да компоненттер арасындағы дыбыстық ықпал өзгеріс туғызбайды.

4. Екі-үш сөзден құралып, бір ғана іс-әрекет атаяны билдіретін құрделі етістік дегендер болады, олар да бір ырғакпен айтыла-ды.

Жазылуы:

ала келді
келе алмады
барман па еді
айтып берді
окып отыр

Айтылуы:

алагелді
келалмады
бармаппеді
айтыпперді
окыботұр

Құрделі етістіктердің басым көпшілігі бір деммен айтылғандарымен, дыбыстық өзгеріске ұшырамайды, өйткені бұлардың сөз аралығында үндестік зандарына қарай дыбыс икемделуі жоқ. Мысалы, *келе жастыр, бара бер, айтып қой* деген сияқты құрделі сөздер жазылған түрінше айтылады.

Құрделі етістіктердің екінші бір тобы *пайда көрді, қол қойды, жүрек жалгады, көз көрген, доп ойнады, асық атты, еске алды, қайқаң қақты* сияқты есім мен етістіктен тұратын-дар болып келеді. Олар да топ құрап, бір ырғакпен айтылады. Жоғарғы мысалдардың айтылуы былайша болады: *пайдалорду, қолгойдұ, жүрөгжалгады, көзгөргөн, добойнады, асыгатты, ескалды, қайқаңғақты*.

5. *Ол, бұл, сол, не* деген есімдіктермен келген тіркестер де ырғағы жағынан біртұтас болып айтылады. Мысалы: *солгезде, бұлғұндері, булгалада, олыз, негерек, негеремет, негылсаң оғыл*. Бұлардың жазылуы: *сол кезде, бұл күндері, бұл қалада, ол қыз, не керек, не керемет, не қылсаң о қыл*.

6. *О, а, я, е* сияқты одағайлармен келген қаратпа сөздер бір дауыс ырғағымен айтылады да, қаратпа сөз **к**, **к** дыбыстарынан басталып тұрса, бұл дыбыстар **ғ**, **ғ** болып айтылады. Мысалы:

Жазылуы:

а Құдай
о керемет
я қызыым

Айтылуы:

ағұдай
огеремет
йағызыым

7. Біріккен сөздер де бір ырғактық топ құрайды. Олар қалай жазылған күнде де (түбірлерін сақтап немесе сақтамай) бір-біріне үйлесіп, үндестік зандарына бағына айтылады. Мысалы:

Жазылуы:

шекара
куздігүні
Жезқазған
Сарыарқа
өнеркәсіп
кәсіподақ
жанкүйерлер
орынбасар
дүйсенбі
өтізшағала
акиық (қыран)

Айтылуы:

шегара
құздұғұнұ
Жезгазған
Саарқа
өнергәсіп
кәсібодак
жангүйөрлер
орұмбасар
дүйсөмбі
өтізшағала
ағыйық

8. Қос сөздердің сыңарлары да бір деммен үйлесе, үндесе айтылады. Олар көбінесе түбірі сақталып, дефиспен жазылады.

Жазылуы:

астан-кестен
көзбе-көз
қолма-қол
келе-келе
килы-килы
қоян-қолтық
күда-анды
азды-көпті

Айтылуы:

астаңгестен
көзбөгөз
қолмағол
келегеле
қыйлығыйлы
қойаңғолтүқ
күданда
аздығөпту

9. *Күн күркіреу, қой қоздау, аяқ аттау, жүрек жалғау, көзі кулімдеу* сияқты бір сыңары – зат есім, екіншісі – етістік болып келетін тіркестер де бір-бірімен ұндастырылған, бір тыныспен айтылады: *күңгүркүрөу, қойғоздау, айагаттау, жүрөгжалғау, көзгүлумдеу*. Ауа райын хабарлайтын дикторлар «бүгүн пәлен жерде жаңбыр жауап *күңгүркүрөйт*» деп айтулары керек (*күн күркірейді* емес).

10. *Бала кезі, жаз күндері, жан құштары, Алматы қаласы, Байқал көлі, аяқ алысы, көңіл қоши, күннің көзі* сияқты бір сыңары тәуелдік жалғаулы сөз болып келген тіркестер де бір ыргакпен ұндастырылған, айтылады: *балагезі, жазғұндарі,*

жаяңшұштары, Алматығаласы, Байқалгөлу, айагалысы, көңул-гошұ, күннүңгөзү.

11 Негізгі сөз берілген қатысты шылау сездер, көмекші есімдер (қасында, ішінде, үстінде т.б.) бір ыргакпен айтыла-ды. Шылаулардың басым көпшілігі (*соң, шейін, дейін, туралы, шақты, сайын, басқа, бөтен, тым, таман, ма/ме, ша/ше* т.б.) алдыңғы сөзден бір топ құрағанымен, араларында дыбыстық өзгерістер болмайды: *аздан соң, үйге дейін, саясат туралы, он шақты, барған сайын, бала ма, қызы ба. Дыбыстық өзгеріс қ, қ*, дыбыстарынан басталатын шылаулар және көмекші есімдер мен дауысты дыбысқа немесе **з, л, р, н, м, у, й, ң** дыбыстарына аяқталған сездердің арасында болады. Ол шылаулар: *қарай, кейін, қарсы, қасында. Мысалы, жазылуы: кешке қарай, түстен кейін, жазға қарсы, үйдің қасында, айтылуы: кешкегарай, түстенгейін, жаззагарсы, үйдүңгасында.*

12. *Әр, кей, бір, еш* деген сездермен келген тіркестер немесе біріккен тұлғалар бір деммен кірігіп айтылады. Мысалы: *әргашан, әргалай, әргүнү, әргайдан, кейгүнү, кейгезде, біргезде, біргүнү, ешпір. Бұлардың жазылуы: әрқашан, әрқалай, әр күні, әр қайдан, кей күні, кей кезде, кей күні, бір кезде, бір күні, ешибір.*

13. *Кім, не, қайда, қай, қалай, қайсы* сияқты сұрау есімдіктің ер і өздеріне қатысты (өздерінен кейін тұрған) сездермен бір топ құрайды: *қайдагеттің / баламау //*. Жазуда: *қайдада кеттің, баламау? Нездейсін / көңлүм / нездейсің //*. Жазуда: *Не іздейсің, көңлім, не іздейсің?*

Кім, не есімдіктерінің септеулі түрлері де (кімнің, кімге, кімді, кімнен, кіммен, ненің, неге, нені, неден, немен) өзінен кейінгі сөзден бір ыргақты топ құрап айтылады. Мысалы: Бұл / кімніңеголу? Жазуда: Бұл – кімнің қолы? Немеңгелдің? Жазуда: Немен келдің?

Кім, не, қайсы, қалай сияқты сөздер мынау, ол, бұл деген есімдіктерден кейін келіп тіркессенде де, бір ыргақпен айттылады: мынауыңым, мыналарғым, бұлғайсың, мұнұңғалай, бұлғалай т.т. Бұлардың жазылуы: мынау кім, мынауың кім, бұл қайсың, мұның қалай, бұл қалай.

14. Екі-үш сөзден құралып, бір ғана түсті білдіретін құрделі сын есімдер және екі сөзден құралып бір санды білдіретін құрделі сан есімдер бір ыргақтық топ құрайды: ал қызыл (айтылуы: алғызыл), ал қүрең (алғұрәң), қара ала (қарала), қара көк (қарагөк), қара қүрең (қарагүрәң), он бір (омбір), жиширма алты (жермалты), он бес (омбес), қырық алты (қырыгалты).

Бұл жерде біз мысалға дыбыстық өзгеріске ұшырап айтыла-тындарын ғана келтірдік, ал құрделі сын есімдер мен құрделі сан есімдердің басым көшілігі бір ыргақтық топ құрап айтылғандығымен, сөз аралығында дыбыстық өзгеріс болмайтындары қалай жазылса, солай оқылады. Мысалы: ақ сары, қызыл ала, ақ құба, құла жириен, он екі, он алты, қырық төрт, елу бес дегендер осы жазылған түрінше айтылады.

15. Екі сөзден құралып, бір заттың, бір құбылыстың, бір іс-қимылдың атын білдіретін (атайтын) құрделі атаулар бір ыргақпен айтылады: Мысалы: ортап қол (айтылуы: ортаңғол), асық жілік (асығежілік), тоқішек (тоғішек), қой қора (қойгора), қонақ уй (қонағүй), ақ жауын (ағжасауұн), тас жол (ташиол), тоқым қағар (тоқұмғағар).

Сейтіп, ыргақтық топ құрайтындар жеке жай тіркестер болып та (қалқан құлақ, тас жол, Байқал көлі, оқып отыр, көк ала), фраза, идиомдар сияқты тұрақты тіркестер болып та (ашиқ ауыз, құр қол, қас пен көздің арасында), біріккен сөздер болып та (қасіподак, шекара, Жаңақорған), кос сөздер болып та (қолма-қол, құлы-құлы), мәнді сөз берен шылау, одагайлар тіркесі болып та (о керемет, үйге қарай, желге қарсы) келе береді.

Сөздерді дұрыс дыбыстаудың киын жерлері (қате кетеді-ау дейтін түстар) тек жогарыда көрсетілгендей, екі (кейде үш)

сөздің аралығында ғана емес, бір сөздің ішінде де жиі кездеседі. Олар сөз түбіріне әр түрлі қосымшалар жалғаған тұстарда байқалады. Мысалы: *тұн+gi*, қашан+ғы, *тұн+ге*, қашан+ға, *орыс+ша*, *жаз+са*, *жұмыс+ши*, *көн+бе+ди*, *көр+ин+ген* деген сөздер айтылуда *тұңғұ*, қашаңғы, *тұңғө*, қашаңға, *орұшиа*, *жасса*, *жұмғышы*, *көмбөді*, *көрунгөн* болып дыбысталады.

Дыбыстардың бір-біріне тигізетін ықпалы әсіресе біріккен сөздер (бірігіп жазылатын) мен қос сөздердің (дефис арқылы жазылатын) аясында өте-мөте сезіледі, ейткені біріккен сөздер әрдайым бір ыргакпен айтылады. Мысалы, мына сөздер: *шек ара*, *алма-кезек*, *қара күйе* деп бөлек-бөлек айтылмайды, *шегара*, *алмагезек*, *қарагүйө* болып бір ғана тыныспен (ыргакпен), бір деммен айтылады. Осы себептен де біріккен сөздер мен қос сөздерді айтуда кететін қателіктер бірден көзге түсіп тұрады (дәлірек айтсақ, құлаққа жайсыз естіліп тұрады).

Қазақ тілінде кісі аттары, жер-су аттары, аң-құс, құрт-құмырска, бақа-шаян, өсімдік атаулары және термин сөздер көбінесе біріккен сөз болып келеді. Мысалы:

Кісі аттар. Жазылуы: *Досжан*, *Сәтбай*, *Құланбай*, *Болатбек*, *Маржанқызы*. Айтылуы: *Дошиаш*, *Сәттай*, *Құламбай*, *Боллатек*, *Маржанғызы*. Қазақ тілінің ең соңғы редакцияланған (түзетілген) емле ережелері бойынша кісі аттарының көпшілігі кіріккен күйінде естілүінше жазылады. Мысалы, *Сатыбалды* (*Сатыпалды* емес), *Дәметкен* (*Дәмееткен* емес), *Ұлбосын* (*Ұлболсын* емес), *Айғызы* (*Айқызы* емес) *Нұргожаса* (*Нұрқожаса* емес), *Амангелді* (*Аманкелді* емес), *Қарағөз* (*Қаралғаз* емес).

Жер-су аттары. Жазылуы: *Жезқазган*, *Талдықорған*, *Еңбекшілек*, *Жаманқала*, *Ешкіөлмес*, *Қараоткел*, *Қараой*, *Жылыой*. Айтылуы: *Жезгазган*, *Талдығорған*, *Еңбекшілазақ*, *Жамаңала*, *Ешкіөлмес*, *Қарой*, *Жылой*.

Аң-құс, жәндік, өсімдік атаулары. Жазылуы: *қарақұрт*, *кәрікызы* (өсімдік), *алақоржыны* (тышқан), *акиық* (қыран), *бірқазан* (құс), *өгізшагала* (құс), *қозықұйрық* (өсімдік), *қарақұс* (құс), *жыланқияқ* (өсімдік) т.т. Бұлардың айтылуы: *қарағұрт*, *кәрігізы*, *алағоржын*, *агиыйық*, *біргазан*, *өгушишагала*, *қозғұйрық*, *қарағұс*, *жылаңғыйақ*.

Терминдер. Жазылуы: *өнеркәсіп*, *кәсіподақ*, *қолөнер*, *үибұрыш*, *төртбұрыш* т.б. Олардың айтылуы: *өнергәсіп*, *кәсіб-*

одақ, қолөнөр, үшпүрүш, төртпүрүш (бұл мысалдар – тек қана айтылуда дыбыстық өзгерістерге ұшырайтын сөздер, ал біріккен сөзден тұратын адам, жер-су аттары, есімдік, аң-құс атаулары мен терминдердің ішінде жазылуынша айтылатын, яғни ұндестік заңдарына сай өзгеріс болмайтындары өте көп. Мәселен: *Ақтай, Ұлдай, Қызылорда, ақку, бұзаубас (құрт), қолжазба* т.т.

Кос сөздер де әрдайым бір ырғақпен, бір деммен айтылады да ондағы сынарлар бір-біріне ұндесіп, қиуласып жатады. Мысалы, айтылуда: *алмагезек, қолмагол, көзбөгөз, қойаңғолтүк, келдігетті, істүссүз, құбагүп, қыйлығылы, күмбөгүн* т.т. Бұлардың жазылуы: *алма-кезек, қолма-қол, көзбе-көз, қоян-қолтық, келді-кетті, іс-түссіз, құба-құп, құлы-құлы, күнбекүн*. Әсіресе **қ**, **қ** дыбыстарынан басталатын сөздің араларына *ба/бе, ма/ме, па/пе* дәнекерін салып қайталап жасалатын түрлерінің (*қолма-қол, көзбе-көз, қарама-қарсы*), екінші компоненті (сынары) ұяндалап айтылатынын (*қолмагол, көзбөгөз, қарама-гарсы*) қатты ескеру керек.

Сөздерді дұрыс айтуда көніл аударатын келесі үлкен мәселе – орыс тілінен және орыс тілі арқылы өзге тілдерден енген сөздердің қазақша дыбысталу жайы. Мектептен бастап үйретіліп келген қағида бойынша, орыс тілінен енген кірме сөздер қазақша сейлеуде екі топқа белініп айтылуға тиіс: бірін-ші топқа ертеректе еніп, қазақ тілінің дыбыстық заңдарына сәйкес өзгеріп қалыптасқан сөздер, сол «қазақыланған» қалпынша айтылатын сөздер кіреді. Мысалы, *шай, самаурын, сиса, сәтен, бәтес, бақал, жәрменқе, жәшик сияқты* «тұрмыстық» зат атаулары мен *облыс, болыс, шен, кеңсе, сом, газет* сияқты дерексіз есімдер орыс тіліндегідей чай, *самовар, ситец, сатин, батист, бакалея, ярмарка, ящик, канцелярия, суд, газета* болып айтылмай, жоғарыда жазылып көрсетілгеніндей, қазақша түрінде айтылады. Бұл сөздер – сан жағынан аса көп емес, сондықтан олардың емле сөздіктерінде ұсынылған қалыптарынша айту іс жүзінде көп қайшылық келтіріп келе жатқан жоқ.

Екінші топқа қазақ тіліне соңғы 50-60 жылда жүздел-мындал енген, көбінесе ғылыми терминдер болып келетін сөздер жатады. Емле ережелерінде бұларды сол орыс тіліндегі

қалпынша жазу ұсынылды да олар қазақша сөйлеу актісінде жазылған түрінде айтылатын болды. Бұл ереже түрінде қатаң ескертілмесе де, сөйлеу тәжірибемізде біршама орнығып, қалыптасты. Бұған радио мен теледидар дикторларының сөздері, мектеп пен жоғарғы оку орындарындағы мұгалімдер мен шәкірттердің сөйлеу мәнері дәлел.

Көптеген тілдердің тәжірибесінде шеттен енетін сөздер сол сөздерді қабылдаған тілдің фонетикалық заңдарына икемделіп, өзгеріп айтылады және сол өзгерген түрінде жазылады. Бұл – тіл табиғатына тән ортақ заңдылықтардың бірі. Осылан қарамастан, 1940 жылдардан бастап орыс жазуы – кириллица-ны қабылдаған бірқатар түркі халықтарының тілдерінде орыс тілінен соңғы кезеңдерде енген сөздерді сол тілдегі қалпынша жазып, жазылған түрінше айту тәжірибесі орын алды. Бұған, сөз жоқ, кейде жұқалап, кейде ашық жүргізілген орыстандыру саясаты басты себепкер болды, яғни орыс графикасына көшуіміз де, міндетті түрде орыс тілін екінші тіл ретінде мектептен бастап үйрену қажеттігі де, жоғары оку орындарында білім алудың негізі орыс тілінде жүргізуі де – баршасы орыс тілінен енген сөздерді «бас-аяғы бүтін» күйінде орысша тұлғалауға, орысша айтуға итермеледі. Тіл табиғатына қайшы келетін бұл тәртіп нормаға айналды.

Орыс тілін де едәуір жақсы менгерген бүгінгі орта және жас буын қазақтарды бұл құбылыс көп қинамайтыны белгілі, де-генмен соңғы жылдарда шет тілдік сөздерді ана тіліміздің дыбыс заңдарына үйлестірмей айту мен жазудың тіл табиғатына қайшы келіп тұрғаны жайында әңгіме жиі көтеріле бастады, тіпті бес-он сөзді қазақша сындырып жазып, сол жазу арқылы оларды қазақша дұрыс айтудың үлгілері деп көрсетіле бастады. Мысалы: *завод, машина, станция, кило* деп жазылып, осы жазылуы бойынша айтылып келген он шакты сөз *зауыт, машине, станса* (бұл сөзді қазақша дұрыс жазсақ және дұрыс айтсақ, *ыстанса* болуы керек), *килә/келі / кілә* деген тұлғаларда көрінді. Әрине, бұл сөздерді «қазақшалау» қыынга түспейді, өйткені бұлар – ғылыми термин емес, зат атаулары және олар күнделікті өмірде аузынша сөйлеу тілінде де жиі қолданылатын сөздер, сондықтан олар бұрынғы *қамыт, дога, қарындаш, сіріңке* сияқты сөздердің катарында сап түзей салады.

Қазіргі жаппай сауатты, орыс тілін де менгерген қазақтар сейлеу актісінде завод, машина, станция, кило деп айтулары жиірек кездесуі мүмкін болса да, бұларды «қазақы» тұлғада ұсыну осы принципті дұрыс деп санаудың үлгісі ретінде орын алып отыр деуге болады.

Бірақ, сөз жоқ, кірме сөздердің қазақы тұлғасында қолданылу принципінің дұрыстығына, оны әлеуметтік пікірдің қолданытырғанына қарамастан, жүздеген, мындаған кірме сөздер мен шетжүрттық жалқы есімдердің (адам аты-жөндөрі мен жер-су атауларының) басым көшпілігі әлі де орысша тұлғасында жазылып, айтылып отыр. Мұның да еркімізден тыс бірнеше объективті себептері бар. Ол себептердің бірі – соңғы жар-тығасыр бойы қалыптасқан тілдік тәжірибемізді, яғни лек-сикалық, еммелік, орфоэпиялық нормаларды құрт бұзу – шым-шытырық, бейберекеттікке, сауатсыздыққа ұшырататын қаупі болса, екіншісі – ғылым салаларының басым көшпілігінің орыс тіліндегі әдебиетпен байланысты екендігінде және әлі де көп уақыт бұл іліктестік үзіле қоймайтындығында, сондықтан математика, физика, химия, астрономия, геология сияқты көптеген салалардың мамандарына орыс, қазак тілдерінде біртекtes (тұлғалас) терминдерді пайдалану қолайлы екендігін ескеру жағет сияқты.

Бұл екі себептің ішінде әсіресе дәстүр факторы үлкен рөл атқарады: тіл тәжірибесінде ұзақ уақыт бойы әлеуметтік қолданыста болған сөз немесе жазу үлгісі я болмаса сөзді айту дағдысы келе-кеle бұрыс болса да, нормаға айналады да одан теп-тез ажырау мүмкін болмай қалады. Айтальық, аракқа карсы күрес науқаны жанданған кезде орысша «трезвость» деген ұғымның қазакша *салаяаттылық* деген баламасы дәл де, сәтті де емес болғанымен, әдеттегі дәстүріміз бойынша, осы ұғымда *салаяаттылық* сөзін күнделікті баспасөз беттерінде үзбестен қайталап жаза берген соң, радио мен теледидардан ауыз жап-пай айта берген соң, ол дағдыға айналды. Екінші мысал. Адам аты-жөндеріне келгенде, оларды екі дауыссыз дыбыстан бастап жазу атақты жазушы Габдол Сылановтың фамилиясын *Сланов* деп жазудан басталып, бул күнде *Смаханов, Смайлов, Спа-*

таев деп жазу етек алып кетті, дағдыға айналып бара жатыр, бірақ ол дағды нормага ауыспауга тиіс, өйткені емле ережесі мұны мүлде көтермейді.

Ушінші мысал. Әр түрлі себептермен сөздерді жазылуын-ша немесе жеке тұргандағы тұлғасынша айтудың дағдыға ай-налу қаупі туып отыр. Бұл өте қате дағдыны нормага айнал-дырмау үшін күрес – осы құралдың басты мақсаты. Демек, тіл тәжірибесіндегі дағдымен күресудің оңай еместігін байқаймыз. Әрине, дағдылардың баршасы теріс, қатеден бола бермейді. Осы себептен ондаған жылдар бойы кірме сөздерді орысша жа-зып, орысша айту көшпілік дағдысына айналғандықтан және ол дағды ресми норма ретінде қалыптастырылғандықтан, мұны бір сәтте өзгерту мүмкін еместігін сеземіз. Сондықтан тұлғасы өзгертилмей енген кірме сөздер орысша тұлғаланғанмен, орфоэпиялық нормага келгенде оларды тек қана орыс тіліндегідей етіп айту шарт емес деуге болады, яғни *химия, физика, электр, автобус, академия, ассоциация, брокер, валюта, глобус* деген сөздерді орысша дыбыстауынша айтуға да болады, қазақыландырып, *кытайский, eliktir, академия, бирокер, гылобұс* деп айтсаныз да еркініз, қайткенде де бұларды сөйлеу актісінде не таза орысша түрінде айту керек, не барлығын қазақыландырып айту керек деген орфоэпиялық қағида ұсынбаймыз. Егер қазақ жазуы өзгеріп (айталық, латын жазуын қабылдап), кірме сөздердің жазудағы тұлғасы өзгертиліп, ұсынылып жатса, сол өзгеріп жазылған түрінде немесе соған жақындатылып дыбыстау норма болмақ. Ал «орыс жазуын» қолданып отырған қазіргі күндерімізде орыс тілінен енген орыстың өз сөздері мен халықаралық термин сөздерді орыс тілі орфоэпиялық нормасы бойынша да, қазақша «сындырып» та айтуға (дыбыстауга) болады деген «екіүдай» қағида ұсынуға тұра келеді.

ОРФОЭПИЯЛЫҚ ЕРЕЖЕЛЕР НЕМЕСЕ СӨЗ САЗЫН КЕЛТІРУ ҚАҒИДАЛАРЫ

Орфоэпиялық ережелерді ұсынбас бұрын олардың берілу тәртібі жайында бірер ескертпе айтуға тура келеді.

Орфоэпиялық қағидалардың ұсынылу қалпы (тәртібі, әдісі, стилі) емле ережелерінің берілу тәртібінен біраз өзгешелеу болады. Бұл құрал, бір жағынан, мектеп мұғалімдері мен балабақша тәрбиешілеріне, мектеп оқушылары мен студенттерге ұсынылғандықтан, осы ережелерді жақсы игертулері және игерулері үшін, олар кеңірек дәлелденіп, түсіндірілді. Мысал-дар да көбірек келтірілді. Оның үстіне үйренушілер жаттыға түсулері үшін бұл ережелерге сөйлеу тәжірибесінде тапсырма-лар беріліп отырды. Ол тапсырмаларды тек сөз сазын үйретуші мұғалімдер, консультанттар т.т. ғана емес, орфоэпия ереже-лерін өз бетімен игеремін деген жеке адамдар да орындаулары-на болады, өйткені мұндай жаттыгулар ережені іс-жүзінде иге-ре түсуге әбден көмектеседі. Ережені теория жүзінде біліп алу бар да оны іс жүзінде пайдалана білу бар той. Сөзді дұрыс жазу мен сөзді дұрыс айтуға келгенде, жалан теорияны, яғни ереже-лерді білу ғана емес, тәжірибелі де, яғни жазу мен сөйлеудің мәні зор.

Екінші бір ескертетін нәрсе – әрбір бапта (параграфта) ұсынылған ереженің жалғасы ретінде ережеге қатысты айтылатын қосымша түсіндірuler, дәлелдемелер беріледі. Оларды да ереже болігі деп тану қажет.

Сөзді дұрыс айту ережелерін, олардың түсіндірмелерін, дәлелдемелерін ұсыну үстінде сөздердің жазылуы да жиі көрсетіліп отырылады, оның себебі, бір жағынан, қазак тілінде сөздің жазылуы мен айтылуы әрдайым бірдей түсіп отырмайтындығын ескертуде болса, екінші жағынан, жазуға қарап оқып (айтып, дыбыстап), окуға (айтуға, дыбыстауға) қарап жазып шатасу қаупінен сақтандыруда болып отыр.

Сөз сазы ережелері, емле ережелері сияқты баптарға (параграфтарға) ажыратылып берілді. Алды-артындағы түсіндірмелер мен жаттығу материалдарынан бөліп көрсету үшін, ереженің өзі жалпы текстен сәл шегіндіріліп терілді.

§ 1. Қазақ тілінде дыбыстардың бір-біріне әсер етіп, өзара үйлесетін, үндесетін тұстарының бірі – қатаң дыбыстардың ұяңдайтын жерлері.

Үрғактық топ құрайтын сөздердің алғашқысы дауысты **a**, **e**, **ы**, **i**, **у** (**үү**, **үү**), **и** (**ый**, **ий**) дыбыстарының біріне аяқталса, екінші сөз **к**, **қ** дыбыстарынан басталса, соңғылар ұяңдала, **f**, **г** болып айтылады.

Мысалдар: 1) Сөйлеу үстінде үрғактық топ құрайтын анық-тауыш пен анықталғыштардың қатаң **к**, **қ** дыбыстарының ұяңдауы:

<i>Жазылуы:</i>	<i>Айтылуы:</i>
бала кезде	балагеде
ала қоленке	алагөленке
ата қоныс	атағоныс
жана қала	жаңағала
ескі кім	ескігійім
қысқы кім	қысқыгійім
қыли көз	қылыгөз

Мәтінмен келтірілген мысалдың айтылуы
(окылуы): Білектей / арқасында / өргенбұрұм /
Шолпұсқ / сылдырығағып / жұрсақырын //
Кәмшәтбөрүк / ақтамақ / қарагасты / Сұлғуғыздың /
көрүппен / мұндайтұрун //

(Абай)

Мұнда өрген бұрым, кәмшат бөрік, ақ тамақ, қара қасты,

сұлу қыз, мұндаі тұр деген сөздер – анықтауышты тіркестер, бұлар бір үрғакпен айтылады. Осылардың ішінде жоғарғы ережеге мысал болатындары сұлуғыз, қарагасты болып айтылады.

2) Қатар келіп үрғактық топ құрайтын толықтауыш пен баяндауыш, пысықтауыш пен баяндауыштардың арапарындағы қатаң дыбыстар ұяңдала, әйткені оның анықтауыштарынан қатаң дыбыстар ұяңдалады. Мысалы: мен киноға бармай, үйге келдім; ол кі-тап оқығанды жақсы көреді; ол шақыртпай өзі келді де-ген сөйлемдердегі курсивпен көрсетілген сөйлем мүшелері бір үрғактық топ құрайды, сондықтан олар үйгөгелдім, жақсығөрөд, өзүгелд(i) болып айтылады.

3) Біріккен сөздердің бөліктегі (компоненттері) де бір ыргақпен айтылады, сондыктан бұлардың екінші бөлігінің басындағы **қ**, **қ** дыбыстары алдыңғы компоненттің соны дауысты дыбыстарға аяқталып тұрса, ұяңдан айтылады:

Жазылуы:

Талдықорған
каракүйе
каракүрт
алакөз (кұс атауы)
Мендікызы
Сарықөл

Айтылуы:

Талдығорған
карагүйө
карағүрт
алағөз
Мендіғызы
Сарығөл

4) Қос сөздердіңсындарлары да осы заңға бағынады:

Жазылуы:

баса-көктеп
кара-құра
келе-келе
кора-қопсық

Айтылуы:

басағөктеп
қарағұра
келегеле
корағонсық

5) Сөйлем ішінде сөз дауысты дыбыстарға аяқталып, оған қатысты шылаулар **қ** дыбысынан басталса, шылаудың баскы дыбысы ұяң айтылады:

Жазылуы:

желге қарсы
үйге қарай
елу қаралы
екі қайтара
үй қасында

Айтылуы:

желгегарсы
үйгөгарай
елүүғаралы
екіғайтара *немесе*
үйгасында

1-баптағы (параграфтағы) ережеге қарап, мына өлең шумағының дұрыс айтылуын (оқылуын) көрсетіндер; ол үшін, әрине, мұндағы сөздерді ыргақтық топтарға бөліндер; бұл мәтінде ыргақтық топтардың қайсысының айтылуы берілген ережеге қатысты екенін айтындар.

Ат қайда Ақбакайдай шаптай желген,

Қыз қайда құдашадай көзі құлген?

Алыстан ат арытып келгенімде,

Шақыртпай еш адамға, өзі келген.

§ 2. Ыргақтық топ құрайтын екі сөздің алдыңғысы **з**, **ж**, **р**, **л**, **м**, **и**, **и**, **й**, үнді **у** (*may, bay* деген сөздердегі) дыбыстарына

аяқталса, келесі сөздің басындағы **қ**, **қ** дыбыстары ұяндала, **ғ**, **ғ** болып айтылады.

<i>Ырғактық топтар:</i>	<i>Жазылуы:</i>	<i>Айтылуы:</i>
жез қазған	Жезқазған	Жезғазған
өнер кәсіп	өнеркәсіп	өнөргәсіп
бал қаймақ	бал қаймақ	балғаймақ
тай келтір	Тайкелтір	Тайгелтір
аман келді	Амангелді	Амангелді
каз катар	қаз-қатар	қазгатар
азан казан	азан-қазан	азанғазан
жылан көз	жылан көз	жыланғоз
сонымен қатар	сонымен қатар	соңуменғатар
катар	кой көз	көйгөз
қой көз	қай-қайдағы	қайгайды
кай қайдагы		

Бұл ережеге мысал ретінде мына үзінділердің дұрыс айтылу түріне назар аударыңыз:

Қарағым / айналайын / келдіңғайдан //
Алғырек / алмамойұн / ұшарсайдан //
Ейғалқа / мекеніңді / айттыпқойыш //
Адамның / жатполмағы / осұндаидан //

(Халық өлеңі)

Мына шумақтарды ырғактық топтарға ажыратып, дұрыс айтылуын көрсетіндер, жоғарғы ережеге сай келетін сөздерді табындар:

Салмасам, Айнамкөзге ән болмайды,
Кимесем, екі бешпент сән болмайды,
Ойнасан, өзің тенденс жаспен ойна, О
дағы алғаныңнан кем болмайды.

Айнамкөз, сен қайдағы, мен қайдағы,
Біреудің мен де өзіңдей боз тайлағы.
Есіме, беу қарағым, сен түскенде,
Қайнайды зығырданым қай-қайдағы.

(Мұхит)

§ 3. Ырғактық топқа енетін сөздердің бірінші сыңары **қ, **қ**, **ғ** деген қатаң дыбыстарға аяқталса, келесі сөз дауысты дыбыстардың біреуінен немесе **ж**, **з** сияқты ұян дыбыстар-**

дан және **р**, **л**, **м**, **и**, **й**, **у** деген сонорлардан басталып тұрса, алдыңғы қатаң дауыссыздар ұяндал, **ғ**, **г**, **б** болып айтылады. Мысалы, *шекара*, *сатып алды*, *қонақ үйі*, *кәсіподақ*, *келіп еді*, *қашық жер*, *бекзат*, *көк орамал* деген сөздер айтылуда: *шегара*, *сатыбалды*, *қонағүйү*, *кәсібодақ*, *келібеді*, *қашығжер*, *бекзат*, *көгорамал* болып дыбысталады.

Бұл ережеге мысал ретінде мына шумактардың дұрыс оқылуына назар аударыңыздар және жазылуын көрсетіңіздер:

Атеді / бұләнімнің / Жонұбалды //
Алғандай / сұлужонұп / ерімталды //
Жасымнан / сүйібайтқан / ән болған
соң // Жаңылмай / әлігүнге / естегалды //
Жанедім / әсемәнді / сүйібайтқан //
Жағымды / көпкебірдей / жұрт ұнатқан //
Келетін / нақысына / жүзғұблұп //
Кейдөрлеп кейдешалқып / баяулатқан //
(Біржан)

§ 4. Бір ырғакпен айтылатын сөздердің алдыңғы сыңары **с**, ш дыбыстарына аяқталса, келесі сөз **ж**, **ш** дыбыстарынан басталса, екі сөз аралығында қос **шиш** дыбысы айтылады. Мысалы, *Досжан*, *сөзишең*, *бос шылбыр*, *жас жаным* деген сөздердің айтылуы: *Дошиан*, *сөшишең*, *бошишылбыр*, *жашашаным*. Сол сияқты алдыңғы сыңар з дыбысына аяқталса, келесі сыңар **ж** дыбысынан басталса, қос **жж** айтылады. Мысалы, *газиз жсан*, *тогызы жерде* дегендердің айтылуы: *газижжсан*, *тогужжсерде*.

Осы ережеге байланыстырып, «Абай» операсындағы Абай мен Ажардың арияларынан алынған мына шумактардың орфо-эпиясын талдап көрелік:

Жазылуы:	Айтылуы:
Бауырым жара, сөзім нала,	Бауұрұмжара / сөзүмнала/
Дертпен келем мен бүгін.	Дертпенгелем / мембұғұн/
Аямас жау мені айнала	Айамашшау / менайнала //
Салды салмақ сұмдығын.	Салдысалмақ / сұмдұғұн //
Қаранғыда жалғыз жарық	Қаранғыда / жалғыжжарық/
Әлсіз қолда өшер ме?	Әлсізголда / өшерме //
Айдарым жок, жеке қалып,	Айдарымжоқ / жекегалып
Зұлмат жанышп өтер ме?	Зұлматжанышп / өтөрме //

Бұл заң екі сөздің аралығында ғана емес, түбір мен қосымшаның түйіскен жерінде де болады. Мысалы, *жұмысшы*,

қосиши, басши деген сөздер айтылуда жұмұшиши, қошишу, башиши болып естіледі.

Осы ережені ескеріп, мына сөздердің дұрыс айтылуын жазып және оқып көрсетіңдер.

ҚызЖібек, Бозжігіт, ауызша, орысша, көзсіз (батыр), құшсан, көшсін, қас жақсы, қас жаман, жас жарым, Көзжақсым, еш жұмысы (жоқ), бес жылдық (оку), үш жылдық жоспар, қазша (мамырлаған), қасша (дүшпанша), жазшы, тас жер.

§ 5. Бір ырғақпен айтылатын сөздердің алғашқысы з де-ген ұнан дыбысқа аяқталса, келесі сөз с деген қатаң дыбыстан басталса, айтылуда қос сс болып естіледі. Бұл заң түбір мен қосымшаның аралығына да тән. Мысалдар: жұз сом, жаз сайын, сөзсіз, бұлардың айтылуы: жұссом, жассайын, сөссуз.

Бұл ережеге жаттығу ретінде «Айман-Шолпан» пьесасынан Жарастың мына сөзін келтірейік:

Жазылуы:

Құдаға кел, жамағат, көз салайық,
Жарасқан сән-тұрманын біз санайық.
Маржаны құмалақтан, құрымжелек,
Қамшыны жібек бауға шамалайық.

Айтылуы:

Құдағагел / жамағат / көс-
салайық /
Жарасқан / сәнтүрманын /
біссанайық //
Маржаны / құмалақтан /
құрымжелек
Қамшыны / жібекпауға /
шамалайық //

§ 6. Бір ырғақпен айтылатын сөздердің алдыңғы сыңары н дыбысына аяқталса, келесі сыңары қ, қ, ғ дыбыстарының бірінен басталса, н өзгеріп, н болып айтылады. Мысалы: Аман+келді, айтылуы Аманғелді (бұл жerde ілгерінді-кейінді ықпал болып тұр: ілгергі н дыбысы кейінгі қ дыбысын ғ дыбысына айналдыrsa, ғ дыбысы н дыбысын н-ға айналдырып тұр). Осы сияқты бөкен қабақ, жан қалқа, Айманқұл, Боранғали деген сөздердің айтылуы: бөкеңғабақ, жаңғалқа, Аймаңғұл (бұл Аймаңқұл болып та айтылады), Бораңғали.

Бұл ереже түбір мен қосымшаның арасындағы дыбыстар өзгерісіне де жатады. Мысалы: қашанғы (қашан+ғы), тұнғі (тұн+ғі), зиянкес (зиян+кес), құйынға (құйын+ға) сияқты

қосымшалы сөздер қашаңғы, тұңғі, зыйаңкес, қүйүңға болып айтылады.

Мына мәтінді дұрыс оқып көрелік:

Жазылуы:

Ішім өлген, сыртым сау,
Көрінгенге деймін- ау.
Бүгінгі дос – ертең жау,
Мен не қылдым, япырмау?!
Жан қысылса, жайтаңдал,
Жанды еріткен жайдары-ау.
Жан жай тапса, сен неге
Жат мінезсің, жабырқау.

Айтылуы:

Ішімөлген/сыртымсау/
Көрүңгенге / деймінау //
Бүгүңгудос / ертеңжаяу //
Меннеғылдым / япырмау //
Жаңғысылса / жайтаңдал //
Жандеріткен / жайдарала //
Жанжайтапса сеннеге //
Жатмінессің / жабырқау //

(Абай)

Бірінші сөз **и** дыбысына аяқталып, келесі сөз **қ**, **қ**, **ғ**, **ғ** дыбыстарынан басталып тұрган сәттің кез келгенінде мұнданы өзгеріс бола бермейді, яғни олар бір топқа енбей, екі белек топта тұрса, бір-біріне әсер етпейді. Мысалы, «Қарақыпшақ Қобыланды» пьесасынан Қобыландының мына бір сөзінің дұрыс айтылуын көрелік:

Жазылуы

Ұлын құл ғып, қызын құн,
Қақсатып болған қызылбас.

Айтылуы

Ұлын / құлғып / қызын / құн/
Қақсатыпполған / қызылбас//

Мұнда **и** – **қ**, **и** – **қ** дыбыстары қатар келгенмен, бір-біріне әсер етпейді, өйткені қатар тұрган сөздер екі бөлек ырғакта тұр, сондықтан бұл жерде **қ** дыбысы **ғ**-ға, **и** дыбысы **и**-ға айналмайды.

Осы ережеге сай етіп, әрі алдыңғы қағидаларды ескеріп, мына мәтіндерді дұрыс айтып көріндер. Ол үшін топтарға беліп алындар.

Анталаған жауың көп
Қас қамауда біз қалсақ,
Жан көке, кімге тапсырдың?
Тогай толған жылқың бар,
Кора толған қойың бар, Жан
көке, кімге тапсырдың?

(М. Эуезов)

Жаңа жыл мың тоғыз жұз қырық бесінші,
Құйшы, дос! Қыран көңіл, бір желпінші!

Қан қырғын, қызыл соқта толастар ма?

Жаңа жыл, айт та маган, ал сүйінші!

(К. Аманжолов)

§ 7. Бір ырғақты топқа енетін сыңарлардың алдыңғысы **и** дыбысына аяқталса, келесісі **б**, **п** дыбыстарынан басталса, **и** дыбысы **м** болып айтылады. Бұл заң түбір мен қосымшаның аралығында да болады.

Мысалы, *сен бе едің, Құрманбек, Дүйсенбай, Жаппейіс, кунбатыс, құнбагар, жылан бауыр* (*трактор*) деген сөздер сембедің, *Құрмамбек, Дүйсембай, Жампейіс, күмбатыс, күмбагар, жыламбауыр* болып айтылады. Кейбір адам аттары айтылуынша жазылып жүр: *Жампейіс, Бейсембай*.

§ 8. Бір ырғақтың топтағы компоненттердің алғашқысы **с**, **т**, **к**, **к**, **п**, **ш** деген қатаң дауыссыз дыбыстарға аяқталса, келесісі **б** дыбысынан басталса, **б** дыбысы қатаң **п**-га жуықтау болып айтылады: *тас бұлақ* (айтылуы: *таспұлақ*), *Сәтбай* (*Сәттай*), *ақ берен* (*ақперен*), *айтып берді* (*айтыпперді*), *кеши бойы* (*кешпойы*).

Осы ережені және алдыңғыларын ескеріп, мына халық өлеңдерін дұрыс айтып көріндер. Үрғақтың топтарға бөліндер және дыбыстары өзгеріп айтылған сөздерді көрсетіндер.

Ат қайда Ақбақайдай шаптай желген,

Қыз қайда құдашадай көзі күлген?

Алыстан ат арытып келгенінде,

Шақыртпай еш адамға, өзі келген.

Баянауыл басында балалы құр, Бір сөз айтам, қалқатай, мойныңды бұр.

Аулыңың тұсынан аттанғанда, Ақ боз үйге сүйеніп қара да тұр.

§ 9. Орыс тілінен енген сөздердің соңында келетін ұян **б**, **в**, **г**, **д** дыбыстары айтылуда қатаң **п**, **ф**, **к**, **т** болып естіледі. Фами-лия соңындағы **-ов**, **-ев** журнақтары да **оғ**, **еғ**, **ығ**, **іғ** болып айтылады.

Мысалы: *клуп* (*клуб*), *педагок* (*педагог*), *устаф* (*устав*), *Иваноф* (*Иванов*), *Жұмашыф* (*Жұмашев*). Бұл сөздердің дыбыстары қатаң естілетін болғандықтан, қатаң дауыссыздан басталатын қосымшалар жалғанады. Мысалы: *наградтау* (айты-

луы: *награттай*), клубқа (*клупқа*), *Ивановтар* (*Иванофтар*). Араб, парсы тілдерінен енген *жад*, *араб тәрізді* бірен-саран сөздер де *жат*, *арап* болып айтылады, бұларға да қатаң дыбыстап басталатын қосымшалар жалғанады: *жадқа айтты* (жазылуы да, айтылуы да: *жатқа*), *арабтар* (айтылуда: *араптар*).

§10. Сөздің басындағы немесе бірінші ашық буындағы **ұ**, **ү**, **ө**, **ө** дыбыстары және екі дауыстының ортасында келген у дыбысы (*тауық*, *бауыр* сияқты сөздерде) келесі буындағы **ы**, **і** дыбыстарын өзгертіп, **ұ**, **ү**-лерге жуықтатып естіртеді (ашық буын дегеніміз – *құ-*, *қү-*, *қо-*, *бұ-*, *бү-* сияқты дауысты дыбыска бітетін буындар). Мысалы, *құ-лын*, *бү-гін*, *о-рын*, *құ-ліп*, *ө-мір* деген сөздер *кулұн*, *бұгұн*, *орұн*, *кулұп*, *өмур* болып айтылады. Еріндік дыбыстардың ықпалы үшінші, төртінші буындарда біртіндеп әлсірей береді. Мысалы, *кумістің* деген сөздің екінші буыны **ү**-ге ұқсан, соган жуық айтылса, үшінші буында **і**-ге жуықтау айтылады: *кумустің*.

Сол сияқты сөздің басындағы немесе бірінші ашық буындағы **ө**, **ү** дыбыстары келесі буындағы **е** дыбысын өзіне жуықтатынқырап естіртеді, бұл әсердің де күші үшінші, төртінші буындарда әлсірей түседі. Мысалы: *өнер*, *көре-ди*, *ө-сер*, *көбе-лек*, *жү-рек*, *қү-рек* деген сөздер *өнөр*, *көрөді*, *көбелек*, *жүрөк*, *қүрөк* болып айтылады.

Қазіргі кезде бұл сияқты ерін үндестігі байқалатын сөздерді жазылуынша оку орын алып барады, әсіресе екінші буындағы **е** дыбысын ә етіп, **өнэр**, **үлэс**, **өрэн** түрінде айтуышлық байқалады, бұл – әрине, қате.

Осы ережеге сай етіп, мына шумақтарды дұрыс айтып көрелік:

Жігітке / өлеңдөнөр / өнөрдөнөр //
Шынжүйрүк / өргөшапса / өршөлөнөр //
(Халық өлеңі)

Қазақтың / өзгөжүрттан / сөзү /
ұзұн / Бірінің / бірішапшаң /
ұқпассөзүн // Көздүңжасы / жүрөктің
/ қаныменен / Ерітуге / болмайды /
ішкімұзұн //

(Абай)

Бірінші буын бітеу не тұйық болса (бітеу буын дауысты мен дауыссыздан тұрады: **өр**, **үр**, **ұл**, **үс**, **өс** деген сияқты, ал

тұйық буынның алды-арты бірдей дауыссызға бітеді: **қол**, **көр**, **көз**, **тын** дегендей) келесі буындағы **ы**, **і**, **е** дыбыстарының **ұ**, **Ү**, **ө**-ге қарай бейімделуі сәл бәсеңдеу болады, дегенмен таза өздерінің дыбысталуын да сақтамайды. Мысалы, **қолтық**, **қойдыр**, **құлдық**, **көркем**, **көзде**, **бөрте** сияқты сөздердің екінші буындарындағы **ы**, **і**, **е** дыбыстарының езулік болып айтылуы сәл солғындау (**күмүс**, **өнөр** дегендерге қарағанда).

Осы ережелерге және бұдан басқа көрсетілгендеріне орай етіп, мына үзінділерді дұрыс қызып және жазып көріндер. Соңғы ережеге сай дыбыстары үндесіп айтылатын сөздердің астын сыйындар не атанадар.

...Өсер...өсер...не өсер? Тек зұлымдық өсер нөсер болып сенен!

Сор өсер, ар өшер!... Өскенде тек зар өсер сенің лағынет табаның астында! (М. Әуезов).

К а р а б а й. Құтылдым ба, құтылмадым ба? Көзім көрмес, қолым жетпес жерге кеттің бе, кетпедің бе?! Қараң батып болды ма, болмады ма? Уа, қайда әлгі қатын-баласы? Жық үйді, арт жүкті! Айдат жылқыны! (F.Мұсірепов).

Бүгін сүйсем, сені алсам – ертең
жалқып, Суып қайтар көнілім желше
шалқып, Куантып, қайғыменен
султамын Біреудің қызыл гүлін тұрган
балқып, Құдайдың толып жатыр күні
бүгін, Жігіттің тани алмай кемшілігін.
Бір алып қадірлемей, тастап кеткен
Тартып жүр киянатышыл ер күйігін.

(Абай)

§11. Қазіргі қазақ орфографиясы бойынша, жіңішке буыннан басталатын сөздердің екінші, үшінші буындарында **ә** әрпі сирек жазылады. *Сіра*, *іра*, *кіна*, *куна*, *куә*, *жұда*, *шұба* деген сияқты бірқатар сөздерде болмаса, қалған сөздерде **ә** естілгенмен, **а** әрпі жазылады. Мысалы: *ләззат*, *тәкаппар*, *рәсуа*, *діндар*, *Сәбира*, *Жәмила*. Мұндай сөздерде алдыңғы жіңішке буынның әсерімен келесі буындар да жіңішке айтылады: *ләззәт*, *тәкәппар*, *рәсуә*, *діндер*, *Сәбира*, *Жәмила*.

Бірақ бұл сөздердің алдыңғы тобына да (екінші буынын-да **ә** жазылатын), соңғы тобына да қосымшалар жуан түрде

жалғанады: *күнәға* (*күнәғе* емес), *Күләшқа* (*Күләшке* емес), *Жәмиләға* (*Жәмилеге* емес), *діндарлық* (*діндерлік* емес). Айтылуда да қосымша жуан айтылады.

Осы ережеге сай етіп және өзге ережелерді де ескере отырып, мына үзінділерді дұрыс айтып (оқып) көріндер:

Талак етіп бұл ғаламды
Болды мәлім кеткенің.
Кінәсы жоқ жас адамды
Қатты соққан не еткенін...
Ғашық-ақпын еш күмәнсyz,
Ырыс емес, сор үшін.
Көрісуге шыдамаспзыз,
Айрылалық сол үшін.,.

(Абай)

§12. Қазақ тілінде *жай*, *шай* сияқты сөздер қосымшасыз тұрғанда, жінішке айтылады: *жәй*, *жәйт*, *шәй*. Бірақ бұл сөздерге де қосымша жуан болып жалғанады да сөз тұтасымен жуан болып айтылады. Мысалы: *жайсыз* (*жәйсіз* емес), *шайга* кел (*шәйге* кел емес). Бірінші буыны *жай*, *шай* болып ке-летін өзге сөздер де – осындей. Қысқасы, **ж**, **ш** дыбысы мен ә дыбысының ортасында келген **а** дыбысы сәл жінішке айтылады. Мысалы, *жайылым*, *жайлau*, *жайнаu*, *шайтаu*, *шайлығu*, *шайы* (*жібек*) сөздері *жәйылым*, *жәйлаu*, *жәйнаu*, *шәйтаu*, *шәйлығu*, *шәйы* болып айтылады.

Ж, **ш** дыбыстары мен өзге дауыссыздардың ортасын-да келген **а** дыбысы жуан болып айтылады (және **а** жазылады): *жарғақ* (*жәргақ* емес), *жануар* (*жәнуар* емес), *жақтаu* (*жәқтаu* емес) т.т.

Осы ережеге сай етіп айтсақ, Абайдың «Оспанға» деген өлеңі билай оқылар еді:

Жәйнағантұуң / жығылмай /	Жағалайжәйлаu / дәuletің /
Жасқаныбжаудан / тығылмай/	Жарқырабжатқан /өзөнің /
Жасаулұжжаудан / бұрұлмай /	Жасылшөбү / құярмай /
Жаужүрек / жомарт / құбұлмай /	Жайдақтартып / сұналмай /
Жақсөмүрүң / бұзұлмай /	Жәйдарыжүзүң / жабылмай /
Жасқұзатың / тоғұлмай /	Жәйдақтапқашып /сабылмай/
Жалынжүрек / сұұмай /	Жақсөлупсің / йапырмай //
Жамбіткеннен / тұңұлмөй /	

Бұл өлеңнің барлық жолы **жа** деген дыбыс тіркесінен баста-лады және барлығы да **а** әрпі арқылы жазылады, ал айтылуда бірінші буыны жіңішке естілетін сөздер: *жәйнаган, жәйдақ, жәйдары, жәйдақтан*, өйткені бұларда **а** дыбысы **ж** мен **й** дыбыстарының ортасында келген.

Өздеріңіз мына үзіндінің дұрыс оқылуын жазып көрсетіңдер.

Жан қысылса / жайтаңдап /,

Жанды еріткен / жайдары-ау.

Жан жай тапса, / сен неге /

Жат мінезсің / жабырқау?

(Абай)

Ойландым да / толғандым,

Ойландым / ойға толмадым.

Жанды қидым / жалындым,

Жайланаң, сірә, қоймадым.

(Бернияз Күлеев)

§13. Кейбір екі буынды сөздерге тәуелдік жалғаулары жалғанған кезде, екінші буындағы **ы**, **і** дыбыстары сусып түсіп қалады. Бұл құбылыс сөздердің айтылуында да, жазылуында да ескеріліп, түсіп қалған дыбыс түсіріліп айтылады және со-лай жазылады. Мысалы, *халық, ерін, ауыл, нарық, бөрік* деген сөздерге I, II, III жақтық тәуелдік жалғауларын жалғағанда, екінші буындағы **ы**, **і** дыбыстары сусып түсіп қалады: *халқы* (халықы емес), *халқым, халқың, халқымыз, ернім, ауым, нарқы, бөркі*. Мұндайда **қ**, **қ** дыбыстары ұяндамайды: *бөркі* (*бөрігі* емес).

Ал жалпы зандалық бойынша **қ**, **қ** дыбыстарына аяқталған сөздерге дауысты дыбыстардан басталатын қосымшалар жалғанғанда, олар ұяндауға тиісті: *балық+ы – балығы, курек+ім – күрегім*.

Кейбір сөздерде **ы**, **і** дыбыстарының түсу-түспеуі сөз мағынасын ажыратуға қатысады. Мысалы, жоғарғы *көрік* сөзі екі түрлі мағынаға ие, егер «адамның көркі» болса, тәуелдік жалғауы жалғанғанда, **і** дыбысы түсіп қалады (*көркім, көркің, көркі*), ал ұстаның темір балқытатын *көрігі* болса, түспейді де соңғы **қ** дыбысы ұяндап кетеді. Сол сияқты «көпшілік, қауым, жұрт» мағынасындағы *халық* сөзі тәуелденгенде, *халқым,*

халқың, халқы, халқымыз болып, соңғы қ дыбысы үяндамайды, ал Халық сөзі жалқы есім болса, Сәрсенбайдың Халығы болып, үянданап айтылады.

Соңғы буынындағы қысан ы, і дыбыстары сусып қалатын сөздер кейде өлең ішінде буын санына орай түсірілмей айтылуы да мүмкін.

Тіпті о баста құрамында ы, і дыбыстары жоқ бұлт, кілт, жалт сияқты сөздер де өлеңде буын саны жетпей тұрса, бұлт, кілт, жалт болып айтыла береді. Мысалы, ауыл, бауыр сөздері тәуелдік жалғаулармен құбылған кезде, мына шумақтардың біреуінде қысан дыбыстарын түсіріп, екіншісінде түсірмей айтылады:

Аулұмғоңған / Сырымбет / саласына – 11 буын

Болдұмғашық / аксұнқар / баласына – 11 буын Егер мұнда ауғлұм болып айтылса, өлең жолы бір буынға артып кетер еді. Ал мына өлеңде буын саны 11 болу үшін, керісінше, ы, і дыбыстары түсірілмей айтылуға тиіс болып тұр:

Атымның / қақтүрады / сауғұрғна – 11 буын

Костепкі / салыпкелем / бауғұрғна – 11 буын

Колұнан / шәйгүйдүрүп / ішейіндеп – 11 буын

Келемін / Айтпайсұлұу / ауғлұна – 11 буын

Осы ережені сақтай отырып және берілген баска да ережелерді еске алып, мына үзінділерді дұрыс айтып көріндер (кей сөздерде емле ережесі әдейі бұзылып жазылды, оларды көрсетіндер). Өлеңнің буын санын көрсетіп, түсіріліп айтылатын дыбыстарды түсіріп, түсірілмейтіндерін қосып жазындар.

Созады Біржан дауысын қоңыр қаздай,

Басқаға бір өзінен жүрмін жазбай.

Жиылдысы жандаралдың болады деп,

Жанбота, тынышымды алдың ала жаздай.

(Біржан) Қамшы

бастым асыға буырлтайға, Өткел

бермей тоқтатқан терең сай ма?

Жұрт жаңғыртып орынынан бір күн тұнде

Қалқатайдың ауылы кетті қайда?

(Біржан)

Қонады бір күн жас бұлыйт

Жастастың төсін құшақтап.

Жөнелді ертең, қалды
ұмыт Көк жүзіне ойнақтап.

(Абай)

Суырып кокте қылышын
Нөсерлі қара төнді бұлыт.
Тарылтып жердін тынысын
Тапа-тал түс болды ымырыт.
Өрістен қашты төрт түлік,
Асыға үйге енді жүрыт.
Салатындаі бір бұлік.
Ақырды бейне долы бұлыт.

(Касым Аманжолов)

§14. Қысаң ы, і дыбыстары көптеген үш буынды сөздердің ортаңғы буындарында көмекілеу естіледі, бірақ олардың түсірілмей сақталып айтылғаны жөн (емледе де көбінесе ы, і әріптері сақталып жазылады). Мысалы: *ықылас, жапырақ, топырақ, тебіренді, күніренді*.

Ал өлеңдерде буын санына қарай мұндай сөздерде дыбыстарды түсіріп те айтуга болады. Мысалы:

Жасыл шөп, бәйшешек жоқ бұрынғыдай,
Жастар күлмес, жүгірмес бала шулай,
Қайырши шал-кемпірдей түсі кетіп.

Жапырағынан айырылған ағаш, қурай, –
деген Абайдың шумағында соңғы тармақтағы *жапырақ, айырылған* сөздері *жапрагынан, айрылған* болып айтылуы көрек, ейткені өлең жолы 11 буынды болу үшін *жап-ра-ғы-нан* 4 буын болып, *ай-рыл-ған* 3 буын, *а-ғаш, қу-рай* 4 буын болып айтылуы қажет.

Мына өлең шумақтарындағы курсивпен терілген сөздердің дұрыс оқылуын (айтылуын) көрсетіндер және себебін айтЫндар.

Калдың ағаш *жапырагы*
Сыбырласып өзді-өзі.
Көрінбей жердің *топырағы*,
Құлпырған жасыл жер жүзі.

(Абай)

Уа дариға, алтын бесік – туған жер,
Қадірінде келсем білмей, кеше гор.

Жата алмас ем топырағында тебіренбей
Ақын болмай, тасың болсам мен егер.

(Қасым

Аманжолов) Әлі есімде бұлтсыз әлем аспаны,
Арман бізді алға апарып таstadtы.
Қара шашың мойныма оралып, Жерге
тамған мөлдір көздің жастары.

(Н.Әлімкүлов)

§15. Бір ырғактық топта айтылатын сөздердің алдыңғысы дауысты дыбысқа аяқталса, екіншісі дауысты дыбыстан басталса, қатар келген екі дауыстының біреуі (алдыңғысы) «жұтылып» кетеді де бір ғана дауысты айтылады. Мысалы, *торы ат, қара ала, келе алмадым, барып па еди, Қараадыр, Сарыөзек, айта-айта сияқты сөздер торат, қарала, келалмадым, барыппедің, қарадыр, сарөзек, айтайта* деп айтылады. Бұл занға біріккен сөздер де, жеке сөздер де, сөз бен шылаулада да, кос сөздер де бағынады.

Қазақ тілінің бұл орфоэпиялық занұлдылығын ақындар шебер пайдаланады, яғни жазуда буын саны артық шықса да, айту-да (окуда) дәл шығатын болғандықтан, сөздерді ақындар еркін колданады. Мысалы:

3 4 4
Бі-лек-тей / ар-қа-сын-да / өр-ген-бұ-рұм /

3 4 4
Шол-пұ-сұ / сыл-дыр-га-ғып / жүр-са-қы-рын /

4 3 4
Кәм-шәт-бө-рук / ақ-та-мақ / қа-ра-қас-ты /

4 3 4
Сұ-лүү-ғыз-дың / кө-рүп-пең / мұн-дай-тұ-рұн // Мұнда жүрсе ақырын, көріп не ең деген сөздері бар жолдар жазылуда 12 буын болғанмен, айтулуда жүрсақырын, көріппең болып кірігетіндіктен, өлең өлшеміне ешбір нұқсан келтірмей түр.

Қатар тұрған сөздердің кез келгенінің екі аралығындағы дауыстылар бірін-бірі «жұта» бермейді. Егер ондай екі сөз екі ырғактық топта тұрса, аралық дауыстылар өз орындарында анық айтылады:

Аласыз / қара гөзү / айнадайын /

Жүрекке / ыстықтійіп / салғансайын /

Үлбүрөген / ағетті / ашығжұзду /
Тісәдемі / көріппен / қыздыңжайын //
(Абай)

Мұнда көзі айнадайын, жүрекке ыстық, етті ашық деген сөздер қатар тұрғанмен, екі аралықтарындағы дауыстылар кірікпейді, өйткені бұлар әр бөлек ырғактық топта тұр.

Осы ережені ескеріп, мына өлең шумактарын ырғактық топтарға бөліп, дұрыс айтып көріндер. Дауысты дыбыстардың кірігетін және кірікпейтін жерлерін дәлелдендер.

Жас қызы мен жас бәйтерек – бәрі бірдей,
Жапырағы тұра ма жылда өзгермей?
Менен гөрі сөзінді жақсы ұғушы Кетер
деме ер жігіт бір кез келмей.

(Абай)

Жас дәурен, қызығына тоя алмаспын,
Ән мен күй, өлең, сені қоя алмаспын.
Тірлікте тербелейін, тебіренейін, Бір
күні кетсем ұбықтап, оянбаспын.

(К.)

Аманжолов) Жел желппиді кейде
есіп, Көк жайлауда жатырмын.
Жұлдыздармен сөйлесіп,
Астында аспан-шатырдың.

(С. Мәуленов)

Ұшады аққу көлден байпаңдаған,
Қалқага бір сөзім бар айта алмаган. Су
құйып сырлы аяққа тұндыргандай,
Көзіңнен айналайын жаутаңдаған.

(Халық өлеңі)

§16. Қазақ тілінің қазіргі емле ережелері бойынша қосар **ый**, **иі** әріптерінің орнына бір ғана **и** әрпі жазылады. Мысалы: *ки* (дұрысында *кій* болу керек), *қи* (*қый* болу керек), *сол* сияқты: *би* (*бій*), *быыл* (*быйыл*), *жисі* (*жійі*), *жинаалыс* (*жыйналыс*), *ти* (*тій*), *тиын* (*ақша*, *тыйын*), *тиін* (*аң*, *тійін*) т. т.

Ал **и** әрпі – жіңішке дыбыстың таңбасы, бірақ жазуда жуан **ый** дыбысын да таңбалайтын болғандықтан, оны жіңішке де, жуан да етіп айтуға тұра келеді. Ішінде **а**, **ы**, **ұ**, **о** сияқты жуан дауысты дыбыстары бар сөздерде **и** таңбасын **ый** деп

жуан айту керек. Мысалы: *жыйналыс* (жазылуы: *жиналыс*), *қыйыңғыстау* (*қын-қыстау*), *быйыл* (*бывл*), *сый* –*сыйапат* (*сый-сияпат*).

Сөз ішіндегі **и** дыбысының жуан не жіңішке екенін ондағы өзге дауыстыларға қарап айыруға болады. Мысалы, *дидар*, *мигұла*, *мизам*, *бидай*, *мирас*, *мыңқ*, *мия*, *қыдию*, *қалқио* деген сөздерде **и** – жуан, өйткені бұлардағы өзге дауыстылар – жуан, сондықтан айтылуда бұлар *дыйдар*, *мыйгұла*, *мыйзам*, *быйдай*, *мыйрас*, *мыйық*, *мыйа*, *қыдыйу*, *қалқыйу* болуы керек. Ал *ми*, *жи*, *қи* үш-төрт сөздің жуан айтылуға (*мый*, *жый*, *қый*) тиіс екенін есте ұстай кажет, өйткені бұл сөздерге жалғау-жұрнақтар жуан вариантта жалғанады: *мии ашыды* (*мий емес*), *мисыз* (*мисіз емес*), *жина* (*жине емес*), *қиды* (*қиді емес*).

Есте оңай сақтауга болатын ереже, ол – **к**, **ғ** дыбыста-ры бар сөздердегі **и** дыбысының әрдайым **ый** болып жуан айтылатындығы:

<i>Жазылуы:</i>	<i>Айтылуы:</i>
қырғи қабақ	қырғыйғабақ
қылыш-қылыш	қылышығылыш
қалқиған	қалқыйған
қыли (көз)	қылый (гөз)
шиқ етті	шыйқетті
шиқан	шыйқан
жан қиярлық	жаңғыйарлық
қағида	қағыда

Мұндай сөздердің ішінде *сый*, *тый* деген екі сөз түбір күйінде де, әр алудан қосымшалар жалғанған тұлғасында да жалаң **и** әрпімен емес, косар **ый**-мен естілудің жазылып жур. Оның себебі осы буындардың жіңішке варианттарында айтылатын сөздермен (*ти*, *си*) мағынасын шатастырмауга байланысты. Алдыңғыларын айтқанда, үнемі жуан **ый** етіп айту керек: *тый*, *сый*. Бұлардың туынды, қосымшалы түрлері де әрдайым жуан айтылады: *сыйлау*, *сыйтық*, *сыйды*, *сыймады*, *сый-құрмет*, *сыйымсыз*, *сыйысу*, *тыйғызу*, *тыйылу*, *тыйымсыз*. Бұл сөздер осы тұлғада **ый** арқылы жазылады.

С мен **т**-дан басталатын және осылардан кейінгі дыбысы и болып келетін сөздердің қалғандарында жалаң **и** жазылады, бірақ сөз жуан болса, **и** әрпін жуан **ый** етіп айту керек. Мы-

салы: *сияқты* (айтылуы: *сыйақты*), *сідаң қагу* (айтылуы: *сыйдаңғагу*), *сидиды* (айтылуы: *сыйдыйды*), *сиқыр* (айтылуы: *сыйқыр*), *сипақтау* (айтылуы: *сыйпақтау*), *сипаң-сипаң* (айтылуы: *сыйпаңсыйпаң*), *сипат* (айтылуы: *сыйпат*), бұл сөздің *сыпат* түрі де айтылады, әйтеуір *сійпат* деп бірінші буыннан жіңішке айтпау керек, *сипау* (айтылуы: *сыйпау*), *сирақ* (айтылуы: *сыйрақ*), *сиyr* (айтылуы: *сыйыр*), *сия* (айтылуы: *сыя*), *сиыну* (айтылуы: *сыйыну*), *типыл* (айтылуы: *тыйыл*), *тиын* (айтылуы: *тыйын*), *тиянақ* (айтылуы: *тыйанақ*).

И дыбысының жуан не жіңішке айтылуы өзінің алдындағы дауыссыз дыбыстың айтылуына үлкен әсер етеді. Мысалы, *ти* және *тый* деген сөздерді айтып көріндер: алғашқысында **и** дыбысын айтқанда, тілдің ұшы тіске тиіп, едәуір ілгері созылады да соңғы жуан сөзде **и** дыбысын айтқанда, тіл сәл артқа қарай тартыңғы болады. Өзге дауыссыздар да осындай азын-аулак өзгеріспен айтылады. Ол үшін *жсi* және *жисын*, *би* және *быйыл*, *тиін* және *тыйын*, *ишикі* және *шыйқыл* деген сөздерді айтып көрініздер де басқы дыбыстардың айтылуындағы ерекшеліктерді аңғарыңыздар.

Қазіргі кездегі орфоэпиялық қателіктердің көзге түсетін тұстарының бірі – жуан сөздердегі **и** дыбысын жазылуынша жіңішке айту (оку). Мысалы, *жиналыс*, *ми*, *дидар* сөздерін *жійналыс*, *мій*, *дійдар* түрінде жіңішке айтуышылық кездеседі. Бұл – дұрыс емес.

Кейбір үш-төрт буынды создерде **и** дыбысынан басқа әрі жуан, әрі жіңішке дауыстылар аралас келеді. Ол сөздер көбінесе араб, парсы, орыс және интернационалдық сөздер болып келеді. Мысалы: *қасиет*, *қиямет* (*қыйамет*), *Сәлима*, *антитеза*, *архипелаг*, *дебитор*, *артезиан*. Мұндайда араб, парсы сөздеріндегі **и** дыбысы іле-шала **қ** дауыссызынан кейін тұрса, **ый** болып айтылады: *қыйамет*, *қыйсан* (есеп-қисап), ал қалған жағдайда жіңішке айтылады: *Сәліймә*, *қасиет*.

Осы ережені сактап және өзге қағидаларды да ескеріп мына үзінділерді дұрыс айтып көріндер, ол үшін транскрипциялап жазып көріндер, яғни естілуге (айтылуынша) жазындар.

1) Зым-зия, зымиян, тиянак, жария, биялай, тиесілі, қияқ, Сұлуқия, қиқар, киім-кешек, қоқиланды, компиды, қария, зиянкес, Зікірия, Рәшида, Рахила, Рахима, Бәлия, Қапия, Халима, Кәrima, Бәтіма, Фәтима, Қали, Ғали, Уәли.

2) Бас-басына би болған өңкей қиқым,
Мінеки бұзған жоқ па елдің сиқын.
Өздерінді түзелер дей алмаймын, Өз
қолыңдан кетпесе, енді өз ырқын.

(Абай)

3) Біз бұлбұл қызыл гүлге тартқан сада,
Нәркес көз, қалам қасты лағыл бала.
Иранның Құсни-зия тотысындаі,
Гәухардан шыққан нәсіл тудың зада. Топ
көрсе, қырындаитын біз бір тұлпар,
Бұлбұл құс қызыл гүлге болып іңкәр.
Сіздерді неге ұмытсын көрген сұнқар.

(Ақан сері)

4) Сүйе алмадық, қия алмадық, қимадық,
Неге біздер от құшаққа сыймадық?
Екеуміз де екі айрылған өзендей,
Махаббатты басқа жанға сыйладық.

(Т. Молдағалиев)

§17. Қазіргі емле ережелеріміз бойынша, қосар ұу, ұу әріптерінің орнына жалаң у әрпі жазылады. Бұл дыбыстың да айтылуының жуан-жіңішке екендігін (ұу немесе ұу екендігін) сөз ішіндегі өзге дауыстыларға қарап айыру керек. Екі, үш не одан да көп буынды сөздерде өзге дауыстылар жуан (**а, о, ы**) болса, ұ әрпімен келген тұс ұу болып, ал жіңішке (**е, ә, ө, ү, і**) болса, үү болып айтылады.

Ал бір буынды сөздерді (олар сан жағынан өте аз) сөйлемнің мағынасына қарай қай сөз екенін ажыратып, жуан не жіңішке айтуға тұра келеді. Мысалы, *Үйдің төбесінде ту желірейді* деген сөйлемде *ту* сөзі жуан *тұу* болып айтылады. *Ту дегенде түкірігі жерге түспейді* деген сөйлемде *ту* сөзі жіңішке болғандықтан, *туу* деп айту керек. Сол сияқты: *Шу, жсану-ар, шу* деді дегенде *шу* сөзін жіңішке *шүү* деп айту керек те, *Көшеде айғай-шу естілді* дегенде *шу* сөзінің жуан екенін, сондықтан *шүү* деп жуан айту керек екенін контекстен, яғни сөйлемнің мазмұнына қарап ажырату керек.

Тәжірибеде у дыбысын жуан не жіңішке айтуда қындық байқалмайды, сондықтан орфоэпиялық қателіктер де бұл ретте онша сезілмейді, дегенмен *ту* және *тұу*, *шу* және *шүү*,

гуугууледі (жазылуы: *гу-гуледі*) және *гудок*, *су* және *сүурет* (жазылуы: *сүрет*) сияқты бес-он сөздің жуан-жіңішке айтылуынан жаңылыспаган абзал.

Осы айтылғандарға сәйкес Абайдың мына жолдарын дұрыс оқып көріндер. и дыбысы жуан және жіңішке айтылатын сөздерді **ый**, **ий** арқылы жазып көрсетіндер.

Тұзу кел, қысық-қыңыр, қырын келмей,
Сыртын танып, іс бітпес, сырын көрмей.

Шу дегенде құлағың тосансыды, Өскен
соң мұндай сөзді бұрын көрмей.

(Абай)

Түйе боздап, қой қоздап, корада шу,
Көбелек пен құстар да сайда ду-ду.

Гүл мен ағаш майысып қарағанда,
Сыбыр қағып бұранданап ағады су.

(Абай)

§18. Бірқатар сөздер мен қосымшалар жазылуда түбірі сақталатындықтан, аралас буынды болып келеді, яғни жуан сөзге жуан варианты жоқ **-кер**, **-гер**, **-кент** сияқты жұрнақтар жалғанады немесе жіңішке түбірлі сөзге жіңішке варианты жоқ **-кой**, **-паз**, **-кор** сияқты жұрнақтар жалғанады. Мысалы: *сауда+гер*, *Шым+кент*, *бал+гер*, *Таш+кент*, *әсем+паз*, *сән+кой*, *шәй+кор* (жазылуы: *шайкор*) т.б.

Осылардың ішінде **-кер**, **-гер**, **-кент** жұрнақтары жалғанған кейір жуан сөздер айтылуда осы жұрнақтардың әсерімен тұтасынан жіңішке айтылады. Мысалы: *саудегер*, *Шімкент*, *Тәіикент*. Бірақ бұл жұрнақтар жалғанған кез келген жуан түбірлі сөз жіңішке айтыла бермейді. Мысалы: *қаламгер*, *жасапкер*, *айыпкер*, *Құмкент* сияқты сөздер жазылған түрінше айтылады. Ал жуан жұрнақтар жіңішке түбірді жуандата алмайды, сондықтан олар жуанды-жіңішкелі аралас буынды болып, жазылған түрінше айтылады. Мысалы: *әсемпаз*, *өнерпаз*, *сәнкөй*, *әзілкөй*.

§19. Соны **к**, **г** деген жіңішке дауыссыздарға аяқталатын кірме сөздерге жалғанған III жақтағы тәуелдік жалғауын жіңішке айтқан дұрыс. Мысалы: *педагог* – *педагогі*, *ток* – *тогі*, *монолог* – *монологі* т.б.

Тері, сөз соңындағы **к**, **г** дыбыстарының қазақ тілінде жіңішке айтылуының әсері күшті, сондықтан айтуда көбінесе

қазақ қосымшаларын жінішке жалғауға бейім тұрады. Мысалы: *педагокке*, *педагоктік*, *участокке*, *участогтер*, *участогі*, *рояльдің* т.б. Өйткені қазақтың өз сөздерінде **к**, **г** дыбыстары еш уақыт жуан **а**, **ы**, **о** дыбыстарымен келмейді (айтылмайды).

§20. Қазақ тілінде сөз сонында екі дауыссыз қатар келетін сөздер бар. Бірақ кез келген дауыссыздар сөз сонында қатар келе бермейді. Тек алғашқысы **л**, **р**, **м**, **н**, **ң** деген сонор дыбыстар, соңғысы **т**, **с**, **п**, **ш**, **қ**, **қ** деген қатаң дыбыстар болып тіркесіп келеді. Мысалы: *жалт*, *қалт-құлт*, *қарт*, *қант*, *ант*, *қарс* (*қарс* айрылды дегендегі), *күмп* (суға *күмп* берді), *қарыш-қарыш*, *дүңк* (*дүңк* етті), *қарқ-қарқ* (*қарқ-* *қарқ* құлді) т.б. Мұндай сөздердің басым көшпілігі *жалт-жұлт*, *қарқ-қарқ*, *куңк* (етті) сияқты еліктеуіш сөздерде екі дауыссыз қатар айтылып, қатар жазылады.

Бұл сөздердің айтуда сөз сонындағы екі дауыссыз күрт, шұғыл дыбысталады, яғни араларына **ы**, **і** сияқты дауыстыларды салмайды: *жалт* (*жалыт* емес), *күрт-күрт* (*күріт-күріт* емес), *жалт-жұлт* (*жалыт-жұлыт* емес) т.т.

Қазақ тілінде сөздің үш дауыссызға аяқталуы – мүлде жоқ құбылыс. Сондай-ақ жоғарыда көрсетілгендей, сонорлар мен қатаңдардың қабаттасуынан өзге дауыссыздардың қатар келуі де – орын алмайтын құбылыс. Қазақ тіліне енген орыс және интернационалдық сөздер, әсіресе жер-су, қала аттары қатарынан бірнеше дауыссыз дыбыска аяқталып келе бермейді. Мысалы: *пункт*, *Омск*, *фонд*, *митинг*, *штамп*, *шланг*, *факт*, *рецепт*, *экспромт*, *киоск*, *лифт*. Бұл сөздер қазақ тілінде жеке айтылғанда, соңғы қатар келген екі-үш дауыссыздың не сондарынан, не орталарында **ы**, **і** дәнекер дыбыстар салып айтылады: *пункті*, *Омскі*, *фонды*, *митингі*, *штампы*, *шланғі*, *факті*, *рецепті*, *экспромты*, *киоскі*, *лифті*. Бұлардың ішінде қатаң дыбыста (*факт*, *рецепт*, *киоск*, *лифт*), сонор мен қатаң да (*шланг*, *штамп*, *экспромт*), сонор мен ұян дыбыс та (*фонд*, *митинг*), тіпті үш дыбыс та (алдыңғысы сонор, қалған екеуі қатаң – *пункт*) қатар келген.

Қазақ тілі үшін үйреншікті емес (яғни фонетикалық жүйесіне сай келмейтін) дыбыстарға аяқталатын мұндай сөздердің бірқатарына, атап айтқанда: **нд**, **мп**, **кт**, **нк**, **нг**, **мб**, **ск**, **фт**, **пт**, **мт** дыбыстарына аяқталатындарына қазақ тілінің

қосымшалары жалғанғанда, сөз бер қосымшаның аралығына дәнекер **ы**, **i** дыбыстары қосылып айтылады және солай жа-зылады. Мысалы: *киоск+ке – киоск+i+ге* (*киоскке* емес), бұл жерде дәнекер **ы**, **i** болғандықтан, қосымшалар ұнданап кетеді (-ке емес, -ге, -тар/-тер емес, -лар/ -лер деген сияқты), *митинг+тер – митинг+i+лер* (*митингтер* емес), *Омск+тен – Омск- +i+ден* (*Омсктен* емес), сол сияқты *фактілер*, *фактіге*, *фактісі* (*факттер*, *фактке*, *факті* емес), *штампылар*, *штам-пыны*, *штампысы*, *штампыға* (*штамптар*, *штампты*, *штам-пы*, *штампқа* емес), *объектілер*, *объектіге*, *объектісі* (*объ-екттер*, *объектке*, *объекті* емес). Үш дауыссызға аяқталған сөздер қазақ қосымшаларын дәнекер **ы**, **i** дыбыстарының қабылдайды, өйткені айтуда алдыңғы дауыссыз бір буынга кетеді де соңғы екі дауыссыз айтуда өздері бір буын болып айтылады: *пунк(i)t*, *пунктке*, *пункітер*, *пункіті* (*пунктіге*, *пунктілер*, *пунктісі* емес), *сфинкіс*, *сфинкістер*, *сфинкістің* (*сфинксілер*, *сфинкісінің* емес). Ал бұлардың жазылуы: *пункт*, *пунктке*, *пункттер*, *сфинкс*, *сфинкске*, *сфинкстің*.

Ал **тр**, **zm**, **rg**, **rd**, **лк**, **кс**, **дж**, **фр**, **рв**, **кт**, **дз**, **фм** сияқты дау-ыссыз дыбыстар тіркесінә аяқталған кірме сөздерде айтылуда соңғы екі дауыссыздың арасына **ы**, **i** дыбыстары қосылып ай-тылады: *метір*, *оркестір*, *альпинизім*, *колледіж*.

Соңғы екі-үш дауыссыздың біреуі **к**, **г** дыбыстары бо-лып келсе, ол сөзге қазақ қосымшалары тек қана жіңішке жалғанып, жіңішке айтылады (түбірдегі дауысты мейлі жуан болсын, мейлі жіңішке болсын). Мысалы: *пунктке* (айтылуы: *пунктке*), *паркке*, *парктер*, *паркі* (айтылуы: *парікке*, *паріктер*, *паркі*), *митингіге*, *митингілер*, *киоскінің*, *киоскілер*. Ал **к**, **г** дыбыстары жоқ жерде қосымша сөз түбірінің немесе түбірдің соңғы буынының жуан-жіңішкелігіне қарай жалғанып, сол жалғанған түрінде айтылады. Мысалы: *лифтілер*, *лифтісі*, *лифтіге* (мұнда қосымша жіңішке, өйткені түбірдің дауысты дыбысы **и** – жіңішке), *штампыға*, *штампылар*, *штампысы* (мұнда түбірдегі дауысты **а** жуан болғандықтан, қосымша да жуан жалғанып тұр).

Осы ережеге сай етіп мына сөздерге қазақша қосымшалар (септік, тәуелдік, көптік жалғауларын) жалғап көріндер де дұрыс айтып беріндер:

Антракт, металлург, анонс, бланк, контракт, бумеранг, почтамт, дифирамб, интеллект, катафалк, комплекс, комплект, конспект, кзендж, лаборант, ландшафт, логарифм, манускрипт, медпункт, моллюск, пакт, прейскурант, раунд, рецепт, рислинг, торт, экспромт, цифр.

§21. Кірме сөздердің ішінде **ст**, **сть**, **зд**, **кст**, **вт**, **сс**, **лл**, **мм**, **тт**, **пп** дыбыстарына аяқталғандарына қазақ тілінің қосымшалары жалғанғанда, ең соңғы дауыссыздар түсіріліп айтылады және солай жазылады. Мысалы: **коммунист+тер** – **коммунистер** (**коммунисттер** емес), **коммунист +ке** – **коммуниске** (**коммунистке** емес), **коммунист+тік** – **коммунистік** (**коммунисттік** емес), **съезд+ге** – **съезге** (**съездге** емес), **съезд+диң** – **съездің** (**съезддің** емес), **съезд +и** – **съезі** (**съезді** емес), **ведомость+қа** – **ведомосқа** (**ведомостьқа** емес), **металл +дар** – **металдар** (**металлдар** емес), **терапевт+ке** – **терапевке** (**терапевтке** емес).

Осы ережені ескеріп, мына сөздерге қосымшалар жалғап айтындар және жазындар.

Кросс, грамм, гимнаст, грипп, киловатт, эхинококк, хлорофилл, фармацевт, авиапост.

§22. Орыс тілі жүрнектары жалғанғанда, жіңішкелік белгісі (**ь**) жазылатын және л дыбысына аяқталатын сөздерге қазақ тілі жүрнектары жалғанғанда, жіңішкелік белгісі жазылмайды және л дыбысы жуан айтылады. Мысалы:

<i>Орысша</i>	<i>Қазақша жазылуы</i>
<i>жазылуы:</i>	<i>әрі айтылуы:</i>
материалный	материалдық (материалдық емес)
феодальный	феодальдық (феодальдық емес)
коммунальный	коммуналдық (коммунальдық емес)

Ал жүрнектар жалғанбай-ақ түбірдің өзінде л дыбысы жіңішке сөздерде (яғни түбірдің өзінде жіңішкелік белгісі жазылатын сөздерде) ь таңбасы сакталып жазылады және л дыбысы жіңішке айтылады: **моральный** – **моральдық** (сөз түбірі – **мораль**), **артельный** – **артельдік** (сөз түбірі – **артель**). Мұндайда көбінесе сөздердің қазақша айтылуы жазылуына сай келеді: ь тұрса, л дыбысын жіңішке айту керек те, ь жок болса жуан айту керек.

Осы ережені ескеріп, мына сөздерді дұрыс айтып көріндер.

Патриархалдық, акварельді, спектакльдік, артельдік, номиналдық, вассалдық, вокальды.

§23. Қазақ тілінде **қ**, **қ**, **п** деген қатаң дауыссыз дыбыстарға аяқталған сөздерге дауысты дыбыстан басталатын қосымшалар жалғанған кезде, сөз соңындағы қатаң дыбыстар ұядап, **ғ**, **г**, **б** (кейде **ү**) дыбыстарына айналатыны мәлім. Бұл өзгеріс жазу-да да, айтуда да секеріледі. Мысалы: *тарақ+ым – тарагым, күрек+i – күрегі, доп+ы- мыз – добымыз, тап+ып – тауып, кеп+у – кебу, кеп+ин – keyin* т.б.

Бұл ережеге орыс тілі арқылы енген сөздердің де бірқатары бағынады: *ток – тогы* (айтуда: *тоги*), *блок – блогы* (айтуда: *блоги*). Ал **п**, **х** дыбыстарына аяқталатын бірқатар кірме сөздер бұл ережеге бағынбай, соңы қатаң дыбыс ұядамай айтылады және солай жазылады. Мысалы: *принцип+i – принципi* (*принциби* емес), *гринп+i – гринi* («оның гринi жұқты», *грибi* емес), *тип+i – типi* (*тибi* емес), *кинескоп+ы – кинескопы* (*кинескобы* емес), *цех+ы – цехы* (*цеғы* емес), *шейх+ы – шейхи* (*шайығы* емес), *шах+ы – шахы* (*шағы* емес).

§24. Жіңішкелік белгісіне аяқталатын көп буынды кірме сөздерге казақ тілі қосымшалары буын үндестігі бойынша жалғанады, яғни сөздің соңғы буыннандағы дауысты дыбыс жіңішке болса, қосымша да жіңішке, жуан дауысты дыбыс болса, қосымша да жуан болып айтылады және солай жазылады, ль дыбысына аяқталған кірме сөздерге тек қана тәуелдіктін III жағында жіңішке қосымша жалғанып, жіңішке айтылады. Мысалы: *фестиваль+га – фестивальга, бірақ фестивалi, календарь+га – календарьга, календары*.

кль, брь, бль тәрізді дауыссыз дыбыстар мен жіңішкелік белгісіне аяқталған сөздерге және жіңішкелік белгісіне аяқталған бір буынды сөздерге қазақ тілі қосымшалары әрдайым жіңішке жалғанады, яғни сөздің соңғы буыны тұтас өзі жуан болса да, қосымша буын үндестік заңына бағынбай жалғанады және жіңішке айтылады (әрі солай жазылады). *Ансамбiлге* (жазылуы: *ансамбльге*), *ансамбiлдер* (жазылуы: *ансамбльдер*), *ансамбiлi* (жазылуы: *ансамблi*, мұнда сөз түгелімен жуан, тек соңғы дауыссызы жіңішке **ль**), *бинокльдiң* (айтылуы: *бинокiлдiң*), *биноклiм* (айтылуы: *бинокiлiм*), *бинокльдер* (айтылуы: *бинокiлдер*). Мұнда сөздің соңғы буыны *нокль* – жуан.

Тюль, тюльдің (айтылуы: *тюлдің*), *тюльге, тюлі* (сөз бір буынды, бірақ жіңішке **ль** дыбысына аяқталған), *князьдің, князъдер, князі* (сөз **зъ** дыбысына аяқталған және бір буынды болғандықтан, қосымша жіңішке жалғанып тұр).

Бұл сияқты дауыссыз дыбыстары, әсіресе сөз соңындағы дауыссызы орыс тілінде жіңішке айтылатын сөздердің қазақша дыбысталуында дауыстылардың ынғайы (жуан-жіңішкелігі) емес, дауыссыздардың айтылу ынғайы шешуші рөл атқарады.

Осы ережені ескеріп, мына сөздерге қазақша қосымша жалғап, дұрыс айтып көріндер.

Капсюль, бандероль, ноябрь, верфь, автомобиль, акрополь, бронь, водевиль, виолончель, вестибюль, вымпель, госпиталь.

§25. Соңғы буынында **е, э, ю** дыбыстары бар кірме сөздерге қазақ тілі қосымшалары әрдайым жіңішке жалғанып, солай айтылады әрі жазылады. Мысалы: *актерлер, актерге, актері, дирижерлер, дирижері, Петрге, Петрден, дуэтке, дуэті, полюске, полюстер, парашютке, парашюті, дуэльге, дуэлі, велордің, велорі, дебютке, дебюті*.

§26. Ер адамның фамилиясы **-ов, -ев, -ин** жүрнақтары арқылы жасалған болса, **-ов, -ев** жүрнақты фамилияларға қазақ тілінің қосымшалары түбірдің соңғы буынның жуан-жіңішкелігіне қарай жуан не жіңішке түрде жалғанып айтылады (және солай жазылады). Мысалы: *Омаровтың, Омаровқа* (сөз түбірі – *O-mar*, соңғы *мар* буыны – жуан), *Әуезовтің, Әуезовке* (сөз түбірі – *Ә-уез*, соңғы *уез* буыны – жіңішке), *Мұсаевқа, Мұсаевтан* (сөз түбірі – *Mұсаев*, соңғы буыны – жуан), *Құдайбердиевке, Құдайбердиевтен* (сөздің соңғы буыны *di* – жіңішке). Ал **-ин** жүрнағымен жасалған фамилияларға қазақ тілі қосымшалары әрдайым жіңішке жалғанып, жіңішке айтылады: *Оразалинге, Дербісалинге, Сембинге*.

§27. Кейбір өлшем атаулары жазылуда шартты түрде қысқартылып беріледі. Ал қысқартулар не әріптерден, не арнайы алынған өзгеше белгілерден тұрады. Мысалы: 10 см, 5 га, 3 мм, 10°, 40м, 100%, 220v, 70w. Бұларды ауызша айтқанда қысқартылып берілген әріптерді емес, сол әріптер білдіріп тұрған сөзді толық айту керек: *он сантиметр, бес гектар, уш миллиметр, он градус жынысы, қырық метр, жүз пайыз, екі жүз жисирма вольт, жетпіс ватт*. Бұларға жалғанып

тұрған қосымшаларды (олар дефис арқылы жазылып беріледі) оқығанда, белгілерге тіркеп емес, тұтас сөзге тіркеп айту керек. Мысалы: *көйлегімнің етегін 5 жылға* немесе *сымыға ұзарттым* деп емес, *бес сантиметрге ұзарттым* деп айту керек. Сол сияқты: *мәшине сағатына 60 км-ден жүріп отырды* деп жазылғанды алтыс километрден (*алтыс км-нен* немесе *алтыс км-нен емес*) жүріп отырды, комбайныны 400 гектардай (га-дай емес) жердің егінін орды деп айту керек.

§28. Жекеше II жақтағы жіктік жалғауы тек қана **-сың/-сің** түрінде (яғни соңғы дыбысы **и** болып) айтылады және солай жазылады. Мысалы: есімдерге жалғанған жіктік жалғаулары (жекеше түрі):

I жақ мен мұғаліммін, диктормын

II жақ сен мұғалімсің, дикторсың

III жақ ол мұғалім, диктор Етістікке жалғанған жіктік жалғаулары (жекеше түрі):

I жақ мен білемін, айтамын, барғанмын, баармын

II жақ сен білесің, айтасың, барғансың, барасың,

III жақ ол біледі, айтады, барған, баар.

Кейде ауызекі сөйлеу тілінде бұл жалғау **-сың/-сің** түрінде (сен мұғалімсін, дикторсын) де келеді және солай жазылып та кетуі мүмкін. Бірақ әдеби нормада сөйлегендеге, тек **-сың/-сің** түрінде дыбыстау керек. Ал **-сың/-сің** қосымшасы етістіктің III жақтағы – бұйрық қалау рай деген түрін білдіреді. Мысалы:

I жақ мен барайын, біз барайық

II жақ сен бар, сендер барындар

III жақ ол барсын, олар барсын.

Сондықтан әр түрлі қызмет атқаратын қосымшалардың тұлғаларын да шатастырмай, бірін **-сың** түрінде, екіншісін **-сың** түрінде айту керек. Бұл екеуін айыру қын емес: егер жіктік жалғаулы сөз *сен* деген есімдікпен айтылуға тиіс болса, **-сың** түрі, ол деген есімдікпен айтылуға тиіс болса, **-сың** түрі жалғанады: *сен барасың, ол барсын*.

Мына шумақтардағы үш нүктө қойылған сөздерге мағынасына қараған **-сың** немесе **-сың** қосымшасының қайсысы жалғанып айтылатынын көрсетіндер:

Адамзат – бүгін адам, ертең топырақ,

Бүгінгі өмір жарқылданап, алдар бірақ.

Ертең өзің қайда..., білемі...,
Өлмек үшін туған..., ойла, шырақ.
(Абай)

Досты қайдан табар...
Кенесерге адам жоқ.
Әрлі-берлі шабар...
Жалғыздықтан жаман жоқ.

(Абай)

Өзгеге, көнілім, тояр...
Өлеңді қайтіп қояр...
Оны айтқанда толғанып,
Іштегі дерпті жояр...
Сайра да зарла, қызыл
тіл, Қара көнілім оян...
Жыла..., көзден жас ақ...
Омырауым боял...
Тындараса еш адам
Өз жүрегім толған...
Әр сөзіне қара...
Іштегі дертім қозгал...

(Абай) Баса...

аяғынды ырғаң-ырғаң, Сылдырап
шашибауың мен алтын сырғаң. Жай
журіп шаттана... әсерленіп, Әсем...
жүйрік аттай мойның бұрып.

(Халық өлеңі)

§29. Кейбір шылаулардың дыбыстық қатарлары болады, яғни өзіне қатысты алдыңғы сөздің аяқталар дыбысының әуеніне қарай шылау сөздің басқы дыбысы да не үзаң, не қатаң болып құбылып айтылады (және солай жазылады). Мысалы: Ол өлең айтып қана қоймады, домбыра да тартты. Жақып қана жана келді, өзгелер әлдеқашан келген-ді. Тек қана бір тілегім бар деген мысалдарда шылау қатаң **к** дыбысынан басталады және солай жазылады, өйткені шылаудың алдындағы сөздер (*айтып, Жақып, тек*) **п**, **к** деген қатаң дыбыстарға аяқталып тұр. Ал мына сөйлемдерде шылау ғана түрінде айтылады (және жазылады): жалғыз ғана тілегім бар; жаңа ғана келдім; ол радиодан ғана сөйледі. Бұларда шылаулардың алдындағы сөздер не

дауысты дыбысқа (*жасаңа*), не ұян, сонор дыбыстарға (*жалғыз, радиодан*) аяқталып тұр.

Осы сияқты мен, бен, пен (домбыра мен қобыз, қобыз бен домбыра, дауыс *пен* үн), да/de, *та/me* (барса да, барып *та* келді), *дағы, тағы* (барса *дағы*, айтып *тағы* үлгерді), *гой, қой* (айттың *гой*, хат *қой* мениң күткенім), *құрлы, ғұрлы* (*жасат құрлы, бала ғұрлы*) деген шылаулар да өздерінің алдындағы сөздің соңғы дыбысына қарай бірде ұян, бірде қатаң дыбыстармен айтыла береді (және солай жазылады). Сондықтан *бала құрлы ақылың жоқ, айтарың осы қана ма, келіп де үлгердің бе* деген сияқты етіп айтуда, дыбыстауға болмайды. (*Бала ғұрлы, келіп те* деп айтылуы керек).

§30. Кейбір сөздердің дыбыстық екі вариантының қатар айтыла беруі әдеби тіліміздің орфоэпиясына қайшы келмейді. Бірақ мұндай сөздер онша көп емес. Мысалы: *мұнның – бұнның, мұнда – бұнда, шейін – дейін, наңсағай – наңзагай, уану – жұбану, разы – риза, жаздың күні – жаздығүні*. Бұл сөздердің вариантылығының басты себебі – орфоэпияға байланысты емес, өзгеде.

Сол сияқты *шайтан ~ сайтан, үкімет ~ өкімет, айқай ~ айғай, Құдай ~ Құдая, заман ~ замана, ашық ~ гашық* сияқты бірқатар сөздер де екі вариантта қолданылады. Бұлардың орфоэпиясы жазылған түрінде болуы керек. Өйткені бұл сөздерді екі түрлі етіп қолдануда қазіргі тіліміз белгілі бір мақсатты қөздейді. Мысалы, *өкімет* пен *үкімет* (екеуінің түбірі – бір сөз) деген сөздердің алғашқысы «государство» дегеннің бала-масы ретінде қалыптасты; *шайтан ~ сайтан* сөздерін ақын-жазушылар көбінесе стильдік мақсатта ажыратып қолданады: *шайтаны* «қәдімгі жын-шайтанды» білдірсе, *сайтаны* көбінесе «өжет, өзгені билеп алатын сиқыр қылықты» деген жақсы мәнде жұмсалады. Мысалы, Жұбан Молдагалиевтің мына жолдарына назар аударыңыз, мұнда *сайтан* сөзі «жын-шайтан» мәнінде емес, жақсы мәнде:

Мен қазақпын, қара көз *сайтан* қызыбын,

Сөйлей қалсам, тілімнен бал

тамғыздым. Сүйе қалсам, өмірдей өле

сүйдім, Қас батырмен айқасқам балтам

жүзін.

Ашық (асық) – гашық, Құдай – Құдая, заман – замана

сияқты параллельдерді ақындар буын санының артық-кемі қажет болған сәттерде кезек таңдағанда береді. Олар сол қолданылған түрінде айтылады (дыбысталады). Мысалы, Абай:

Сорлы асық сарғайса да, сағынса да, Жар
тайып, жақсы сөзден жаңылса да, –

дегенінде *асық* вариантын алады, өйткені дауыстыдан басталған *асық* сөзі алдындағы сөздің соңғы буынымен кірігіп, *корла-сық* түрінде үш буын құрайды, егер *гашиқ* вариантын алса *корлы га- шық* болып 4 буын болып кетер еді де 11 буын-ды тармақтың өлең өлшемі дұрыс шықпас еді. Ал өзге сәттерде Абай «*гашиқтың тілі – тілсіз тіл*» немесе «*сен шошыдың гашығынан*» деп *гашиқ* вариантын жұмсайды. Міне, бұл тәрізді бір сөздің белгілі бір мақсатпен әдейі қолданылған екі вариантының екеуі де әдеби нормага жататындықтан, олардың айтылуы да екі түрлі (яғни қалай берілсе, сол түрінде) болуы керек.

§31. Бір сөздің екі түрлі дыбысталып айтылатындарының ішінде жергілікті ерекшеліктеріне (диалектизмдерге) қатыстыларын жоғарғы көрсетілген варианты сөздермен шатастырмау керек. Яғни көптеген сөздердің әр жерде әр түрлі дыбыстық өзгерісі болғанмен, әдеби тілдегі түрінше айту – орфоэпиялық норма болады. Мысалы: *маңдай* – *маңлай*, *шаңырақ* – *шаңғырақ*, *киіз* – *кігіз*, *ие* – *еге* (*үйдің иесі*), *шатақ* – *чатақ*, *сияқты* – *сивікты*, *аула* – *әулі*, *жсоңышқа* – *жсоңырышқа*, *қабырға* – *қабыртқа*, *жоқ* – *джоқ*, *масқара* – *машқара*, *бес тыын* – *беш тыын*, *ас пісті* – *ас пысты*, *мысық* – *мышық*, *балалар* – *баладар* сияқты параллель сөздердің алдынғы сынарлары әдеби норма да екіншілері – жергілікті (диалектілік) вариантары. Бұлардың айтылуында әдеби нормадағы тұлғасын ұстау қажет. Олай дейтін себебіміз – кейде автордың не кітап, журнал шығарушылардың салақтығынан я болмаса білмestігінен кейбір сөздердің әдеби варианты емес, жергілікті қолданыстағы тұлғасы жазылып кетеді. Мұндайда сөзді түзетіп оқыған (айтқан) абзал. Ал пьесаларда немесе фелье-тон, сықақ әңгімелерде автор сөздің жергілікті не қарапайым сөйлеу тіліндегі вариантарын әдейі берсе, оларды, әрине, сол берілген тұлғасында айту (оку) керек екендігі белгілі.

§32. Қазақ тілінде одағай сөздер де дыбыстық, тұлғалық варианттары бар сөздер тобына жатады. Бірақ бұлардың барлығында қалай берілсе (жазылса), солай айтуга (окуға) болады. Мысалы: япирау – япирмау – ойпирмау – ойпирмай – ойпирым; ойбай – ойбай, ах – аң – ең – ех, аң-аң – ең-ең, аха-қа – ең-ең, уа -уау -уай, па – паң, бәлі – пәләй, әй – ей, астапырал-ла – астагыпиралла т.б.

Жалпы одағай дегендер – дыбысталуы жағынан өте құбылмалы тұлғалар. Сондықтан жазушы өзінің қалауынша бір одағайды бірнеше түрлі құбылтып, қатарлап, дыбыстарын созып бере береді. Мысалы: Ә-ә, солай де! Ой-қой, дүние-ай! Бәрекелді-i, жігіт-ақ екен! Паң-паң-паң, мына сұлудың кербезін-ай! Осы сөйлемдерді: Е, солай-де! Ой, дүние-ай! Бәрекелді, жігіт-ақ екен! Паң, мына сұлудың кербезін-ай! деп те беруі мүмкін.

Одағайлар адамның түрлі сезім дүниесін білдіретін ишарраттар болғандықтан, актер немесе фельетон окушы пьесалардағы, сықақ- фельетондардағы одағайларды өзгертіп, бірінің орнына екіншісін айтпаганмен, образдың ыңғайына қарай, дыбыстарын созып немесе келте қайырып, бір одағайды екі-үш рет кайталап немесе бір-ақ рет айтып дегендей, құбылтуына болады. Мысалы, пьесадағы сиңуацияға қарай: жә, болды! түрінде де, жә-жә-жә, болды! түрінде де айтылуы мүмкін. Алғашқысында өктем бүйірып, тұжыртып тастау реңкі болса, одағайды екі-үш қайталап айтуда сәл өзгеше реңк пайда бола-ды.

§33. Кейбір етістіктердің толық және ықшам варианттары, сондай-ақ олардың қосымшалы, шылаулы қолданыстарының да түрлері жарыса келе береді. Олар сол қолданылған түрінде, ықшам да, толық та айтылады. Мысалы, келіп қалды, болып отыр деген тұлғалар кеп қалды, бол отыр түрінде келуі мүмкін.

Сондай-ақ барамын, келемін, айтамын деген тұлғалар барал, келем, айтам түрінде айтыла береді. *Барғаннан соң*, келгеннен соң деген тұлғалар қысқарып, *барған соң*, келген соң түрінде, тіпті одан ары ықшамдалып, *барғасын*, келгесін түрінде де айтылуы жиі ұшырайды. Немесе *барғанмын*, *келгенмін* дегендерді ақын, жазушы не драматург *барғамын*, *келгемін* тұлғасында қолдануы да әбден ықтимал. Едім, едің деген етістік тұлғалары ем, ең түрінде, *бармаймын*, *алмай-*

мын деген тұлғалар *барман*, алман түрінде ықшамдалып келе береді. Ықшам тұлғалар әсіресе поэзияда көбірек ұшырасады. Мұндайда тұлғаларды қалай берілсе (ықшам не только), солай айту керек. *Кеп, барам, баргасын, баргамын* деп жазылғанды келіп, *барамын, барғаннан соң, барғанмын* деп айтуға (окуга) болмайды немесе керісінше, толық түрінде беріліп тұrsa, оны қысқартып айтуға болмайды.

Осы ережеге байланысты сөздерді тауып, мына үзінді шумактарды дұрыс оқып (айтып) көріндер.

Талай сөз бұдан бұрын көп айтқамын,

Түбін ойлап уайым жеп айтқамын.

Ақылдылар арланып, ұялған соң,

Ойланып, түзеле ме деп айтқамын.

(Абай)

Сен үшін әлі босқа жанам,

күйем,

Көніліце қайырым салсын мейірімді

илем, Өзің біл танам десең уағдадан,

Өмірімше ұмытпаймын, мен шын сүйем.

(Бернияз Күлеев)

Сенің алма бағыңа

Шыбық шанышып кетіп ем.

Алдағы өмір бағына Соны

белгі етіп ем. Келдім

қайтып майданнан,

Таптым ізденеп сені алғаш.

Сол шыбықтан жайқалған

Өсіпті бір алма ағаш.

Тұр жайқалып бағыңда,

Қызығамын, тамсанам.

Өзің де бұл шағында Кем

емессің дәл сонан. Неткен

жақсы жер еді Жас

шыбығым жайқалған! Бір

сөз айтқым келеді, Тіл

жетпейді, айта алман.

(Қасым Аманжолов)

Ей, халайық, барым ең сен,

Зарыңа зар қосып ем.

Жатың емес, досың ем мен,

Дос бейілін тосып ем!
Бауырым жара, сөзім нала,
Дерптен келем мен бүтін.
Аяmas жау мені айнала
Салды салмақ сұмдығын!
Алдыңа кеп жар саламын,
Тап жауымды жабылып.
Өш аламын, өш аламын
Қанды кекті жамылып!

(Мұхтар Әуезов)

§34. Әдетте грамматикалық норма бойынша етістіктің аудыспалы шағының III жақтағы жалғауы **-ды/-ді** түрінде келеді. Өлең тілінде, кейде қара сөзде де өлең өлшемі, үйқасы сиякты шарттарға орай бұл жалғау ықшамдалып, жалаң -д түрінде қолданылуы мүмкін. Мұндай тұлғалар тіпті **т** дыбысымен де айтылады. Мысалы, Әсет ақынның «Інжү-маржан» деген өлецинің бірінші шумағы:

Әуелетіп ән салса әнші Әсет,
Аққуменен аспанда жер *тілдесет*.
Дауылдатып тұнықтан шыққан даусы
Жүргегінен күніреніп желдей *есет* –

деп келеді. Мұндағы етістіктер әрі үйқас үшін (бірінші жолдағы *Әсет* сөзімен үйқасу үшін), әрі өлшем үшін (өлең жолдары 11 буыннан аспауы керек) *тілдесед*, *есед* (*тілдеседі*, *еседі* деудің орнына) болып қолданылып тұр.

Екінші мысалға «Ақан сері-Ақтоқты» драмасынан Ақтоқтының сөзін алуға болады:

Саған көнсем, сүйгенім бе ед?
Көnlім құлаганын қашан көріп ең?
Ақаннан безсем, шыным ба *еді*?
Жүргімді жерге төсеп, Әрен
айтпап па ем «ие» деп?
Ақан жаққан от бар да,
Сен қатырған мұз бар...
Отым қашан сөніп *ед*,
Мұзым қашан еріп *ед!*...

Осы жолдардың дұрыс айтылуы:
Сағаң көнсөм / сүйгөнүмбет /
Көңулұм / құлаганын / қашаң ғөрүбен //

Ақаннанбессем / шынымбет//
Жүрөгүмді / жергетөсеп /
Әрең / айтпаппем / иедеп /
Ақан жаққан / отбарда /
Сенғатырган / мұзбар /
Отұмғашан / сөнүбет /
Мұзұмғашан / ерібет //

§35. Қазақ тіліне өзге тілдерден енген сөздердің дұрыс айтылуы жөнінде мына жайттарды ескерген жөн:

1) Қазақ тіліне енген араб, парсы сөздері сол тілдердің дыбысталуын сактамай, «қазақшаланған», яғни қазақ тілінің дыбыстық жүйесіне бейімделіп қалыптасқан тұлғада ай-тылады. Олардың кейбіреулерінің күні бүгінге дейін бір тұлғада орнықпай, екі-үш түрлі болып айтылып (және жа-зылып) жүргені байқалады. Мысалы: *урдің қызы* – *хордың қызы* – *һүрдің қызы*; *ықсагат* – *еждигат*, *бихабар* – *бейха-бар*; *үкімет* – *әкімет*, *ақиқат* – *хақиқат*, *есеп* – *қисап*, *уәде* – *уагда*; *шәр* – *шаңар*; *әрдайым* – *әрдәйім*, *мәлімет* – *мағлұмат*, *мақұлық* – *мақұлұқ*, *мәлігұн* – *мәлғұн*, *несін* – *нәсін* т.т. Бұндай жарыспалы тұлғалардың бірсыптырасы «бас-басына отау тігіп», екеуі екі мағынадағы сөздің баламасы ретінде қолданылып жүр. Мысалы: *үкімет* – «правительство», *әкімет* – «власть», *мәлімет* – «сообщение, справка», *мағлұмат* – «сведение», *есеп* – «счет», *қисапсыз*, *қисабы жоқ* дегендерде *қисап* тұлғасы «өте көп, мол» дегенді білдіреді. Ал енді бірқатарының бір ғана тұлғасы орфографиялық және өзге де сөздіктерде әдеби норма ретінде ұсынылып жүр. Мысалы, болымсыздықты білдіретін **бей-** (би-) элементімен келген сөздерді **бей-**мен жазуды (және айтуды) жөн деп табамыз: *бейкунә*, *беймаза*, *бейтарап*, *бейуақ*, *беймезгіл* т.т. Сол сияқты *мақұлұқ* ~ *мақұлық*, *мәлғұн* ~ *мәлігұн*, *мәкұрлук* ~ *мәкүрік* деген параллельдердің екі буынды тұлғасы (*мақұлұқ*, *мәлғұн*, *мәкұрлук*) әдеби норма деп ұсынылады. Бірақ айтуда бұларды *мақұлұқ*, *мәлігұн*, *мәкұрлук* деп үш буынды етіп айту керек. *Әрдайым*, *тәкаппар*, *дұдамал* сияқты 2-3 буындары жуан жазылатын араб, парсы сөздерін де айтуда алғашқы жінішке буынның әуенімен *тәкәппар*, *әрдәйім*, *дұдәмал* деп айту керек болады.

2) Орыс тілінен енген орыс сөздері мен интернационалдық сөздер, негізінен, орыс тіліндегі дыбысталуынша айтылу

дағдыға айналды, яғни сөздің орыс тілінде айтылудағы екпін тұрған орнын сақтап, қазақ тілінде жоқ **в**, **ч**, **щ**, **ц**, **э** сияқты дыбыстарын сақтап айтылады. Мысалы: *вице-президент* (бит-се емес), *республика* (респөбликे емес), *парламент* (пәрламент емес), *экономика* (економике емес). Тек, ертеректе еніп, «қазақша» қалыптасқан *самауыр*, *қамыт*, *дога*, *жәшик*, *сіреңке* (сырянка), *білте* (фитиль), *пәтер* (квартира) сияқты сөздер ғана сол қалыптасқан тұлғасында айтылады. Кейінгі дәүірде енген сөздерден *газет* (газета-ның орнына), *цифр* (орысша цифра дегеннің орнына), *минут* (минута-ның орнына) сияқты.

5-10 сөздің соңғы дауысты дыбысы түсіріліп қолданылады (солай айтылады әрі жазылады).

§36. Кейір дыбыстарды дұрыс айту жөнінде мына жайтарға көніл аудару кажет:

1) Қазақ сөздерінің басында келген е дыбысы **йе** түрінде айтылады. Мысалы, *ер*, *елек*, *екі*, *ет* деген сөздердің дұрыс айтылуы: *йер*, *йелек*, *йекі*, *йет*. Әрине, бұл жерде **й** (**йот**) дыбысы толық **и** түрінде емес, «жартылай» (болар-болмас) естілуге тиіс. Егер бұл сөздерді **йот** элементінсіз айтсақ, *эр*, *елек*, *екі*, *ет* түрінде айтылар еді. Бұл занылықты анығырақ байқау үшін орыс тіліндегі *ель* (ағаш) сөзі мен қазақша *ел* (жұрт) сөзіндегі е дыбысының айтылуына назар аударыңыз: орыс сөзі *ель* түрінде, қазақ сөзі *йел* түрінде дыбысталады.

2) Сөз басында келген **о**, **ө** дыбыстарының алдынан да у дыбысының элементі естіледі: *уотан* (жазылуы: *отан*), *уорак* (*орақ*), *уөрүк* (*өрік*). Бұл жердегі у да толық емес, «сәл-пәл» айтылуы керек.

3) Сөз басында келген **p**, **л** дыбыстарының алдынан **ы**, **і**, **ұ**, **ң** (сөздің жуан-жіңілгіне қарап) дыбыстары қосылып айтыла-ды. Жазуда **ы**, **і** әріптері жазылмайды. Мысалы:

Жазылуы:

рет	ірет
рас	ырас
рай	ырай
ру	ұрұу
рұқсат	ұрұқсат
леген	ілеген
лаж	ылаж
лак	ылақ
лайық	ылайық

Айтылуы:

4) Қазақтың төл сөздерінде **Ч**, **ДЖ** дыбыстары айтылмайды. Қазақстанның кейбір өлкелерінде жергілікті ерекшелікке байланысты ауызекі сөйлеу тілінде **Ш**, **Ж** дыбыстары келетін сөздерді **Ч**, **ДЖ** дыбыстарымен айту дәстүрі бар. Мысалы: *чатақ*, *чырақ*, *малchy*, *джсақсы*, *джоқ*. Бірақ әдеби тіліміздің орфоэпиялық нормасы бойынша, қазақ сөздерін тек **Ш**, **Ж** дыбыстарымен айту керек болады. Ескертетін нәрсе дыбыс жүйесін зерттеушілер **Ж** дыбысының қазақ сөздерінде, әсіресе сөз басында айтылуына сәл-сәл **Д** элементі қатысатынын айтады.

5) X әрпімен жазылатын араб, парсы сөздерінде ауызекі тіл-де бұл дыбыс қазақша **Қ** дыбысына жуықтаңқырап айтылады. Мысалы: *қабар* (*хабар* дегеннен ғөрі), *қат* (*хат* дегеннен ғөрі), *Ақымет* (*Ахмет* дегеннен ғөрі), *Қадыйша* (*Хадиша* дегеннен ғөрі), *тарыйқ* (*тарих* дегеннен ғөрі), *қалық* (*халық* дегеннен ғөрі).

6) І әрпі жазылған сөздерде осы дыбыстың өзінің айтылуын сактау қажет. Мысалы: *гәүнәр* (*гәүқар* емес), *қанағман* (*қахарман* емес), *жиңан* (*жиқан* немесе *жихан* емес), *аң-аң*, *еңе*.

7) Екі дауыстының ортасында келген **Б** дыбысы қазақ сөздерінде жеке тұрғандағы айтылуынан сәл өзгешелеу болып естіледі. Мысалы, *Абай*, *таба*, *көбелек* сөздеріндегі **Б** дыбысын айтқанда, екі еріп бір-біріне тиіп қатты жуыспайды (осы дыбысты жеке айтқандағыдан немесе орысша дыбыстағандай). Мұны байқау үшін *Абай* деген сөзді орысша (орыс тілінде сөйлеп тұрғандай) және қазақша айтып көріндер. Не болмаса *баба* деген орыс сөзі мен *баба* («ата» мағынасындағы) деген қазақ сөзін айтып, екінші буындағы **Б** дыбысының естілуіндегі (айтылуындағы) айырмашылығына назар аударындар.

Орыс тілін жақсы білетін қазіргі жастардың қазақша сөйлеу тәжірибесінде қазақ сөздеріндегі **Б** дыбысын орыс тіліндегі-дей етіп, екі ерінді бір-біріне қатты жабыстырып айтушылық байқалады. Бұл қазақ тілінің орфоэпиялық нормасына қайшы келеді.

8) Қазақ фамилияларында келетін **В** дыбысын **Ф** деп, ал, -**ев**, -**ов** жүрнағын **-ыф**, **-иф**, **-ева**, **-ова** жүрнағын **-ыва**, **-ива** деп

айтқан жөн. Мысалы: *Құнанбайыф, Ілекеріф, Құнанбайыва, Ілекеріва, Шәрійтыф*. Өзге ұлт өкілдерінің аты-жөндерін жазылған түріне жуықтау етіп айтқан абзал. Өйткені қазақша *Болат* болып келетін жалқы есім өзбекше *Пулат*, *Пулад* деп берілсе, оны қазақшаламаған жен. Ал орыс адамдарының аты-жөндерін орыс тіліндегіше дыбыстау керек. Мысалы: *Николай* (жазылуынша *Николай* емес), *Канстантин* (*Константин* емес), *Ләф Талстой*.

Шетелдік адамдардың аты-жөндері мен қазақша жер-су аттарынан өзге географиялық атаулар негізінен орыс тілінде-гі айтылуынша дыбысталғаны жөн. Мысалы: *Вильям Шекс-пир, Моцарт, Лондон*. Олардың ішінде тілімізге ертеден еніп, қазақша қалыптасқандарын сол дәстүрлі түрінде айту қажет. Мысалы: *Қырым* (*Крым* емес), *Мисыр* (*Миср* емес), *Бағдат* (*Багдад* емес).

МАЗМУНЫ

Тілдік норма және оның қалыптануы (кодификациясы)	3
Алғы сөз.....	4
Кіріспе.....	6
Тіл мәдениеті және оның проблемалары.....	21
Тілдік норма туралы ұғым.....	46
Норманың өлшем-шарттары (критерийлері).....	57
Тілдік норма және функционалдық стильдер	67
Норма және варианттылық.....	81
Лексикалық нормалар.....	116
Сөз мағынасы және оны түсініп жұмсау	117
Жаңа сөздер мен қолданыстар, олардың нормалану процесі.....	118
Терминология мәселелері және норма.....	131
Сирек қолданылатын лексикалық топтардың нормалануы.....	136
Қарапайым сөздер, жаргондар және әдеби норма.....	151
Диалектизмдер және әдеби норма.....	154
Көркем әдебиеттегі сөзқолданыс және әдеби тілдік норма.....	161
Грамматикалық нормалану.....	175
Орфографиялық нормалар.....	181
Орфоэпиялық нормалар.....	194
Сөз сазы.....	203
Қазақ әдеби тілінің ауызша түрі және оның қолданылу еріci.....	204
Сөз сазы, яғни сөзді дұрыс айту (дыбыстау) заңдылықтары.....	216
Сөз сазының көркем әдебиет пен өнердегі маңызы.....	229
Сөз сазы нормаларының қолданылу жайы.....	234
Сөз сазы ережелерін игеруде ескерілетін жайттар.....	242
Орфоэпиялық ережелер немесе сөз сазын келтіру қағидалары.....	255

Рәбиға Сыздықова

Көптөмдүк шыгармалар жинағы

Сегізінші том

ТІЛДІК НОРМА ЖӘНЕ ОНЫҢ ҚАЛЫПТАНУЫ (КОДИФИКАЦИЯСЫ)

СӨЗ САЗЫ
(Сөзді дұрыс айту нормалары)

Редакторы: Әділ Әбсаттар
Техникалық редакторы: Ниязбай Оразымбет
Корректоры: Ермұхамет Маралбек
Компьютерде беттеген: Жәмила Айдос

ИБ № 164

Теруге 01.12.2014 ж. берілді. Басуға 05.12.2014 ж. кол қойылды.

Пішімі 84x108^{1/32}. Қаріп түрі «Times New Roman».

Басылымы оффсеттік. Шартты баспа табагы 15,3.

Таралымы 2000 дана. Тапсырыс №

ISBN 978-601-7317-96-6



*«Ел-шежіре» қайырымдылық қоры» қоғамдық
қоры. 050009. Алматы қаласы.
Абай даңғ. 143, 413 бөлме*

*«Полиграфкомбинат» ЖШС
Алматы қ., Мақатаев көшесі, 41*